

清代傳記叢刊·綜錄類⑦
周 駿 富 輯

國朝耆獻類徵初編(十八)

卷七四至
卷八二

(清)李 桓 輯



明文書局印行

國朝耆獻類徵初編卷七十四目錄

卿貳三十四

張廷璐 弟廷瑑
從子若淳

若淮

陳樹萱 弟樹著

崔應階

赫赫

程元章

王蘭生

畱保

補錄

完顏和

--	--	--	--	--	--	--	--	--	--

國朝耆獻類徵初編卷七十四

通奉大夫前署江西巡撫江西布政使司布政使湘陰李桓輯

卿貳三十四

張廷璐 弟廷瑑 從子若淳 若澐

乾隆甲子春禮部左侍郎桐城張公陳情乞休舉賢自代至是凡三拜疏矣 上鑒其誠懇允所請時公卿大夫祖道都門外數里不絕故鄉親舊宗黨父老子弟走迎數十里外朝野交羨謂公之考文端公 予告歸田後於今再見不數疏傳之於漢廷也明年夏公配姚夫人卒秋公相繼薨時聞公喪者無弗嗟歎鄉黨謂失一善人 朝廷謂失一正人宇內被公教澤者至設位而哭嗚呼

榮且哀矣丁卯秋嗣君昆弟將葬考妣於吉壤擇有日以狀來乞
志墓德潛公之老門生也感知最深不敢辭公諱廷璠字寶臣號
葑齋姓張氏先世自豫章遷桐代有鉅人曾祖文學恂所公祖明
經拙庵公以文端公貴累 贈光祿大夫曾祖妣祖妣 贈一品
夫人考龍眠公諱英文華殿大學士諡文端妣姚氏 封一品夫
人累 贈一品太夫人文端公子六人長少詹事諱廷瓚次太保
大學士伯名廷玉公行居三 贈翰林院庶吉士諱廷璫內閣學
士致仕名廷瑒明經諱廷璫皆公弟也公少力學弱冠名著大江
南北聞然恂恂謙抑出入里門常徒步遇路人高年者必讓道人
忘其爲貴公子也康熙壬午中南闈副車癸巳舉於鄉戊戌成進

士殿試以第一人入詞館年四十有四矣雍正癸卯春典福建
試授宮允侍講幄遷侍講學士秋分校禮闈視學河南甲辰以
諸生累去官未幾授侍講乙巳掌成均轉少詹事丁未春二月典
武闈試三月分校禮闈旋充殿試讀卷官秋陟詹事己酉視學江
蘇前後凡九載九載中典壬子浙江試晉禮部右侍郎轉左侍郎
仍督學政既之春官兩知貢舉己未典武會試辛酉典江西試迄
告歸居官共二十有六年官翰林大制作每出公手校文取士理
必宗宋五子法必宗漢唐宋諸家以經術勝者爲上故鄉會所得
士多儲國家有用材官成均端本樹範抑奔競崇端方曰學者當
以仁誼禮樂爲本一時士風蒸蒸日上而公之教育如入人肝脾

而弗能釋者尤在江蘇視學時公之任江蘇也念八郡三州爲人文淵藪期與多士其敦上理而品行不立講張作奸者亦時有公揭姓名於通衢俾知屏足斂息每試日坐堂皇終日無倦手定甲乙反覆慎重惟恐偶爾疏忽失士子摩練苦心故每一榜發眾心帖服被屏黜者亦感媿奮勵遇廣文及諸生有文行者獎諭勸導之如坐春風化雨中計歲科試六周末嘗輕辱一士然而士之廉恥自生品節自立不徒弊絕風清已也公去任久猶尸祀俎豆雖小夫婦豎能道張公姓氏迄今數江蘇學政必以公爲清德和風之冠云在禮部承 命纂修禮書明制度定儀則歸於至當履蹕東巡敬慎陪祀克襄盛典此公生平莅官之誠事 君之忠之

大節也公少侍文端公京師伺顏色日夕無違文端公歸田公偕諸弟日撰杖扶輿侍兩大人側極孺子慕既兩大人相繼薨逝公號呼欲絕至不忍聞 天恩祭奠銜哀致恪遠近觀禮中年抱鵠原痛哀逾常情既老與太保閣學兩公聚首愛敬彌篤猶推梨讓棗時也偕配姚夫人鴻案相莊五十六年如一日事師長心喪三年交友皆正人接後生揖讓盡禮終身無失言失色熟知公者謂於人倫日用間求一端缺失不可得也爲學原本經史制義宗震川古文師廬陵詩學古體橫空硬語師昌黎近體出入大庾十子應制得唐初陳杜沈宋格刻有詠花軒制義詠花軒詩集公生於康熙十四年乙卯五月二十七日薨於乾隆十年乙丑八月二十

二日年七十有一 誥封夫人姚夫人辛丑進士小山公女端淑
孝謹相宗伯公敬順無違既貴不易疏布婚嫁子女經理中節不
關公心公致政歸並扶鳩杖往來閒園享林泉之樂而忽焉徂謝
宜公手草行實謂失一閨中老友不勝愴悵也卒年七十有三子
二人長若震雍正癸卯舉人官浙江布政使以母末疾乞養歸次
若需乾隆丁巳進士翰林院編修乞養侍公南歸今並在籍孫六
人曾肇曾牧曾做曾效曾敷曾孫一人元表女一人適姚孔
鐫孫女三人曾孫女二人墓在桐城縣北鄉兩山之原下窆爲乾
隆十二年丁卯九月十有九日公督學江蘇時德潛爲諸生四試
並冠曹偶試古學冠兩郡薦博學鴻詞於 朝每見侃侃温温告

以禔躬行己之道路分位如師弟朋舊後追隨 朝右步趨履舄
時接嘉言正論奉爲儀型睽隔未久遽成古人此蘇子瞻所云上
爲天下慟下以哭其私者也銘曰

龍眠之張世忠貞 三朝舊臣位春卿後進楷模惟老成薰公德
者和且平爲國剖璞羅瓊瑛歸來擬築三休亭白首佩黻如賓朋
人偕往矣風常清選卜幽宅逢佳城其歸其藏後頻興

右墓誌銘沈德潛撰

公諱廷璐字寶臣號葑齋先世自江西遷桐城明隆慶戊辰進士
官陝西左參政載明史循吏傳諱滔者公高祖也曾祖某祖某三
世俱以太傅文端公及公仲兄今少保貴 贈如官階文端子六

人公於次爲三康熙戊戌以一甲第二人進士及第 聖祖仁皇
帝臨軒臚傳知公名諭今少保曰汝兄弟不媿家風矣 嘉歎久
之授編修辛丑旣散館 特命教習是科進士 世宗憲皇帝續
承大統召直南書房授額外中允雍正元年典試福建遷右春坊
右中允旋充日講官知起居注擢侍講學士九月充會試同考官
卽闈中拜督學河南之 命莅河南逾年試開封而封邱令督諸
生供瀕河之役諸生向不任役卽走控上官不卽理相約罷試公
檄開歸副使集諸生戒約諸生聞公命咸已帖帖就試惟謹而大
吏已飛章以諸生梗命入告獄具而公與副使俱以姑息去職公
方將伏 闕謝罪詣京師未至授侍講冬奉 命授皇八子懷親

王書尋晉國子監祭酒轉詹事府少詹事署祭酒事五年充會試同考官並殿試讀卷官升詹事府詹事七年提督江蘇學政壬子試周將告歲事 特命典試浙江是年以學臣主試事惟公與交河王閣學蘭生事竣復畱任督學旋晉禮部侍郎轉左侍郎 今天子卽位知公學行訓士校文著有成績可信仍以原官畱公在江蘇凡九載乾隆五年至京以疾具疏乞休不許八年典試江西九年 天子奉 皇太后東巡恭謁 祖陵發京師取道熱河經蒙古諸部落展謁 三陵大禮慶成公以禮官陪侍從往還數千里旋京以年衰不任事再疏乞休又不許十年京察又瀝陳衰病狀乞罷以例舉內閣學士李清植以代 上察其誠懇乃順求請

報曰可公以是年四月南歸九月疾篤告薨里第十二年九月十九日葬於東北鄉兩山之原公純懿惇大居常無矯亢之行而所守堅正嶽不可動其接物意誠以愉表裏洞如也仕登卿貳年屆七十於人世可謂貴壽而士大夫猶以公未及台揆年遠耄期爲憾則公之德量感於人者其有涯也夫人姚氏德安令文燕之女淑德壺行具於家乘先公三月卒年七十二遂以年月日附公之兆次子二人若震癸卯舉人浙江布政使若需丁巳進士翰林院編修俱以公與夫人耆老乞侍於家女子一適貢生姚孔鏞孫男六人某某曾孫某系曰

公於文學天植其性蘭陔瑤圃寢饋典訓謝墅怡顏九齡裁詠公

之通籍未爲晚達夷考公門第年公屈一人臨軒慶追先闕
憲皇御宇何橐內廷直廬視草春澍夏霆無言温樹筆參灑冥
鑒裁棘闡敷化首善行先三物學必九貫日者圭璋當時髦彥三
江震澤沄沄魂魄公之教澤與相吐吞公在容臺考經志典原本
前修爛焉編簡公如虛谷道裕黃中本以御物既介而通夫人珮
環輝章黻舄我不盡辭庶藏幽宅

右墓銘姚範撰

張廷璐字寶臣一字葍齋以進士第二人官至禮部侍郎著有詠
花軒詩夫心躁者多志微噍殺之音心平者多順成和動之音言
爲心聲不可強也葍齋公不干進不務華以介自矢以誠感人視

學江蘇九年如和風著物萬類萌動既久士林猶歌頌之宜發言
爲詩比於水之滌洞春之和益讀者心醉氣夷而不自知也

右 國朝詩別裁集小傳沈德潛撰

桐城張侍郎廷璐爲翰林時督學河南以約束生員不嚴罷斥
世宗皇帝鑒其誠樸 特旨起之廢籍復畀以江蘇學政之任三
年報滿有公明之譽奉 諭再畱三年 高宗卽位又畱三年閏
二年江蘇又缺員 上仍命之往侍郎懇辭乃改 命其弟廷瑑
兄弟二人四任此官前所未有

右紀聞陳康祺撰

張廷瑑

內閣學士張公桐城人諱廷璩字桓臣別字思齋大學士文端諱英之子大學士文和諱廷玉之弟也公生長貴胄而敦篤誠樸絕去華靡綺紈之習其天性仁愛洞悉民生衣食之艱難常推己以及於宗族戚屬交游里黨中雍正癸卯進士授翰林院編修充日講起居注官歷左贊善翰林侍讀學士詹事府詹事工部左侍郎後補內閣學士兼禮部侍郎公在翰林嘗條奏民間賭博習非已久朝廷雖頻申嚴切之禁而卒莫挽其頽風竊以爲子弟之不率其責在於父兄比室而居乃於其間肆爲不善豈得若罔聞知設使代爲容隱卽以祕匿作奸相連坐比於竊盜同居之律使父兄能舉報其子弟之罪應免其連坐而子弟之罪亦寬減其半然

後其父兄無所瞻顧而不才之子弟無所容其奸且開以自新之路如是推行既廣庶幾其風稍息 上聽其言允行之公在工部飭材督事綜覈最稱詳密於寶源局之鼓鑄較銅鉛視肉好別輪郭量輕重不憚頻煩吏斂手不敢爲奸而於解送銅斤之官弁不苛不縱獨得其平中北直大水總督直隸臣請使饑民修隄稍給工食以代賑濟公獨陳疏謂饑民非有田在隄內爲其分所當修而強使力作又受直無幾徒膺版築之勞苦而不足以救其飢餓彼富民有田資隄蓄洩乃因官爲修築得以巧逃役外事之不平無過此者夫民隄無異官隄宜令官予其半而有田資隄之富民更輸其半然後雇直足以供朝夕而輸錢用力於饑民富民之間

兩無偏倚 上又聽其言允行焉 上嘗稱公謹飭屢異以衡文
之任其視學江蘇務殫竭精力以殊別高下校閱常至夜分不倦
所拔多績學能文自守其業者公雖世家貴族而於利人濟物奔
趨如勇士撫孤姪若爵若霍若霽教誨婚嫁無異於所生文端舊
立義田文和續置增多然族屬殷盛歷久而用猶不周公復同太
保宗伯兩兄共捐白金千兩別其親疏列爲上中下三等以爲族
人計口授食之備又立篤素公田得穀九百餘石以贍文端以下
之子孫又立息濟田以濟其從弟承先子孫之貧憊又立廣惠田
以周友朋故舊戚屬之困乏公少肄業吳歌熙之門歌熙歿其子
相繼亡公爲迎養其夫人於家數十年如一日公之鄉舉出豐令

朱君龍御之門朱君去官而貧公時使人饋問其家時其來過必豐其贖贈盡歡而去康熙戊子邑東水溢爲災田廬皆沒公設廠於城西爲粥糜以食餓者親嘗其厚薄涼暖而後授之食其後疫從饑起公爲延醫救治公與二僕皆染疾二僕死而公獨得全人以爲天所佑云甲午大旱按察楊公請紳士分鄉募賑公主東鄉正月二日卽啟行捐米爲倡分二廠近者食粥遠者給米全活無數又以其餘米買山以掩埋枯骨之暴露者嘗曰財以備用不用奚以財爲又曰財不可聚聚則爲患害故常損己以利物薄取而厚與衣食皆自取其敝薄者曰吾衣敝衣覺體輕年踰八十食不二味交游及門下之士或餽方物物少則受之至幣帛財貨輒堅

謝曰吾家溫飽足自供無需於此也公以乾隆二十九年正月六日卒享年八十有四元配吳氏河南提學副使子雲之女 誥封夫人子二人長若泌中雍正乙卯鄉試次若渠同科副榜長女適候選知州孫循縣次適監生顧麟曾以乾隆某年月日葬於某鄉某里之原使人來請銘銘曰

張氏望族夙顯於桐二相繼起厥聲逾隆公維子弟慄慄其恭輸其忠實以辦於公溥其慈厚以睦於宗凡厥親故靡不有容既豐而約既滿而冲羣推長者匪位之崇巍然華表維公之宮堯堯者石九九者松無敢毀敗世聞其風

右墓誌銘劉大槐撰

張侍郎廷珠奉命往祭陵寢先期數日途次風雪大作同人欲沽酒以禦寒侍郎以未曾行禮力持不可人笑其迂然其生平謹畏可想矣

右紀聞陳康祺撰

張若淳

張若淳安徽桐城人祖英文華殿大學士父廷玉保和殿大學士三等伯俱有傳若淳由貢生捐納主事於乾隆十四年引見授刑部主事十五年終養回籍丁父憂二十二年服闋二十三年補缺命在軍機處行走二十六年五月擢員外郎十二月擢郎中二十七年京察一等二十九年奉旨記名以繁缺知府用三十

年授雲南澂江府知府三十五年擢四川建昌道三十六年因在滇辦理安南國黃公瓚一案獲咎奉 上諭張若淳於辦理安南國黃公瓚一案不詳悉稟商上司輒以州境並無其人率令該州移覆殊失示信外夷之體固屬咎所應得第念伊係大學士張廷玉之子見在張廷玉子孫無名列仕籍者殊爲可憫張若淳著加恩免其治罪以四品小京堂用三十七年授太僕寺少卿三十八年擢通政使司副使四十三年授通政使四十五年丁母憂回籍四十七年服闋四十八年復任通政使司通政使五十年擢都察院左副都御史五十一年四月授內閣學士兼禮部侍郎十一月奏南方山谷間起蛟患起於陸地卽成巨浸雖有智力俱無所施

傳聞雍正年間魏廷珍在江省時著有伐蛟說並未聞其陳奏惟詢諸父老相傳育蛟之地霜雪不積入山尋窆形迹立見且開窆不過數尺卽能免害又上年豫章被害蒙 皇上軫念飭令種薯濟食因思南方土性較潤植此必易蕃衍請 敕下南省各督撫於平時講求除蛟之法并將原任撫臣陸燿所著甘薯錄飭交江浙令其學種爲救患防災之計 諭曰據張若溥奏請申伐蛟之令以除民患並請於江浙地方學種甘薯以濟民食等語江廣一帶每於大雨時行閒有起蛟之事深爲民害自應搜尋窆除防患於未萌至甘薯一項廣爲栽種以濟民食上年已令豫省栽種頗著成效此亦備荒之一法著傳諭各督撫將張若溥所奏二事酌

量辦理於地方興利除害亦屬有益五十三年扈 蹕避暑山莊
射中布靶二箭奉 上諭向來漢大臣官員有射中布靶三箭者
朕每格外加恩賞戴花翎以示鼓勵是以前日張若淳曾中二箭
因不合式未賞本日汪承需前來熱河帶領引見詢及伊從前射
靶時止中二箭卽賞戴花翎前日張若淳亦中二箭未經賞給汪
承需係協辦大學士汪由敦之子今張若淳亦係大學士張廷玉
之子且肯畱心習射尙屬奮勉著加恩一體賞戴花翎以示朕眷
念舊臣之意五十四年 諭曰工部侍郎員缺著張若淳補授雖
非科甲但尙謹慎且係大學士張廷玉之子特加擢用以示朕眷
念舊臣至意五十六年調刑部侍郎五十七年十月陝西蒲城縣

監生馮廷連控知縣匿災扣賑浮徵等款 命若淳偕蘇凌阿往
讞十二月奏蒲城六月被旱該縣李衍孫先請停徵平糶繼請借
給籽種七月開放粥廠分食大口二十人合小口四十人每廠各
派公正紳士十人協辦又花戶納糧俱交糧正在旁同封同折新
舊戩子俱有藩司印烙花押是匿災扣賑浮徵不實詢之紳士部
民皆稱虛捏卽馮廷連亦自認誣告惟該縣違例勒派糧正向各
里勸捐修理 文廟兼曾向錢鋪借貸一次并放賑之期藩司飭
定七月二十一日該縣延至二十六始行開放三款審非全虛應
交部分別議處下部議行六十年四月陝西安定縣民王道生控
知縣採買撥累等款先經步軍統領衙門奏陝西富平縣民雷增

科控知縣重徵科派一案已奉 旨交督臣勒保審辦茲奉 諭
曰此案及前富平縣民控告重徵科派一案俱著景安張若淳馳
驛前往會同勒保秉公查審定擬具奏六月奏五十九年富平縣
麥生蠶蟲經撫藩各臣勘不成災惟將蟲傷較重之臨潼等縣奏
請緩徵奉 恩豁免本與富平無涉雷增科因縣地接壤致疑重
徵已自認誣告又富平風俗每逢燈節城鄉各民自行釀錢裝辦
戲劇從無知縣科派之事雷增科亦認架詞聳聽之罪惟該縣賈
杰於奉文買補倉穀並不自行買運輒違例發銀交糧正張志敏
等八人代買又失察倉書樊汝績於交穀時每石索制錢四文共
詐贓制錢二十九千有零應請革職并治雷增科以誣告之罪七

月奏安定有歷年平糶倉穀未補五十九年該縣周冲傳集各甲戶首令其向各花戶收買復於收穀時淋尖斛面每石約多收二升又倉書南慶徵每石索錢五文採買擾累應請革職治罪至王道生所告五十六七兩年採買折價及率領軍流各犯拏人重款審係全虛應以誣告科重俱下部議行嘉慶元年三月 命兼管順天府府尹九月長蘆商人范光震控商總欺隱窩價 命若溥偕成德前往查辦奏到 諭曰張若溥成德審訊范光震呈控商總欺隱窩價分別定擬一摺所辦殊屬含混且案證俱未明確不足以服該鹽政運司及商眾之心著該侍郎等即將案內人證及案卷等項帶京並令方維甸阿林保一並來京交軍機處大臣會

同該部另行審擬具奏十月 諭曰戶部尙書缺出見在所有漢
侍郎非新缺卽人不相宜朕以張若淳係張廷玉之子范宜恆係
范文程之後原欲於伊二人內簡擢一員以示眷念舊臣之意乃
張若淳審辦天津鹽務一案於方維甸阿林保與商人楊秉鉞有
無情弊全未能審訊明確輒將楊秉鉞家產查封並將查善和等
各商見運鹽斤一併變價卽令停運在途有妨民食所辦實大錯
謬楊秉鉞應得罪名尙未訊究得實何得遽將伊家產查封卽或
楊秉鉞果有謀產減估情事亦止坐罪該商又何得波及查善和
等三商將領運在途之鹽斤併行變價見在氣候漸寒若再稽遲
時日一經凍阻則各州縣地方無鹽接濟小民皆有淡食之虞見

已令軍機大臣行知各該督撫鹽政卽飭各該地方官督率辦運商夥等仍行照舊分運以資民食並另降諭旨將該侍郎等交部嚴加議處張若淳似此辦事舛誤豈可復任尙書之任所有戶部尙書員缺著范宜恆補授旋軍機大臣奏商總楊秉鉞與各商總等所估窩價係照見在錢價約估並無欺隱其承辦范引四股之一係訊明新商查善和查世延不能全辦因邀同總商等公保且所分引地及當堂籤掣眾證鑿鑿並非較三商爲優是其蓄意謀產委無確據該侍郎張若淳等未經訊實遽將伊家產查封問擬杖流實屬過當且蘆東商力疲乏必須招股實之商接辦或可冀有起色乃該侍郎等將新派之殷實商人查善和查世延等撤下

並將所運鹽斤變價入官轉令無力之十商兼辦范引全置鹽務
於不問應請將張若淳等再行交部嚴議 諭曰張若淳等辦理
此事並不查明情節率行定擬本當照部議降調但念伊二人亦
祇糊塗不曉事體尙無他弊本日吏部議上已加恩將該侍郎等
所得處分從寬改爲革職畱任所有軍機大臣定案摺內請將張
若淳等嚴加議處之處著加恩寬免四年正月調工部侍郎四月
諭曰莫瞻棗兼管順天府府尹事務張若淳年已就衰毋庸管
理七月 命管帶工部印鑰五年正月調戶部侍郎尋授兵部尙
書 命在紫禁城騎馬仍管順天府府尹事務五月調刑部尙書
九月 命管理戶部三庫事務六年四月保和殿策試新貢士侍

衛羅布藏多爾濟搜出第七十四名左德修挾帶策底三紙監試
王大臣奏稱當經查問據供與刑部尙書張若淳係屬親戚若淳
曾囑伊小心挾藏恐被臨場搜出奉 旨張若淳著解任交軍機
大臣一併嚴訊定擬復 命添派儀親王成親王慶郡王公同會
訊旋審奏張若淳與左德修雖係親戚左德修在德勝門內佑聖
禪林教讀相去寫遠發榜後左德修祇到張若淳處一次見面道
喜並無他語嗣後亦並未晤面并詢之管守書院之伊塞塞亦稱
左德修中後祇出城一次平日亦未見張若淳到寺又據羅布藏
多爾濟等稱左德修被搜時曾有不聽張親戚小心謹慎之言是
張若淳並無囑令挾帶等事 命照舊供職 諭以王大臣所奏

係屬一時疎率斷非有心傾陷張若淳不得心存芥蒂十一月
恩賞黑狐端罩七年六月 命留京辦事七月二十五日患病請
假 諭曰張若淳見在患病著加恩給假調治所有刑部尙書著
熊枚暫行兼署至張若淳果卽病勢就痊亦著專辦刑部事務其
留京辦事著改派劉墉二十七日卒三十日奉 旨刑部尙書張
若淳本係世家歷任卿貳供職有年小心謹慎自擢投尙書以來
辦理部務均尙妥協茲聞溘逝深堪軫惜張若淳著加恩晉贈太
子少保其任內降罰處分悉予開復所有應得卹典該部察例具
奏事下禮部題奏 賜祭葬如例諡勤恪長子曾誼原任浙江按
察使次子曾謙以正二品廕生授主事

右 國史館本傳

張若淮

張若淮安徽桐城人雍正八年進士籤分兵部尋補車駕司主事乾隆元年七月監督裕豐倉十月充順天武鄉試同考官三年丁父憂尋丁母憂服闋補職方司主事十五年京察一等旋升員外郎充會典館纂修十六年遷郎中十七年擢江西道監察御史十八年五月奏酌定遲延公文處分查一應緊急公文例由馬上飛遞其事關緊要刻難遲緩者則由軍機處發交兵部晝夜限行六百里沿途驛站儻有遲延三刻及三刻以上者並一時二時三時者該管州縣等官俱議以降一級調用蓋以此等公文稍遲恐於

事機有誤故立法不得不嚴惟是一經遲延除因大雨連縣河水暴漲取具印結送部准免議處外其餘議以降調者每案多人伏念州縣爲親民之官皆經 皇上甄擇簡畀其有驛州縣多係衝繁之區半由督撫於牧令中斟酌才能特以調補茲之遞送公文例應派撥馬次按時馳送間致稽遲雖係僉差不慎但若踰限僅止三刻或三刻以上者爲時尙屬無幾儻值天陰月黑所差刻數亦在恍惚之間乃與遲至一時以上一例降調其中豈無賢員被議離任在地方未免失一幹練有司而新舊交代亦多滋擾請將遲延處分略爲分別除在一時以上仍照例降調外其餘僅止三刻者或定罰俸一時以內者或定以降級畱任下部議行八月充

順天鄉試同考官十九年兵部議刪軍功加銜若漑奏言定例千把總軍功加銜遇因公降調者削銜一級守備以上任內雖有加銜向不准抵銷降級因其照銜食俸優升是以不與千把一例議抵今法刪去加銜改以等次給劄是既不照銜食俸又不照銜優升若遇因公又不使之扣抵文職加級可以抵銷武職獨不准抵似未平允旋經兵部議准守備以上軍功加等遇降調俱照千把功加之例准以功加一級抵降一級從之二十一年掌京畿道事二十二年四月擢鴻臚寺少卿尋升鴻臚寺卿二十七年轉大理寺少卿三十年提督山東學政三十一年遷太僕寺卿三十二年升通政使司通政使三十三年四月轉都察院左副

都御史八月擢刑部右侍郎三十四年四月充殿試讀卷官九月
充武會試正考官三十五年二月署工部右侍郎閏五月擢都察
院左都御史十月奏向例稽查科場御史惟開列資淺者二十員
分擬外場內場內簾在一年半年之前已有揣度恐有請託情事
請嗣後不論資俸通行開列 上是之三十六年四月充殿試讀
卷官五月奏鄉會試以策取士考其經濟至 國朝臣子人品定
評豈可令草茅輕爲論斷再策題引緒發端觀其敷陳學識近則
每問至七百字之多空疏者易於點竄成篇請嗣後策題不得以
國朝人發問對策亦不得引涉其每問亦不准過三百字 從
之八月充順天鄉試正考官三十七年二月奏六科給事中奉差

有由御史兼署者該御史升給事中所署科向不另奏署致以一
人兼兩科請嗣後另開御史奏請簡署又奏各省吏治之壞由司
道府及州縣各序齒換帖彼此依倚恃勢及府州縣官借名稟事
上省鑽營又或略分宴會荒職耗財請 飭各督撫等約束稽查
年終據實具奏並得 旨允行五月充朝考閱卷官七月京師不
雨糧價騰貴 諭查居奇奸商捕治之會有搜索鋪戶者若漕奏
京城雜糧鋪戶如有囤積齊行操縱市價誠當盡法究處至於開
張鋪面逐日交易卽有存留二三百石者亦係隨買隨賣流通無
滯請不必繩其多寡 詔如議速行三十八年閏三月充四庫全
書館副總裁十月 諭紫禁城騎馬三十九年五月奏向例五城

案件情罪重大送部辦理近來巡城科道將笞杖小罪亦皆送部徒使書役勒索小民廢時失業傾家蕩產拖累無窮夫以刑部衙門爲司坊清理細務旣非政體而巡城科道卸責於部殊爲失職嗣後遇尋常案件令巡城自行發落免致滋擾從之四十年四月充殿試讀卷官五月充朝考閱卷官奏言近奉諭旨命查前明殉節之人有官者分別議謚下及諸生章布並令俎豆其鄉竊聞定彙衙門以明史通志爲斷明史通志固我朝修纂之書也崇禎年間抗志於流賊者或載及之若犯我顏行方且指爲不順其孰大書特書請就明史通志查考外行文各督撫再加採訪命大學士九卿議行四十一年九月上以若淮年逾七旬命

不必辦理四庫全書總裁事尋以老病乞休 諭曰張若淮行走
有年尙爲勤慎今旣以老疾陳情著准其回籍以原品休致四十
五年 上五次南巡若淮迎 鑾於紅花埠道左四十九年 上
六次南巡若淮迎 鑾俱 召對行殿五十年 上以國慶舉于
叟宴若淮與焉 御書臺柏恆春扁額及酒醴壽杖賜之五十二
年卒

右 國史館本傳

陳樹萱 弟樹著

陳樹萱字慈雲湖南湘潭人河道總督諡恪勤鵬年子康熙五十七年樹萱以諸生 召見試詩文稱 旨命隨父鵬年校書內廷授戶部屯田主事累官至兵部左侍郎凡承追豁免諸大政辦理裕如尋乞養歸弟樹著字學田以父廕授刑部郎中出爲福建汀漳龍道有陳作賴石者先後糾黨猖獗樹著單騎往撫置首惡於法民皆安堵調雲南迤西道阿墩子地方土千總相讎殺居民驚竄樹著聞報卽馳往擒治之會刑部失火延燒案卷 詔曾任刑部者默寫惟樹著獨多人服其彊記遷長蘆鹽運使內授鴻臚寺卿隨 駕木蘭次灤河無疾卒

右述聞謔瑤錄

孫文定公官祭酒時嘗舉其弟揚淦爲國子監學正同時侍郎陳樹萱奏保族弟鹽大使陳大芳大爲高宗譙責可知聖朝彰瘝無私內舉不避之名非能假託也

右紀聞陳康祺撰

崔應階

崔應階湖北江夏人父相國官至浙江處州總兵應階由廕生於康熙五十九年授順天府通判尋升西路同知雍正九年擢山西汾州府知府乾隆十二年調河南南陽府知府十五年授河南驛鹽道十六年遷安徽按察使十七年丁生母艱服闋補貴州按察使二十一年九月擢湖南布政使十一月署湖南巡撫湖廣總督碩色疏劾應階子甘肅東樂縣知縣崔琇由驛馳送家書應階不檢舉奉 特旨降調二十二年七月補江南常鎮揚道十二月遷江蘇按察使二十四年十月授山東布政使二十八年五月擢貴州巡撫六月調山東巡撫前任巡撫晏斯盛疏准東省銷鹽額粟

分三等令商人按票輸穀至是應階請以所輸穀分貯常平以裕倉儲 從之十二月請濬荆山橋舊河以洩濟漁二處積水 諭嘉之二十九年五月疏言山東武城縣東岸之牛蹠窩祝官屯西岸之蔡河遇陂水匯注俱爲隄隔不得入運河及浸灌民田請各建石閘一設板啟閉得 旨如所議行三十一年疏言民壯之設所以巡緝賊匪防護監倉地方官不如法教練以致有名無實臣去年將東省各州縣民壯汰老弱選精壯年來已覺改觀且營伍器械惟鳥槍最迅利臣已令各州縣將弓箭長槍等械改設鳥槍令其練習與營伍無二則合東省而計不增糧餉已得精壯三千三百餘名奏入得 旨嘉獎三十一年三月疏言東省武定府屬

地方濱海水患難除一在徒駭河尾閘不暢一在鉤盤河淤塞不
挑查徒駭上游河闊百餘丈或六七十丈至霽化入海處僅十二
三丈曲折紆回兩岸高陡以上游百餘丈六七十丈之河身乃爲
十二三丈之口門所束無惑乎歸海遲延而掣消不利也臣細加
相度徒駭有舊漫口一道僅二十五里寬或二十餘丈四五十丈
每遇徒駭水滿卽由此分流仍歸正河入海若將此開濬寬深庶
上游五百餘里來源歸海得以迅速又武定爲眾水所匯有八方
泊者上承諸窪經年不涸每遇伏秋霖雨上游諸水歸泊下游又
多阻滯水勢倒漾田每被淹泊東北爲古鉤盤河經一百三十餘
里久成湮廢實武定一郡洩水最要之區若就古河形勢酌量開

三
三

濬藉以引水入海則上游不致停蓄而諸窪之水亦得順流而下
詔如所議行七月調福建巡撫三十三年正月擢閩浙總督八
月加太子太保三十四年疏劾興泉永道蔡琛於奏定洋行規例
銀酌留四千圓之外每年加收規禮四千圓又船廠承辦桅木例
應照時價購買而琛於應換桅木時將桅商查封勒辦每件僅發
銀四兩所有報銷餘價私藏入己并有莆田縣監生鄭清芳生員
鄭遠芳兄弟厚禮拜琛爲師餽送不絕且購買少女贈琛爲妾各
條請旨將琛革職嚴審究擬琛論罪如律三十五年正月漳浦
縣奸民蔡烏強等糾合詔安縣眾搶奪謀逆旋被官兵擊獲應階
奏聞諭曰所辦甚好但案內尙有李阿闕等務飭該屬嚴速

查拏勿令竄逸二月阿闐等就擒 上嘉之十二月調漕運總督
三十七年正月疏言糧道專司漕務請於各省糧艘開行時令糧
道親押赴淮不得轉委丞倅 諭允行尋授刑部尙書三十八年
十月 賜紫禁城騎馬四十一年十月調左都御史四十五年
諭以原品休致尋卒

右 國史館本傳

--	--	--	--	--	--	--	--	--	--

144-048-1-1

1111

赫赫

赫赫甯古塔氏滿洲正黃旗人由監生充數理精蘊膳錄書成優敘於康熙五十九年補戶部堂主事雍正元年升員外郎尋遷郎中乾隆四年正月授廣東肇羅道十月丁父憂六年服闋授甘肅洮岷道十一年遷山東按察使十二年五月升布政使十一月護理巡撫十二月 諭曰赫赫補山東布政使已半載有餘其於地方公事並未見具摺陳奏見在護理巡撫雖爲日無多但地方事務豈無一應行奏聞之事此次奏摺請安之外惟奏報米價可見卜素漫不經心前伊爲部屬時尙屬能事今擢任布政使全不實心任事或因位至藩司器量褊小輒自滿足遂一味因循爲保全

祿位之計耶布政使爲通省表率地方關係緊要豈可怠玩如此
著傳旨申飭尋奏請捐職武生武舉遇鄉會試年有願入武闈者
照貢監舉人例一體應試 從之十三年二月授太僕寺少卿先
是少卿缺二茲議裁一得 旨赫赫遇有相當之缺該部請旨補
用五月補光祿寺卿十四年 命祭告遼太祖陵十五年五月升
內閣學士兼禮部侍郎銜九月 命祭告醫巫閭山旋授鑲黃旗
蒙古副都統十六年二月調鑲黃旗滿洲副都統十二月 命祭
告長白山等處十七年署工部侍郎二十年四月授盛京戶部侍
郎十二月疏言盛京等處買房產田畝均請上稅 諭曰盛京等
處買房產有上稅者有不上稅者自應一體上稅至買田畝從無

上稅之例遠令上稅於民不便但不與執照日久不免爭端嗣後買田畝著不必上稅至稅務處遞呈領照二十一年奏稱盛京內倉一年額徵地米一萬五千餘石除支用外僅餘二千餘石向無積存於乾隆十一年經前任侍郎蘊著奏請存米六萬石將附近之遼陽開原廣甯三倉地米撥入內倉徵收足額遇有偏災或賑或借見在存米三萬七千餘石較額存之數少米二萬二千餘石自應仍撥外倉地米以足額存第額存之中尙有應略爲變通者查舊例盛京內外各倉每遇青黃不接之時均有糶三米石減價賣給茲內城緣積儲原議俟六萬石足數後再爲存七糶三是以數年來拘泥前議並無糶三米石每遇青黃不接之時各外城官

兵俱需 恩得糶內城官兵則輾轉升斗不無拮据稱思積儲固不可少而糶賣亦難或缺請內倉於六萬石外再多儲米數千石遇米價昂貴之時減價糶賣於地方旗民大有裨益至不敷米石查各旗倉除徵地最少之蓋州熊岳復州金州岫巖鳳凰城俱無可撥外甯遠錦州義州廣甯開原牛莊遼陽各倉可撥米六千餘石改入內倉徵收庶轉移之間內倉米石漸積漸多於積儲糶賣均得充裕部議如所請行二十四年七月授正紅旗漢軍副都統九月復授內閣學士兼禮部侍郎銜二十五年充殿試讀卷官二十七年 上以赫赫年逾七十 命不必管理副都統事二十九年五月 上御勤政殿聽政 諭曰今日派出奏請折本之內閣

學士赫赫臨時不能奏請著罰俸一年卽賞給代爲奏請之學士
塔永阿三十二年卒子德成刑部郎中

右 國史館本傳

日本書紀卷之四十四

三

程元章

程元章河南上蔡人康熙六十年一甲三名進士授編修雍正元年充四川鄉試副考官三年署日講起居注官四年提督福建學政尋遷侍講六年晉侍講學士七年六月授少詹事七月署浙江布政使九月奏言臣欽奉 訓諭屏除科甲黨庇陋習臣前在福建學政任內署浙江巡撫蔡仕舩籍隸閩省於臣由閩赴浙前一日託鹽驛道孫國璽轉屬其子登魁科舉卽爲拒絕迨臣到浙藩任仕舩於八月初六日入闈十三日欲更易外簾官與例有違亦未曲從臣惟知恪守 皇上法度不敢周旋上司更何敢瞻徇科甲情面得 旨所奏甚是爾宜堅持此志毋稍遷移十二月實授

八年五月擢安徽巡撫八月奏稱霍邱奸民以首告欺隱爲詞於有田家沿門誑詐見追賊究擬其小民有無欺隱田糧祈寬限半年自首升科下部知之又奏劾鳳陽之靈璧縣被災七分府縣官匿不報尋下部議革鳳陽府知府葉勇靈璧縣知縣吳之綱職九年疏報廬州府城內金斗河壅塞年久愈漲無從宣洩前奏明開濬士民踴躍捐輸今工竣得旨但當一順民情如果於民有益不妨動用公項開濬以資利賴十年七月署浙江總督九月實授奏言石門桐鄉歸安烏程電災動備公銀賑恤漕米應緩徵其南米係給兵糧請借倉穀碾放帶徵補還平湖海鹽武康諸暨等縣蟲災漕少不必緩徵酌借各州縣倉穀碾兌俟來歲早穀登場遵

上年辦災 恩旨每米一石折徵銀一兩買補再各州縣有捐監
補漕及平糶各穀俱應買補今歲歉價昂請緩至來歲 上嘉其
辦理妥協十一年疏言杭屬新城湖屬歸安烏程被旱歉收請截
畱杭嘉湖三府本年漕米五萬石來春平糶歸安烏程本年及帶
徵雍正十年漕米並改折徵解以紓民力 從之十二年十月
命郝玉麟爲閩浙總督元章以總督銜管巡撫並鹽政事務尋奏
訪擊江山縣奸民王益善起獲僞劄究出首犯黃森官等在江西
結黨散劄謀爲不軌先後全獲 上嘉之十一月疏言竈地可墾
者無塘禦潮遂致淪棄見於鳴鶴場勸諭按丁築塘墾地萬四千
餘畝清龍石堰二場亦一體興修惟應建閘座備蓄洩請酌撥引

費節省銀應用 從之十三年四月疏言杭州漢軍四旗壯丁生齒蕃衍雍正十一年做閩省例挑餘丁三百歸督撫標頂補綠旗名糧查浙江止撫標除隨糧公糧外實額兵六百餘新補旗兵例不派差勢必不敷差遣又出缺有限非十年不能補足使綠旗餘丁無缺可補未免向隅得 旨著將閩省從前頂補綠旗之漢軍撤回俟本標缺出頂補其缺仍給還綠旗所有頂補甲兵亦著撤回六月沿海草石舊塘附近尖山大條石塘坍塌墊陷 命將承辦海塘之副都統隆昇大理寺卿汪漣內閣學士張坦麟與元章俱交部嚴議尋元章降一級從寬畱任仍令督工贖罪十二月諭曰程元章身爲巡撫不能和衷共濟乃懷挾私心貽誤公事不

應畱於浙省著來京乾隆元年二月授漕運總督五月疏言清白
二糧千總領運委同知通判督押江南七浙江三餘省各一嗣江
蘇巡撫張偕因廳員少題減二員查各省運官俱足資管束獨江
西十四幫程遠船多運官一員鞭長莫及江南六十六幫運官五
員亦難兼顧請嗣後江西委二員江南照舊委七員管押以資漕
糈下部議行時山東平山衛回空糧船過直隸清河縣貨賣私鹽
拒捕經長蘆巡鹽御史三保入奏部議元章不能約束降一級准
抵又向例六七月全運抵通本年五月初頭幫方到奉 旨程元
章不勝漕運總督之任著來京署理禮部侍郎二年三月補刑部
侍郎六月調吏部五年 上以元章卑庸不肖實心任事著革職

十五年 上時巡中嶽給侍郎銜三十二年卒

右 國史館本傳

王蘭生

王蘭生直隸交河人由生員經大學士李光地薦舉入直 內廷
校對書籍並編纂律呂正義音韻闡微等書康熙五十二年 賜
舉人尋丁父憂服闋仍入直 內廷六十年 諭曰此番應試之
人有學問優長不得中式以致抱屈者朕亦無從而知卽有人奏
聞亦難深信如舉人王蘭生學問南中人或有勝彼者若直隸人
則未能及之前周易折中性理精義朱子全書魏廷珍王蘭生等
在朕前晝夜校對五年不遺一字讀書人少全讀性理者王蘭生
甚爲精熟學問亦優屢試未中或文章不佳抑別有故耶再滿洲
舉人雷保學問好滿洲蒙古漢軍中罕有及者卽翰林中諒如彼

者亦少此在朕前行走之人朕深知之非屬偏向也王蘭生留保
俱賜進士一體殿試蘭生改庶吉士雍正元年散館授編修三年
命署國子監司業四年五月充廣東鄉試正考官尋實授司業
十月 命提督浙江學政五年擢翰林院侍講六年轉侍讀奏言
生員以立品奉公爲尙若有潛通胥役欺隱錢糧包攬抗欠者一
經查出卽行黜革重處臣於按考所至嚴加曉諭並令地方官開
報使其完糧然後收考若能久而成風人人以急公爲榮以欠糧
爲恥則士習民風愈覺醇厚 諭曰天下之人不外乎士與民天
下之俗不外乎士習與民風士民雖分而爲二而其實則一也有
司有治民之責學政有課士之任雖各有專司而實則相爲表裏

嘗見有司但以爲職在臨民而置學校於不問而學政則以爲統屬士子若不優容庇護無以博其稱揚因而曲爲徇隱百計包荒遇有生員違抗錢糧者又以爲催科乃地方官之事與督學無涉以致士子無所忌憚此等陋識實庸劣學臣之所同也不知士子乃百姓之坊表士習不端民風何由而厚況倚仗青衿抗延國課則士品頹壞已極其害實在世道人心不僅關係錢糧之逋欠而已王蘭生令地方官開報欠糧之生員必俟完納方准收考俾人以急公爲榮以欠糧爲恥此實鼓勵化導之善政而他省學政從未有如此舉行者未必皆見不及此大抵瞻徇苟且之習未除耳王蘭生著交部議敘向來浙江士習澆薄中外所知朕爲世道

人心計不得不嚴加整理今二年以來李衛王國棟王蘭生先後奏稱兩浙士子感朕訓誨之恩省愆悔過將舊日囂陵奔競之習痛自改除可稱士風丕變前年朕原降旨浙人秉性聰慧既知讀書必明大義非如強悍執滯之難於感化者一經指示則醒悟亦必最捷不出二三載可以望其自新今果然矣明年卽屆鄉試之期浙省士子准其照舊鄉會試以示朕訓俗牖民樂聞遷善至意七年擢侍讀學士 命提督安徽學政九年升內閣學士兼禮部侍郎銜仍畱學政任十年閏五月得 旨王蘭生再畱任三年七月 命兼充江南鄉試正考官十一月調陝西學政十三年三月奏言西安府原轄之耀州同州華州乾州延安府原轄之鄜州鞏

昌府原轄之秦州俱經改爲直隸州請於西安府學原進文章額內酌減五名以三名分歸耀州同州華州屬二名歸乾州屬武童額內酌減一名撥歸乾州屬之武功縣延安府學原進文武童生額內各酌減三名撥歸鄜州屬鞏昌府學原進文武童生額內各酌減二名撥歸秦州屬部議如所請五月緣事降補少詹事仍留學政任尋奏稱陝甘流民舊皆令良民養之宜令有司別爲安插以免擾累下總理事務王大臣議行十月復擢內閣學士兼禮部侍郎銜 召回京乾隆元年四月充殿試讀卷官七月 命充三禮義疏副總裁官尋充會試副考官十一月授刑部右侍郎兼署禮部右侍郎二年卒 賜銀五百兩治喪尋 賜祭葬如例五年入

祀鄉賢祠

右 國史館本傳

公諱蘭生字振聲別字坦齋直隸河間府交河縣人安溪相國督學畿輔公時方試童子安溪一見奇之拔冠其曹教以窮經已而文貞以吏部尙書兼撫直隸檄公入保陽書院爲都講及入正揆席招公入京安溪之學畱心律呂麻算音韻有發前人所未及者公皆得其傳時 廟堂方開書局旁求哲士 聖祖仁皇帝神明天縱自六經外於諸家皆能洞探其交奧疏決其障礙而安溪之學適與有合然以閣務繁不能任編纂乃薦三人其一今禮部尙書景州魏公其一卽公其一今順天府丞甯國梅公同入直晝日

三接以膺 顧問遂得時受 天語指示校審周易折中以至纂
輯律呂正義數理精蘊卜筮精蘊音韻闡微諸種又編朱子遺書
公皆與焉而律呂音韻二者公之力尤多公於律呂少有夙悟安
溪嘗以朱子琴律圖說雕本流傳多誤令公正之公爲之抉發證
明遂可推據旣得承 聖祖所授御製律管風琴諸解乃本明道
程子之說以人之中聲定黃鐘之管積黍以驗之展轉生十二律
皆與古法相應又至郊壇親驗樂器而後知管音有長短巨細之
差故有黃鐘積八倍者或四倍者而匏笙之管反有黃鐘積八分
之一者至埙篪之數亦皆以黃鐘積實加減而得其應聲至弦音
則但爭長短或用倍或用半其聲已應蓋立方者用體平方者用

面有不同也其說弗盡符於朱蔡而與管子淮南合音韻則公得
之安溪之說者大略與崑山顧氏同而較密又承 聖祖之誨知國
書與古法合并外蕃諸國韻書亦有合者今人皆疑歌麻支齊微
魚虞七韻無頭不知七韻乃聲氣之元能生諸部切諸部而不爲
諸部之所生所切宜居部首卽國書第一頭喉音五字也等韻之
易錯皆由清濁之不分乃卽用國書五字頭爲聲音之元以定韻
又用連音爲紐切之法以定等皇極經世韻圖詳等而略韻顧氏
則詳韻而略等互有異同是書出較若列眉而萬音畢舉矣是時
翰詹宿老容有未盡通其義者公以布衣諸生親接 君相之緒言
披卻導窾釐爲一代石渠大制作誠遭際之極隆也 聖祖以癸

已秋 特賜公同與禮闈試尋丁外艱 許以所纂書自隨辛丑
春 特賜公同與殿試改翰林院庶吉士 世宗憲皇帝嗣位授
編修乙巳遷司業丙午主廣東秋試事還京 詔督學浙江浙中
素稱多士公未嘗稍徇物望也而高才生俱列甲選在浙三遷至
侍讀學士移節安徽得士如浙中晉閣學是秋卽主江南試事以
學臣而主試亦前此所未有也再移節陝西得士如初會所貢舉
士註吏議連及左遷需代吏部推翰詹諸人入見 世宗熟視良
久曰恐皆非舊學臣之繼也乃畱公俟期滿而以少詹莅事 今
上嗣位仍晉閣學還京公以浙江銅政大壞長吏之任事者輒困
請變通其舊例陝中流民舊皆令土人養之宜令有司別爲安插

皆仁心仁術也適 詔修三禮以公同總其局是冬晉刑部侍郎
尋調管禮部公之治事縝密而周詳毫髮未至不敢卽安漸以積
勞致病顧爲受 恩重不敢言 世宗梓宮發引公扈從出行次
涿州從者前有所白則危坐卒於肩輿中 上聞軫悼 賜帑金
五百督臣爲治喪 賜祭一壇論者惜以爲未竟其用焉生於康
熙十有八年正月初六日卒於乾隆二年二月二十三日得年五
十有八曾祖某祖某父某皆以公貴 贈閣學娶何氏 封淑人
無子以族子誠爲後廕生女三予追隨幕下公所以陶鑄疎野者
甚至及入京又以邸舍相近得時見今而後歎撰杖之無從矣誠
於是年十月大葬公於東原而以埏道之文爲請又曷敢辭銘曰

扶風布算康成登樓建安定律季通其尤峩峩先生孤詣清修爰
登虎觀以襄校讎乃以冰心而持玉鏡人物權衡文章司命乃以
清卿而佐新政夙夜惟寅典禮攸定橋山在望有號其弓凡在百
爾其孰不恫胡公之出遽以告終穹碑八尺長護幽宮

右神道碑銘全祖望撰

公名蘭生字振聲一字坦齋幼端凝喜問學誦朱子易本義不遺
一字安溪李文貞公督學畿輔拔置縣學爲諸生遂稟學焉益自
刻厲研極性命之理自樂律音韻旁及中西象數莫不深造從文
貞公修朱子全書冥心編校數學相長泊然於聲利榮祿之外者
十有三年 聖祖仁皇帝問士於文貞文貞首以公薦 召直內

廷晝日三接歲癸巳 命與舉人一體會試九月蒙養齋開局與編修纂輯事旋以父病乞假歸丁憂方持重服 召赴熱河行在復以母病請急有 旨命將韻書帶回就家纂輯蓋異數也服既闋復赴書局日侍講殿祇承 顧問辰入酉歸不聞寒暑歲辛丑試禮部不利 賜一體殿試以二甲第一名進士改庶吉士充武英殿總裁纂修駢字類編子史精華是年冬 世宗憲皇帝嗣位以內廷近臣例邀 錫賚嗣散館授翰林院編修雍正三年四月奉 旨凡諸館有律呂門目者俱著會同修纂旋 命署國子監司業事明年出典廣東鄉試爲正考官未報實授司業俄有提督浙江學政之 命面乞便道省親五年擢翰林院侍講六年轉侍

讀七年晉侍讀學士調安徽學政九年擢內閣學士兼禮部侍郎
十年以安徽學政復畱卽充江南鄉試正考官復調陝西學政公
清介絕俗苞苴干謁不戒自遠愛士如子弟頒示文貞公遺書經
說使諸生知所誦法凡奇才孤學通知陰陽厯術者必提掇獎成
之故主三大省學政興賢育才鼓舞淹滯青衿組帶之士彬彬郁
郁莫不願出門下迄今誦說不衰十三年以事註吏議左遷少詹
事 今上皇帝登極之初首蒙擢用卽補原官充乾隆元年殿試
讀卷官旋充三禮館副總裁晉刑部右侍郎管禮部侍郎事二年
二月二十二日隨 駕奉安 山陵行次良鄉謁履親王於幄次
爲具食飲談論如平時夜畱宿幄中明早肩輿卽路及午從者有

所白憑伏不能應履親王卽以上 聞遽 命太醫診視而公已
不可復藥矣 聖心閔悼嗟歎者久之 賜帑金五百兩 命直
隸督臣監護喪事停棺涿州以待家人奔赴焉公性畏慎周密出
入禁闈二十餘年深爲 三朝所信遇科第皆出自 聖祖特恩
一則曰王蘭生爲人正所學亦好再則曰王蘭生朕深知其學問
憲皇帝御宇十三年由庶常拔擢至卿貳 今皇帝方隆重寄
而年不躋中壽不得大其設施命也操守廉潔俸祿之入半以給
周親密友薄田數畝纔給餽粥所居數椽不蔽風雨自列九卿未
嘗有尺寸之益宗支衰落一弟以哭公故逾時而歿繼母在堂年
逾七十哀公無子以族子誠繼公嗣承廕公學不爲泛濫其於樂

律如有神契朱子琴律圖說一篇字多譌謬公以意詳正瞭然可
曉文貞公用以進 御深被嘉賞入直時恆得 聖祖指授本明
道之說以人之中聲定黃鍾之管積黍以驗之展轉生十二律皆
與古法合又謂弦音祇爭長短或用倍或用半其聲可以相應管
音則有長短巨細之差故有黃鍾積八倍者或四倍者而匏笙之
管反有用黃鍾積八分之一者至埙箎之類亦皆以黃鍾積實加
減而得其應聲葢綫與綫體與體之比例異故也其說稍變朱蔡
而實與管子淮南之說合嘗謂世所傳等韻書清濁未分元聲不
辨邵子經世詳等而略韻顧氏音學五書詳韻而略等皆未極其
至及奉 敕編纂棄短取長用 國書五字類爲聲音之元以定

韻又用連音爲紐均之法以定等書成 世宗賜名音韻闡微非
大臣未嘗叨 賜焉他如律呂正義數理精蘊卜筮精蘊凡與編
校者皆一時之選至律呂音韻必以公之論折中其學獨是莫知
唯 聖君賢相君臣道合冥契於天人之際而公以一介儒生參
其閒而承 恩顧可不謂難得之遇哉公娶於賀儒學彭年女有
三女二適士族一未字某與公先後入館悉公之蘊蓄重公之介
特哀公之卒然以死而血允之無續也誠以公行事來告因綜次
之如左謹狀

右行狀杭世駿撰

交河王少司寇蘭生侍直禁近編纂祕書鋒車四馳與文字相終

始而兩朝恩遇之厚亦自無與比肩論者謂本朝文臣清望
殊榮公尤出高文恪上云

右紀聞陳康祺撰

皇朝通志卷之九十一

三

雷保

公完顏氏名雷保字松喬滿洲正白旗人康熙甲午舉京兆辛丑
會試總裁李穆堂先生用唐人通榜法落第者不平聚譟馬首爭
投瓦礫堵其門 聖祖不悅命 雍親王檢閱落卷奏公文佳遂
欽賜進士入翰林次年 雍親王登極卽 世宗憲皇帝雍正
元年也三年中驟遷侍講學士充日講起居注官再加經筵講官
遷通政使禮部侍郎署掌院學士雍正六年廣東巡撫楊文乾與
前總督阿克敦不相中密劾其侵用海關稅銀與所屬司道方願
瑛官達李濱等朋黨爲姦 世宗命公馳驛會同總督孔毓珣辦
治行至半途楊文乾病亡又有人奏阿某與方官諸公彼此慶賀

張飲觀優 世宗震怒 詔公一並嚴審且痛責孔督縱弛失察之罪孔惶悚無措即召阿公具三木以待公不可曰公與阿公先後總督也匣印猶溫一旦以重囚待之褫其靴露其足於心安乎孔疑公反言相試俛首禁聲但云公意云何公曰我平日與阿某無交但禮稱貴貴爲其近於君也阿某官階一品貴近君矣辱大 臣卽辱 朝廷大刑宜撤孔曰然則何以成讞曰向例審事先大員後小員今日審事當先小員後大員先問知府問司道最後再問大員之家奴則眾情俱得而案已定何必刑及上大夫然後成讞耶孔曰儻 皇上知之柰何公笑曰公何所見之晚也天威不遠顏咫尺我輩爲臣子者一言一動豈可希冀 皇上之不知而

縱意妄爲故今日不刑阿某 皇上知而問我我卽以存國體對
皇上平明必能鑒恕儻有不測畱保以一身當之與公無干孔
卽出座下階三叩首曰吾今而知先生真君子人也除敬服師事
外尙復何言旋訊明所揭數條各分虛實擬罪奉 旨依議阿公
後官至刑部尙書文華殿大學士今廣廷公相名桂者其子也雍
正七年 命督建闕里文廟九年 命監修江西龍虎山上清宮
乾隆四年 今上命查看蒙古三處軍容五年奉使盛京收糧公
往來勘歷不下七八千里所到必有日記書其山川要害土俗華
離爲治理張本又必賦詩推廣風化之情昭彰元妙之思屢唱皇
華不知勞瘁然積年蒙犯霜露車殆馬煩而公年力漸衰鬢亦皤

皤老矣晚年以吏部侍郎調工部乞病閒居自稱恤緯老人又十餘年而薨壽七十七公風神甯靜弱不勝衣造次必於儒者遇大事則神識超然屹不可動 世宗方崇修寺廟時直隸知縣某有盡逐僧道出境者奉 旨拏問公奏僧道皆無告之窮民寺廟皆養濟棲流之院落 聖上所爲卽文王視民如傷意也彼腐儒學究何足以知之 世宗嘉公能識政體怒亦旋解縣某從輕治罪公在浙時 世宗批摺尾云朕聞汝尙無子汝在浙可買一二婢妾回家織造隆升以女子奴奴贈公世傳奉 旨取妾如此寵榮古未有也公三歲喪父四歲喪母庶母某氏守志撫孤公亦孝敬出於天性身貴後奏請旌獎 賜封一品夫人幼年氣盛常易生

曠太夫人屢折筴戒之及長使於四方跪太夫人前乞一杖交蒼頭曰嗣後我儻不戒於怒汝卽以杖示我蒼頭如其言公每曠噶見杖必悚然曰母在斯怒爲之平其純篤如此公初艱於子嗣晚年得子松筠娶夫人鍾氏繼配角落氏

論曰昔人稱舉主之恩重於座主故何也座主衡文務滿額數所取俱暗中摸索不知誰何之人非真知己也若保薦一人則其人終身行爲與薦主息息相關非知之深不敢形諸章奏且極多不過一二人故知我之恩同於生我宜也余己未會試出公門下壬戌上命大臣保薦陽城馬周一流人公命枚擬時務奏疏一通大加矜寵卽欲以枚應詔疏已具矣枚適外用喜得薄俸以養親

苦辭而出事雖不行然公業以座主而兼薦主矣恩較他弟子爲尤深壬申余病起入都謁公於里第赴陝拜別公投杖大慟枚亦悲不自勝其時公年高彼此未必再見故難訣捨果別十年而公薨至今又三十餘年枚屢思採公事爲立傳以文報德而公門戶寢衰求不可得心常缺然幸近年受知於奇麗川中丞中丞姊夫趙碌亭先生寄公自作年譜來枚欣然奮筆雖事跡無多枚亦年衰才盡而寫宣梗槩後世觀者或想見賢人丰采焉嗚呼公門下士三百餘人零落殆盡枚年亦八十矣隨武子雖不可作而由也升堂業已將近公九原有知其轉悲爲喜也夫

此傳成後二年碌亭先生又寄公年譜及自省錄來覺尙有逸

事應書者守 泰陵時禮部郎中官福請曰祠牲芻豆錢太豐
盍奏請覈減以博 上懼公不可曰 天子富有四海 山陵
乃萬古烝嘗之地汝以一人之小見而欲損 聖主之孝心可
乎曰恐他人妒羨必生物議柰何公曰吾與汝約牛羊肥汝不
食以芻豆錄汝功牛羊瘠汝雖食以芻豆治汝罪汝問心而已
何恤於人言聞者悅服在戶部時織造某請徵已免關稅飯費
錢公不可曰關吏巡攔亦百姓也君欲屯膏則此輩必虐取諸
商賈矣又有請裁河東總河者公不可曰當初設立總河原爲
南北不能兼顧故也一旦廢之所省廉俸幾何耶向例旗人有
負官項者死則免有縊死者出差死者先後牒部部以爲疑公

曰縊死出差均死也例俱應免有何疑耶向例兵出征官賞棉甲凱旋繳庫公請卽賞本兵不必再繳公大旨總在損上益下以養民固邦本爲務其他如請關稅羨餘以賞入旗增汛地兵糧以防盜賊寬諱盜處分免民之不敢報盜畱錢糧耗羨使吏之略有盈餘雖奏上有行有不行而公之忠誠遠慮亦可槩見云

右傳袁枚撰

國朝耆獻類徵初編卷七十四補錄

卿貳三十四

完顏和

皇清誥封通議大夫內閣侍讀學士兼佐領總管內繙書房武英殿事 皇子師傅完顏公卒和碩履親王曰嗚呼余師也余否德忝 帝胄幸不至隕越以貽國之羞公之教也乃走位哭 諸皇子成會弔其孤祭焉而許以銘屬王事執筆未果越三十有一載始克敘銘赴其葬敘曰公諱和字純德始祖杭愛以勇聞世居完顏部遂姓完顏氏曾祖魯克蘇恭遇 太祖高皇帝龍興東海舉所部來歸隸鑲藍旗祖達齊哈以女兄充 太祖掖庭復擢隸內

府佐領均未仕考阿什坦始由進士官刑科給事中有聲生二男子公其仲也公生而穎異初受業童子師居數月師辭去曰生非常人吾毋以俗學溷也年弱冠以筆帖式起家稍遷至內府員外郎立幣帛庫庫故財賦地時 國家法簡易官吏乾沒無度公受任一無所染立鉤考法迄今行之吏不能爲奸遷上駟院郎中稱職 仁廟心嘉之會 諸皇子出就傅擇師難其人謂公嚴重乃命公俄被 旨坐免數日復起爲武備院員外郎仍充 皇子師累官至今職公之在 禁闈也垂四十年早暮出入惟謹雖瞻視步武閒必有尺度遇 諸皇子侃侃不少寬假 諸皇子咸敬愛之偶語及公必稱爲夫子而不名嘗 仁廟親征噶爾丹也公誓

以死報固請從 上曰皇子國本也事大汝立功事小勉留之其
爲 上所倚重如此公博涉古今不屑爲章句之學嘗承 旨作
制藝援筆輒就情詞斐然 仁廟顧侍從曰和非甲科而能文理
明故耳嗟賞者久之然公終不以此自多亦不復更作也國書尤
爲眾所推服有奉 敕纂修資治通鑑綱目性理孝經黃石公素
書傳於世爲人篤於天性居親喪寢食如禮與兄共匕箸至老無
閒兄亡撫兄子畱保卒以文學顯爲 國重臣他如宗黨之孤營
婚嫁似續之事力無所不盡嘗脫人於難終其身不以語人與人
接不設崖岸人亦無能以私干者性惡華靡有戚屬某富而高其
門公曰德不修而豐其屋其能免乎已而果然諸子請其故曰不

幸而吾言中不願汝曹效也故居恆以謙謹儉約為諸子訓人或
方之萬石君云公於康熙五十一年 予告歸越六年卒春秋六
十有七娶某氏 誥封安人丈夫子二長伯熙內府郎中次白衣
保監察御史女二適某某孫男四公子以某年月日葬公於某鄉
銘曰

帝臣 王師茲焉允臧以固以安百世其昌

右墓誌銘鄭虎文代某撰

國朝書獻類徵初編卷七十五目錄

卿貳三十五

錢陳羣 子汝誠

沈起元

喬世臣

謝道承

介錫周

陳履平

金鉉

補錄

和素

國朝書獻類徵初編卷七十五目錄

--	--	--	--	--	--	--	--	--	--

國朝書獻類徵初編卷七十五

通奉大夫前醫江西巡撫江西布政使司布政使湘陰李桓輯

卿貳三十五

錢陳羣 子汝誠

錢陳羣浙江嘉興人康熙六十年進士改庶吉士散館授編修雍正七年充湖南鄉試正考官九年遷右贊善十一年轉左贊善十二年三月遷右庶子四月遷侍講學士充日講起居注官十三年正月提督順天學政閏四月轉侍讀學士七月 命南書房行走九月次右通政仍留學政任十一月疏言各學舉報優劣請照京察計典例止於歲試隨棚舉行蓋歲試文武生畢集至科試則武

生不與而文生應試者亦止十之三四不能面加獎戒其歲科並
行之地必有朝報劣而夕褫革欲自新而無路者卽舉優亦易掩
飾請停科試舉報下部議行乾隆元年丁母憂回籍服闋 命提
督順天學政四年補原官陳羣母陳氏知書工繪事陳羣少時母
劬之學爲夜紡投經圖陳羣嘗奏及之 上賜題以詩有嘉禾欲
續賢媛傳不愧當年畫荻人之句五年疏請增順天鄉試南北皿
中額 諭曰此奏甚屬錯謬國家育才取士自有章程卽正途人
員應得之缺亦有定制斷無因人數眾多而多設官職之理目今
進士之就選者已覺濡滯而舉人之就選者則在二十餘年之久
已有難於疏通之勢若欲希圖士子之稱揚感激再增中式之數

則取者愈多而用者益覺遙遙無期彼中年中式之人至老方得一官精力衰頹志氣怠惰國家何能收科目取人之實效乎錢陳羣身爲學臣不知政體爲此沽名之奏甚屬不合著交部察議尋議銷去加一級六年六月遷太僕寺卿七月遷詹事八月疏請直省學宮從祀先賢先儒神牌位次悉遵太學不得因陋就簡以譌承譌用昭慎重部議從之七年五月擢內閣學士六月遷刑部右侍郎七月轉左九年七月充經筵講官十年充會試副考官十二年二月充大清會典館副總裁六月充江西鄉試正考官十五年復充江西鄉試正考官十七年患反穀疾連疏乞解職回籍許之命其子編修汝誠侍行且賜詩以寬其意詩曰三尸素

所滅二豎胡爲作子告遂頤和還鄉竟如約陸辭意懇款請詩應
允諾憐汝身日羸壯汝神猶鑠達生有至論庸醫無大藥辟穀方
赤松先憂後原樂十八年陳羣進途中所作詩 上用其會錦春
園和韻 賜詩曰北海惟客待杜陵詎身謀勝會開名園新詩步
秦州猶記陸辭時流火方新秋何事大江北閒尋谿壑幽養疴許
謝莊遁跡非田疇故鄉山水佳藥餌頗易求頤攝冀良愈待泛還
朝舟江頭有錦春何妨一命遊几杖兒孫侍樽核寶從稠江湖信
可樂廊廟豈忘憂遲遲有深意欲邁還停收況彼五畝閒卷阿我
會畱卽是矢音地扈賡憶從頭詩筒附奏箋翰苑傳風流固知解
脫心疾等浮雲浮從茲一葦南遙望心與悠二十二年 上南巡

諭陳羣在籍食俸二十五年 上親爲橋梓圖寄賜陳羣序云
重五日錢陳羣和賜其子汝誠詩畫扇以進蓋欲之而不敢言陳
羣老矣不可使其因此鬱鬱於懷促成是幅並疊舊韻賜之詩曰
南國應嘗穀雨茶筵頭書自遂初家貢來恰好臨蒲節賜去無須
寶墨華教寄北山聊示梓漫參西土擬拈花高年已覺多男累莫
逐東風更羨鴉二十六年來京恭祝 皇太后七旬萬壽蒙 恩
與香山九老會 諭曰錢陳羣久歷卿貳兼直內廷年逾七旬學
問優裕前以養疴回籍有旨在家食俸用資頤養今來京慶祝召
對之次見其神明不衰而居鄉素稱恪謹著加恩賞給尙書銜以
昭優眷又 諭曰今年恭逢 聖母皇太后七旬大慶在籍諸臣

來京叩祝具見悃忱獻歲之初朕恭奉安輿時巡南服諸臣甫及旋里復當出境迎鑿僕僕道途於林下高年諸多未便可諭諸臣今年曾經赴闕者明春無庸赴省候接在兩浙者不必至江南在江南者不必至東省如沈德潛卽於蘇州錢陳羣卽於嘉興餘均視此爲例副朕體卹至意二十七年 駕過常州陳羣偕德潛來迎 御製詩各書一通賜之曰二老江浙之大老新從九老會中回身體康強自逢吉芝蘭氣味還相陪迎隄恭遇以爲喜出詩命和羣應推更與殷勤訂佳約期頤定復登金臺三十年 上南巡陳羣復偕德潛迎 駕 賜詩曰二仙仍此候河濱三載相睽意更親郭泰李膺一煙舫沈期錢起兩詩人飄然白髮都還健矚爾

清隴自有神筆力年華雖共老載廣知復倍清新是年陳羣年八十命加太子太傅賜其子汝器爲舉人汝誠適扈蹕諭至家省侍三十一年陳羣進其母畫冊每幅有其父綸光題句上製詩十章歸之有子昂題句仲姬畫頗有今人似昔人之句三十六年二月上東巡駐蹕平原陳羣進所書登岱祝釐頌及御製詩文並廣韻詩冊至賜詩曰平原此日巡方駐秀水多時奏牘欽萬有餘言親手寫三千里外故人心可知食履益康健具見頌揚篤悃忱冬月定當重晤面健談興自勃知音八月陳羣進謝恩詩上卽以前韻答之曰宣毫端硯常隨劍卽景摘詞每寓欽何必多思甫老句所無逸緬旦公心往來筆札如覩面廣

和篇章每託忱善頌雖卿頗自許不忘規更佇佳音是冬來京恭
祝 皇太后八旬萬壽 命紫禁城內騎馬並 賜人羨令其子
汝誠扶掖出入 內廷再與香山九老會陳羣進和 御製香山
九老詩句云鹿馴岩畔當童扶 上賞其超逸 親爲圖以賜陳
羣將南歸復 賜詩曰剛喜談心頻席前胡爲慶歲又當旋幾番
笑語消一瞬重晤風光期十年雪阻長途仍發軔冰凝順水未開
船精神健豈妨跋涉卻是南瞻每眷然明年陳羣抵家疏謝 上
時駐蹕香山 賜答詩有香山適接還鄉信卽景尤思扶鹿人之
句陳羣深於詩多不經人道語書法亦蒼老家居後每歲 上錄
寄詩百餘篇 命之和陳羣旣和韻必親繕冊以進冊必有跋體

或兼行草屢蒙 獎贊三十九年卒 諭曰在籍加刑部尙書銜
錢陳羣老成端謹學問淵醇自康熙年間通籍詞垣以後久直內
廷游歷卿貳奉職恪勤嗣因養病予告優游林下者二十餘年實
東南搢紳領袖前此屢次南巡疊加授尙書銜晉太子太傅在籍
食俸並時以御製詩章寄令賡和儒臣老輩中能以詩文結恩遇
備商確者沈德潛故後惟錢陳羣一人而已前歲來京見其精神
強健爲之欣慰因賞給人蔭俾資頤養冀其壽躋大耋尙可再赴
闕廷益承優寵昨冬聞其忽爾抱疾廬念良殷會於奏摺內溫垂
諭詢意其即可調理就痊以副恩眷今驟聞溘逝深爲悼惜著加
恩晉贈太傅入祀賢良祠並於浙江藩庫內賞銀一千兩經理喪

事應得卹典該部察例具奏尋 賜祭葬如例謚文端四十四年

御製懷舊詩列陳羣於五詞臣中詩曰少年困場屋賢母授之
經故學有淵源於詩尤粹精經濟雖非卓不失爲老成以疾賜懸
車還鄉信循名迎鑿三於浙祝 釐兩入京倡和稱最多頌中規
亦行林下惟恂謹文外無他營優游登大耋生賢歿亦榮長子汝
誠乾隆十三年進士改庶吉士散館授編修十六年充河南鄉試
正考官十七年侍父南歸比還職 命南書房行走二十年三月
充日講起居注官五月遷侍講二十二年遷侍讀學士二十三年
擢內閣學士二十四年遷兵部左侍郎二十五年三月京師穀價
未平 命赴德州會勘北上商販船因請嗣後商船至天津關毋

得畱難回空時槩免封隄刺船得 旨嘉允四月調刑部左侍郎
六月充江南鄉試正考官二十六年三月兼管順天府府尹十一
月調戶部右侍郎尋轉左充經筵講官仍署刑部侍郎事二十七
年復充江南鄉試正考官二十八年二月請將應入鄉會試外簾
官通行開列無得規避 上是其言如所請行六月文安霸州大
城等處生蝻 諭嚴督捕 命會勘順天府屬及宣化永平遵化
旗地覈定租額二十九年因刑部擬罪乖謬部議革職 詔從寬
畱任三十年疏請終養 許之三十二年丁母憂服闋仍畱籍養
父三十九年丁父憂四十一年服闋署刑部右侍郎尋授左侍郎
充四庫全書館三通館副總裁四十三年 命仍在南書房行走

四十四年卒

右 國史館本傳

刑部尙書嘉興錢公登朝爲名卿老而告歸上承 聖人之殊眷
下爲海內文學之士宗仰爲書碩耆又二十餘年乾隆三十九年
正月辛酉薨於里疏 聞 上悼惜甚至製詩哀之 命贈太傅
祀於賢良祠謚之曰文端 賜祭葬如制 特予銀千兩治喪其
子汝誠以是年十二月葬公武原生坊南化城請余爲銘按狀公
諱陳羣字主敬明給事中贈太常卿徵者公六世祖也曾祖諱陞
祖諱瑞徵考諱綸光三世皆以公貴 贈光祿大夫妣皆一品夫
人公之少也讀書穎悟過人未二十遊京師則已與諸名士論文

倡和相得時言才士卽曰錢君康熙六十年公成進士改庶吉士
授職編修 世宗時三晉官至侍讀學士充日講起居注官直南
書房 今上登極擢通政使司右通政四晉官至刑部侍郎以疾
歸里公當事持大體守成法爲編修時嘗爲陝西宣諭化導使在
事稱爲能及久任刑部讞獄剖晰得情甚稱職然 上尤愛公詩
文之美嘗樂與考論今古稱爲故人公之歸也 上每思見之公
以所作詩奏進 上覽之未嘗不稱善也公歸後五年 上南巡
賜在家食俸後三年 皇太后慈壽七十公入都慶祝 命加
尙書銜與九老之會圖形禁中後又兩值 南巡加命以刑部尙
書致仕 皇太后壽八十公再入都年八十六矣

猶健步 上見公益喜 賜騎馬紫禁城再與九老之會公子汝
誠爲戶部侍郎侍養於家及是隨公入 朝父子卿貳持杖扶攜
出入宮苑禁闥之中觀者以爲榮其歸也又 賜詩以寵其行公
嘗一爲會試總裁三典鄉試再提督學政及年益高天下文士翕
然趨之公亦和易與後進談說往復論難不厭吟誦詩章音節抑
揚要眇說先朝故事歷歷首尾如披史傳聽者每至中夜忘疲是
時長洲沈文愨公在吳公在嘉興天下以爲齊名雖 上亦稱爲
二老也文愨旣歿後四年公亦亡於是上自 九重下洎朝士以
及閭閻識與不識莫不歎息悲傷謂東南耆舊盡矣公年八十又
九再娶皆俞氏皆一品夫人與公祔葬子七長侍郎汝誠次汝恭

汝懋汝隨汝豐汝弼公以汝弼嗣弟界後幼子汝器 上南巡爲
公賜汝器爲舉人女九孫男十五曾孫二銘曰

多士雲興蔚此昌時孰爲魁英備履福祺秀水之郭鷺湖之湄公
起登朝作吏之儀歸樂太平爲羣士師上與 天子廣和其辭眾
望哀然旣老不衰我嘗識之丹頰白髭飲酒笑談寡怒多怡國有
上瑞匪鷺匪芝進觀公貌退讀公詩詩則永畱貌不可追刻示後
來五言不欺

右墓誌銘并序姚爾撰

今天子優禮文臣稱爲江浙兩大老者一爲沈公德潛一爲錢公
陳羣沈年雖高於公爲後進受知 今上而公則受知 聖祖

世宗贊國家文明之治先沈二十餘年故薨後 天子加贈太傅
賜祭葬諡文端崇祀賢良一切恩禮較沈爲尤隆非徒眷舊臣兼
以重 先朝也公爲錢武肅二十四世孫高祖富一公始遷秀水
生而敦敏愛讀書母陳太夫人躬自督課公貴後繪夜紡授經圖
皇上題詩獎許以康熙甲午舉人辛丑進士改翰林庶常 世
宗登極召見曰錢陳羣不獨文佳人亦好遂以編修主試湖南旋
遷學士視箴輔學政乾隆元年擢通政司右通政丁母憂服闕補
原官累遷禮刑兩部侍郎加經筵講官充乙丑會試總裁主江西
丁卯庚午兩科鄉試壬申病 上命太醫診視予告歸里公天才
警敏藻思全涌每扈從廣歌帳殿前諸黃門環而伺之晷刻未移

百韻已就歸田後 上有吟詠輒寄示公絡繹往來至千餘首凡
國家大禮畢武功成公必進雅頌數十章 聖書褒美賞賚不
可紀極辛未南巡 命閱召試諸生卷丁丑南巡 命在家食一
品俸壬午南巡晉刑部尙書銜乙酉南巡加太子太傅賜幼子汝
器舉人辛巳祝 太后七十萬壽 命與九老會 賜杖入朝辛
卯祝 太后八十萬壽 命紫禁城瀛臺騎馬偕九老遊香山圖
形內府 上於公若有宿契每入見 聖心先怡公亦事君以誠
承顏抗詞動引書語頌不忘規民隱必告壬午公子汝誠典試江
南 上先諭總督尹文端公招公遊攝山俾父子歡會 聖壽六
十念公老難北行 命沈文愨公往嘉禾互相勸止公進竹如意

上批劄云未頒僧紹之賜恰致公遠之貢文而有節把玩良怡
今賜卿木蘭所獲鹿服食延年以俟清晤凡此 恩意周摯皆出
於尋常控揣之外龍光湛露海內榮之公雖研深文學而於政治
尤通明雍正七年爲陝西宣諭化導使宣講時有奸民某闖入聽
講公異其狀命遮畱之果邑中捕者至乾隆十九年僞稟獄與公
家居矣密奏奸民主名未立請緩窮治以省株連奉 旨嚴飭俄
而諒其誠悃 寵眷如初公任天而動倜儻和易口汨汨如傾河
汲引後進酬應翰墨必躬必親日不暇給然能廢心而用形人人
滿所懷以去而體益聰強構宅雙溪之西春秋佳日輒偕故人野
更遊桑麻間嘗至古杭聖湖小住信宿見者或以爲元老或以爲

神仙幼有至性弟死未殮公抱尸臥糞温熨使甦太夫人至見公
身冷如冰乃哭而止之官通政使時以應得己身封典請 封外
祖父母 上許之遂著爲令公諱陳羣字主敬號香樹又自號柘南
居士兩娶於俞氏皆 誥封夫人三代 贈如公官子七人長汝
誠官刑部侍郎次汝恭汝慤汝豐汝隨汝弼汝器皆有官秩女九
人薨年八十九葬銘曰

文思天子張咸英皋陶庭堅方降生爽鳩氏代鳳鳥鳴奕奕錢公
輔 聖清肫然明允更篤誠爲士作鑑文持衡有茅必拔賢必登
義刑義殺廷尉平惟公折獄能引經天牢雖空臣疾瘵昧死上疏
求歸耕 上帝書之詩寵行東門送者車千乘爭羨白鶴翔蒼冥

誰知在野如在廷堯醜舜薰時和賡君臣師友相合并四河入海
無河名五年巡狩 轡輿迎羣臣之中喜見卿子牟魏闕江湖情
能無銜感涕沾纓韋孟雖歸王室爭丹忱足照青史青傷哉顏光
大畫驚 帝猶批勅期遐齡 龍章雖來臣目眼中涓捧祭馳新
堊有睟其容圖殿庭龜銀後祚隆隆升實盱實覃多孫曾公委化
矣公永甯

右神道碑袁枚撰

公少讀書至說命泣下不能語陳太夫人異焉公跪而言曰君臣
遇合至於如此是以感泣也

行述

公幼時家貧隆冬天未明即起讀書無薪舉火熱水汲井泉盥手

膚爲之坼

詩續集卷三注

十七歲依檀溪俞公於京師助編摩事冬無裘

晨興作楷手凍裂潛入市以錢三百買皮袖手自綴於絮袍鈔書

益力

詩集卷十八注

二十四歲春自京歸里課兩弟讀書於南樓去梯級

縋繩送飲食歲除始一下樓如是者二年公姿性過人八歲讀四

書日四十行九歲讀尚書日百二十行皆數過卽成誦而力學猶

如此

年譜

朱竹垞李秋錦分虎彭羨門諸先生嘗集半完園賦積雨詩公纔十一齡賦五古一首有蚯蚓長於蛇薜荔陰似鬼之句諸先生極賞之羨門先生曰此子他日當以五古名世及之京師查初白先生見公詩擊賞不置曰吾浙詩人他日當以錢子追配竹垞特舉

詩會同館以詩名課京師者多未延致獨邀郭君元鈺及公二人
年譜及自跋詩冊墨蹟

公嘗請益於徐華隱先生曰何以博耶先生曰讀古人文就其篇
中最勝處記之久乃會通後述於竹垞先生先生曰華隱言是也
世安有過目一字不遺者耶公嘗舉以爲讀書法 成業錄要序

公年十五從陶先生日襄學先生爲公從叔商隱先生高弟博通
經史立講經法以課公命注易日一卦乾坤二卦分十日注隨所
見爲注不背經義而戒勦襲又命公與二弟講經書有未當者指
而訓之公嘗曰我蒙 恩充經筵講官每進講凡執事閣中者皆
曰聲音爽朗舉止安和雖老輩不及也得力有自來矣先生每教

公讀古詩及李杜集又躬率公兄弟習灑掃應對進退之節每持帚掃地必背吟所誦詩

文集陶先生傳

公年十四應童子試鶴庵公以公嘗育於外大母因命名曰陳生及鶴庵公易簀前三日夢五世祖謂曰爾一生長厚力學功名未顯爾二孫前生乃太邱孫也遂召公定名

年譜及跋三槐堂銘冊

公總角時隨祖父訪盛高士大鏞於匏庵畱數日高士取案頭凍水集相遺曰子貌清厚他日當以文章事業名天下此集幸畱意焉後二十年公爲翰林假歸重訪高士於南湖之濱問曰凍水集尙在篋否對曰已披閱數次矣

文集盛高士傳

公三十二歲於津門旋寓聞太夫人疾憂甚適洗面嘔血盆水盡

赤宋監司師曾素重公資贈回浙及抵家太夫人已愈相見歡甚
年譜

康熙乙酉 聖祖仁皇帝南巡公於吳江縣境跪迎獻 時巡詩
五言律二十首奉 旨於迴鑾時與江南獻詩者同候召試旋以
太夫人病不赴試癸巳恭逢 聖祖六十萬壽公獻頌一冊安溪
李文貞閱選人高等及辛丑成進士引見時公奏履歷蒙 溫諭
云朕乙酉南巡汝曾獻詩何以至今方成進士公奏云科第早晚
自有定分今得仰蒙 皇上教育便是萬幸 天顏甚霽卽選人

翰林 年譜

雍正己酉有 旨各舉所知有鄉人素請吏治將錄其名移知選

八矣其人未之知也詣公通殷勤卽焚薦牘而以弟曉村公名上文集與弟札

公充陝西化導使時自涇州晨發居民文進義拾道旁遺金二十餘兩覓失金人不得卽送州牧處曰不敢負錢使君也州牧知爲公僕人所遺因具揭道始末公致書許中丞屬旌獎焉行述文集與許中丞書

公在陝西徧歷兩河勤宣德意公餘集諸生中好問勤學者就公

解講經明習吏治多所成就

汪文端跋公與黃君兄弟札

黃君建中父過講堂

見諸生環立聽講士庶人孝章伐木常棣小弁諸詩有流涕者因

遣建中兄弟受業

文集壽黃文序

後建中歷任江左著有惠政部民祀之

汪文端公與建中兄弟札先後凡五十紙為諸生則勉以潛心實學

臨民則勸其勤政愛民凡遇人接物悉本乎天理合乎人情近裏

著己布帛菽粟真可坐言起行陳文恭跋與黃君札凡與子弟及交遊書亦

然雖極忙中必累幅連篇勸勉懇至今尺牘存集中者十之二三

而已

公奉使包引所肩行李必親為衡舉輕重曰我能勝者若亦能勝

也行狀

公通籍後謨擬文字屢蒙 憲皇帝激賞而久未遷擢雍正九年

特召諭曰朕看汝將十年今日方知汝真是安分讀書人不數

日由贊善擢庶子又五日擢學士其明年 命視學順天或言公

命視學順天或言公

嘗寓天津恐有瞻顧 憲皇帝答諭曰此人諒不至此後數月考
畢天津入都 召見獎賞曰我早知汝不負我也 公與蔣石宗伯
手札

公視學畿輔時有題帳詩一時傳爲美談詩序云往時學使者下
車供張甚盛厥後相繼簡任於此者多清節素著之前輩以次刪
除唯臥室內設一帳寒則禦風夏避蠅蚊余前後視學於此凡七
年莅瀛郡者四將行必撤帳歸所司曰明年來無煩改作也辛酉
春復來見帳極新因識數語並綴以詩知繼余而役於此者必朝
右君子慎乃儉德有同志焉詩云不寢常如枕有警屏私直似鏡
無塵題詩自有紗籠護畱伴他時絳帳人 詩集

諸城劉文正初釋褐以所業就正公謂文正房師王樓山先生云
吾賀子及門得偉器他日令僕才也金壇于文襄方爲孝廉時公
卽異其才劉文正及錢塘梁文莊俱以筆法自詡公曰二君毋高
自位置會看賢郎跨竈耳謂山舟先生及文清相國也後皆如公
言行述及詩集注

公嘗作九思箴手書屏閒以自觀省以訓子孫云淑慎爾身君子
其人思則得之云何勿思爾有視聽明聰則正惟溫而克惟恭作
肅言忠庶可復也事敬如執玉也芻蕘可詢蓄疑者愚忘身及親
忿可不懲歟逐臭者役貪利者墨其目惟九惟思則一其敬受之
循循焉聖訓是率平生所奉格言聯語以訓子孫及門弟子輩如

自下則人莫能踰謙之六爻皆吉內省而心無所疚恕乎終身可
行自待重則一毫不敢苟且爲學勤必寸陰勿使怠荒知足則遇
自安知不足則學日進惟讓則步不失惟不讓則仁可當又好引
范甯夫惟儉可以助廉惟恕可以成德周元公淡則欲心平和則
躁心釋數語又喜書趙清獻無一事不可告天司馬溫公無一事
不可以對人語及寢疾猶道之不去口每寢疾人來問疾輒與誦
啟予足啟予手數語疾少聞則曰吾若未填溝壑且仍誦戰戰兢
兢三句矣易簣時制軍鍾公方入 覲過禾候公公口占絕句贈
行曰予近易名典君方述職時平生不疚處猶有故人知 行述
公幼時卽愛錄忠孝故事至廢寢食客有問曰公書何如松雪華

亭公曰不及也然則流傳修短何如日過之兩公所書多風雲月
露及內典諸經余惟以樂道人善自勸且以勉人世有感者雖數
世子孫守之矣不亦遠乎

文集自跋忠孝故實

公少侍王父鶴庵公母陳太夫人得畫法而不常作乾隆丙子廬
雅兩都轉製屏十二幅畫者皆七十以上人致絹乞公畫因走筆
畫松梅並作長歌以紀之又嘗爲盛百二先生畫袖俱見詩集袖
卷今在曾孫希憲所

右遺事錢泰吉輯

康熙辛丑科得人最盛名臣名儒多出其中官尙書者一嘉興錢
陳羣官侍郎者二靜海勵宗萬鄞縣邵基官總督者二上蔡陳元

章平越王士俊官巡撫者四新喻晏斯盛滋陽喬世臣安居王恕
漢軍孫國璽名儒則德州盧見曾孝感夏力恕會稽魯曾煜宜興
儲大文歸安陸奎勳金谿馮詠園縣謝道承皆是科庶吉士也

右記余金撰

錢文端公幼貧甚未弱冠依人京師傭書餬口踰數年旋里讀書
南樓兼課兩弟二年學大進遂以文字邀 異遇高官大年席寵
累代 高廟南巡公扶杖迎 鑾 御製詩至有江浙大老之目
可謂榮已迴憶童身孤露饑寒偏人唯瘠寐中當無此冀望士之
匿影蓬華憔悴謀生者觀於公無自戚戚也

右紀閩陳康祺撰

皇朝通志卷一百一十四

三

沈起元

沈起元字子大太倉州人父受宏能詩有白澗集傳世起元年十二能詩古文康熙六十年進士改庶吉士乞養歸旋丁艱服闋入京值澄汰部屬選庶吉士補之遂授吏部驗封司主事由員外郎出爲福建知府初試福州隨授興化署臺灣所至除積弊革陋規捕宿盜懲訟師以閩人言語不正立正音書院在閩三載政聲日著俄以平反忤按察使被劾鐫級乾隆元年起授江西鹽驛道旋擢河南按察使晉直隸布政使內遷光祿寺卿十三年因公降級明年乞假歸起元性端慤廉潔自好刻意爲民遇事一本至誠而才識足以行之莆田縣有陳王二姓訐訟累年樹黨互毆巡撫按

察使將各置重典起元廉其實獨坐首事者尙書史貽直奉旨
至閩甄別府縣以起元爲第一臺灣豬毛社生番擾境眾議立界
起元謂彼非奪地特如猛獸出山則噬人耳界何益請於山口設
寨禁其出入境遂甯河南兩潦四十六縣災起元議於本省不成
災處招集授糧民以得生開封歸德旱蝗禱於社神蝗盡死八年
直隸旱總督議以十一月開賑起元力爭得速賑所屬有粟賑戶
不賑口者嚴斥之災民俱得實惠又絕鹽綱之例餽卻庫封之羨
餘省州縣解項之苛駁寬盜案三月之率結聲名益振自少尊心
理學謂學問須知行合一以躬行實踐爲驗時張伯行主朱子而
斥陸王李紱主陸王而詆朱子起元不肖稍有附會謂孔子弟子

自顏曾外入門各異歸於聞道今宜恪守經書質實爲人不必高
言作聖晚年窮易理撰周易孔義以十翼爲宗歷主銓山濼源安
定婁東四書院藉以自給晏如也病亟謂醫曰吾自念平生學力
惟檢點身心使明淨純潔以還天地父母耳言訖而逝年七十九
著有敬亭文集

右傳王祖撰

公諱起元字子大世居江南太倉州高祖諱文明封儒林郎曾祖
諱衍應父諱受宏鄉貢生通經術隱居教授著書數萬言歿祀鄉
賢祠兩世皆 贈奉政大夫公童時能文章年十八慨然有自立
之志爲諸生敦厲廉恥嚴義利之辨居母吳孺人喪依古禮不御

酒肉不內寢其後父喪亦如之康熙五十九年舉於鄉明年成進士補庶吉士以父病乞歸父歿服除入京雍正四年改授驗封司員外郎尋兼考功司明年命往福建以知府用總督高文良委署福州府移興化時世宗聞閩中倉穀多虧遣四大臣率謁選府縣官六十餘人往按有司被劾者十居五餘悉解任聽勘受事者計較升合爭爲煩苛公獨持平宏大體興化屬僊游令受代不冑收碎米公怒曰穀以備賑碎米獨不可食耶令謝過乃已糧道李玉鉉聞而歎曰近日閩省惟建甯興化爲光天化日矣建甯守姜君亦良吏其屬官多賴以得全者也莆田有黃陳兩家連歲訟不決乃結黨互毆有南北黨之目上官恐其釀亂將悉捕治之公

責兩人而釋其餘報曰斲由主者懲之畢矣餘不足問也 詔以
閩人不善官音令督撫教之學習興化土音尤詰屈讀書了不可
辨公建正音書院擇閩人通官音者爲之師集諸生以四聲校正
經書俾轉相教授上官采其法頒行諸府在官禁屬官饋獻府倉
壞出私錢興造一不以擾民巡撫常安委攝海關司關向無養廉
責諸關口差役歲輸金三千以給公請於巡撫革之竝革洋船規
例數千金巡撫有家奴守關欲浮收糖稅不得格二十餘船不行
公聞立督收稅如額放船行而白其事於巡撫巡撫召家奴切數
之由是人莫敢不奉法及常去代者朱定元向公問常奴贓狀公
不對朱彊之曰起元但知常公任內革除浮稅四千金它非所知

也初高文良奏開南洋報 可已復禁內地商久畱外國文良下
令出洋者必戚里具結狀立往還期限逾者連坐公進曰此法立
將一船不得行文良問故曰出洋者生死疾病無常數貨物利鈍
無常期此豈內地戚里所能逆料而爲之具狀乎且公不聽開洋
則已今聽之商人造船集貨費無算忽以結狀媿之是明利之而
陰奪之也商何望焉文良曰君意云何曰但令商自具狀過三年
不歸者不聽回籍以此牒部足矣文良喜令商具狀如式部例洋
船水手多寡視梁頭大小商苦納稅大輒報小及出口船不得行
泉防同知馳啟督撫議增水手公方奉檄放船商環集求驗放且
請聯舟互濟免增水手同知欲候督撫令下不可公夜詣同知曰

水手定額工部所頒督撫不能增文移往復輾轉駁詰商船且不得行南風將起彼情急必生變君其危哉同知不得已許諾則眾已洶洶集同知門矣初兩院得同知啟方愕眙不能爲計及聞船已放則大喜守興化三載史文靖公奉使至閩以牧守優等第一薦攝臺灣知府臺田一甲準十一畝有奇賦有上中下則上則一甲收穀八石中則六石下則四石視內地加數倍然率多隱占民不甚困時丈量法行占者不得匿公將赴臺文良語之曰吾欲使臺田悉視同安下則起賦但恐不及故額致部駁奈何公曰此事籌之素矣宜令著籍田且仍舊額而丈出者視同安起科俟隱占既清更減舊額重者均於新額之上則賦不虧而民不病文良以

爲然及至臺大風壞海船廬舍人民率漂溺公單騎按視賑給流
民多所全活時有山豬毛社生番之擾議設寨山口斷其出入南
路遂甯新守至還興化先是同安縣民有冤獄按察使潘體豐不
能察獄成總督命公覆訊直其冤潘坐是銜之中以它事部議降
四級用途如京師尋告歸高文良總督兩江聘主鍾山書院 今
上卽位召入京授江西驛鹽道在官絕商人餽遺臨行以千金爲
贖卻之乾隆二年授河南按察煥值夏大雨災被四十六縣饑民
四走布政使欲關之公曰民饑且死奈何禁其它徙昔田文鏡以
此獲咎可鑒也今邊境州縣有未被水者宜安插流民給口糧俾
毋出境其可從之屬吏報鹽梟四十餘拒捕傷人已而獲者過半

法皆當斬訊之自四五人外皆饑民請於巡撫雅爾圖斬三人戍
二人餘杖遣而已巡撫令府州各設書院委公總其事公以教士
當先實行頒鄉先輩陳確庵敬怠日程自大梁書院始進諸生示
以省身克己之學覈其程而加差等焉巡撫立章善坊令諸州縣
舉孝子悌弟義夫貞婦登其名公采訪事實著章善錄版行一時
風動有兄弟爭訟累年忽大悔讓財產友愛終身七年遷直隸布
政使明年大旱七月總督高斌自江南視河工還公迎謁故城議
賑事高欲遲至仲冬公曰饑民朝不謀夕豈能久待請先普賑一
月再查戶口分別加賑高愠曰必如此君自奏之公出語清河道
方觀承曰普賑萬不可緩時之安危民之生死在此決矣子其圖

之方入言於總督卒從公請時有縣令倡言賑戶不賑口公怒曰
一戶數口止賑一二是且殺七八人矣移檄州縣有犯此者梟之
戶部尙書海望奏清理直隸旗地有司違限奉 旨飭責高恐命
公劾數州縣以應 命公不可曰旗地非旦夕可清州縣方災何
暇了此獨劾起元可也乃止九年內轉光祿寺卿尋奉 命稽察
宗學居閒讀易折中古訓著周易孔義十三年移疾歸歷主濟南
揚州太倉諸書院晚而杜門日誦先儒書病中手鈔明道先生語
錄臨終語其友曰平生學力無住手處年來日夕檢點身心仰不
愧俯不忤或庶幾焉卒年七十九所著書自易義外有敬亭詩文
集十餘卷刻行於世

右事狀彭紹升撰

公姓沈諱起元字子大世居太倉父宏受號白漢先生與相國王公揆爲布衣交高隱不仕著述千萬言生先生愛其穎悟曰此兒須我自教也辭千金館穀閉門督課以康熙庚子舉人辛丑進士入翰林改吏部員外 世宗登極嚴六部缺主之禁不自首者死直隸學政缺主事發公爭曰此與六部缺主不同學政衡文缺主不能爲弊宜減死爲流 世宗嘉公有識召見授興化府知府當是時 世宗風聞閩中倉穀多虧 命內大臣伊拉齊等率請選州縣六十餘員按覈之諸員爭得缺盤斛苛煩仙遊令某受代不收碎米公怒曰穀以備賑也碎米亦可療飢斗升旣足何事紛紜

諸大府無以難一時矯虔之風爲之稍戢總督高文良公奏開南洋已帖黃曉示矣有旨禁內地商羈留外國高公猶豫命商人戚里具原船往回結狀方許放行公諫曰此法立將一船不得行高問故曰出洋者生死疾病無常數貨物利鈍無常期此豈內地戚里所能逆料而爲之具結者乎且公無開洋之示商無怨也今商旣得此好消息造船者費若干製貨者費若干忽以結狀相騁是明誘之而暗苦之也商必怨且走南洋者需北風今立春已半月儻結狀來北風不來彼失業商聚集廈門或爲盜賊害將何已言未竟高色變曰君欲云何曰據起元意但令出洋商自具狀以三年爲期如過期者不聽回籍卽以此狀咨部足矣故事驗放官

興泉道及泉防同知也洋船水手多寡視梁頭大小民懼納稅大輒報小及出口船不得行乃求增水手同知張某馳啟督撫公攝道篆後到曰此啟誤矣水手定額工部所頒督撫不能增勢必咨請部示從此駁詰不已奈何俄而眾商具牒願自掉船免增水手張不可公夜叩張門曰南風起矣眾商懼不得行故爲此請君再固執必生他變張不得已驗船放行船中商果已集無賴袖瓦石將堵張門當是時微公幾不測初兩院閱張牒方仰天愕貽計無所出及此信聞乃大喜嘉獎者再而海口商民變詛爲祝懽舞者數萬人遷臺灣道臺田以甲論每甲十畝有奇國初以鄭氏稅簿爲額較內地賦加重幸欺隱者多民不爲困雍正五年丈量法行

民多棄產逃公請於高公曰人謂欺隱清可歲增漕十萬此妄說也第恐科則不定或比舊額轉少必干部駁爲今計宜令舊甲悉依舊數而丈出新田照同安下則起科俟欺隱盡清之後再將舊甲舊賦通勻於新田輕賦之上則國課民生兩無所病高從之至今臺灣民安其居同安縣民辛氏與顏氏有仇自殺其弟婦誣顏按察使潘體豐不能察具獄上總督命公覆訊公平反之潘怒以他事中公落職家居今上元年起用爲江西驛鹽巡道尋遷河南按察使直隸布政使內遷光祿寺正卿以老乞歸年七十六卒公長身廣頰白鬚偉然待後進諸生慊慊如不及而於權貴處屹不可動在閩時巡撫常安屬司海關吏白故事司關者到必先以

名紙謁巡撫家奴公大駭不可一切驗放南面指揮諸奴悚息垂
手唯唯及常去後撫朱定元向公問常奴贓狀公不對朱強之曰
起元但知常公在關革除浮稅四千金此外非所知也戶部尙書
海望奏清理直隸旗地有司違限奉 旨嚴斥總督高公命公劾
數州縣以自解公不可曰旗地非旦夕可清州縣方災何暇了此
公必劾官當自藩司始十二年直隸旱 駕幸東魯高公以迎
鑿事重命檢戶口十一月開賑公力陳民困甚慮不及待高愠曰
必若此君自具奏公默然出苦言於清河道方公觀承求通其意
甚婉高亦悟卒從公言公性儉自奉一盞之外無他過菜口不言
生產專歷任脂膏而蕭然四壁於官爵黜陟視若浮雲初署臺灣

知府到官日生番越獄前守劉某曰獄魁未交是我責也公曰守印已受是我責也爭開失察職名大府嘉其有讓遂兩免之所著學古錄四卷古文八卷詩四卷子某

右行狀袁枚撰

太倉沈先生諱起元字子大進士官至光祿寺卿著周易孔義集說二十卷大旨以十翼爲夫子所手著學易者必當以孔傳爲主因取明高景逸周易孔義之名別加纂集於古今說易諸書無所偏主惟合於孔傳者卽取之其篇次則仍依今本以彖傳象傳繫於今文之下謂易之亡不亡不係於古本之復不復王氏以傳附經亦足以資觀玩惟大象傳往往別白起義文言則引伸觸類以

闢易蘊皆無容附於本卦故別出之前列三圖一爲八卦方位圖一爲乾坤生六子圖一爲因重圖皆據繫辭說卦之文至於河圖洛書先天後天方圓諸圖則謂此陳邵之易非夫子所本有槩從剛雉頗能埽除紛紜轉轉之習矣又著詩傳叶音考三卷

右學案唐鑑輯

四庫全書

四

喬世臣

雍正十有三年正月三日少司空喬公以疾薨於位年僅五十越六月其孤大元等將返葬於其鄉撰次行狀千里走使來求麗牲之碑謹按公諱世臣字丹葵號蓼圃自曾大父南泉公始從泗水遷濟甯士考景進考發皆爲儒不仕公以康熙五十九年舉山東鄉試第一明年成進士改庶吉士 今天子御極之歲散館授檢討充明史館纂修官三年改吏部郎中是年八月奉 旨閱視保定城工自九月以迄明年四月凡再賑武清饑一刷侵牟罰給之習會縣令輸米偶不繼餓者洵藉公以便宜借貯穀給之 天子以爲能晉階二級卽令出知嘉興府事尋丁父憂服闋補杭州知

府復遭祖母朱太夫人喪承重持服假四月復起視事遂護理浙
江按察使事旋命署理江蘇按察使未半歲爲眞公所至有惠
政而聰辨彊毅發奸摘伏不可豪髮舉民以爲神九年晉通政使
司右通政署理江蘇巡撫事務江蘇儲備倉糧較各省獨少乃奏
請依雍正五年定例大小中縣皆令積貯米穀出陳易新民食既
足緩急可恃京口駐防兵丁向無存貯銀兩惟恃蘇州藩庫調發
相距稍遠動淹時日乃請撥八旗倉米折價銀二萬兩豫存鎮江
府庫以待不時又以各省提鎮駐紮之地多有與會城隔遠者並
請計鎮兵多寡量撥藩司存庫之銀近寄守牧並得 俞允是年
冬晉都察院右僉都御史賁授江蘇巡撫松江海塘自金山至華

家角凡四十里最爲險要自雍正二年今相國高安公奉 旨修
勘別築塘基易土爲石而華家角至黃家灣二百一十餘里土塘
少薄颶風發作其地每先受患又黃家灣以北至寶山土塘頽廢
既久潮患尤甚公親相度形勢鳩工與築高下廣狹因地制宜捍
海之塘迄今無患他若蘆斤墩飭營堡開鎮江支河清無錫城河
起事與眾動爲民利皆有刻石茲不備書十一年七月 特召還
京晉都察院右副都御史兼理工部侍郎事逾月晉刑部左侍郎
仍兼工部十二年七月以疾請假 上遣御醫二人診視稍痊復
力疾省事十月調工部右侍郎疾復作遂不起公內行純至仕臻
牧守兩道大故哀毀骨立淚如瀉露上有一兄不幸蚤世葬斂盡

禮撫其孤逾己出自少嗜學經根史柢追探元本與修明史時嘗
爲叢目若干卷旋移曹郎中較爲文援筆立就雄深渾灑兼同父
華父之勝遇事廉勁峭厲不以利害回疚其孤狀稱不沽名不市
恩門無私謁家無餘貲蓋實錄也公娶於程處士美公女子二大
元大愷皆太學生女二長適阮次字張今年某月日葬公於某原

銘曰

邾婁舊城礪礪古津川盤山鬱氣鍾偉人官從蓬山繼剖符竹執
憲慎罰不教而肅行臺旣立銀印紫綬王之喉舌句吳建身爲士
轉餽爲民足食捍海築塘恩比溟渤 帝嘉汝臣汝貳司空兼折
庶獄作朕股肱奔走二職萃於 王事醫師實來藥對罔治旣旣

我公道冠百卿通儒良史大猷是經梁竦七序劉迅六說鴻華陶
治世秉科律騎箕躡尾將歸故都清白而終不遺其孤文無妍媸
狀公最質石墨鏘華庶免慚色

右神道碑銘杭世駿撰

國朝詩林卷之十五
三

謝道承

謝道承字又紹福建閩縣人康熙六十年辛丑進士官至內閣學士著有小蘭陔詩集閣學高行屢聞於家光祿敬事後於令嗣玠處得其遺集讀之仁孝之思時時流溢洵爲德人之言也玠爲子戊辰所取士官比部亦敦本行

右 國朝詩別裁集小傳沈德潛撰

謝侍郎道承嘗引疾乞休以養母人間何不奏終養而奏病耶曰爲人子養可也聞終字便傷心耳其憶母詩云兒來前自堯經今凡幾年兒彊記自堯經今凡幾年帝兒時應對稍逡巡母顏變色施恚曠陳篋孫志學人責稽古胡不如婦人吁嗟乎母言在耳兒顏

猶泚安得我母常暝兒常泚於今勸學無聞矣其志餘痛詩云切
肉作羹母呼進菜侍側勸餐母匕不再懶能抱本烏返哺夕膳晨
羞闕供具母曰汝貧母以我故加豆盈觴匪行我素俄焉空庭感
風樹爲豐爲裔總不御吁嗟乎兒無母哺哺於兒撫茲栝栳雙淚
垂讀此二詩而不勵於學勸於孝者非人情矣

右記余金撰

謝古梅先生道承書學褚河南 國朝閩人善書者當以先生爲
巨擘俗傳其與孤女唱酬所謂媚蘭仙子者其真僞不可考然先
生敦品勵學實爲儒宗一時罕有其匹恭讀乾隆五年六月十八
日 諭云據大學士趙國麟奏稱謝道承在祭酒任內訓導有方

國學諸生因其升任具呈懇留朕思內閣學士尙非繁劇之職成均事務可以兼攝且從前邵基升任之後亦會行之謝道承著仍兼國子監祭酒當時成均欽式如此亦可謂信而有徵矣

右記梁章鉅撰

皇朝通志卷之五

三

--	--	--	--	--	--	--	--	--	--

介錫周

太僕寺少卿鼎卜介君既歿之五月其孤玉潮走京師謀所以傳少卿者余官吏部玉潮爲驗封司郎中屬 朝廷發帑金二十萬築室宣武門中隙地以爲士大夫邸寓 命余董其役余素知郎中質直可信以其名上 聞俾任監督初不知其爲罔卿公子郎中聞公疾篤乞假歸省而訃音已在途矣奔喪成服後以工當報竣復來京師請余銘罔卿之墓余素不善文今衰耄更不能文玉潮曰知公之文不輕爲人作也願先人自邑令至司臬皆在黔中公爲滇藩滇黔接壤軍務方興先人撫苗運糧有實蹟公知之悉爲先人志墓必不同泛泛予因此乃知玉潮爲罔卿子而罔卿官

黔政績實有歷歷可紀而不能已於言者公初令畢節烏蒙土酋
梗化會兵進勦督運軍糧攀崖破箐遇逆苗千餘眾方恟恟夫役
棄糧欲走公厲聲曰失糧法當死犯苗亦死死於法毋甯死於賊
願與爾等同死佩縣印整衣冠策馬徑前糧夫擁馬而進逆苗相
顧駭愕各鳥獸散人莫知其所以然旣而烏蒙獠夷復叛川苗應
之滇南獠亦反由水城趨平遠以攻安順公時爲平遠牧往撫大
定苗而平遠得以無患雍正十三年古州苗亂陷黃平清平驛路
俱梗公方赴大定守任羽書交集成云土酋安國賢與古州苗通
剋期犯貴陽大府卽日遣川兵來安酋所轄地九百里眾且駭莫
知所出公立召安酋至宣布 聖主恩威厲聲曰汝果通古州賊

耶我今來汝果反川兵踵至我能殺汝安酋叩首伏地泣陳無交
通古州苗狀公亦偵知爲塘兵妄言所惑諭安酋曰汝能率眾苗
就撫我以百口保汝不死並止川兵無來時丹江亦正危急公乃
請川兵往援丹江丹江之圍藉川兵以解大定知川兵不來安堵
如故大府爲今大學士尹公稱其有膽有識極加器賞焉南籠有
無藉民王祖先者以書符惑人播爲逆詞又有粵西農民王阿耳
爲寨長王文甲所執竄入苗寨卽誣文甲將糾合冊亨諸寨以叛
二獄同時具滇黔粵三省騷然囚繫南籠獄中幾不能容株連累
千餘人時含上納陽諸寨多逃苗公奉委馳往南籠會鞠得其情
科罪魁立釋文甲及繫累諸人文甲歸而逃亡者亦歸惶惑者安

矣一時文武官僚咸服公爲人所不能爲不肖爲不敢爲不惟省
卻濫刑無辜生靈免遭誅戮兩省良善不致波累皆藉公詳慎鎮
定之力也黔省新開鉛廠五方雜處廠民以口角忤委員因卽以
聚眾罷市具報公直抵廠所審察情形以廠民故眾眾不待聚廠
非市市無可罷二語覆稟上游見信獄立解黔中是歲軍餉計金
二百四十餘萬楚粵來米八十餘萬石公以知府攝貴東道總理
諸路糧運其時鄰省解糧馬以三千計催調民夫以五千計屯集
鎮遠漫無章程夫則坐糜廩糧馬則滋累里戶且多斃者上游南
籠諸府復役民夫加運九站兵精又於下游銅仁諸府調運夫二
千餘公力陳三策以餘馬三千安壘分運凱里丹江諸路糧以見

夫五千按期包運台拱諸路糧楚粵兩省兵米則皆以水運有運至清江者有運至古州都江者輓輸迅速糧乃大集於是止上游之糧運停下游之調夫此舉也不下數十萬金所省民亦復無算故制軍有韓范流亞之稱公之於黔所以籌畫軍需撫安苗眾大率類此其令畢節時直歲大旱民嗷嗷待斃以小民輓輸之苦不及請示開倉借給七千餘石乃具詳聲明身任賠補民得無饑次秋民亦爭償無爽而鄰邑之轉徙者不少矣畢邑幅員遼闊延袤幾千里爲雲貴孔道向無站馬馬出里中民有破產應役者公捐俸每站設馬四匹民得免役後官以爲例至今賴之任平遠牧時前牧以重案繫獄頗眾公一一剖析雪冤者百餘人前有冷牧者

政平訟理後爲少司寇州民謠曰前有冷公今有介公以前牧姓冷而心則善慈公姓介而政則和平故以並稱也牧黔西守大定其革除弊政勤理訟事一如畢節平遠時總理錢鉛火藥諸局清理監政剔釐陋規通商裕課民亦獲利由貴西轉糧道於歲需兵米折色出入公平不圖餘羨兵民感頌有以歷來相沿規例爲言者公云吾非敢以此立名惟歸潔吾身耳亦不以吹求前任也此公之清而惠公而恕豈俗吏所能希其萬一哉 特擢貴州按察使公在黔中久其吏治風土民苗疾苦素所熟悉設誠推行惟以矜慎刑獄廣敷化誨爲事而性情耿介短於周旋因以老請休聖主鑒公志節不苟勞績懋著奉 恩旨令其入 覲隨補太僕

寺少卿實異數也閱三年告歸時荷 溫旨存問辛巳入京恭慶
聖母皇太后七十萬壽 覃恩加一級畱都下七日還又四年
而卒公諱錫周字鼎卜由進士起家其先世德深厚七代科名世
系官階已詳載志傳中公孝友著於家庭爲善稱於鄉里甯人負
己毋己負人義方之訓惟以立身節義講求經術爲諄諄其醞釀
之厚貽謨之遠求之古人無多見焉故余樂爲之述其梗槩以志
於墓乃爲銘曰

赫赫廉吏以公以嚴撫綏惟德惠政在黔譌言不驚我酋以生誣
獄不與我苗以甯壁立清標如砥如矢盍歸乎來老不任使 帝
曰毋然休勞逸賢於以錫之問命之篇維爵德齒達尊備矣施於

國朝名臣集卷之二十一

三

孫子永無既矣佳城安安松柏丸丸同穴之固於萬斯年

右墓誌銘陳宏謀撰

按介公康熙六十年進士

陳履平

陳履平字勉夫河南商邱監生隨兄履中補官京師皆以詩文遊公卿閒時畿輔方開營田水利高安朱相國薦其才遂往任事相度形勢指陳利害百不失一五年報最歷官吏部文選司郎中振淹出滯一時注選肅清屢遷巡城御史掌刑垣有巨商挾厚貲營銓法堅執不應及巡西城彈劾無所梗避同官氣懾風采凜然歷通政司右通政踰年丁憂歸服闋不復出與伯兄觀察履中優游林泉壘篋倡和世稱清風明月兩閒人矣田居十年而卒著有南原詩彙奏彙各四卷

右傳查岐昌撰

金鉷

金鉷鑲白旗漢軍人由監生授江西廣昌縣知縣雍正元年游升太原府知府五年擢廣西按察使尋遷布政使六年授廣西巡撫奏言思明州地方狹小毋庸專設流官思明知府又係土司從無統轄流官之例請將該州仍歸太平府管轄下部議行又奏召募本地殷實商人開採桂林府屬各礦並梧州府所產金沙請委專員辦理其採得之銅亦請發價官買以供鼓鑄俱下部議行七年二月奏請將南甯府正雜等官歸部銓選其沿邊之南甯慶遠府等屬知府同知通判知州知縣二十三缺及慶遠新設同知一缺俱請歸調缺題補五年俸滿卽升至太平府通判泗城府知府同

知西隆州知州西林縣知縣等五缺皆地處極邊水土惡劣請改爲三年卽升推升之後果於風土熟悉人地相宜再留三年照升銜升用吏部以歸部銓選及五年卽升之處應如所請其太平等缺地處極邊宜加體恤未便令其久留應無庸議 諭曰該撫身在地方必有所見部議不使久留雖據情理而言但推升之員既熟悉土地非初到者可比或其人情願再留以圖上進亦未可定惟是再留三年之後果能稱職或格外加恩或令該督撫於本省要缺保題優升以示獎勵著該部另議具奏尋議如所請行八月請移駐宜山縣縣丞於楞村 從之九年二月奏桂林平樂等九府鬱林一州開墾雍正七年分田地八百六十頃有奇報 聞三

月疏言東蘭州新改爲流水十最劣請將正雜等官揀選調補俟俸滿題咨到部之後卽行升用四月奏請復設廣西鬱林州州判一缺添設鬱林州撫康巡檢柳州府懷遠縣梅寨巡檢各一員又奏泗城鎮安等處向無應試童生請令外省及本省別府之人有情願入籍者咨查本籍如無過犯准其入籍考試嗣後土屬內改流之州縣均照此例應於十科後照例停止十年七月請添設馬平縣屬三都汛穿山鎮巡檢各一員八月請改右江道原轄之鎮安府歸左江道管轄南甯府原轄之胡潤寨及下雷土州歸鎮安府管轄俱得 旨允行十一年六月疏報鬱林州所屬之富民鄉藤釐坡忽涌瑞泉二穴味甘色清足灌田三千餘畝 諭曰朕從

來不言祥瑞今蒙 上天福佑邊氓顯賜大澤朕心不勝感慶若
該撫選擇善地建立祠宇奉祀泉源之神以答靈貺八月奏鎮安
府東蘭州等處業經改土歸流請添設學官酌定取進學額又奏
思城州土知州趙康祚緣事革職無人承襲請改隸崇善縣管轄
添設縣丞一員分駐彈壓徵解錢糧九月又奏言添設泗城府照
磨一員桂林府永福縣縣丞一員十二年九月請裁武宣縣永安
巡檢一缺均 從之乾隆元年四月廣西提督霍昇奏巡撫金鉉
言躁而失實志大而氣浮失封疆大臣之體得 旨金鉉原屬不
妥不因汝奏後始知也五月 上諭總理事務王大臣曰朕奉
皇考諭旨辦理苗疆事務時見廣西巡撫金鉉陳奏事件甚多朕

卽位之初伊於一兩月閒亦連奏事四件今半年以來未見伊陳
奏一事巡撫管轄通省事務繁多豈半年之久地方民生竟無一
可陳奏之處耶抑私心揣度以朕欲尙簡靜而爲迎合之舉耶看
來金鉷竟未能深知朕心此次申飭之後料伊必又將不應陳奏
之事喋喋數陳矣若此存心何以膺封疆之重寄可傳旨曉之尋
請密舉賢良以備擢用 諭曰以人事君固爲臣之要節但汝所
奏薦朕介在疑似之間耳六月密奏奉 旨逮問之原任湖廣提
督董芳謀勇忠直可備國家緩急之用 諭曰國家以賞罰馭羣
臣豈汝淺劣小才所能窺其萬一哉八月 命來京陛見以刑部
左侍郎楊超曾署理廣西巡撫鉷又奏革桂林廠雜稅九條北流

縣臨江廠雜稅九條部議 從之二年正月實授楊超曾爲廣西
巡撫以銜爲刑部左侍郎尋楊超曾奏參金銜於廣西巡撫任內
用印票向蒼梧道黃岳牧私借銅務充公銀一千二百兩請 旨
革職交刑部審訊四月刑部請將金銜照例柳責得 旨前因楊
超曾奏參金銜借用存公銀兩一摺內稱金銜任內各項錢糧收
支不清者甚多容臣陸續查明奏參等語朕意其必有貪劣實蹟
是以交部嚴察議奏後楊超曾查參到來皆係瑣屑無關重輕之
事則金銜尙無劣蹟可知今覽刑部所審此案原非正項錢糧且
金銜用印文支借而黃岳牧用印冊申報亦非暗相侵蝕可比部
議金銜柳責之處著寬免所借銀兩亦不必著追五年七月 特

旨授河南布政使尋吏部查奏金鉷已於本年四月卒報聞

右 國史館本傳

乾隆元年春枚起居叔父於廣西巡撫金公幕下見公公奇枚狀貌命爲詩大異之當是時天子詔舉博學鴻詞之士四方舉者每疏累數人多老師宿儒公獨專爲一奏稱某年二十一歲賢才通明羽儀景運應此選克稱語多溢美天下駭然想見其人廣西自高爵以下至於流外驚來問訊亡何枚報罷公亦以事去官後二年枚乞假歸娶拜公於安肅會日暮天大雪公聞其至也喜曳杖走出及門迎且笑曰果然翰林耶枚再拜公荅拜命入見夫人五年枚再入都公之兩子來曰珽玉振玉等不孝不能延先君之

年今先君薨肆有日矣惟貞石之未書翰林其銘先君哉枚乃泣而言曰公仕宦垂三十年盛業若干枚與兩郎君俱年少知之難文之尤難雖然就所聞以光幽宮翰林事也亦門生志也不敢任亦不敢辭謹按公諱鉷字震方一字德山祖友勝本姓金襲明金帶指揮世居山東登州流賊破城友勝死之存三歲兒名延祚太夫人余氏將死屬諸側室趙氏曰守節經也存孤權也我行經汝行權趙氏泣而頷之挈兒至遼陽轉適郭氏既長從本朝入燕歷任工部侍郎生公及公貴始復姓公通易理善兵法爲粵西布政使葵州縣向例雖有繁簡兩調而於所治處分析未備則人地難相宜請分衝繁疲難四條許督撫量才奏請上嘉納焉今直

省所行自公始西隆州八達寨苗反公討平之奏免泗城六年舊稅以汛兵少粵土蕪不治乃行屯田法設都司官駐柳州與民牛招之耕教之技勇每名給水田十畝公田一旱田三十畝公田二存公田租於社倉行之期年粵萊田萬餘於是天下人皆曰公以一廣昌知縣莅任五年蒙 世宗皇帝擢太原知府才三年遷廣西按察使才一月遷布政使才三月遷巡撫今入粵者望氣慙慙然政行民和大異疇昔然則 世宗非用人之驟也其知人之深也公之自太原入覲也方廷議耗羨歸公公奏不可 世宗不悅曰朕已定養廉矣汝在官私官乎公叩頭曰臣非爲官游說也從來財在上不如財在下州縣爲親民之官甯使畱其有餘養廉者

養其家使知廉恥也家有大小所定數詎能胥足一遇公事動致
俯張 皇上之意豈不曰凡是官辦皆許開除正供但從司院按
數以至戶部層層隔閡報銷甚難從此州縣恐多苟且之政 皇
上意在必行臣請養廉外多增公費或存縣或存司做北宋畱州
之法庶於事有濟會左都御史沈近思持論與公合 世宗乃敕
山西巡撫覈公費章程巡撫希 上意定數較他省爲優公撫廣
西九年 今上登極召補刑部侍郎治行時印券借司庫千金後
任巡撫楊超曾劾之罷職雜治居月餘楊摺摭不已 上怒曰朕
以金鉷撫粵久恐有他故故置之獄今楊超曾數來奏皆極細事
是金鉷平日無可奏也免鉷罪以所借銀 賜之卽日甯公於家

五年春薨後 天子念公賢授河南布政使吏部以爲公存也
文書下其家叩門不應鄰一叟出曰公亡三月矣乃奏明收 詔
嗚呼罪之雪也雪之者必有人而公以加擠而得脫黜而起也起
之者必有人而公以身死而得官然則公之孤直與 天子之明
聖可以見矣性仁儉而靜置古鐘一枚擊之以招僮豎侍者聞鐘
聲始往道人至大同買妾詢爲宦家女厚其資歸之嘗謂雲貴總
督鄂公爾泰曰改土歸流非計也異日當思我言公享年六十有
三先娶徽氏再娶陳氏俱 誥封夫人銘曰
得一少年薦於皇天我愧賈後公居吳先公之勳庸寰海所知灘
水湯湯我初見之牙旗兩收南衙畫長每接從官竊窺簾旁口畢

王事誦我文章行止儀狀瑣屑夸張辨裝非過借祿非貨受彼擗
摭甘茲折挫 天子有恩用公之魂豫民泣涕待公不至僂指平
生第一知己豈圖報公如是而止嗚呼蒼天使我如此我心匪石
墜於泉底

右神道碑袁枚撰

國朝耆獻類徵初編卷七十五補錄

卿貳三十五

和素

琴譜合璧十八卷和素撰取明楊掄太古遺音譯以國書使明人
舊笈轉賴此帙以永傳是亦操縵家特擲之製為古所未有者矣
八旗通志

右 熙朝雅頌集錢保錄

按和素公字存齋滿洲人累官內閣侍讀學士

國朝有獻類攷初編卷七十六目錄

卿貳三十六

杭奕祿

海望

劉吳龍

嵩壽

三和

傅爾

陳惠華

王安國 孫引之

范璨

李清植

子宗文

補錄

王引之

圖書集成彙編

卷一百一十一

一

國朝耆獻類徵初編卷七十六

通奉大夫前署江西巡撫江西布政使司布政使湘陰李桓輯
卿貳三十六

杭奕祿

杭奕祿滿洲鑲紅旗人姓完顏氏由閒散考授中書雍正元年正月授額外員外郎三月補監察御史十月遷光祿寺少卿二年十一月充繙譯鄉試副考官三年正月遷光祿寺卿時奉 旨蘇州松江長蘆正額錢糧四十五萬杭奕祿疏言 聖主施千古未有之殊恩蠲錢糧至四十五萬臣維蠲免之數按田均算其中有田者雖多無田而佃種人田者亦不少有田納賦旣邀蠲免定額佃

人納租業主亦宜酌減常式俾貧富均霑實惠得 旨此奏甚公
下九卿詹事科道議尋議減十分之二三如業戶免額一錢則佃
戶免租穀三升 詔如議速行五月擢左副都御史仍兼管光祿
寺事五年九月以安南國定界事 命偕內閣學士任蘭枝往
諭國王黎維禔先是原任雲貴總督高其倬查奏安南國界有內
地舊境百二十里應加清理於賭咒河立界國王具疏陳辨 上
命總督鄂爾泰再行確查給還八十里於鉛廠山下小河內四十
里立界國王復疏辨 敕該國王不必以從前侵占內地爲嫌中
心疑懼拳拳申辨至是復 命杭奕祿等往諭未至國王已奉
赦悔罪上表謝鄂爾泰以 聞六年正月 詔以鄂爾泰所查鉛

廠山下四十里地畀安南並 敕諭杭奕祿等齋往宣讀 賜敕
曰朕前令守土各官清理疆界原屬行之內地未令清查及於安
南也督臣高其倬以職任封疆詳考志書兼訪輿論知開化府與
安南分界處當在逢春里之賭咒河於是一面設汛一面奏聞比
因該國王陳奏朕特降旨令撤汛另議立界又恐高其倬固執已
見復命接任總督鄂爾泰秉公辦理鄂爾泰體朕懷遠之心定界
於鉛廠山下小河較舊界已縮減八十里誠爲仁至義盡此皆地
方大臣經理疆界職分所當爲朕統馭寰宇凡屬臣服之邦皆隸
版籍安南旣列藩封尺地莫非吾土何必較論此區區四十里之
地若該國王以至情懇求朕亦何難開恩賜與祇以兩督臣定界

時該國王激切奏請過於舛望種種陳訴甚爲不恭該國王既失
事上之道朕亦無從施惠下之仁此天地之常經上下之定體乃
王自取非朕初心也頃鄂爾泰將該國王上年十二月內本章呈
奏知該國王深感朝廷之仁自悔從前執迷之誤踊躍拜命詞意
虔恭朕覽閱之餘甚爲嘉悅在王旣知盡禮在朕便可加恩况此
四十里之地在雲南爲朕之內地在安南仍爲朕之外藩一毫無
所分別著將此地仍賞賜該國王世守之並遣大臣前往宣諭該
國王其知朕意十月杭奕祿等回京奏言臣等於三月自滇起程
取道廣西五月至鎮南關安南陪臣范謙益等大員叩迎關門外
六月抵貂瑤營國王復遣陪臣迎勞且請儀注欲以其國禮敬行

五拜三叩臣等責以天朝定制溥海共遵無得更張乃愧悚聽命臣等渡富良江至彼國長安門國王黎維禔跪迎臣捧敕由中門入維禔率文武陪臣聽宣舉行三跪九叩首禮臣等復宣示皇上中外一視種種恩德嗣後當倍加忠慎戒飭守邊員目毋得滋事階禍維禔聞言以手至額者再四誓世世子孫永矢臣節復送至長安門兼餽贖儀臣等婉辭不受回至鎮南關陪臣吳廷碩等四員齋國王陳謝表章叩乞轉奏臣等伏思安南僻處荒遠久列外藩皇上念其累世恭順不忍以片壤故卽加兵討且鑒其感恩悔罪行賞賜地此誠怙冒鴻慈撫綏至計臣等睹其異地之歡騰識天威之遐暢謹據實奏聞祈宣付史館昭垂萬世

疏入 上允之是月授刑部左侍郎尋署吏部尙書十一月 遣
杭奕祿偕副都統覺羅海蘭前往湖南會同巡撫王國棟嚴訊逆
犯曾靜尋 命提犯來京七年九月授鑲紅旗滿洲副都統仍兼
侍郎八年三月奉 旨解任回旗辦事四月補禮部左侍郎五月
署右翼前鋒統領時準噶爾台吉噶爾丹策零納青海叛賊羅卜
藏丹津久不獻大軍征剿九年二月 上慮陝甘二省民或以用
兵爲累 特命杭奕祿與左都御史史貽直署內務府總管鄭渾
寶率同翰林院庶吉士及六部學習人員國子監肄業選拔貢生
等往宣諭化導七月 諭杭奕祿協辦西安軍需其宣諭化導事
交史貽直鄭渾寶分辦十年七月署西安將軍十一月 諭曰聞

陝西甘涼沿途一帶營伍廢弛總督劉於義事務繁多不能親身
查閱著侍郎杭奕祿往來稽查悉心整頓給與欽差大臣關防凡
有辦理事宜俱與劉於義酌行山西近邊營伍與陝西相近者亦
著杭奕祿一體稽查十一年七月 諭曰杭奕祿係朕特差稽查
沿邊營伍之大臣理宜體卹弁兵潔己奉公以副委任今聞其沿
邊驕奢放縱擾累兵民甚屬溺職尋奉 旨在肅州永遠枷號乾
隆元年二月 召來京授額外內閣學士三月補工部右侍郎時
恭修 世宗憲皇帝實錄 命杭奕祿充副總裁四月 遣往西
藏駐紮辦事十二月轉工部左侍郎四年四月奏言西藏西南三
千里外巴爾布國有三汗一名庫庫木一名顏布一名葉楞雍正

十二年會通貢近三汗交惡臣遣貝勒頗羅爾宣諭罷兵三汗歡欣聽命遣使呈進部落戶口數並金銀絲緞及珊瑚念珠等物報聞六月遵旨還京調刑部左侍郎十二月襲其從兄戶部侍郎申珠渾所遺三等輕車都尉世職五年二月奏言巴塘裏塘土司品秩同所屬地方亦相等歲給養廉巴塘一千兩裏塘祇一百三十五兩請將裏塘土司二員量增養廉詔於裏塘地方徵收錢糧內交打箭鑪充餉者以四百兩增賞土司用示優卹三月擢左都御史四月兼議政大臣十二月因秋審冊錯擬緩決降二級畱任十年十月以老乞休諭曰卿才品優長簡任風紀正資料理著照舊供職十一年閏三月上察其行走艱難命以原官

致仕十三年七月卒子哈豐阿襲三等伯及輕車都尉世職見任
山西參將

右 國史館本傳

海望

海望滿洲正黃旗人姓烏雅雍正元年由護軍校授內務府主事尋遷員外郎二年 賜戴孔雀翎四年遷郎中八年六月擢總管內務府大臣九月管理戶部三庫 賜二品頂帶尋偕兩江總督高其倬相度太平峪 萬年吉地得 旨嘉獎議敘加二級九年七月遷戶部左侍郎仍兼管內務府事八月授內大臣十一年正月 命偕直隸總督李衛勘浙江海塘先是總督程元章奏海甯縣潮勢自東而西侵仁和縣界石草各塘坍卸勢甚危險大學士等請 特簡大臣通盤籌畫以垂永遠故有是 命四月海望等疏言浙江省海塘情形門戶有三省城東南龕赭兩山閒曰南大

鹽禪機河莊兩山閒曰中小鹽河莊山北河海甯塘南曰北大鹽
謂之三鹽南大鹽久淤成陸數十年前水由中小鹽出入後漸徙
北大鹽年來桑田廬舍已成滄海若欲遏江海之狂瀾俾仍歸中
道恐非人力能爲查海甯東南有尖山聳峙鎮鎮海口其西有小
山俗名塔山相去百餘丈今江水大溜緊貼北塘直趨尖山塔山
之閒而海潮激塘護沙日刷若俟冬初水落建石壩堵塞使江水
海潮仍向外行則北岸護沙可望復漲至仁和海甯海塘自華家
街以東尖山以西有草塘條石塘塊石塘各工草塘易朽石塊塘
亦易坍應改建大石塘並於海塘內增築土備塘一道庶可衛護
民生成成樂土 諭曰所議俱屬妥協著交部照所奏行朕思尖

塔兩山之間建立石壩以堵水勢似類挑山壩之意所見固是若再於中小壘開引河一道分江流入海以減水勢似更有益從前雖經開挑旋復壅塞者皆因惜費工之故今若加工開濬兩工並舉更覺妥備石壩建後卽有漲沙而石塘亦可漸次改建以爲永久之利蔣程元章等相度遵辦是月海望等又奏海塘四事一營工人工員工竣日分別議敘一工價銀米兼發於米賤之地買運搭放一增設海防兵備道一員總轄塘工同知一員與舊設一員分轄守備二兵一千備調遣一新設道駐海甯同知駐仁和與守備分駐海甯東西分防塘汛部議如所請八月又言從前塘工未固由監修之員每多草率所致請 敕浙江駐防將軍副都統就近

選派旗員協同監修 允之十三年振武將軍傅爾丹虐兵婪索
事發 命海望赴北路軍營拏解來京治罪八月 今上御極
命在總理處協同辦事署戶部尙書九月 諭曰海望前自北路
軍營回京時奏稱鄂爾坤發遣人犯在彼種地並無實濟且恐日
久之後人數漸多致生事端應改發他處彼時 皇考以鄂爾坤
見有大兵駐紮豈有不能彈壓之理此奏不合曾經降旨教導令
總理事務王大臣及辦理軍機大臣等議覆此事並無定議之語
殊有觀望之心及朕降旨諭再議而王大臣等仍復游移其說而
介在兩歧是王大臣等尙未知 皇考聖意也朕伏思 皇考之
意蓋以此等發遣之犯原係身獲重罪之人今發往軍前種地者

乃保全之大恩以令其效力贖罪耳若其中果有情罪冤抑不應
 發往者乃辦理刑名大臣之錯誤自應聲明具奏寬釋其罪方於
 情理允協若本無冤抑之情只因其不善開墾遂爾改發內地以
 兵民代之是獲罪重犯又不肯急公趨事轉得遂其僥倖之心且
 兵丁等平時職業惟有騎射當差耕種之事非其所素習若以不
 能力田爲辭則將遷移內地之民往耕邊塞之地乎此事之斷不
 可行者若以此不應聚集多人則將嗣後發遣之犯改置他處尙
 屬可行似此已發之犯豈有更改他處之理且無論大軍在彼儘
 足彈壓卽彼處無兵亦毫無可慮者若以伊等不能耕種則自應
 令該將軍大臣等嚴加督率定爲賞罰之條以示懲勸况耕種本

非難事非工作技藝之可比若冒用力人人能之其所以苟且因循未收實效者皆該管官員疏忽怠玩之所致也海望心地純良但識見平常且有固執己見之處伊所陳奏豈可盡以爲是爾等之意想以朕降特旨將海望署理戶部尙書且不時召見遂起觀望之心聽伊陳奏且向奉 皇考申飭仍復含糊議覆甚屬不合後當以此爲戒十月授戶部尙書兼議政大臣上疏言大兵見駐防鄂爾坤官駝數萬若以給臺站蒙古等令其運米則運價大省於蒙古生計亦有裨益王大臣等議如所請乾隆二年四月 奏陵工竣奉 旨優敘給雲騎尉世職十二月因總理事務議敘復給一雲騎尉四年晉太子少保六年二月請停各省捐穀例 諭

曰從前停止各項捐納之時在廷諸臣及翰詹科道等議畱捐監一條俾各處積穀以備民間荒歉之需且使士子廣其應試之路洵爲兩便並非捐官可比朕已久行昨據御史趙青藜請停止捐監又經大學士九卿會議以事屬難行應仍其舊朕已降依議之旨矣今據海望奏稱外省收捐繁難赴捐之人甚少原議各省捐貯穀數共應三千餘萬石今報部者僅二百五十餘萬石合計尙不足十分之一不若且停止各省之捐穀仍照九卿原議在部交銀將所收之銀扣抵各省買穀銀款俟倉貯充盈之後將應停止之處再行請旨朕思納粟貯倉原爲備荒發賑預爲籌畫之計外首捐穀繁難且有弊竇不若在部投捐之易誠如海望所奏朕亦

知之嗣後仍准在部收捐折色至於外省收捐本色之例亦不必
停在此在外悉聽士民之便地方積穀不厭其多賑卹加恩亦所
時有正未易言倉貯充盈也先是海望爲郎中時充崇文門監督
泊推尙書任滿 命管理如初至是御史胡定疏陳關稅浮徵事
言崇文門貨物上稅有挂錘頂秤名目每百斤必作百四五十斤
稅額雖未明增實已加至數倍其零星貨物由各門入者任意需
索更有數倍於稅額者至外省各官如杭州北新關自南而北不
過十餘里盤查共有七處雖無貨客商必索飯錢多方畱難有貨
者應納之貨不過數分而入口給票出口繳票之費七次苛索竟
計百於零星貨物所值之數推其原故蓋由管關之員務欲所解

稅課盈餘浮於舊額以免部駁而見己長吏胥巡攔藉得恣睢無忌請嚴禁 諭曰關差一項從前司稅之人歸之私橐者後令報出卽爲盈餘耳並非見徵之外有所增加也雖管關之人賢愚不一或有奉行不善欲增課以見長因而需索累民然此十之二三耳較之未經澄清以前已覺減少者蓋多矣朕臨御以來又復覈減稅課不下數千萬兩且不時嚴飭該管諸臣剔除諸弊至再至三今條奏關稅者尙屬紛紛如海望係 皇考及朕簡用之大臣豈不知國體而但知言利者比其管理崇文門稅務不過儘收儘解盡行報官不似先前之入私橐因而見其獨多耳朕卽另派大臣管理想亦如其數也若如胡定所奏苛索種種朕可以信其必

無何爲如此過甚之詞耶崇文門稅務不必另議至外省關課皆
久經該督撫就近稽查除見設口岸報部有案者照舊設立外其
有私增口岸逐一詳查題報應畱者畱應革者革此番清查之後
司權之員若再有違例苛索者胥役嚴處官吏嚴參該督撫不行
查察經朕訪聞必於該督撫是問至潁墅北新二處係浙江大關
尤爲緊要著交兩江總督楊超會閩浙總督德沛照此稽查辦理
十二月海望調禮部尙書兼管樂部太常寺鴻臚寺事十三年署
戶部尙書十四年調戶部尙書十七年四月與侍郎三和等遵
旨查奏 兩郊壇宇工程所發物料銀過多自請嚴議六月議革
職 詔從寬畱任十九年以前在侍郎任內承審鹽商王會民匿

謀行私一案誤以未完作完議革職 詔畱任二十年卒 諭曰
戶部尚書海望老成敬慎辦事實心宣力有年勤勞懋著昨患痰
證亟賜醫藥尙冀痊可遽聞溢逝朕心深爲悼惜著賞銀二千兩
治喪遣散秩大臣博爾木查帶領侍衛往奠茶酒應得卹典該部
察例具奏尋 賜祭葬如例諡勤恪

右 國史館本傳

劉吳龍

劉吳龍江西南昌人雍正元年進士改庶吉士二年十月揀選改授吏部主事累遷郎中六年遷監察御史仍兼郎中七年十月疏言吏部稽俸廳事向無專責請歸併稽勳司管理八旗承驗歸驗封司辦理下部議行十二月轉刑科給事中八年疏言各省學政歲科試將歲貢造冊報部以訓導主銓名次先後或由教官申詳或學政書吏隨意繕寫吏部憑所開先後補用同年出貢冊開在先者得缺早後者守候多年請照恩貢拔貢例遇訓導缺出同年出貢者吏部堂官代爲掣籤部議從之十年充廣東正考官尋轉禮科掌印給事中十一年四月遷光祿寺少卿五月授安徽

按察使十三年二月遷光祿寺卿八月 命管理北路軍需事務
乾隆元年四月 詔回任六月疏言北路軍需有運送科卜多截
畱察漢度爾等處應追腳價銀二萬九千餘兩在車駝戶名下著
追已追一萬四千九百餘兩其未完者查明實係無產無力請量
爲豁免商人因公賠累情有可原者將承追之冊覈明原委分別
定議得 旨允行十一月提督順天學政二年遷通政使擢左都
御史六年四月疏言步軍統領衙門番役私用白役生事害民請
照部院承帖寫送查例將番役年貌籍貫按季造冊出具並無圓
扁子印結以憑考覈提緝人犯官給差票獲犯日番役向該管地
方呈票驗明掛號應緝之犯旗人會同該旗都統民人會同順天

府府尹巡城御史訊取確供互相覺察疏入議行六月劾浙江巡撫盧焯受賄營私 命副都統旺扎爾往會總督宗室德沛查審得實盧焯論罪如律九月擢刑部尙書七年二月充會試正考官四月以疾請解任 命在任調理派醫診視尋卒 上諭曰劉吳龍質樸老成操守廉謹敷歷中外宣力有年今聞溘逝朕心深爲軫惻命散秩大臣帶領侍衛往奠茶酒並賞帑銀五百兩爲喪葬之用應得卹典著察例具奏 賜祭葬如例諡清愨

右 國史館本傳

乾隆七年大司寇南昌劉公以疾在告 皇上特遣御醫診視公疾不起 上聞震悼 命散秩大臣率同侍衛往奠並頒帑金庀

喪事禮臣繼以卹典上請 賜諡清愨給葬如禮嗣子成廣等扶
榧還南以乾隆八年十月十八日葬於祖山之原其幽宮片石請
銘於公之執友江西巡撫某嗚呼公自雍正癸卯官翰林洊歷大
司寇凡二十年由翰林改吏部歷御史給事中光祿寺卿持臬安
徽提督順天江南學政晉通政使擢左都御史總持風憲累爲鄉
試會試主考及同考官中間爲翰林者一年爲吏部者且十年任
事最久余與公以同年進士同官翰林後又同官吏部知余最深
以道義相磨礪長夕相處惻惻款款而語不及私得公觀摩涵育
之力良復不淺迄今追思往事有如昨日而公遂不可復作也今
其子來請余銘余雖不文不可得而辭按公諱吳龍字紹聞號平

田江西南昌人先世本閩籍遠祖允迪偕弟允濟遊朱子門登隆興進士官江右移家玉山縣再遷南昌之梓溪代爲望族高祖一琮仕鄱陽縣訓導曾祖曷祖丁爲庠生有名父起成克守家學不求聞達以公貴 贈祖父通議大夫祖妣張氏妣萬氏並 贈淑人公生而岐嶷性簡重不苟語笑容貌肅然畱心實學爲文沈潛深邃一如其人年十七補博士弟子員康熙癸巳以毛詩舉鄉試雍正元年癸卯成進士選庶吉士次年冬 世宗憲皇帝以部務勞煩令大臣簡擇老成宿望以充其選公在詞館高安朱文端公深相契重遂以公名奏薦改擢吏部文選司主事職掌銓注條規繁重選人冗雜胥吏巧猾多端公鉤弊釐奸一一洞中窳要無疾

言遽色而莅事確乎不拔莫有以私干者每遇疑難輒轉眾議朋
與公爲折衷一二語無不帖然心服相國朱文端公今相國桐城
張公先後管冢宰事俱倚公如左右手公展盡底蘊實心區畫銓
政爲之一清五年升稽勳司員外郎轉郎中調文選司郎中明年
擢掌陝西道事江西道監察御史七年爲刑科給事中十一年轉
禮科掌印給事中雖歷任臺垣仍兼吏部事如故 世宗憲皇帝
察公純樸廉幹可大用晉光祿寺少卿尋 命爲安徽按察使
陛辭之日欽承 清問對曰臣不敢豫設成心惟仰體欽恤明允
之至意因物付物而已抵任後理冤直枉情涉可疑必虛衷參覈
不憚再三所平反冤獄甚夥十三年內擢光祿寺卿隨奉 命管

理北路軍需事務 今上登極乾隆元年事竣 召還提督順天
學政明年晉通政使三年擢都察院左副都御史調江蘇學政正
文體肅學規南北儒風蔚然丕振未滿任 特授都察院左都御
史六年 命兼管國子監事晉刑部尙書公自掌學院歷大司寇
敷陳章奏剴切不爲浮辭多蒙 俞允他如寶山通州海口高築
閘埝以禦洪潮開除京口一帶運河民賦以便民挑濬九門提督
番役不許白票拘人以杜嚇詐所奏並 國家大計蓋公畱心經
濟不爲目前苟且之策一片丹誠惟思仰答 聖朝倚眷早作夜
思積勞成瘵年纔踰艾遂齎志以終惜哉公官翰林時與余同授
徒內城館舍密邇公湛深經術質有其文余空疏固陋然中心耿

耿不以不能風雲月露之辭爲愧而惟懼不克爲淑身善世之學
公有以啟之也余爲吏部司封郎公掌銓政已三年每遇乏員引
余協辦余以未諳體例不敢執筆公曰凡事視情理何如情理當
則體例自合不爾一胥吏優爲之甯須吾儕耶驗封司有會審缺
主一案少宰某公擬大辟五人余呈橐止坐爲首者流餘予徒杖
屢爭於藤花聽事前少宰銜之同官咸爲余危勸改其橐公謂余
曰殺人以媚人吾不忍爲正今日之謂也余因此決意不改後竟
得 恩旨如議歸結凡余有疑難事公徐以片言定者多類此公
於事惟論是非不苟同異余或與公所見不符斷斷相持迄歸於
一不因此稍存芥蒂每語及官場躁進營求交通聲氣動色相戒

有若將浼焉之意公在臺垣所陳奏進退人材剔除宿弊皆關銓政要務絕不輕泄公之慎密持重得大體如此公制作冠冕當代屢秉文衡雍正己酉鄉試庚戌癸丑會試皆爲同主考壬子粵東鄉試乾隆壬戌會試並爲正考官世稱得士又嘗充大禮記注館會典館纂修官斟酌條例悉有模範可遵守余與公奉職銓曹時做車羸馬冬一裘夏一葛珥筆於 乾清門外晨入晚歸雖風雨霜雪無阻余以雍正七年出守揚州乾隆三年自滇入 覲公時視學畿輔按試趙州遇於城外旅邸握手公仰頌 聖天子稽古勤民之至意爲臣子者益當以大中至正可久可大交相勸勉恩恩別去及公視學江南余秉臬江蘇雖同官一方竟不獲相見求

如官翰林吏部時之晨夕追隨渺不可得桂萼風塵趙州城外之
立談遂成永別興言及此痛何如耶公受 兩朝特達之知事業
在 朝廷勳名滿天下天下賢士多出其門將來垂 國史光家
乘者余不能悉誌也謹據余聞見所及與平素所奉教誨者臚列
之以掩諸幽焉公生於康熙二十九年十二月十四日享年五十
有三元配熊氏 贈淑人先公歿繼娶龐氏 封淑人子四長成
承國學生早卒次成廣廕生成秉成常俱幼女一公自失偶二十
年誓不再娶冢子亡始爲嗣續計今連得丈夫子三人某秉節江
右公喪來歸哭於章江舟次有子疑然見頭角悲痛之餘又爲公
稍慰云公所著有求心錄廣理學備考注解陰符經參同契共若

千卷藏於家銘曰

大圭蘊樸遇斲斯彰猗歎劉公嶽立巖廊如彼天漢五星耀芒早
年養舍專場脫穎騰掣驪駟萬里俄頃雅健雄深文筆天挺蓬山
高步儷雅軼騷根柢經術頓息眾囂改官銓部夙夜勤勞如繩如
絲科條煩密振領絜綱諸曹咸秩銓注不紊猾胥屏跡留部十年
選政肅清洊歷臺垣仍掌銓衡晉階卿貳佐佑 王廷秉臬江左
有倫有要案牘不繁奸欺畢照巷無冤民刑以弼教銀臺之門喉
舌所資擢長烏臺百寮是師翳公品望卓立 天墀 帝曰俞哉
獻納朝夕往惟汝諧恪其厥職秋官司寇明允作則成均警宗首
善之區恂恂士子矩步規趨課文考行仰公楷模公清如水傲裘

國朝通志卷之二十一
二
羸馬德爲人師虛衷善下細流寸壤咸歸陶冶器局端嚴不苟談
笑理學淵源鉤抉堂奧實踐躬行卓犖高操事君接友一本純
誠朝端標準寮案儀型允矣吾師大猷是程九九松柏章江之
涘斧屋攸存千秋長峙銘以藏幽用驗信史

右墓誌銘陳宏謀撰

嵩壽

嵩壽滿洲正黃旗人大學士希福曾孫由雍正元年進士改庶吉士散館授編修十二年充日講起居注官遷侍講十三年十月命在上書房行走乾隆元年六月轉侍讀七月充山西鄉試副考官十月同正考官侍講鄒升恆疏言京闈鄉試會試向設內簾監試稽察一切并點放水茶外省則皆主考兼理請照京闈例增設監試又墨卷違式例應貼出但如擡頭點畫草藁偶有錯落小誤無關弊竇請嗣後免貼下部議行二年四月 冊封安南國王黎惟禕嵩壽充正使 賜一品服三年四月還京授陝西學政九月擢詹事畱學政任四年疏言向例歲科兩試摘士子所習本經令

國朝通志卷之六十一
默寫於四書經藝之後恐士子徒事記誦不究精義請於四書經
藝外令作經藝一段其不能講解及背經旨者生員不列優等童
生入學不列前茅再童生有背誦五經兼能講解者文藝平通亦
量取以示鼓勵 詔如所請五年遷大理寺卿六年十二月授安
徽學政八年六月調陝西學政十二月疏言府州考試童生本署
向無考棚號舍無從編號諸弊易生查學政考棚多設府州本城
且考試必在學臣未按臨之先號舍桌凳俱備請府州卽就學棚
編號局試閒有學棚設於屬縣者赴屬縣考試儻因公事不能往
亦就近擇緊密公所編號嚴防部議 從之是月丁父憂十三年
授左副都御史尋任內閣學士十四年頒 詔朝鮮選擢禮部右

侍郎上書房行走十五年兼漢軍鑲白旗副都統調鑲黃旗充順天鄉試副考官及武鄉試正考官十七年命爲經筵講官尋充會試副考官十八年復典順天文武鄉試先是希福所立三等子爵長子奇塔特孫費揚古曾孫來仙襲爵相繼襲十九年襲爵卒嵩壽襲之二十年卒賜祭一次孫增保襲子爵任頭等侍衛見在哈密辦事

右 國史館本傳

同治十三年庚午六月二十一日

天

三和

三和滿洲鑲白旗人姓納喇雍正二年由護軍校授三等侍衛初三和曾叔祖拜庫達以軍功授二等輕車都尉卒兄子瑪察襲卒子瑪爾賽襲四月三和降襲騎都尉乾隆元年四月授二等侍衛五年晉一等侍衛六年三月授總管內務府大臣六月署戶部侍郎七年實授八年十月管理奉宸院事十二月疏言親蠶典禮與親耕並重前代制度未備 皇上敕建先蠶壇爲曠世鉅儀請將建造壇址宮殿規制及興工告成日期 宣付史館以光盛典從之十年正月 命赴甘肅會同巡撫黃廷桂勘估應修城堡邊牆六月疏言自甯夏抵甘涼肅沿邊二千九百餘里土牆多坍塌

我 皇上保乂邊氓原不惜百萬帑金爲鞏固藩籬計但一時並舉工費實屬不貲且城垣爲兵民依賴見所議修邊牆似可稍緩至通省應修城垣須先其所急後其所緩查甘肅鎮屬金塔協在極邊外甘州府爲五涼扼塞蘭州府屬之河州狄道或控制邊口或水患衝刷請卽動項興修至平涼府固原州古浪縣三城應次及其餘殘缺城堡需工料千兩以內者飭地方官動公項按年修理千兩以外委道府確估報部修補部議如所請尋 諭就近會勘陝西各屬城工奏言榆林府屬之榆林麻谷神木三縣延安府屬之定邊縣偏近邊牆鄜州安塞縣二城爲水所衝均應急修靖邊延州米脂華陰咸陽等二十州縣陸續遞修 從之十一月調

工部侍郎十三年五月因辦理 孝賢皇后冊寶不慎議革職得
旨從寬畱任十月調戶部侍郎十四年四月晉工部尙書兼議
政大臣十二月 諭曰三和自補授尙書以來事事周章不能妥
協今御門聽政伊又遲誤不到乃器小易盈不足勝任著以工部
侍郎用眾佛保不識漢字不必辦理部務其員缺卽著三和補授
十五年九月以私伐木植一案掩飾回護部議革任得 旨從寬
革職畱任註冊十月工科給事中珠章阿疏參工部承修 天壇
內外圍牆銷冊與原奏不符且多碎輒包砌 詔下工部堂官明
白回奏三和等奏言壇內三座門東西舊牆明嘉靖年所造俱三
順一丁成砌今所修圍牆與舊相連是以內圍四面外圍東南

三面照舊成造其外圍北面去內圍遠不見舊式隨一順一丁成
砌查城甃一塊之長與二塊之闊相等圍牆止二進則三順一丁
與一順一丁工料相同再圍牆共三千二百餘丈包砌二層奏准
裏用舊甃砌完再用新甃並非私用舊甃冒銷新甃價值 諭曰
此奏殊屬支吾三和委辦工務尤其專責乃既已踏過又復飾非
著交部嚴加議處尋議革任得 旨從寬畱任十七年二月調戶
部侍郎四月與海望等遵 旨查奏 兩郊壇宇工程所發物料
銀過多自請議處革任註冊十八年仍調工部侍郎時銅山河隄
決尙書舒赫德等奏開引河濬上游 命三和率通曉測量之員
馳赴工次測視二十三年以承辦塔工圯蟄部議革任得 旨永

遠停俸三十二年 上以三和行走多年年已七旬授內大臣尋
命紫禁城內騎馬三十八年卒 諭曰內大臣工部侍郎三和
宣力有年恪勤匪懈昨冬因患病請假隨命御醫診視時復遣使
存問今夏特賞給人淺俾得從容調攝以冀就痊忽聞溘逝深爲
軫惜著賞銀五百兩料理喪事其任內革職降級之案准其開復
凡有一切應賠應繳各項著加恩槩行寬免應得卹典該部察例
具奏尋 賜祭葬如例諡誠毅子蘇第察襲世職

右 國史館本傳

傅爾

傅爾滿洲鑲白旗人姓富察氏初任侍衛雍正二年授漢軍鑲黃旗副都統尋授兵部右侍郎三年調盛京戶部侍郎四年五月疏言倉庫關係錢糧盛京戶部庫除掌印監督外設司庫二員接續辦事惟倉止監督一人任滿交代其出入數目有無情弊難稽請選本部賢能章京協辦庶不致虧缺部議如所請並將倉監督照京城吉林一年任滿例年終揀選正副保題更換八月因侍衛任內爲浙江被參糧道江國英關說受賄事發部議革職抵罪 諭曰朕從前因傅爾素性巧詐不守本分曾降旨令隆科多不時稽查乃隆科多將三年內傅爾所行劣蹟盡爲隱瞞且奏言甚是安

靜今傅爾諸事敗露卽如騙詐江國英銀萬餘兩人所共知傅爾亦自認不諱又傅爾曾在朕前口奏隆科多子岳興阿甚怨其父言我家受恩深重理應將生平所行之事盡情據實奏聞若稍有隱瞞掩飾罪更不可追等語而該旗承追隆科多婪贓罪案審實應追之項則奏言岳興阿並不將伊父藏匿寄頓之贓私據實交出與前傅爾所奏絕不相符蓋傅爾原與隆科多交結甚密乃故意枉奏其爲隆科多保全岳興阿之情節顯然著將傅爾革職鎖拿來京交刑部質審訊明之日從寬免死發遣黑龍江九年七月召赴北路軍營效力十二月給原銜授軍營參贊大臣十年準噶爾賊掠喀爾喀額駙策棱等敗之於額爾德尼招賊由推河竄

走將軍馬爾賽擁兵不追傅爾以機不可失請兵殺賊至跪求不從事 聞馬爾賽坐罪伏誅十二年八月 命偕內閣學士阿克敦副都統羅密宣諭準噶爾台吉噶爾丹策零十三年三月還八月 命給都統銜食俸是月 今上御極 命署兵部尙書十二月授刑部尙書兼理兵部乾隆元年六月疏言刑罰世輕世重乃帝王宜民宜人之權我 朝律例布於順治三年酌議於康熙十八年重刊於雍正三年臣伏讀 世宗憲皇帝遺詔曰凡各衙門條例有從前本嚴而朕改易從寬者此乃從前部臣定議未協朕與廷臣悉心斟酌而後更定以垂永久者應照更定之例行若從前之例本寬而朕改易從嚴者此乃整飭人心風俗之計原欲暫

行於一時俟諸弊革除之後仍可酌復舊章此朕本意也向後遇此等事件再加斟酌若有應照舊例者仍照舊例行臣思 聖心惓惓於此蓋必有所軫念而未及更正者也我 皇上御極以來皆以 世宗憲皇帝之心爲心每遇奏讞時斟酌詳慎臣查 大清律集解附例一書見今不行之例猶載其中如竊盜三犯今已改議分別贓物十兩上下遞爲輕重而例內所載乃係贓數不多奏請改遣如遣犯脫逃行兇爲匪今已改議分別所犯情罪遞爲重輕而例內所載乃係卽行正法此類頗多恐問刑之員援引舛錯吏胥因緣爲奸請 簡熟悉律例大臣詳加覈議除律文律註仍舊外所載條例有先行今已斟酌定議者改之有因時制宜應

行斟酌而未逮者酌照舊章務期平允逐條繕摺恭請 欽定纂輯成書頒行以昭畫一七月又言斷獄全憑律例引用貴審全文若摘引律語人人重罪是爲深文周內非平恕也查律載官吏懷挾私仇故勘平人致死者斬監候又載若因公事干連在官事須問鞫依法拷訊邂逅致死者勿論律意本極平允數年來各督撫矯枉過正遇屬員用刑不當誤將在官人犯拷訊致死題參律擬動輒刪去懷挾私仇四字摘引故勘平人一語擬斬監候刑部尙書張照又奏准如將笞杖人犯故意夾拷致死二命以上及徒流人犯四命以上者俱以故勘平人致死律論擬斬監候殊不思旣非懷挾私仇其於故勘之義何居若謂在官之人本屬無罪則必

有誣告之人應照律以誣告之人抵罪不應以依法拷訊邂逅致
死之官抵罪若謂輕罪不應夾訊則命盜等案情偽百出當首從
未分安能預定其爲杖笞徒流不行拷訊若謂拷訊不依法則當
引決罰不如法之律分別杖徒不應摘引故勘平人之律若謂拷
訊不依法致死二命四命以上則當引決罰不如法之律議以加
等不應摘引故勘平人致死之律議以斬罪況案犯受刑後有因
病而死者亦當分別請將各省從前以故勘平人致死定擬之案
或赦免或減等發落 敕法司酌改平允通行遵守均下部議行
八月以勒借商人銀兩奉 旨傳訊回奏不實部議革職杖徒得
旨著革職從寬准其納贖尋 命暫署兵部尙書先是傅爾達

例爲內務府總管常載乞廢至是並下部議照例降二級調用註冊二年授滿洲正藍旗都統三年二月因違例誤給署參領和德等俸奉 旨發往軍臺效力尋病卒

右 國史館本傳

公諱傅爾字閣峰先世居長白山號富察氏祖額色泰從 太宗文皇帝用兵有大功子四人次子驃騎將軍噶爾漢輔 聖祖致太平生公公眉目英朗倨身而揚聲精騎射讀書目數行下年十六選入右衛侍 世宗於雍邸驂乘持蓋不頃刻離雍正二年補兵部右侍郎年羹堯以大逆誅窮其黨公謂廷臣曰元惡已誅脅從罔治爾事上久能知 上之用心儻諸公心知某冤而不言非

上意也諸王大臣以公語平反無算岳與阿者九門提督隆科
多子也隆柄用時禮下於公公不往及隆敗公爲 上言岳無罪

上疑公與隆有交故爲岳地謫戍黑龍江公聞命負書一篋步
往率家僮斧薪自炊先是公在 上前嘗論準噶爾情形 上不

以爲然用兵數年所言驗乃 召公還予侍郎銜命往軍前參贊
未行仍命入宮侍起居 上違和醫藥事皆公掌之十二年春

命公觀兵鄂爾多斯部落中途偵賊數萬掠地西走公卽赴拜達
理請於大將軍馬爾賽曰賊送死可唾手取也爾遠來雖兵疲猶
能一戰惟馬力稍竭願大將軍給輕騎數千助爾事成歸功將軍
事敗爾受其罪馬默然再三云不應公憤激自率所部出與賊戰

大敗之獲輜重牛畜萬計卒以馬病不能窮追事 聞 天子大
悅賜孔雀翎移佐平郡王軍謀斬大將軍馬爾賽徇於軍會賊有
求降意而盈廷諸臣皆欲遣使議和罷兵 上問公公叩頭曰此
社稷之福也 上意遂定卽 命公同都統羅密學士阿克敦往
時戰爭連年虜氛甚惡窮沙萬里雪沒馬鼻行者迷向認人畜白
骨而行公聞 命不辦巖徑上馬馳抵策零部落策零坐穹廬紅
璫珠爲褥金龍幡疊五尺高侍者貂蟬持兵女樂數行彈琵琶獻
酒公從容宣 詔音響如鐘酋蠻伏地觀者萬計皆膜手指夷言
曰果然中國 大皇帝使臣好狀貌也 詔劃阿爾泰山爲界策
零曰阿爾泰不毛之地中國奚用且我先人披荆棘厲血刃與喀

爾喀爭來之地甯忍棄之公曰以爲若不念先人耶若肯念先人更善昔我 聖祖征噶爾丹通好於若國若國主伐叛助順縛噶爾丹送來在途病死若國震於天誅卽獻阿爾泰地方中國受之置驛設守已有年矣今猶以爲言是非背 大皇帝乃是背其先人豈非大不祥乎策零語塞思以利害動公乃集十四鄂托十四宰桑合而見公曰議不成公不歸矣鄂托宰桑者華言十四路頭目也公叱曰出嘉峪關而思歸者庸奴也某思歸某不來矣今日之議事集萬世和好不集三軍暴骨一言可決而談談如兒女子吾爲而王羞也諸酋相目以退翼日策零如約繕表求公轉奏并遣宰桑同來獻橐駝明珠等物 世宗大悅赦下加公三級晉秩

都統 世宗崩 今上登極遷刑部尙書以誤舉參領明山失察
家人兩事落職入獄病旬部尙書孫公嘉淦奏請就醫私第許之
薨於家年六十二葬西山獨樹里子三人長昌齡官編修次科占
次查訥俱有父風公寬於接下太雜剛於事上太慤伉爽自喜好
聲矜賢簡節而疏目以故無平不陂福與禍俱丙辰會試榜發公
奏請搜落卷 上允之復取中三十餘人有廣東劉起振者年八
十八以公薦入翰林爲一時盛事所居稻香草堂有白雁峰龍峰
東皋南莊諸勝積書萬卷招四方人與遊性理經史詩文醫人日
者悉萃集焉果親王任事時謦欬所及九卿唯唯公在坐伺王發
聲聽未畢輒迎拒曰王誤矣王不能堪 世宗責公曰汝知果親

國朝通志卷之二十一
王何語而又誤耶公亦不能答也銘曰

公如劍其干將乎誰不欽以其光乎卒以折毋乃剛乎迷陽迷陽傷吾良乎固不如赤堇之錮而南山之藏乎

右神道碑袁枚撰

乾隆初旣命傅閣峰尙書爾等與準噶爾議和互通市易甲子歲噶爾丹策零旣歿不數年閒篡弒相仍辛未春酋長薩喇爾來降上素諳蒙古語已知其篡弒之情甲戌秋輝特長阿睦爾撒納款關請降欲請兵收復四衛拉時諸耆舊狃習辛亥敗兵事皆以不納爲便上深悉其情謂天與人歸時不可失乃內斷於衷立主用兵三載之間拓地二萬餘里天山雪窟無不隸我版圖其閒

雖有成功賞賚之費然視往昔邊防轉餉十不一二足見上之
貽謀宏遠非人臣所及也

右錄宗室昭榘撰

國朝詩林卷之二十一

三

陳應華

陳應華直隸安州人雍正二年一甲一名進士授修撰四年丁父憂七年服闋充日講起居注官九年遷贊善旋擢侍讀學士提督廣東肇高學政十年調廣韶學政十一年丁母憂十二年特命來京充一統志館副總裁官十三年充浙江鄉試正考官乾隆元年三月充會試同考官十月遷詹事府詹事充經筵講官入直上書房十一月擢刑部右侍郎三年充江南鄉試正考官四年正月賜羣臣宴賦柏梁體詩應華與焉尋遷戶部尙書三月充殿試讀卷官五年京師有富室俞君弼者死九卿俱往弔事聞飭查未往者惟應華等數人七年三月充殿試讀卷官四月奏言聞近

日民人踵至山海關者皆訕然而返恐有畱難勒指情事請行令直隸總督飭查近關三百里內居民出關種地者卽給印票并令該關副都統轉飭驗放下大學士等議行七月調兵部尙書八年以弟惠正任陝西按察使審訊王之博幼女被勒身死一案任性酷刑經巡撫塞楞額疏劾惠正具密摺申辨並帶部科揭帖與惠華先行酌商惠華以惠正既經被劾理宜候勘將原摺等寄回並未入奏事 聞 諭曰陳惠正以密奏之摺及用印之文齎送來京與伊兄陳惠華相商投遞與否伊既欲駁回豈有不奏知於朕之理況伊身爲大臣旣深知其非卽當據實奏參乃隱匿不發及朕詢問始行奏出大臣事君豈容如此詐僞夫父爲子隱子爲父

隱直在其中朕非不知以此風示天下然君臣之倫實在弟兄之上著交部嚴察議處尋議革職 命降補右侍郎十二年以議處江西總兵高琦武備廢弛一案違例邀譽應革職 聖駕由湯泉回至行宮惠華不偕九卿侍班指名尋覓良久始至 上切責之遂褫職十四年正月起爲都察院左副都御史仍在上書房行走七月 諭曰諸皇子等扈蹕行圍武備固當講肄而經書亦豈可暫荒卽不必日課新編亦應溫理舊業陳惠華身爲師傅自起程以來從未一至諸皇子讀書處及經詢問乃以腹疾爲詞豈途次每日皆患腹疾耶其曠職之咎實無可追著交部察議尋議革職 命從寬畱任二十年 諭曰上書房行走諸臣理宜勤謹供職

乃朕今日甫及未初偶至上書房並不聞皇子讀書聲行走各員
多半不到不意平日怠惰不能盡心課讀至此毓德養正之謂何
奪惠華俸三年二十二年升工部侍郎二十四年遷禮部尙書二
十九年以病乞致仕 允之三十七年恭祝 孝聖憲皇后八旬
萬壽 上命繪九老圖宴遊香山惠華列致仕九人中並 予優
賚四十四年卒子箴兵部主事

右 國史館本傳

王安國 孫引之

王安國江蘇高郵人雍正二年一甲進士授編修十一年擢司業十二年遷侍講九月提督廣東肇高學政十月擢侍讀學士十三年遷僉都御史仍畱學政任乾隆二年疏言丁憂官員回籍守制親赴省會易衣冠拜院司送禮赴席恬不知怪請嚴行禁止下部議行四年五月遷左副都御史十一月擢刑部右侍郎五年三月轉左九月擢左都御史會兩江總督馬爾泰覆奏廣東巡撫王椿徇縱各款 命安國審訊得實 召募遺著安國以左都御史銜管廣東巡撫事七年奏裁大埔坪大官田同知二員高廉運判一員三水縣西南清遠安遠曲江縣芙蓉英德正陽驛丞四員陽江

縣那龍司澄邁縣新安司巡檢二員崖州陵水感恩昌化等州縣
訓導四員部議 從之八年十月疏言江西應撥廣東酒糧十萬
石水陸所經湖灘踰嶺輓運維艱請改於湖南撥運一水可通實
爲便利議如所請又言廣東之欽州與安南接界商販出洋貿易
貧民業操舟者不可數計小汊甚多最難稽查請將瀕海船隻報
官印烙船戶水手出洋人給身照一紙歸時繳查暫羈者准於三
年內附載歸港並行文安南王必有印照方准收留卽有事不得
過三年從前出洋之人生長彼地者聽其勒限三年附載回籍違
者擊送正法疏入 上曰如此立法亦稽查之一端但須實力妥
爲之九年正月晉兵部尙書尋丁父憂廣州將軍策楞奏言安國

孤介廉潔歸葬無資與護巡撫託庸等助銀回籍報 聞十年十一月授禮部尙書十四年六月 諭曰前日召見尙書王安國伊面陳目下正屆科試各省學臣尙有未除積弊朕以事關學政令其繕摺具奏候朕降旨今伊奏稱上科鄉試之後頗聞學臣中因錄科例嚴轉開僥倖之門或於省會書院博督撫之歡或於所屬義學徇州縣之請或市恩於朝臣故舊或縱容子弟家人乘機作弊以致取錄不盡公明等語朕思歲科試爲士子進身之階果有前項諸弊豈可不嚴加懲飭但各省學政多員未必悉係如此自宜據實舉出庶幾懲一儆百若漫無指名卽行降旨或傳諭督撫查察亦不過文告故事其眞實作弊之人轉以指摘未及不知儆

畏而謹慎自持者又因無所區別不足以服其心乃面詢王安國
遲延觀望者久之始舉尹會一之向督撫求送遺才陳其凝之營
私孫人龍之濫取呂熾明知鄧釗子弟冒籍直隸不爲稽查改正
此數人者如陳其凝已經敗露孫人龍因考規避已經處分尹會
一鄧釗均經物故而鄧釗亦不可謂之朝臣王安國身爲大臣奉
旨詢問而所舉皆參革病故之員於學臣之見任者第諉爲無從
指實不知人臣事君大義凡所陳奏宜本公忠旣不可有市恩之
心亦不可存避怨之見王安國市恩之心縱無避怨之見不免朕
自臨御以來何事不由乾斷又誰能庇護私人傾排異己者而必
畏首畏尾瞻徇退縮乃至於是耶且市恩朝臣之處最爲關係夫

所謂朝臣者如大學士張延玉史貽直內廷辦事尙書陳大受梁詩正汪由敦等或足以當之此數人者果有恃勢夤緣各學臣果有徇情取錄王安國自應秉公指參如不確鑿指出豈朝臣之子弟皆不應循例與試而該學臣以朝臣之故轉可故意裁抑令不得與眾人齒耶朕用人行政悉出於至中至正不存成見無所假借王安國既有此奏各御史甯無風聞何以無一人奏及著傳諭申飭伊等如有所見不妨據實直陳但不可又如王安國以僮侗浮泛之詞塞責並諭各督撫一體留心稽查如學臣實有弊端卽宜糾劾毋得徇隱王安國之摺因朕問及而具奏故不議處二十一年十一月以疾乞解任 諭曰尙書王安

國夏閒曾奏懇給假回籍遷葬彼時以明春卽屆南巡面諭俟期
隨往今據奏舊病復發難於行動著准其給假解任調理俟可就
道自行從容回籍二十二年卒 賞給內庫銀五百兩料理喪事
仍 賜祭葬如例謚文肅三十年 上南巡 賜其子念孫爲舉
人

右 國史館本傳

乾隆二十一年夏吏部尙書臣安國言臣父卜葬於天長縣西有
年矣墨食不協迺有後艱願得歸遷兆域以展臣私 皇帝曰明
歲春將南巡江淮汝其從是兩盡也曷待之公拜稽首公素羸病
咯血越數月疾大作疏請解職 上知不能視事命從容就道於

是朝之卿士咸惜公之去而願公之遄有喜也二十二年春正月
病革訃聞 上爲之震悼賻內庫白金卅喪具孤子念孫奉遺疏
進得 旨賜祭葬如制閣臣考諡典以 聞應法 予諡曰文肅
於是念孫件繫公事狀以幽堂之石爲請由敦與公同年舉進士
同館同朝三十有四年熟知公行己立朝志節事業之素其敢例
辭按狀公諱安國字書城號春圃先世蘇州人明初遷高郵歷世
載德潛而未耀有諱開運者治尙書有聲州學是爲公會王父子
諱式耜通五經康熙戊午副榜貢生恬於仕進教弟子爲人師是
爲公王父公之考諱會祿守家學爲諸生研精理學教授後進雍
正癸卯進拔貢成均母車太夫人生公時夢得古鼎之瑞三世俱

以公貴考 贈光祿大夫禮部尙書妣 贈一品夫人公復推考
妣意以身所得 封妣贈外祖父母如其階蓋異數云公生而端
重不與羣兒戲七歲就家塾從贈公受書卽求訓誥大義十歲屬
文能自樹立恥爲勦說雷同年十九補博士弟子員第一康熙丁
酉舉鄉試雍正二年會試第一名 憲皇帝親策於廷讀卷大臣
有端人正士之目拔置一甲第二名及第授編修此公受知 憲
皇帝之始也旋充大清一統志纂修官又兼修八旗志書壬子典
福建試十一年遷國子監司業十二年充日講起居注官遷翰林
侍講奉 命提督廣東肇高等處學政在道升侍讀學士抵任擢
都察院左僉都御史當是時公受知寢深駸駸嚮用矣公之入詞

館也嘗語人曰初謁座主高安朱先生先生教之曰學人通籍後
惟畱得本來面目爲難退而自省面慙發赤由此立志堅定數舉
以勵學徒其教國子也嚴月課抑營競進諸生講濂洛關閩之學
不沾沾講義曰學當識之心見之行事講習討論求其是耳著書
垂訓當出之老師宿儒非學者所急也其任廣東學政也粵東山
海遼遠初分兩學使以寬考校之期公所部自肇慶以西達於瓊
儋皆濱海地文風視南海諸郡縣爲劣公首飭教官以敦品立操
爲多士先接諸生嚴毅有不可犯之色而往復辨論不啻父兄之
於子弟闢學舍爲齋拔士之秀者如干人餼其中親爲授業有司
以非禮挫折諸生者公爲執持不少屈其有敗羣而害於鄉者繩

以重法無所贖由是人知學使之任以整齊風教扶樹人才爲大
地方有司咸知所嚴憚云 皇上御宇元年澄鑒臣工 特命留
任四年報滿 召對晉都察院左副都御史旋擢刑部右侍郎轉
刑部左侍郎五年九月升左都御史公總率臺綱以激揚爲己任
會粵撫以某教官登薦剡公故吏也知其人昏耄不可用以實
聞 上嘉公不避嫌怨 命以原銜管廣東巡撫事公曰吾劾其
人而得其位是古人所譏蹊田奪牛也具摺力辭 上不許乃卽
任 陛辭之日 御製五言以寵其行聞有老親復拜豐貂文綺
之 賜粵東文武僚吏皆公所稔悉聞公至不自安者望風引去
公與約宥往咎許自新改絃更張治其骯髒無狀者他皆不問嶺

南物產素豐海舶往來貨費瑰麗風俗侈靡政治疲玩不飭習爲固然公極意整肅墜廢畢舉倉儲溢羨自制府以下月給白粲若干吏以故事白公曰非制也叱勿受比數年有發其事者監司皆坐重辟人益服公操積案塵委公爲之決疑牘省畱獄歲久不雨公禱於神弗應有盜案心疑其誣一訊得實乃大雨計典察吏不事苛刻嘗曰人才實難且官屢易吏益滋僞易者安知必優於去者乎莫若勸戒使知自勵故不以糾劾求赫赫名凡三年而嶺以南十郡三州咸治會丁贈公艱貧不能辦裝制府請於 朝致賻二千金乃得歸舟至南昌 內召爲兵部尙書又遷禮部尙書皆未拜居廬營葬旣訖事十一年服闋乃入 朝視事公故湛深經

術嫻習掌故容臺典禮公所議必斟酌古今折衷聖籍期於正人心明典制以胡贊 休明之運雖違俗侃侃弗顧也五禮自朝廷達於鄉遂載在會典卷帙繁重學士大夫莫能徧觀熟講民間吉凶婚媾各以其俗尙未遵一爰是取臣工士民所當循用者爲通禮頒諸郡邑公長禮部爲刪正繁曲一斷以 國朝制度 命充大清會典總裁官會典與通禮相表裏公因得一手編輯每會典進呈附以通禮悉稟 皇上睿裁改定凡十年而告成十五年充經筵講官二十年晉吏部尙書明年兼管工部尙書事銓衡具有成憲精密無可出入而臺吏舉疑似者因緣上下其手或瞰人所不知輒以牟利躁競者爲所愚弄公釐剔眾弊杜絕請謁雖親愛

不敢干以私而部事繁委心力俱瘁病有由來矣公起家寒素由
巡撫入爲尙書衣食器用不改於舊晏居退食矻矻如老諸生搨
秃管點竄丹黃循行書麓參伍鈎索不雜世事門館闕然中年喪
偶不畜侍妾一子甫龀相依同寢起其境爲人所難堪而公處之
自如十餘年如一日與人言謙和若不勝及臨事持論商推文義
意所不可張目抵几不少避事過了無芥蒂於胸中以是人皆知
公心乎爲國而非好爲佳岸與眾異趣也公清癯骨立疏髯灑
然望之嚴氣正性贈公以公年望五未舉子語公曰秋斂春生當
養生氣公因自號春圃以志庭訓其篤於踐履如此公所著書自
奉 敕修通禮會典外嘗欲兼綜朱子師弟問答之語裒其粹精

以附章句更取眾說之衷於朱子者嚴爲去取勒成一書而未竟其業公所重固不在此亦以見公志所存耳公生於康熙三十三年閏五月初三日薨於乾隆二十二年正月初八日得年六十有四元配車氏繼配徐氏又繼配徐氏俱先公卒皆 誥贈一品夫人子男一念孫女子一字朱元定卽公女弟之子也念孫將於某年某月某日卜葬公於某阡以三夫人耐嗚呼典型凋謝感愴何已然卓然爲一代完人終始蒙 恩哀榮兼備班行倚重皜無瑕尤在同譜所當致羨而無遺憾者也爰系以銘銘曰

北斗喉舌天官尊三槐世澤貽後昆珠浮璧社川獻珍唱第曾見五色雲峩峩千尺松蟠囷峭壁獨立無攀援嶺南開府廉石存秩

宗三禮和神人十年鉛槧資討論雲臺博士舌可捫上佐 天子
下臣民周官法度由睢麟山公啟事得二年介不戾物勇本仁不
茹不吐樊仲山拜疏請急宜 温綸騎箕盡軫悲朝紳楚山鬱鬱
淮水淪中有大鳥翔墓門君子有穀詒子孫摘詞無愧鑄貞氓

右墓誌銘汪由敦撰

王尙書安國字書臣號春圃先世蘇州人遷高郵祖式耜通五經
副榜貢生父會祿拔貢生教授百人爲名儒尙書稟承家訓熟精
宋五子書性孤介不苟合丁酉舉於鄉雍正甲辰會試第一名
殿試一甲二名授編修初謁座主高安朱相國相國曰學人通籍
後惟畱得本來面目爲難尙書竦然受教十年與福建試遷國子

司業十二年以侍講督廣東學政累遷至都察院僉都御史其教
國子必以濂洛關閩之書抑營競務實踐在粵嚴教官校士之法
闕院署西齋簡士之尤者親爲講授復周卹其貧使一意於學

今上卽位之四年入爲左副都御史晉刑部侍郎不踰年晉左都
御史巡撫廣東尙書之官翰林也孤介挺特如諸生時惟高安深
器重之亦未及薦也自司業爲侍講督學甫一年其晉學士僉都
又不過數月且方就道抵任無援於朝無推於眾皆出 世宗特
達之知及 世宗升遐我 皇上繼統澄敘百僚尙書方在五嶺
之表遂能以其素履結 主上知數月之間官五轉入總臺綱出
釐南服可謂直方大不習无不利高而不危極遇主之隆者也先

是撫粵者卓異非其人尙書糾之 上卽命代撫粵固辭不許至
則貸宿過予自新卻額餽鋤積猾理冤振滯興學勸農及計典察
吏不尙苛刻每歎曰人才實難官數易則民不靖而吏滋奸且大
吏平昔董戒何事也在任三載嶺表稱治八年 內召爲兵部尙
書丁父艱歸里服闋遷禮部尙書究心典制每有正議人不能奪
時聞有龍異撫臣疏請立廟祀又東粵請敕封雷祖悉建議闕之
其窮理持正類皆如此二十年夏晉吏部尙書尙書起家寒素由
巡撫入爲尙書衣食器用不改於舊公餘則杜門矻矻如老諸生
中年喪偶不畜妾媵子念孫甫齒相依同寢起者十餘年嘗欲取
朱子師弟問答之語裒其粹精以附章句未克就卒謚文肅

論曰予少從尙書贈公學每與尙書論道學之旨浩然知人之爲貴也尙書幼有操行以古人自期待居官時克稱其志迄今中外士大夫稱典刑者必先尙書尙書奏疏不存於家予特掇其行事著於篇待史氏采擇焉

右傳夏之蓉撰

文肅晚年充會典館總裁所撰欲上比周官公歿子懷祖好學深研經義小學尤精孫伯申以第三人及第春華秋實兼擅其長皆公之遺澤也

右湖海詩傳張維屏錄

公典試福建一榜成進士者四十大學士葛山蔡公與焉巡撫

廣東向例江西應撥廣東漕糧十萬石沂灘越嶺輓運維艱公請改撥湖南一水可通官民稱便公察吏不苟舉劾每日官數易則民不靜而吏滋奸且大吏平昔董戒何事也

右淮海英靈集張維屏錄

高郵王氏祖孫父子篤志傳經爲本朝儒門之冠其立朝亦卓有聲績不墜家風文肅公安國清操冠時每日出內直家不舉炊挈幼子同輿市餅餌數枚以代蚤膳履懿親王與之善嘗資助之公辭不受曰忝在九列不敢與王私交也公子石臞觀察念孫仕諫垣時以彈和相著聲望公孫文簡公引之則履道廣深風鑒明遠明刑典禮獨持大綱蓋三世青瑣百年喬木體用兼備讀書之

國朝書林典故卷之二十一
收效宜然彼劉歆戴聖輩抗顏大師望實俱隕恐仍是緣飾經術
澤古不深耳

右紀聞陳康祺撰

王引之

王引之江蘇高郵州人祖安國官吏部尙書自有傳引之嘉慶四
年一甲進士授翰林院編修六年充貴州鄉試正考官八年大考
一等擢侍講九年二月 駕幸翰林院與諸臣倣柏梁體聯句引
之與焉又以張說東壁圖書府五律分字賦之引之分得竭字禮
成 賜味餘書室全集暨茶綺箋硯等物尋充 皇朝詞林典故纂
修官三月京察一等六月升右春坊右庶子充湖北鄉試正考官

九月丁母憂十一年服闋會 皇朝詞林典故成下部議敘十二年五月補原官八月提督河南學政十三年五月轉左庶子十二月升翰林院侍講學士十四年轉侍讀學士十五年回京十六年充日講起居注官十七年五月遷通政使司副使十二月稽察右翼宗學十八年八月升太僕寺卿十月升大理寺卿十九年提督山東學政奏申嚴五童互結法令先期識認點名時挨次細認頂冒之劉雲漢等因是敗露治如律 硃批以實心整飭士習勸勵之先是河南滑縣教匪煽亂山左多從逆者 上命學臣撰論說以化之引之著聞 訓化愚論見利思害說進 御奉 命刊布二十一年十月遷京十二月擢都察院左副都御史二十二年二

月充會試知貢舉三月擢禮部左侍郎會福建龍溪縣知縣朱履中改教後因欠鹽課銀二千餘兩請以吏欠追抵不允遂訐藩司李廣芸任道府時有受陋規事總督汪志伊等劾廣芸解其職會鞠之知府涂以軼迎合志伊意偪令誣承廣芸故廉潔不能堪遂自縊事聞上命引之借吏部侍郎熙昌往按白其誣乃褫志伊等職以軼履中遣戍新疆引之等復言閩省士民數百請爲廣芸建遺愛祠上以斯民直道之公聽其捐建八月還京奏江蘇高郵等州縣低地因洪澤湖水漲淹浸命疆吏履勘撫卹二十三年六月充浙江鄉試正考官十一月以禮部覈議原任侍郎錢樾入祀鄉賢祠不置可否率請欽定下部議處引之降二級

任二十四年三月充會試副考官閏四月署兵部左侍郎九月教習庶吉士尋以萬壽節前遇忌辰不於先期奏請輒照常素服降正三品京堂又以罪應戍邊廢員朱錫爵呈進萬壽頌冊禮部一律接收下部議處十一月補通政使司通政使十二月授吏部右侍郎二十五年七月進爵秩全覽繕寫譌誤下部議處九月充寶錄館副總裁十月充武會試知武舉道光元年六月畿輔及山左旱蝗諭疆吏飭屬親勘搜除引之疏言捕蝗一事惟在辦理得法若專任胥役則蝗蝻未除而農民反受騷擾之害蓋胥役一經奉票捕蝗則計畝派夫藉端取費及率人撲捕則又故踐禾苗偏令出錢無蝗地畝亦復肆行蹂躪是爲民除害之事轉爲

貽害於民之事恭讀 欽定康濟錄捕蝗必覽所載捕蝗十宜以設廠收買爲最要之策其法或錢或米捕蝗一斗給以若干捕蝻一斗給以若干使百姓捕蝗而得賞則趨之如鶩不假胥吏之催促非惟受效甚速且免作踐騷擾之患請將捕蝗必覽 頒示直隸山東地方大員令其相度機宜速行籌辦 上如所請行六月充浙江鄉試正考官八月充國史館副總裁十二月充經筵講官二年三月轉左侍郎閏三月充殿試讀卷官八月署刑部左侍郎三年三月充會試副考官四月 仁宗睿皇帝實錄漢本告竣上嘉其恪恭將事辦理妥速 賜紗一端旋充教習庶吉士九月充武會試正考官時 聖駕恭謁 西陵 迴鑾抵黃新莊引之

等乘轎近豹尾槍後轎夫誼嘩降三級畱任四年二月禮部尙書汪廷珍奏題缺主事新例名實不符請確查更正下大學士軍機大臣吏部會議引之疏言題缺所以勵人才選缺所以敘資格乾隆九年定各部郎中員外主事題缺揀選保題行之四十年毫無流弊乃於四十七年御史李嗣勗有請定額外人員敘補之奏其意專爲捐納人員敘補易於得缺地步彼時吏部遽行議准摺內因有按其應得題選各缺一體統較先後挨次題補之語先後挨次應專指選缺而言題缺本無挨次之例不得含混牽入也迨四十八年吏部清書則例告成忽於除授門內增纂題補主事統較先後行走一條因譌成誤與揀選門內題缺本例相矛盾其實乾

隆九年所定乃斟酌盡善之舊章四十八年所增乃沿襲譌誤之
文也請如該尙書所奏會大學士軍機大臣以行之既久一旦更
改事涉紛更議乃寢四月 聖訓 實錄告成 上嘉其盡心編
輯在館四年始終經理其事 予其子候補主事壽昌遇缺卽補
先是吏部奏請官員遇生祖母之喪父故在先本員爲庶長孫者
令承重離任丁憂三年是年五月引之更定前議云孫之於祖服
止齊衰一年嫡長孫父故在先遇祖父母之喪則持服三年蓋以
承父之重與祖爲體宗祧大法於是乎在其於祖母從同者一本
相承敵體之義也至庶祖母非祖敵體固不得以承重言矣卽如
次子三子其受父母之恩與長子同若其身先死而父母後歿爲

其子者不能代服三年之喪且爲人後者爲本生父母止服降服
一年庶長孫之分原止儕於孫生祖母之恩不能加於父母蓋緣
情則罔極之恩卽終身不足以言報制禮則承重之義斷不能加
於支庶嗣後官員遇生祖母之喪其父先故別無與父同母之伯
叔本員於庶祖母爲長孫者無論嫡祖母是否見在槩令治喪一
年許其離任 從之十一月署戶部左侍郎五年八月署戶部右
侍郎十月充武鄉試正考官六年充殿試讀卷官七年五月擢工
部尙書七月充武英殿總裁十一月 賜紫禁城騎馬八年七月
承修 文廟碑亭引之等勘估草率下部議處是月 上面諭康
熙字典開有譌字今重加刊刻自應詳考更正引之校正二千五

百八十八條另輯考證十二冊進呈 欽定八月署戶部尙書九年署吏部尙書十年調禮部尙書十一年七月署工部尙書十月充武鄉試正考官十二年丁父憂十四年服闋補工部尙書尋卒 諭曰工部尙書王引之品行端謹學問素優由翰林洊躋卿貳擢任尙書方資倚畀茲聞溘逝殊深軫惜著加恩照尙書例賜卹處分悉予開復應得卹典察例具奏尋 賜祭葬 予諡文簡子壽昌河南按察使彥和安徽甯池太廣道壽同湖北漢黃德道

右 國史館本傳

王引之字伯升登嘉慶四年進士出朱文正阮文達兩公門 廷試以一甲第三人 賜及第授編修累官禮部尙書所莅皆能張

其職初伯升年二十一歲應順天鄉試下第歸急究心爾雅說文音學五書以求聲音文字訓詁之學越四年復入都以所見質疑於石臞先生先生喜曰乃今可以傳吾學矣遂語以古韻二十一部之分合說文諧聲之義例爾雅方言及漢代經師詁訓之本原且曰訓詁之旨存乎聲音字之聲同聲近者經傳往往假借學者以聲求義破其假借之字而讀本字則渙然冰釋如因假借之字而強爲之解則結籜爲病矣故毛公詩傳多易假借之字而訓以本字已開改讀之先至康成箋詩注禮屢云某讀爲某而假借之例大明後人或病康成破字者不知古字之多假借也又曰說經者期得經意而已前人傳注不皆合於經則擇其合者從之其皆

不合則以己意逆經意而參之他經證以成訓雖別爲之說亦無不可必專守一家則爲何邵公之墨守而已故其治經也請說並列則求其是字有假借則改其讀蓋熟於漢學之門戶而不囿於漢學之藩籬也伯升推廣庭訓遂成經義述聞十五卷經傳釋詞十卷精博過於惠戴二家凡前人誤解者獨能旁引曲喻以得其本原之所在使人頓解心折歎爲確不可易而又百思不能到使古聖賢見之必曰吾言固如是沿誤數千年而今乃得明矣此誠不可不開之奧矣阮文達謂恨不能起毛鄭孔諸儒而共證此快論者也高郵王氏自文肅公以清正立朝以經義教子孫至石臚伯升三世相承而其緒益拓論者謂本朝經術獨絕千古而王氏

一家之學自長洲惠氏父子孫外蓋鮮見六匹云

右事略李元度撰

嘉慶十八年巨逆林清以七十七人入禁門既殄定有議築圓明園宮牆高厚者有議增圓明園兵額者高郵王文簡公意非之具摺上 睿皇帝大動容召對良久乃罷 諭軍機大臣曰王引之乃能言人之所不敢言其奏牘何語海內迄今弗知而公之風旨可見矣

嘉慶己未高郵王引之秀水錢昌齡汾陽曹汝淵同入翰林是三家皆三世翰林矣科第清門衣冠盛事王定保摭言未有也

右紀聞陳康祺撰

國朝書目表卷之二

四

范璨

范璨浙江秀水人雍正二年進士改翰林院庶吉士五年散館以知縣用補順天大興縣十二年洊升江南廬鳳道乾隆元年超擢河南布政使四年調直隸布政使五年遷湖北巡撫六年五月奏漢陽府屬之漢口鎮商賈輻輳向多劫盜巨案武昌府屬之八吉堡地方瀕江居民俱假捕魚爲業乘機搶劫寢成積習見飭文武各官嚴行緝捕隨時分記功過如有功少過多委靡不振者文職入於計典武職入於軍政分別劾參 命實力行之六月以宜昌府屬之歸州州判張維漢牟利病商奏請革訊因疏陳歸州新灘地方險要川省商船路所必經值冬春水淺山石森立必雇寬本

地熟悉水性之人放溜過灘向有無賴棍徒強索不遂輒用破壞
船隻奪溜礮撞俟船貨漂沒羣相攫取以致商人視爲畏途州判
職分較卑不能彈壓請責成歸州知州及該管道府實力稽查並
分別條款刊立木榜俾商民得免苦累 從之十一月疏言宜昌
施南二府所屬苗疆地方例儲倉穀六千石見在發價採買惟該
處地寒水冷種植雜糧者居多兵民相處日久亦慣以雜糧充食
向無米商到境請改儲雜糧如所請行八年三月調安徽巡撫六
月奏安省上年被災鳳陽潁州泗州等屬有鰥寡孤獨窮民無告
者各省向有額外收養之例江南因耗羨不敷尙未舉行見值災
祲之餘亟宜設法安置 上是之九年三月奏常平倉儲所以酌

盈劑虛持平市價特是平糶之際價值不大加覈減則貧民不能
霑惠設或減價太過則營利之徒貪賤多買囤積居奇每見一州
一邑之間倉儲所蓄本足敷數月平糶往往減價過多一時競糶
卽報糶竣致貧民不得邀絲毫之惠惟查照上年秋成平價之情
形爲目前減價之成數如見在每穀一石較價平之時祇爭一二
錢者不必過減儻或收成之時價本不平見復一時驟長則減至
收成時之價值而止 諭曰所奏尙屬畱心須實力董率有司妥
帖行之六月 召還京九月授都察院左副都御史十二月河南
按察使王丕烈疏陳米價昂貴地方有司應諄勸益藏充裕之家
陸續糶賣并嚴行查禁勿使商販居奇部已議行璩以所論尙有

未盡奏言商販居奇如爲本地之商爲害尙淺如爲外來之商濱水州縣舟楫可通朝發夕至搬運一空應密諭富戶令其親自經理零星出糶固不可使近商囤積尤不可使外商遠運 上躉之如所議行十年二月御史彭肇洙奏請歲終令戶刑二部將各省旱澇豐歉及命盜案件多寡彙摺入奏藉以考察督撫得 旨允琛奏稱旱澇豐歉每年按省分注固可見民生之休戚察調劑之當否至以命盜案件多寡殿最各省大吏州縣官咸謂案牘紛繁關係上司政績勢必有意消弭巧爲迎合請 敕下各直省督撫嚴飭地方官務以實心行實政勿得瞻顧考成塗飾耳目 上從之五月遷工部左侍郎六月奏江南下江糧賦重於他省聞上

年收漕初開倉時印官駐宿倉所親驗米色書吏尙無閒可乘迨至漕糧緊兌之時印官不能親驗吏胥等遂多方刁難小民不能守候情願議扣自九五折至九折不等大漕旣畢所徵兵行局恤等項米石竟有扣至八折者請 特頒諭旨通飭有漕地方官於開倉之際大張曉示毋許額外需索如有刁難折扣等弊將官吏一併揭參 諭曰徵收漕糧弊竇甚多江蘇之漕甲於諸省尤爲積弊之藪朕亦知之范璨所奏著發出令有漕地方大小官員閱看嚴行釐剔如有仍蹈故轍者經朕聞知或被御史參劾必重加處分十一年請假回籍尋以年老休致三十二年卒尋 賜祭葬

右 國史館本傳

乾隆辛巳之歲恭逢 聖母皇太后七旬萬壽 上命文武廷臣
及予告在籍年七十以上者各九人賜游香山製九老詩以寵之
則資政大夫工部侍郎松巖范公與焉蓋公自丙寅蒙 恩致仕
至是以 慶典來朝獲廁耆英之會朝論榮之越六年丙戌十二
月有司以公卒聞 諭祭如例以某年月日葬公於木瀆之阡公諱
璨字電文一字約軒其曰松巖者以 上賜公松巖樂志額因以
爲號也系出宋文正公長子監簿公純佑之後十一傳至從源徙
麻源九曲里是爲公始遷之祖州同知能彥公之考也國子監生
必才公之祖也府學生允龍公之曾祖也祖考皆 贈資政大夫
河南布政使妣皆夫人公登康熙癸巳鄉薦雍正甲辰進士改庶

吉士以人才薦知大興縣擢知鄧州升知萊州安慶江甯等府分
巡盧鳳嶺道河南直隸布政使巡撫湖北安徽入爲都察院副都
御史工部侍郎在大興日部民阿青恣橫一日方理堂事突入搜
人公曰鼠輩敢爾縣令尙可爲哉卽閣署扉捕之鞠其奸狀境內
肅然縣有隱糧一案公白京兆發之藩司不悅方以他事去公在
廷有白公冤者特擢河南鄧州知州鄧旁邑巨盜張連膂力絕人
吏不敢捕公召瞽目退役以計擒而致之旁邑坐弛再脫公復以
計擒之副使廬鳳時境有飛蝗公禱於神自帥鄉農撲捕忽有蟲
似蝗而黑雜處蝗中三日齧蝗爲盡咸謂公誠感所致嘗自爲捕
盜捕蝗二記志其事其自楚移皖或挾千金追送江干麾之不去

公慮儻從爲奸自坐鶴首諭之視其舟去遠乃已所轄廬鳳泗滁
連歲災祲公念新舊並徵民力必困分年帶徵民賴蘇息又以江
表重地武備宜急日坐箭道分番練習一時營伍皆嫻於藝方是
時皆以公敷歷有年行駸駸大用矣果入參臺憲晉佐司空公感
激遭逢益圖自效如弛富戶囤積之禁酌命盜處分之條敷下江
收漕之制有見輒陳不敢緘隱旋以兩親尙在淺土特疏陳請遂
得蒙 恩卜葬並許歸田自公解組之後惟以經書督課諸孫不
問外事中間詣闕祝嘏者再恭逗 鑾輅者三 天章宸翰藤杖
如意文綺佩褰之 賜稠疊里門不可勝紀居平益以盛滿爲戒
潔清之操晚節彌勵菜羹蔬食不異寒素蓋仕宦京外者二十餘

年退養林泉者亦二十餘年公既貴顯讓宅於從父兄弟而自卜
居於吳興之南潯其卒之年距生於康熙庚申享年八十有七配
孫夫人子二人儀薰國子監生莛貢生皆先公卒孫三人墀城墀
皆國子生子於公爲鄉後學墀又媼也以公隧道之文來請因敘
其世次歷官行誼而系以銘銘曰

范由宋啟族爲吳望監簿子孫麻源再創公繼厥聲於宗有亢進
樹勳猷退懷廉讓始鏃詞鋒旋剗利器屈服市魁齟齬大吏治不
爲武盜以瞽致歲不能災蟲以類噬建身楚幕弭節皖城臣心如
水卻餽遊行誰偏飢餒公寬其徵誰弛什伍公練其兵旣長諫垣
游司邦土剔弊釐奸卽事條舉業著鼎鐘榮辭簪組潯溪之濱來

歸啟宇普天同歡 聖母萬壽公再趨 朝龐眉皓首 帝詔耆
成陟遊巖阜追媿唐賢得公而九自遷初服三返 鑿輿便蕃
寵錫照耀衡閭公戒驕溢益慎德隅閉門卻掃樂此桑榆湖公名
德累世相承衣冠蕃衍逮公復興園以義高山以 賜稱幽堂對
啟銘示昆仍

右神道碑銘陸燿撰

李清植子宗文

李清植鍾佐子雍正二年甲辰進士由編修官至禮部侍郎子宗文字郁齋乾隆戊辰進士亦由編修官禮部侍郎典試廣東陝西江南督學河南順天皆稱職能傳其家學

右事略李元度撰

安溪李文貞公孫穆亭少宗伯清植嘗視浙學閱三十餘年宗伯子郁齋少司空宗文繼之太夫人晉江黃氏就養官齋根觸舊事因命少司空建再到亭於學署聽事之西偏奇石修竹花木蓊蔚清流涓涓環亭如帶游者以爲勝觀今不可復問矣

右紀聞陳康祺撰

臣等不才，有不能盡其詞者，伏乞
聖鑒。臣等謹將所請開列於左。

三

國朝耆獻類徵初編卷七十六補錄

卿貳三十六

王引之

公諱引之姓王氏江南高郵人祖安國禮部尙書謚文肅祖妣車氏徐氏考念孫四品卿銜前分守永定河兵備道妣□氏公乾隆六十年舉人嘉慶四年進士由翰林院編修累官禮部尙書改工部尙書卒於位 賜謚文簡生乾隆三十一年卒道光十四年明年十有二月□□日葬於州治之 賜塋公典鄉試事四典會試事二藝自珍則其典浙江鄉試所得士公之學及其著書大凡嘗不以自珍爲不可裁而請之矣其行誼始末自珍又窺其數大端

矣將葬公第四子壽同則使自珍表諸墓自珍爰述平日所聞於
公者曰吾之學於百家未暇治獨治經吾治經於大道不敢承獨
好小學夫三代之語言與今之語言如燕越之相語也吾治小學
吾爲之舌人焉其大歸曰用小學說經用小學校經而已矣又聞
之公曰吾用小學校經有所不改周以降書體六七變寫
官主之寫官誤吾則勇改孟蜀以降槩工主之槩工誤吾則勇改
唐宋明之士或不知聲音文字而改經以不誤爲誤是妄改也吾
則勇改其所改若夫周之末漢之初經師無竹帛異字博矣吾不
能擇一以定吾不改假借之法由來舊矣其本字什八可求什二
不可求必求本字以改假借字則考文之聖之任也吾不改寫官

棄工談矣吾疑之且思而得之矣但羣書無佐證吾懼來者之滋
口也吾又不改又聞之公曰吾之學未嘗外求師本於吾父之訓
先是兵備公校定晚周諸子太史公書一時言小學者宗之公所
著書口卷謂之經義述聞述聞者乃述所聞於兵備公也通說四
十餘事又說經之大者在述聞之末又聞之公曰吾著書不惡放
其辭自珍受而讀之每一事就本事說之栗然止不溢一言如公
言公之色孺子色與人言未嘗有所高論吳譚年近七十爲禮部
尙書兵備公猶在比丁憂服闋再補工部尙書而公旋卒矣公終
身皆其爲子之年門下士私相謂曰以王公名位齒髮而辭色如
子弟所學殊與所養殊與其諸人論歸之師海內歸之福也與公

國朝通志卷之七十一
以事親爲讀書以讀書爲事親門內之事勉勉顛顛人知之立
朝循典常俟 乾斷無所表暴天下頗無由測公嘉慶十八年巨
逆林清以七十七人入 禁門旣殄定有議加築圓明園宮牆高
厚者有議增圓明園兵額者公皆不謂然具摺上 睿皇帝大動
容 召對良久乃罷 上諭軍機大臣王引之言人所不敢言其
事卒見施行與否海內弗知其奏牘何辭海內迄今弗知也由此
例之公之風旨其視徒表暴於道路者何如哉公配沈繼配范子
四壽昌彥和壽朋壽同范出孫七銘曰
璞之瑟瑟外有文也鏐之沈沈中有堅也君子肖之以事其親也
於乎欲事親者考斯欲事君者考斯斯人而不敢承孰爲大道

右墓表銘龔自珍撰

因明書錄解題卷之二十六補錄 二

皇朝通志卷一百一十八

三

國朝耆獻類徵初編卷七十七目錄

卿貳三十七

趙大鯨

高景蕃

尹會一

何宗韓

羅鳳彩

韓光基

姚永泰

邵泰衡

目録

國朝耆獻類徵初編卷七十七

通奉大夫前署江西巡撫江西布政使司布政使湘陰李桓輯
卿貳三十七

趙大鯨

趙大鯨浙江仁和人雍正二年進士改庶吉士五年散館授編修
十年充雲南鄉試正考官十三年充湖南鄉試正考官乾隆元年
遷右贊善二年大考一等擢洗馬三年七月充河南鄉試正考官
十一月命提督江西學政五年閏六月遷侍讀學士九月奏稱
文生降青之後對讀一次卽復附生武生例不對讀年愈衰邁文
理愈荒難望考復故武生中青社極多有入學已歷三十年未經

給頂者殊可憫惻請嗣後武生降爲青社如未滿十科仍照舊例
有歷三十餘年者准給衣頂至年滿七十雖未經十科亦准給頂
如所請行六年七月授少詹事十二月任滿回京七年六月充日
講起居注官旋擢太僕寺卿九月升大理寺卿八年二月授左副
都御史 命提督順天學政十二月疏言學政之職專司化導士
風整飭則民俗自必淳厚臣恭奉 恩命再膺斯任夙夜祇慎務
期於士習有所振作今將有關於士習者二條爲我 皇上陳之
一實學之宜崇也竊惟窮經爲學者根柢約其旨可以成文通其
理可以致用而性理一書學者潛心探討可爲經濟才華之本是
工夫俱屬切要欽惟 聖祖仁皇帝御纂四經性理功垂萬世

世宗憲皇帝諭令各省刊刻准人刷印我 皇上又特頒諭旨令各省撫藩留心辦理務俾士子易於刷印仰見 聖朝崇尚實學樂育人才之至意在東南各省久已家有其書而北方士子竟有未曾得見者皆因北地紙貴工本太昂之故臣前任江西學政時刷印四經性理祇需一兩六錢今直隸則需七兩有奇雖比之部定國子監經書之價已是減省而較之江西已四倍有餘矣臣莅任後卽支養廉刷印分發無如貧寒士子購買維艱雖諄諄勸令誦習究不能強人以力之所不逮請於直隸藩庫撥銀一千兩移交江西撫藩刷印其書交直隸藩司收存俟學臣帶往出考之處分發生童購買書價交還藩庫行之既久酌量停止如此則家有

其書人人得以誦習矣一劣生之宜做也學臣考試例須舉報優劣原令歲科兩次舉行後經禮部議准祇於歲試舉行一次比照三年大計之例也伏思舉報優生不妨寬其時日毋庸再議若劣生祇於歲試舉報則前後歲試往往有相隔二年餘者在不肖之生儘可任意妄行雖積惡自必敗露而以二年之久家庭則和氣多乖鄉曲則把持不一譬之父兄師長見子弟有過立當訓誨豈有遲之二年始行懲治之理且歲試爲諸生畢集之時固當加以勸懲而科試爲學臣再至之地尤爲訪聞詳悉請嗣後舉報劣生仍遵定例歲科並得舉行其科試舉報者不必於任滿時題奏俟後任學臣於歲試之後彙題如此則劣生時時知做矣臣莅任後

士子凡有違犯或立即斥革或發學戒飭總冀聞風知懼庶幾地方無紊庸之繁鄉里愚民免欺陵之患得科試再加整飭於士習大有裨益矣奏入 命與督臣商酌行之九年丁父憂服闕後因母年逾八十陳請終養 允之十四年卒

右 國史館本傳

乾隆十四年秋九月都察院左副都御史仁和趙公卒於里第越兩年其孤震以狀來請文其隧道之石余與公先後同官翰林以文章道義相勸礪歎治無閒自公之歿嗒然神傷踰時而不釋非予誰宜銘公者按狀公諱大鯨字橫山其先自蘭谿遷仁和祖啟裕以純孝稱父金章邑庠生隱德者年見推鄉里以公貴累 封

奉直大夫前妣宋氏妣盧氏皆封宜人公少時寓吳門受業何
屺瞻先生考貫經義史法博綜漢唐名人辭賦之文鉤校其理澤
以三代古詞粹如也雍正二年舉於鄉是秋會試中式出漳浦蔡
文勤公之門殿試二甲第三名賜進士出身改庶吉士時方
耕藉臨雍肇行典禮有合璧連珠黃河激清之瑞詞臣咸思以著
作襄泰運公勤修館職文術爛然每有撰述華瞻瀟雅爲同館所
推自授編修後試皆高等及今上卽位知公才首除春坊乾隆
二年五月試翰詹諸臣於乾清宮列一等擢司經局洗馬有松
華石研筆墨紗葛之賜十年中凡典試者三充同考官者四會
江西學政缺命公往既受事與諸生陳說學古之要敦行之方

和樂坦易拳拳媿媿若塾師然諸生中心悅服莫不躍然鼓舞成材者甚眾至今思公不忘也試竣請假省親而月還朝以少詹事充日講起居注官遷太僕寺卿復遷大理寺卿明年春晉都察院左副都御史旋視學京畿士類感慕一如在江西時乾隆九年八月遭太公喪歸里服闋具奏太夫人篤老狀請終養得旨允至明年得噎食證遂膈不起公爲詩工唐人應制之體而登臨遊覽之什亦溫雅有古致書法秀勁得趙董遺法與人交無宿諾余以詞館後進與公交居京師邸第比鄰過從甚密同典雲南試唱和之樂不減京師時及公歸里余方失怙在疚公歲數遺書相勞苦公捐館余哭之甚悲於孤之以狀來也追念平昔涕淚橫流

吾忍不銘公哉公生於康熙二十五年距其卒之年得年六十有四妻郁氏封安人有賢德子二人震太學生升乾隆九年舉人女二人俱適士族孫男三人女七人曾孫男一人將以乾隆某年月日卜葬於風篁嶺之原銘曰

大觀突兀三折淵淪篤生英雋爲時風麟簪筆朵殿摛文蔚新然藜天祿圖史載陳天子曰俞臨軒親試拔冠鳳池邦家之瑞皇皇者華時遣出使斗牛之墟掄才是寄公之訓士和風慶雲元氣所至靡不陶甄帝心嘉悅倚毗方殷不解于位臣職克勤非欲退閒全忠於孝將母情殷古人是做天不慙遺遠近爭弔卜兆旣吉聖湖之湄有堂有斧銘之幽碑西江學校青衿奉祠公之神靈

於何不之

右墓誌銘彭啟豐撰

本朝以文學受知 今上者禮部尙書沈公德潛詹事府正詹張公鵬翀而外惟副都御史趙公公名大鯨字橫山別字學齋雍正二年進士入翰林楷法秀潤如鋪春雲詞賦修意修言得沈隱侯三易法八試內廷皆稱 旨遷學士再遷大理寺少卿左副都御史提督江西直隸學政典雲南湖南河南三省鄉試四校順天鄉會科以太夫人大耄乞歸五年卒年六十四葬仁和某原安人郁氏附焉子二其次升官庶吉士公督學時遇諸生如弟子每校卷躬自點勘觀者相環拂衣觸几公勿禁曰取士易教士難使諸生

國朝詩集卷之十一
五
觀吾所以取知吾所以教也衡文頡頏顏澀不展臥記某卷佳起
再誦再加墨擢之如不及待旦者然性峭急無威儀送客輒走客
前客或坐未起必問有餘語乎趣爲我言不然時寔事適可以行
矣人有誣諉不可者謝之已負諾責捫胸苦記必踐之而后食飲
大中丞永貴公弟子也將撫浙來見公公問君往政將奚先日劾
貪吏公笑曰貪吏賊入己者勿劾也永愕然曰何謂也公曰賊入
己而不分潤大府則大府久劾之矣不待君往也今巧宦全取之
民而半致之上已潤其餘或且全致之上以遷其官是暗劫民財
納己爵也不見捕盜者乎胥篋百萬有所私焉不敢目攝之其所
勦詰擒獲以上計者皆竊鈔攘雞者也君將奚擇焉永再拜曰微

先生無能言及此者敬聞命矣既抵浙延公萬松書院教諸生先是主教者面柔曲容濫等公以爲設書院所以待高才生非養簞人子若不以才取而徒哀其窮故收之是恤孤非養士也於是申良拉枯無所聽請及見士又僞士大不悅飛言如雨公不爲動不數年所嘘揚者異日視者九卿三司茂才高等均從窮約致顯貴紛然麟鳳羣翔而詬公者如秋蟻冬蠅漸滅殆盡或至今猶堙沈藍縷嗚呼公人倫之鑑果何如也枚未遇時袖文質公公奇賞之枚乞一授餐所公唯唯朝送枚出暮聘已至卽今大宗伯稽公家也公卒時太夫人年九十餘故遺表曰沐聖世如春之澤小草長榮奉慈親垂暮之年反哺難遂誦者皆爲泣下銘曰

無亢不中無過不庸不惡不仁而曰好仁其所好者亦朦朧黜黷
蹇駕應龍斬曲檣扶青松此豈吾一人之爲而佻險者竟鶴鶴僂
僂以相攻彼何人斯其爲飄風吾見鏘金腰玉而拜華表者如萬
壑之朝宗嗚呼雖余小子之不肖亦咨嗟涕洟而執筆以銘公

右墓誌銘袁枚撰

高景詩

嗚呼此我入朝卓行君子高怡園先生之墓也先生姓高名景蕃字崧瞻一字怡園先世爲宋勳戚從高宗南渡先居山陰後居杭州高祖咸臨知福建永安縣死土寇之難世祖章皇帝贈按察司僉事諡忠節祖鳳盤父組綬俱郡文學以先生貴贈中憲大夫先生行二中雍正二年鄉會試選山西樂平縣知縣莅任六年內遷刑部湖廣司主事再遷山東道監察御史出爲福建興泉永道內補禮部主客司郎中提督四譯館兼鴻臚寺少卿以老乞休家居數年年七十八卒先生生有至性七歲喪母哀毀如禮事伯兄甚敬少授生徒貧有賈人持金勾爲立傳堅拒不可興泉永道

駐廈門海商聚泊多奇服怪民以故前官來荷校列戟甚威先生切屏撤正己以臨廉從蕭然不市外洋一物宵小之因緣爲姦者望風遁矣雖柔和不妄笞督而摘伏如神樂平縣有殺人於郊者主名不立先生診屍旁顧一氓曰殺人者汝也訊之果然或問故曰眾人惶視渠獨斜睨而遠探必有內怯於心者是以知之眾皆讐服刑部吏或受賕舞文持決事比來試先生先生笑曰某事當引某例不得以疑似者相溷吏張目不能對先生短身而癯與下僚言若恐傷之獨斷斷於大府前福建總督陳文肅公將劾某今賊先生廉其誣爭之陳不聽公不畫諾陳不得已事竟寢而心不悅奏先生不宜外任賴天子知其賢雖內用眷注愈隆庚午

命典雲南鄉試庚申甲戌 命提調會試十六年 命送暹羅
國使者二十年 命送琉球國使者先生隨事盡職在滇以得人
稱行海外萬里酋夷欽其清嚴 今天子元年冬余試鴻詞科報
罷落魄無歸飯先生家三月有餘至今常涕泣追想長安米貴今
古同然以素不識面一男子又不任典籤記室而許其虛糜雁鷺
之餘食棲依宇下此何如恩德耶雖客邸清貧除脫粟外絕無一
豆一觴而先生每食必偕明日將有早朝會鞠諸大事裁瀹二雞
子以自供而猶必推盤讓客至於再四嗚呼仁哉所著六經疑義
錄十六卷秋水堂古文十六卷駢征集十二卷愛日軒詩餘十二
卷娶恭人黃氏生五子三女以某年月日葬某銘曰

輪方不行悲古難聽吁嗟乎先生而竟以亨我爲之銘先濯筆於
滄浪之水清

右墓誌銘袁枚撰

尹會一

尹會一直隸博野人雍正二年進士分部學習三年授考工司主事洊遷員外郎四年充廣西鄉試副考官五年授湖廣襄陽府知府九年調江南揚州府十一年遷兩淮鹽運使乾隆元年二月詔署兩淮鹽政十月加僉都御史銜尋授兩淮鹽政二年以淮揚運河定於冬月挑濬鹽船不能轉運諭令預運貯存以濟民食恐商人辦理竭蹶著將請單呈綱兩次應納錢糧緩至加斤時一體完納會一陳奏鹽務三條一本年丁巳綱淮南正運鹽七十萬引預運如之丙辰綱應運殘鹽四十萬引數多期迫竈戶乘機擡價各場產鹽不敷商艘趨運不及查運河東岸邵伯鎮迤南向有

陸開係淺水由荒稻河歸江之路上接邵伯諸湖下通泰壩鹽河擬於挑河時在陸開南北各築攔河壩一中畱運河五六里蓄水濟運鹽船直抵揚州灣頭自灣頭陸運至三汊河所畱運河五六里三月復挑濟無誤一預運鹽堆貯儀所鹽垣夏多滴耗請六月以前每引加鹽二十五斤七月以前加二十斤八月十五日以前加十五斤十五日以後加十斤商本庶免虧折一鹽課例於九月奏銷十一月考覈但丙辰綱鹽課特旨以新頒引鹽展限至乾隆二年二月奏銷丁巳綱新引見今領運至九月爲期甚近請寬至三年二月奏銷四月考覈下部議行三月入覲詔署廣東巡撫會一以母老疏辭調署河南巡撫五月奏言豫省關兩歉收應

緩徵以紓民力又平糶必需見價窮民尙費經營備領則急補目前請不拘存七糶三之例視地方緩急斟酌多寡以資接濟從之十月條奏農務一天時宜乘也力田貴早豫民有時宜播種尙未舉耜時宜耘耔始行播種旣失天時遂違物性臣擬分析種植先後刊諭老農督率勸勉仍遵 聖諭州縣官不拘時日輕騎減從親往查勘如有工本不敷許借倉穀秋後補還一人力宜盡也南方地狹人稠一夫所耕不過二十畝力聚工專故所獲厚北方地闊一夫所耕自七八十畝至百餘畝不等力散工薄故所獲少臣今勸諭田主多招佃戶量力授田以三十畝爲率則地少力多可望豐收分多種之田以給無田之人則游民亦少一樹藝宜廣

也豫省多鹹鹼沙地去其三尺而鹹少則潤澤臣今責成鄉耆保
長勸諭就隙地視所宜之木種植則地無曠土一女工宜勤也查
江南蘇松繁庶而貧民俯仰有資者女子七八歲以上卽能紡絮
十二三歲卽能織布一日經營供一人之用度有餘今棉花產自
豫省而商賈販於江南豫省民家有機杼者百不得一擬有力之
家多造機杼貸於織戶量取賃值或動支無礙公項製造給領俟
一年後繳還原項並廣勸婦女互相做做得 旨酌量行之不可
存欲速之心不可有終怠之念若民不樂從不可徒繩以法也十
月實授河南巡撫三年 上以河南山東歲稔 敕會一等籌補
倉穀十二月疏言本年河南豐收以直隸江南災歉商販較多價

值日昂臣飭各州縣如本地價昂平糶不敷買補卽赴鄰邑穀賤處採買儻鄰邑價亦相倣卽將不敷銀報明在各屬盈餘銀內通融撥給再豫民食用以麥爲上高粱蕎麥菽豆次之臣飭地方官遇穀貴卽查明雜糧若干可抵穀一石參酌糶貯來春先儘雜糧糶借以濟民食秋後仍照時價買穀還倉至新舊民欠穀石河北三府被水無穀之民須糶雜糧糶穀還倉出入多虧折遲延請照穀價折收雜糧來春一體糶借秋後易穀庶民易輸將而倉儲不至虛虧 上嘉之時安徽按察使張坦麟條奏農忙停訟如商賈爲奸牙串騙侵吞適值農忙恐日久比追無術請酌改定例以恤遠人 敕各督撫酌議會一議應如所奏並請以訟事而妨農宜

停准理若因農事成訟時當農忙尤宜准理速結奏入報 聞又
奏報勸諭鄉農栽植榆柳棗梨一百九十餘萬株 敕各督撫勉
爲之四年五月黃沁水漲沿河武陟原武鄭州封邱陽武儀封蘭
陽考城虞城夏邑災會一奏請酌借倉糧資助籽種趕種秋禾七
月奏預籌民食事宜一請免關稅以通商也祥符等屬被水民食
仰給鄰省江南則由淮河之正陽關達陳州府之周家口山東則
由運河之臨清關達彰衛二府之楚旺道口等處懇 敕免收稅
俾商爭趨以資接濟一及時興工以代賑也各屬城垣倉庫監獄
河渠隄岸營房傾圮淤墊宜動帑興修俾貧民力作餬口一酌量
買運以備賑也州縣儲穀如不敷賑糶請於本省就近可通舟楫

處不論常平穀撥用並動帑採買米穀雜糧以濟民食一多種菁菜以助食也查蔓菁春食苗夏食心秋食莖冬食根昔諸葛亮行兵所止乃令軍士種植取其易長而可食見飭被水州縣酌購菜子給貧民廣種以備採食部議從之七月奏辦災賑事宜一成災地方漕項錢糧豆米照地丁例按分數蠲免一應納漕項緩至次年麥收後徵解一未被水州縣應辦漕糧截畱本省以備賑糶額徵八旗飼馬黑豆七萬石水淹無收祈 敕產豆省分採運詔從之十一月御史宮煥文奏劾會一莅豫至本年報盜至百六十餘案本年秋審招冊所擬情實可矜改駁至三十餘起疲玩不振貽誤地方 諭曰尹會一自任豫撫以來屬員怠忽不知畏懼

其讞獄弭盜多未妥協今年豫省各屬被水災重所辦賑務之事亦未盡善實少幹濟才能不勝巡撫之任但其爲人忠厚謹慎非有心誤公者可比著解任來京候朕另用尋授左副都御史五年會一母年七十餘疏請終養上以會一孝其母而母亦賢賜詩曰聆母多方訓於家無閒言休風誠所勵百行此爲尊名壽輝比里孝慈萃一門猶聞行縣日每問幾平反九年丁母憂十一年三月服闋授工部侍郎十月提督江蘇學政十二年上敕各省學政於考試文藝後就御纂四經中酌量舊說別異處摘取數條發問荅不失指者生童卽予補廩入泮會一奏言一等生員槩補經解似凡列優等者盡能記誦傳說未爲覈實請於冊報生童

另期發問經義答不失指者卽以經解二字印記卷面衡其文藝
酌予補廩入泮其不在冊報者不必槩補經解下部議行十三年
四月轉吏部侍郎仍留學政任閏七月卒 諭賜祭十五年江蘇
巡撫雅爾哈善奏准入祀名宦祠子嘉銓由舉人授刑部主事游
遷郎中乾隆二十八年擢山東濟東道三十二年遷山西按察使
三十三年擢山東布政使旋調甘肅三十九年授大理寺卿四十
年以甘肅布政使任內失察邪教部議降調得 旨留任四十三
年二月以失察河州逆犯蘇阿洪邪教交部議尋議革任 詔免
以原品休致四十六年三月 諭曰今日回蹕保定有尹嘉銓遺
子至行在奏爲伊父尹會一請諡一摺已屬狂妄易名賜諡國家

大典豈可妄求而又不親來乞恩本應交部治罪因批諭念其爲父私情姑從寬免若再不安分家居則罪不可追及次閱伊爲父請從祀孔廟一摺更爲肆無忌憚愚而好自用矣從祀宮牆非人品學問純粹無疵久經論定者孰敢輕議是以國朝從祀寥寥甯缺無濫今尹嘉銓奏稱欲爲湯斌范文程李光地顧八代張伯行並請從祀而廁以伊父謬妄殊甚湯斌在皇祖時曾經侍讀理密親王乃不盡心輔導以致理密親王縱欲敗度終於廢黜於保傅之義有虧至范文程本係明季諸生臣事我朝致身通顯雖非如洪承疇等身事兩朝可比然於純儒品節不無遺議若李光地於耿逆時遣人齎送臘丸告變外間傳有不與陳夢雷一同列

名之事於公論亦未允孚至顧八代不過通曉繙譯滿漢文義居
官循謹本無行誼過人之處又張伯行雖操守廉潔亦人臣職分
當然其奏參噶禮一案實因噶禮欲尋其釁勢難兩立因先發以
爲自全之計不得以其託名講學輕議入祀以上諸臣皆朕素所
深悉乃尹嘉銓以休致在籍人員不知安分妄言無忌實屬從來
未有之事甚至奏稱伊父尹會一蒙御製詩章褒嘉稱孝已在德
行之科自可從祀等語尤爲狂吠罪不可逭尹會一從前經朕賜
詩獎勵原藉以風示羣倫而已其於巡撫任內亦僅循分供職後
因不能勝任改用京員尙不能如湯斌等諸人今尹嘉銓乃敢妄
稱已在德行之科旣爲請諡復請從祀如此喪心病狂毫無忌憚

其視朕爲何如主耶且尹嘉銓託於行孝爲此妄奏天下之人孰非人子乎使令皆爲其父求諡求入祀孔廟亦可行乎否則爲不孝卽得罪仍託於爲父則朝政不至於大紊乎此而不嚴行治罪何以彰國憲而懲將來尹嘉銓著革去頂帶拏交刑部治罪並將朕批示其兩摺發交大學士九卿閱看四月諭曰尹嘉銓由落第舉人用爲部屬游歷藩司內擢京卿因其年老無用准予原品休致伊父子兩世受恩理應感激安靜居鄉以終天年乃敢令伊子齋摺爲伊父尹會一請諡又請從祀孔廟肆無忌憚罪無可道因降旨將伊拏交刑部治罪並飭查伊家有無狂悖不法字跡隨據英濂袁守侗於伊京寓及本籍查伊所著各書則其中狂妄

悖謬之處不可枚舉而其尤甚者如朋黨爲自古大患我 皇考
世宗憲皇帝御製朋黨論爲世道人心計明切訓諭乃尹嘉銓竟
有朋黨之說起而父師之教衰君亦安能獨尊於上哉等語古來
以講學爲名致開朋黨之漸如明季東林諸人講學以致國事日
非是可鑒戒乃尹嘉銓反以朋黨爲是顛倒是非顯悖 聖製誠
不知是何肺腸且其書又有爲帝者師之句則竟儼然以師傅自
居無論君臣大義不應如此妄語卽以學問而論內外臣工各有
公論尹嘉銓能爲朕師傅否昔韓愈尙言自度若世無孔子不應
在弟子之列尹嘉銓視朕爲何如主耶又其書有名臣言行錄一
編將本朝大臣如高士奇高其位蔣廷錫鄂爾泰張廷玉史貽直

等悉行臚列無論此諸臣居心行事未能及古名臣且以本朝之人標榜當代人物將來伊等子孫恩怨卽從此起門戶亦且漸開所關朝綱世教均非淺鮮卽伊託言倣照朱子名臣言行錄朱子所處當宋朝南渡式微且又在下位其所評隲尙皆公當今尹嘉銓乃欲於國家全盛之時逞其私臆妄生議論變亂是非實爲莠言亂政又尹嘉銓在山東藩司任內面求賞戴花翎且敢於朕前肖述伊妻言狀稱若不得賞卽無顏相見等語彼時毫不知恥而朕之深鄙其人實從此始也然尙欲全伊顏面從未宣示廷臣昨日廷訊伊仍自述不媿此種行徑豈講學者所宜爲也至託言夢中神人告以係孟子後身當傳孔子之道又朕御製古稀說頒示

中外而伊竟自號古稀老人且欲娶年逾五十之女爲妾所行種種乖謬出於情理之外其他狂悖誕妄見於所著各書者尙不一而足正所謂少正卯言僞而辨行僻而堅爲所必誅者伊從前經朕屢次保全休致回籍本可終其餘年俸逃法網乃惡積罪盈自行敗露此實天理昭彰可爲天下盜竊虛名妄生異議者之戒連日命大學士九卿等公同反覆確訊奏請加刑訊問朕尙未允行將伊書內狂悖各條復加親訊伊俯首伏罪自認爲欺世盜名之小人懇求立置重典以彰國法等語經大學士等按律定擬奏請凌遲處死家屬緣坐覈其情罪卽予磔誅亦所應得當此光天化日之下此種敗類自斷不可復留尹嘉銓著加恩免其凌遲之罪

改爲處絞立決其家屬一併加恩免其緣坐此朕爲世道人心起見不得不明示創懲以昭炯鑒凡內外大小臣工天下讀書士子均當洗心滌慮各加儆惕引以爲戒若再有如尹嘉銓之狂悖不法一經發覺斷不能復邀尹嘉銓之末減也翌日又諭曰昨閱尹嘉銓自著年譜載其在大理寺卿任內與刑部簽商緩決一條夫明刑所以弼教準律定罪或輕或重執法者惟當斟酌平允不得意爲軒輊俾犯者輸情服罪無可市恩亦無所歸怨至問刑衙門內而法司外而地方官遇有案件自應悉心研究彼此講論務使情真罪當卽司官之於堂官州縣之於府府之於臬司臬司之於督撫凡有寬嚴不中之處皆許其據案直陳繕上官意涉偏私

有乖允當司員等所爭果是原可不隨同畫押或竟自行陳奏朕方將嘉其持正不阿卽外吏亦准直揭部科秉公嚴議要之皆爲公事起見不得少涉私心也夫從寬從嚴視其人之自取而寬之嚴之均無所容心於其間若議獄者不求其平甚至自記是出市恩沽譽之私其可乎若朕亦欲博寬大名將秋審情實人犯全予免勾其爲陰德豈不更大而使國家刑章憲典竟成虛設有是理乎昔雋不疑每錄囚還其母輒問平反幾何人歐陽修文亦載其母述父之言謂求生不得則死者與我皆無憾此雖婦人之仁就其所言亦祇爲辨明冤枉者言之耳非謂弗冤枉者槩當從輕縱也若如尹嘉銓所載是博寬厚之名而歸過他人且以所辦公事

退而私自記載以冀無識之徒妄爲稱譽其心尙可問乎朕矜慎庶獄惟期大中至正雖匹夫匹婦之細亦必確覈案情折衷至當若徒以姑息爲念致失情法之平乖止辟之義朕不爲也因尹嘉銓欺世盜名妄行記載一事明切宣諭內外問刑衙門將朕此旨各錄一通懸之公署觸目警心其矢詳慎以臻協中之治其凜遵毋忽又諭曰尹嘉銓所著各書內稱大學士協辦大學士爲相國夫宰相之名自明洪武時已廢而不設其後置大學士我朝亦相沿不改然其職僅票擬承旨非如古所謂秉鈞執政之宰相也況我朝列聖相承乾綱獨攬百數十年以來大學士中豈無一二行私者然總未至擅權執法能移主柄也大學士之於宰相雖

殊其名而其職自在如明季嚴嵩豈非大學士而其時朝政不綱
竊弄威福至今稱爲奸相可見政柄之屬與不屬不繫乎宰相大
學士之名在爲人君之能理政與否耳爲人君者果能太阿在握
威柄不移則備位綸扉不過委蛇奉職領袖班聯如我 皇祖聖
祖仁皇帝 皇考世宗憲皇帝暨朕躬臨御四十六年以來無時
不以敬 天愛民勤政爲念復於何事藉爲大學士者之參贊乎
卽如傅恆任大學士最久亦僅以盡忱勤職自效今伊身後十餘
年朕於庶務豈致廢而不理乎昔程子云天下之治亂繫宰相此
祇可就彼時朝政闕冗者而言若以國家治亂專倚宰相則爲之
君者不幾如木偶旒纒乎且用宰相者非人君其誰爲之使爲人

君者深居高處以天下之治亂付之宰相不可也使爲宰相者居然以天下之治亂爲己任而目無其君此尤大不可也本朝協辦大學士職本尙書不過如御史裏行學士裏行之類獻諛者亦稱爲相國已可深鄙而身爲協辦者亦儼然以相國自居不更可嗤乎從前傅恆於乾隆十三年扈從東巡因行在令其暫攝協辦事務其時直隸布政使長垣遂以大學士稱之伊深以爲愧如此庶爲知恥識大體之人而此外諸臣恐未必皆然矣乃尹嘉銓槩稱爲相國意在諛媚而陰邀稱譽其心實不可問至名臣之稱必其勳業能安社稷方爲無愧然社稷待名臣而安之已非國家之福況歷觀前代忠良屈指可數而奸佞則接踵不絕可見名臣之不

易得矣。朕以爲本朝紀綱整肅，無名臣亦無奸臣，何則？乾綱在上，不致朝廷有名臣奸臣亦社稷之福耳。乃尹嘉銓竟敢標列本朝名臣言行錄，妄爲臚列，謬著品評，若不明闕其非，則將來流而爲標榜，且而爲門戶，爲朋黨，豈不爲國家之害？清流之禍乎？總之人君果敬天愛民，勤政自能庶事，惟和百工，熙載，否則雖有賢相，亦何裨政事？我國家世世子孫，以朕心爲心，整綱紀而勤宵旰，庶幾永凝。庶命垂裕萬年，所謂無疆，惟休亦無疆，惟恤可弗凜歎。

右 國史館本傳

蠡吾李璠剛主嘗言北方少俊，不肯自混於俗者，博野有尹元孚。余心識之，乃無因緣會合。乾隆二年春，元孚自淮南入，覲再過。

吾廬終未得面以 聖天子大孝實行三年之喪余時領武英殿
修書事請於二親王就直廬持服時未再期余不出元孚無公事
不得入也五年春自河南入爲副都御史始得相見方是時元孚
通籍已十餘年顯功名於襄漢兩淮開府河南海內賢士大夫計
數大府中人物指再三屈則必及焉而元孚深愧不能有所樹立
以負 天子特達之知蓋少孤貧太夫人口授論語卽知孔子之
言不可違悖旣長篤信程朱之書謂治法不本於三代皆苟道故
自服官日取漢唐以來代不數見之人以自律故自視若粥粥無
能者一旦入長御史爲耳目之司竊幸得自展布而太夫人老疾
不能就養京師未數月卽以終養告歸居五年太夫人考終服未

闕 天子豫虛少司空職以待之及赴闕未踰旬 特命視學江
南十二年秋莅金陵八月望前六日諸生旣入棘闈質明操几席
杖屨徒步造清涼山下潭亭余尙未起童奴白有客徑入不知其
爲大人也及相見北面再拜曰曩在京師母命依門牆先生固執
不宜使眾駭遽今里居無嫌且身未及門心爲弟子久矣蒙授喪
服或問吾母之終寢處食飲言語得無大悖成身之德豈有旣乎
時余治儀禮因以相屬欲共成一書作而曰生未暇及此也往者
巡撫河南會凶饑未遑教治居臺四涉月而聞母病今使事畢歸
廁九卿陪奉廷議非忘身忘家不足以荅主知若不能自樹立徒
附先生經學以垂名抑微矣必衰老或以不職罷歸然後可卒先

生之業越日又獨身前來從者一人余畏邦人疑詫乃掃墓繁昌
入九華山以避之而私心竊幸吾君求賢若渴又得一支柱名
教之人也未幾有旨復掌江南學政逾歲七月按試至松江遽
瘧寒疾卒於官前是月特晉少宰人皆曰上之信用益切矣嗚
呼惜哉元孚始以吏部郎中出守襄陽漢水暴上壞護城石隄修
建萬山至長門近十里分植巡功民忘其勞已調揚州適荊州都
統西征取道漢江飭造浮橋吏民惶急乃竭誠修禮卒改令以船
濟儿利害切民未有聞而不諮知而不行者所屬皆羣聚而禱祠
焉其治揚州亦然就遷鹽運使尋擢巡鹽御史晉中丞積弊一清
導商民以節儉而身先之及開府河南開歸諸郡大水自劾

列賑卹之宜 天子一切報可約法十六條兼用北宋富公弼趙公抃救災事宜而令離鄉求食者有司隨在廩給開以作業俟改歲東作資送還鄉則古法所未備也以是災民無一出河南境內者元孚性清白坦易遇事必行其心之所安少時授經邠州語生徒假館於張氏以奉母凡七年不忍一日離也其居官每夕必以所措施詳告太夫人意或未愜則跪而請罪不命之起不敢起官中祿賜出入壹稟於母非請命妻子不得取尺布錙金日用之外多布之治所爲揚州兩營河南撫標置舉本各二千金日凡卒伍必使衣食得自適乃可以法繩完城濬河建橋梁設津渡修學校立書院勸蠟祠表前賢舊蹟賜高年布帛寒者衣之疾者藥之故

民皆感興政教信從其在鄉則族人皆授以田使自耕以食而執其契立義倉義學拯危濟困不可勝紀用此仁聲義聞播流海內顧公用方久任督府再舉以自代高公東軒以宗程朱志相得總督護軒嘗以公事過博野登堂拜母孝德上聞乾隆八年冬十有一月天子特賜太夫人御製詩及楹聯天下傳爲美談最其生平以與眾人絜度則行旣成名旣立功業亦有所表見矣而每爲余言其胸中所蘊蓄尙未見其端倪此余所以心孤氣結涉月踰時而不能自克也其入 覲初 命巡撫廣東 陛見陳母老不能遠行故有河南之 命禦災捍患日不暇給尙於其隙布周官溝樹之法編甲戶以詰盜命州縣皆分四鄉立社學簡有德行

者爲社長朔日月半書其孝弟敬敏任恤者與其放逸奇褻爲患
於鄉里者有司巡問觀察因事而勸懲之行之數月罷民竦惕禮
俗烝變而尋內 召始入臺卽奏人主一言天下屬耳目焉今方
甄別年老不勝任之員而知饒州府事張鍾又以年老命改部司
旬日間前後頓殊恐羣下無所法守 上嘉納之其在河南嘗奏
睢州湯文正公宜從祀孔廟視學三吳首謁東林道南祠舉舊典
荅諸生再拜凡試舉士旅見皆然頒小學以明程朱本意聞隱士
是鏡廬墓三年親訪於舜山薦舉以礪士行旣邁疾自知不起草
遺疏言任賢納諫始終一意以立誠爲本旬日中無一語及家事
卒之日晨興盥漱扶杖至東齋郡守入見子嘉銓侍尙爲辨人心

道心汗出露衣請解衣少偃息不可扶劫入寢移時危坐而逝時
年五十有八所述君鑑臣鑑士鑑女鑑增定洛學編北學編已鈔
版居憂讀禮作從宜錄侍養五年讀三禮筆記及與師友論學語
藏於家嘉銓承父學欲繼其志事水漿不入於口者三日朝夕米
飲不過一溢淮商致五千金曰大人生不取一錢今以此賻堅拒
之曰受一錢何以對大人之靈聞者莫不感動以爲君子有子元
孚名會一雍正癸卯進士先世山西洪洞人遷保定至曾祖諱先
知始爲儒祖諱澤升皆邑庠生父諱公弼早世並 贈河南巡撫
母李氏庠生諱宗白女 旌節孝累 封太夫人祖妣某氏曾祖
妣某氏 贈夫人妻蘇氏處士昂女以馳 贈未受巡撫時 封

而前巡鹽用御史中丞所加級 封一品夫人子二人長嘉銓雍
正乙卯舉人次永銓早殤次啟銓承蔭女二人以某年月日葬於
某鄉某原銘曰

以人視子所受於天實厚且全而子自視則終其身而缺然子志
方盛道若可達而不假以年有子象賢尙無恨於幽埏

右墓誌銘方苞撰

乾隆十有三年秋七月十五日江蘇學臣少宰尹公會一以勤事
卒於官 上聞深悼 諭頒卹典於其葬也遣參政陶正中齋
詔書以一品秩致祭 聖天子之優禮大臣及公之所以靖獻厥
職者可謂交至矣子嘉銓以余嘗知公因余銘神道碑石爰按公

之學行而志節事功亦因以悉焉公生三歲孤賴太夫人苦節以長以教自幼時安詳恭敬知公者謂公植志行身胚胎於此矣甲辰成進士補吏部考功司主事丙午典試粵西遷員外分校丁未會試得人胥極盛 天子知其賢欲試以事尋外遷公性純孝奉太夫人以行初任襄陽郡勸農興學表前賢舊蹟荆蜡祠修復郊外老龍隄延袤十里至今民賴焉攝荊州所屬石首縣饑民聚眾萬餘聲言劫倉穀公單騎行縣饑民擁集公和顏諭以吾爲救汝民來汝民毋自絕繫其強悍者於石開倉次第給之眾悅服公之爲政恩威並濟動之以誠類如是移守揚州一如所以治襄者已遷運司晉巡鹽御史治所胥在揚境公以此地浮華商俗靡靡尤甚

一切規爲服物導以節儉而身先之恤商裕課積弊一清乾隆八年入覲超遷廣東巡撫公以母老不能遠行辭天子鑑其誠改河南公益感奮夙夜兢兢倣周官體國經野及古封疆大臣教養斯民之道推誠竭力作監司郡縣先逾年開歸諸郡大水遂上章自劾列賑卹十六條悉報可舉凡宋富文忠趙清獻救災事宜悉次第施行而災民求食者令有司隨所至安輯改歲東作資送還鄉民皆得所公旣奉太夫人行自出守荆襄至汴梁開府凡所設施每夕必以告得則喜偶有不合太夫人對案輟食公輒長跪請罪不命之起不敢起其善政爲過往大臣所推重公必告以稟太夫人教以故四方傳誦慈孝聲徹內廷四年召補副都

御史公送太夫人還博野迺入臺 上方甄別老不勝任之員而
饒州知府張鍾儀以年老改補京員公上疏以人主一言天下屬
耳目今旬日間前後違反恐無以昭法守 上嘉納之未數月聞
太夫人病乞終養 天子閔其孝許歸逾年 特賜太夫人 御
製詩章聯額公家居五年侍養之暇益讀書稽古於聖賢義理精
微道學源流派別息心探討以折其中所嘗體驗於身心日用者
往往見諸讀書劄記師友往復及生徒講習單詞隻義悉中要領
蓋公之志致遠蘊積深矣其誠心養志則自太夫人就養所至節
俸錢賜高年布帛賜恤窮民接濟兵食所費不貲比歸故里設義
倉義田興義學由近及遠惟太夫人命諸凡默體無言相時軫恤

謂老人非此不樂也九年七月太夫人卒公性純孝當五十不致
毀之年毀瘠特甚幾不勝喪十一年三月服未大祥而 上注念
公虛少司空以待十月乃之官不數日有督學江蘇之 命欽承
聖訓以教士求賢爲務念此邦文勝不可不風以質行士子入
聖之功始基端在小學常講求服習敦厲學者至是適功令考試
嚴奉行益力本范文正公作秀才時以天下爲己任頒示秀才
樣子先以立志歸於立身中閒條貫立德立功立言三不朽胥以
文正事實之每接諸生誠勉切至嘗言小學書是做人樣子文正
是做秀才樣子由斯二者相觀而善不十年世教興人才出矣初
下車謁東林書院講學於依庸堂舉舊典荅諸生再拜訪故潛德

碩學從祀道南陽湖處士是鏡品端學邃廬墓隱舜山公至卽親訪薦於朝江甯前少宗伯方公苞經學湛深治三禮尤嚴喪葬嘗授公所著喪禮或問公居喪深所心佩至是造門請益事以師禮皆足以風世十三年四月特旨遷少宰仍畱學政上故嚮用公論道經邦將計日以待顧所望於培植人才之意蓋尤亟矣溽暑按蘇而疢作猶力疾閱卷至松益劇自知不起草遺疏勸上任賢納諫意甚懇切蓋公平生矢忠報國之誠所未盡達諸當宁者大端略見於是卒之日距始生康熙辛未年五十有八以明年二月庚子葬東章新阡公字元孚號健餘其先自山西洪洞遷博野曾祖諱先知祖諱澤升皆庠生父諱公弼早世以公貴俱

贈資政大夫河南巡撫曾祖妣李氏繼趙氏祖妣王氏俱 贈
夫人母李氏 旌節孝累 封太夫人娶蘇氏 封夫人子三長
嘉銓雍正乙卯舉人揀選知縣次永銓殤次啟銓承廕女三孫八
所述綱目君臣士女四鑑呂語集粹續洛學編續北學編居憂讀
禮輯喪葬從宜錄督學江蘇頒學約十條最合古賢造士法皆已
刊纂道南編續讀書劄記與師友論學語暨詩古文集藏於家公
學宗洛閩行在孝經焯焯在人耳目事功所至有成績書其尤切
民生有關世教者至志節故不待言掌齋數載洗手奉職既歿商
士思公培恤恩以五千金購嘉銓泣辭曰此何可以累公當年節
操槩可知矣惟是平生大志受 兩朝知遇之所蓄積於心不負

吾君以不負所學蓋嘗與余深論之然竟施焉其未究此余於公之卒所爲拊心流涕歔歔長太息也嗚呼曷可以無銘銘曰
聖學如綫是生賢詰仔肩彝教爲士表的世途嶮巖宵小蠅營公自披誠天開日明帝心簡在正直是與焯焯諭祭觀者如堵於惟純孝邦家之光有子廬墓哀動彼蒼嗚呼是亦足以徵諸天道而信我公之死而不亡

右神道碑銘王步青撰

尹氏故山西洪洞人後遷保定之博野九傳而至公之曾祖邑庠生諱先知有隱德鄉里咸稱之祖諱澤升邑庠生父諱公弼業儒以公貴俱贈河南巡撫母李氏庠生諱宗白之女旌節孝

封太夫人公生三歲而孤太夫人苦節食貧口授論語諸經教之
以義方其所以課督之者甚嚴其於四方之士必賢豪長者然後
與之交故卒其所成就爲天下之碩德名儒公旣長爲顯官而太
夫人猶嬰兒視之有不當其意太夫人輒對案不食公惶悚卽長
跪以請不命之起不敢起也蓋太夫人之教與公之孝相賴以成
此其所以名動天下上徹於 天子之視聽而四方尙德之君子
咸願與之交歡而每以不得見公爲憾者也公諱會一字元孚別
字健餘登雍正甲辰進士補吏部考功司主事典試廣西升授考
功司員外分校會試易經房得人稱最盛 天子以爲賢出知湖
北襄陽府公之治襄陽多出太夫人經畫郡人佩其德作賢母祠

而刻石以紀其事公辭之甚力不能止也城有老龍隄起萬山迄長門延袤近十里皆壘石爲之五月漢水暴溢隄石盡傾公出帑金重爲修治至今民賴焉又建八蜡廟於城南社稷壇西以爲民祈報之所然其費乃皆出於官而民不勞襄陽有書院而士人或無書可讀公爲購經史百家藏於中以資諸生之貧乏者治西三十里有山隆然相傳爲諸葛隱居公建草廬其上其慕尙古之賢豪類如此知襄陽五年 天子以爲賢乃移守揚州而是時西方方用兵公以料理軍需畱襄陽明年閏五月始至揚州至則濬兩城之市河通舟楫以爲民利而以城西保障河襟帶蜀岡田疇藉以灌溉乃爲父其淤澱以資市河之蓄洩民咸賴之往年鱗魚初

出漁人取以獻豪貴之家有賞至數十金者公躬節儉以化之適
同年生以是爲饋餉奉太夫人命堅辭不受既居揚之二年天
子以爲賢於是卽以爲兩淮鹽運使郡之東舊有安定書院歲久
傾毀公與商士撤而新之而揚州之士子多興起於學公少而卓
犖多才遵太夫人朝夕庭闈之訓言動皆必以禮稍長讀書益悟
浮華放浪之非深究伊洛之源流蔚爲儒者宗師其學以誠爲本
遇人無等夷一待以肫懇之懷故士之得於目見耳聞無不推爲
長者而性又至孝其事太夫人誠至禮備上達九重自世宗
憲皇帝已知其賢能數畀以重任至今上卽位尊崇孝養推恩
錫類愈加顯擢於是使督理兩淮鹽政加僉都御史公以私販之

多由竈戶之私賣餘鹽請自今鹽有餘則出官錢買貯之以配商引而私販賴以稍息踰年遂超遷河南巡撫公膺特達之知益感奮自勵推誠竭力勇於爲忠至則備陳恤民之宜與士民約法六章勸建營倉以濟兵食豁減陳畱閩鄉之額徵諸所施設便於民者甚眾而是時河南開封等處四十七州縣大水漲溢公勞心焦思謀所以撫綏之方甚備其大略曰無食者暫予以一月之糧曰無居者暫予以葺屋之資曰緩徵曰減糶曰貸倉米曰移他郡之粟曰畱漕運曰助籽種曰勸富民使之相周曰假富民有餘之居爲貧民旦夕棲身之地曰建棚舍以安流亡曰免米稅以通商賈曰及時興工以資丁壯曰多種蔓菁以代穀食曰捐施藥餌以療

疫癘日延諸生協力以供稽察凡此規條十六事而要以因地隨時便宜行事爲本故其所全活甚夥至今居官者多奉以爲法河南素多盜災禋之後滋益多公廣爲捍禦清保甲考客舍申夜禁又於伏牛大隗重山險隘之區增設巡檢官而盜亦不能爲民害公心虛善下平生遇朋友相規以善則喜動顏色其賑水災也有諸生郭善鄰等四人陳救荒之策公卽延入訪問多出公之已行者而公與之言終日不厭也公之爲治一以仁厚愛民爲務而臺臣或言公好爲寬縱乃入補副都御史是時上方甄別官司年老不勝任之員而知饒州府事張鍾又以年老令改補京員公上書以人主一言天下屬耳目焉惟協於克一然後能使臣庶信從

今旬日之間前後違反恐無以昭法守也 上嘉納之公矢心以誠其平時爲人謀或與人言無不周詳切至其在 君父之前尤懇懇款款言人之所不能言 上亦以此信任之屢稱其忠厚謹慎公性和易與人交上下一無所忤至守國家之法雖當世之巨公貴人不能奪也公在臺甫及半歲正色直言百官敬畏其風采上亦方嚮用公而公以太夫人老病遽請歸養 天子鑒其誠許之卽日就道朝士多嗟歎以爲賢公旣歸博野太夫人喜不自勝病亦尋愈公侍養五載暇時益讀書稽古究斯道之指歸務在躬行實踐所與四方之士大夫往還書問無非相規切以義求所以行身植志之方質疑辨難一以明道爲己責而因以興起鄉里

之後學公少時嘗讀義田記慕范文正之爲人俊見朱子社倉益
欽仰其懿範其知襄陽旣五年祿俸稍有餘卽勅立東章義倉以
周給里黨東章者公所居博野之邨也至是乃復捐千金以修博
野之縣學又勅立博陵社約使相勸以善而同里赴約者十二人
又勅立博陵義館請有道而能文者一人爲之師而同里來學者
十七人蓋公之誠心愛物不私於一己類如此乾隆九年七月太
夫人卒公旣性純孝而太夫人之賢又爲近世所希有公感生成
之德當五十不致毀之年而哀毀逾於尋常遂得疾時時發作而
治喪之事一準古禮經及朱子所輯家禮喪禮久不行公乃斟酌
古今之宜而變通之著從宜錄乾隆十一年三月公之服未闋也

而天子卽授以爲工部侍郎俟其服闋赴任及是冬十月乃之
官未踰旬而天子使督理江蘇學政江蘇文勝事煩劇公倡以
質行乃申明小學之教以孝弟忠信安詳恭敬平生所以自策厲
者與諸生共相勸勉公素慕望溪方先生先生方以老家居公按
行至金陵請益先生以公有使命辭以他出不見公曰無害吾以
親師也若有言當奏之天子耳翌日公止騎從於外徒步直造
其廬親操几席杖履北面再拜願爲弟子先生乃置酒歡然而罷
聞陽湖有隱君子曰是鏡者敦行孝弟講學於舜山去江陰使院
三十里公親枉車騎過訪旣歸卽草疏薦之當是時公年已五十
七官至少司空矣而禮賢樂善孜孜如此戊辰之夏天子復擢

以爲吏部侍郎公校文詳慎每去取一人必反覆移時積勞損氣是時六月天方暑疫癘盛行幕中同事半已病而公亦感風成疾公恐精神之不及試事之不詳上負 聖天子惓惓以作養人才相委之至意且憂且懼遂至不起然自得疾以來十二日假寐寤言大抵皆公事也至其家人生產未嘗一語及之公爲 今天子之所深知眷注優隆使其歸 朝方將任以論道經邦之職而公既卒矣嗚呼是豈獨一人一家之不幸也哉公娶蘇氏子二長嘉銓雍正乙卯科舉人次啟銓廕生女三長適國子生刁世瞻次適幹林院庶吉士勵守謙次幼未字櫪獲與公子嘉銓遊其見知於公自始至今十六年矣公之言行得之於聞見者爲多今公之卒

也樾適在使院中故爲條次其大略如此使世之有道德而能文章者得以考焉

右行狀劉大樾撰

尹先生名會一字元孚別號健餘保定博野人幼孤貧事節母李太夫人以孝聞登雍正甲辰進士授吏部考功司主事遷員外郎丙午典試粵西丁未分校禮闈胥得人出守襄陽攝荊州府石首縣饑眾萬餘洵洵以浮言相煽動先生單騎宣慰之賑撫其眾而收其簧鼓倡首者眾立解移守揚州尋擢兩淮運使晉總鹽政加僉都御史揚俗汰侈先生躬節儉屏絕餽遺俗爲少革乾隆二年入覲巡撫廣東以母老辭上閱其情爲改河南北宋以來理

學之傳河南爲盛明道伊川康節同源派衍歷金元明代不乏人而國朝湯文正潛庵張清恪孝先耿嵩陽逸庵尤爲後起卓卓先生慨然以振興絕業爲任增訂洛學編以詔學者立五社簡好脩良士爲之長月朔望長吏集諸生講論德義因以察鄉之孝弟任郵與罷吏不率者而勸懲之逾年教化行倣周官溝樹畜牧比伍保愛之法以劭農靖民紆徐布之政成而民無擾開歸水上章自劾因採宋富鄭公趙清獻救災事宜損益之條爲十六次第請行皆報 可是年不知有災內遷御史中丞甫數月以母病乞養得允歸築健餘堂以奉太夫人先生自早歲受書及通籍歷仕至開府未嘗一日去太夫人膝下其承顏養志雖年五十依依猶嬰

亦其居官行政每夕必告太夫人有不合或爲輟食則長跪不敢起以故先生之孝與太夫人之賢聲聞士大夫上達 天子御製詩章扁聯卽其家賜之當世以爲榮先生旣家居侍養之餘益博稽古人微言奧義息慮以求其精有所得著之讀書劄記立其學社招生徒相與講明義理之學學者翕然從之置義田以睦宗族設義倉義學溉惠其鄉里嘗曰爲學務在力行徒尙空言無益也太夫人卒哀毀壹衷諸禮服闋之歲 上預虛少司空待之旣卽任 命督江蘇學政先生以江蘇文勝實鮮敦厲小學之教舉蘇人范文正公爲秀才法其晉接諸生温温然復舊典答其拜也方望溪屏居清涼山下先生舍騶從手操几杖造其廬請以師事聞

陽湖是鏡隱居有孝行親詣舜山訪之遂以薦於朝其敬德樂道虛己善下類如此晉少宰仍畱學政尋卒於官年五十有八遺疏以任賢納諫爲言言不及私上聞悼惜賜一品諭祭於是鄉人請祀於鄉所歷治地皆以名宦請祀而蘇人兼祀之道南祠以配前賢先生之學淵懿純粹不爲岸異於古今人學術純駁審慎別擇之而未嘗顯言攻斥曰吾惡從來學者好爲謾罵也自居鄉莅官外建節內長耳目咸卓然有可稱道而自視欲然若毫無所得諸己而設施於世者望溪先生以是亟稱之所著有文集十卷詩草三卷奏議十卷劄記語錄讀書筆記凡十七卷講習錄二卷從宜錄一卷尹氏家譜八卷賢母年譜一卷撫豫條教四卷尺牘

四卷君臣士女四鑑錄凡十六卷增訂洛學編五卷北學編三卷
呂語集粹四卷重訂小學纂注六卷近思錄集解十卷並行於世
續北學編云

右學案唐鑑輯

公莅官遇水旱災太夫人必跽禱烈日甚雨中家眾恐致疾羅跽
挽掖終不起常應時而得所求太夫人通文史憫民俗怙侈縱逸
作女訓質言十二章以勸懲之陋俗丕變顧尙書琮久任督府再
舉公自代高相國斌以宗程朱志相得總督直隸時嘗以公事過
博野登堂拜母孝德益上聞太夫人以女子而能先天下之憂
每闕邸報至聖制惇大必三拜稽首以慶臣下有讜論訐謨必

再拜稽首偉哉淵乎公母子定心若此則所見於行事抑又其淺
焉者矣

右事略李元度撰

臣等謹將... 奏

三

何宗韓

乾隆三十六年陝西文縣鄉賢大理寺左少卿何公之仲子渾以辛巳進士除廣東從化令將行介富陽董中允來謁曰先大夫之歿也有行狀有墓志有傳雖然嘗乞傳於太僕陳先生兆崙業許我而未就也今先生已矣願以屬吾子予惟古之人不傳人又國史三品以下例無傳傳略而墓表詳乃爲文以塞其請公諱宗韓字桐藩一字對溪以廩膳生舉康熙戊子鄉試雍正甲辰成進士授禮部額外主事明年補儀制司主事又明年充山西副考官又明年遷祠祭司員外郎除江南鳳廬道按察司僉事入爲刑部福建司郎中旋擢大理寺左少卿 予告歸此公出處厓槩也進士

釋褐爲主事者需在部習掌故第隨人畫諾無可否三年後予眞其能者始判牘時此制未定值重修會典自朝會郊廟壇壝至鄉會歲科試諸條制皆公釐請增定冊庫失金冊一鑄印局大使逮繫同官引罪請劾公抗言舍盜不問卽誅大使何益請會咨提督九門勒番役緝之已而果獲盜堂上官益器重公有欲舉公牧令以應 詔者大宗伯蔚州李公持不可曰是豈百里才耶少宗伯江都唐公又以公賢能最 召對稱旨除分巡鳳廬道僉事巡道治鳳陽督關稅稅口數十處官吏都藪爲利苛覈毛髮公務持大體處膏不潤正羨悉貯之官又以養廉額未定首請歲支二千金而絕所部供餽朱家口湖水決入安河壞泗虹田舍州牧言涸出

地七千四百頃河臣言新淤湖田九千三百頃可起額佐河費公將以去就爭而太恭人訃至 詔在任守制假四月治喪事竣莅官力陳泗民之苦有重糧既報淤而又報涸者也有賠糧本未涸而報涸者也夫一地二糧與無地有糧民弗堪也淤則淤涸則涸所不爲民者有如水於是按圖冊審面勢於安河兩岸每里封一大墩以碑記每戶封一小墩以旗記得地一千二百七十頃而向之詭報者十七八皆烏有故大學士尹文端公時撫江蘇以勘挑宿淤地邀公問狀輒太息以爲賢然公猶以瀕水地渰涸不常爲念歸田後恭遇 今天子特免湖河淤地錢糧見邸報感泣如身受也嘗奉檄查太平府及泗滁和三州逋賦分民欠官侵吏蝕爲

三等以別償免鳳陽饑撥賑米未至發倉粟便宜應之河南大水
饑民就食江淮間者日數百千人公率屬爲粥以食或留養或資
送贖其已賣之小口甚夥資送者日限程四十里壅滯不得前進
令倍行者予二日糧官民便之所全活無算六安潁亳間故盜藪
公以淮水自豫入潁至盱眙老子山入洪澤湖迤邐千餘里致疎
防援遂勅議置哨船增營汛其要害移文武員弁駐之裁道役及
所屬蠹役千餘人曰此盜媒也驅歸農可矣於廬潛金斗河於宿
引城北小河與滄雎二水通又鑿桃溝燕子口以洩蕭徐永城之
水於英山請折漕價以甦艱運又言虹縣小河淤淺水發輒成巨
浸疏小河以分洩於淮疏舊溝以全洩於汴則虹不受水而靈璧

兼受其利議雖格不行而公之心則已瘁矣文縣自前明王侍御
繼禮以甲科起家後二百餘年至公而始 賜進士復釋褐甫四載
卽歷監司願性樸愿少結納又任事已銳不求合上官其奉 命
入覲也上官特以部民籲畱爲紆半載限旣官西曹 上垂問淮
南治狀公臚實以對 上顧廷臣曰鳳廬號難治何宗韓在官六
年實心整頓而人反議其短長何也尋以甘肅普蠲地丁條銀率
眾表謝 上曰陝甘迺竟無大僚卽何宗韓可用遂擢少廷尉大
司馬彭某以事置議或欲甚其罪公徐曰罪不至甚甚則不平入
人罪以媚人不可其長卒上之 上弗以爲是而公屢沐異數二
年中從耕藉扈 駕上 陵侍經筵又請罷六曹委署官以重職

守皆得 旨允行人謂 上將大用公會足疾乞歸歸而不復起
嗚呼豈非命歟公十二歲試輒冠童子科旋喪父每作文長慟獻
總帳前守部日以太恭人春秋高家貧將乞歸侍而淮南之 命
下遣長君歸爲迎養計并盡室以行憚暑埃佳秋發板輿而太恭
人疾遽作每語及銜恤若初喪足未嘗輕出城市過其廬淵然惟
吟誦聲人有不善惟恐聞於公爲相語曰不畏王公怒但畏何公
知王蓋時宰也其學以忠恕爲主著弟子錄者先後數百人必先
以行誼相激厲乞休後置義田廣族葬焚貸券倡修文廟及陰平
橋人或以是矜式公而不知公學問之本與夫大節所存爲不可
沒也公所著族譜若干卷敦仁堂集若干卷以康熙十七年月日

生乾隆九年月日卒十二年月日葬文臺西北阡先世常熟人明
洪武初孟文公始遷秦八傳而至呈圖是爲公曾祖祖道亨邑諸
生父帝錫扶風縣教諭其在太學時與長洲韓文懿公友善也母
陶太恭人配歐陽恭人公計偕後代公侍太恭人以終有孝稱後
公三年卒子三長溥丙午舉人終江西臨川縣知縣次濬庠生次
卽渾女二適某某孫五汝楫汝梁汝杭汝枋汝權曾孫四子竊按
公之遭逢與其行誼庶可以不朽惜生晚不見公觀從化君之旌
然卹然旣葬二十餘年而不忘其親嗚呼其亦足以知公之教矣

右墓碑吳省欽撰

皇朝通志卷之二十一

三

羅鳳彩

原任宗人府府丞 晉封通議大夫羅公以乾隆三十七年二月初六日卒於石屏里第公孫慶恩湛恩會恩甫罷春官試居京師以原隴西令終養在籍公子元琦書來請曰願表公墓余於公爲鄉後學里居相接既識公子元琦於五華書院近又獲與諸孫遊知公者莫余若其可以辭謹案狀公早歲受知於學使張公目爲國器雍正癸卯舉於鄉聯捷成進士教習景山學有成效初仕西曹一以矜恤爲主嘗平反疑獄忤司寇某不爲動卒以此受知憲廟擢臺諫司封駁視振視漕查旗務巡中城所至有聲其視學山左也頒教條表節烈除弊寶絕包苴殫心校閱振拔孤寒待士

嚴而有禮東人官於朝者至今稱之曰吾山左學政之肅自公始也雍正甲寅以內艱歸乾隆二年起復入刑垣未幾洊擢宗人府丞旋假遷葬歸引疾不起計公歸蓋三十餘年矣公生平所言於上者不爲矯激然皆知其忠而不阿所施於下者不求顯名然皆知其順而不苟兩入臺垣務持重凡所陳奏必切事理封事上皆焚其草余後公二十年職是官乃所聞於臺中諸先達有公子元琦來狀所不及者公早年力學耄而不倦詩古文超邁卓朗然雅不欲以文藻傳蓋剗華就實所性然也嗚呼其諸不言而見之躬行者與余爲揭其墓曰今之所稱矯焉立異者其措注之方本原之地固不可誣也居平張目掀髯侈談天下事及小遇事變猥瑣

嘖嘖咋舌不能下而盛德之士嘗斂手低眉事會所及順以集之而已而有不可必達其志如公者豈不遠哉今春會恩銜公命屬書於余蓋公築堂既成而自顏曰景石曰吾慕萬石君之爲人也而公子元琦試吏事則教以競爭鬪捷非所尙必如何武無赫赫名而去後常令人思者嗚呼此足以知公矣公諱鳳彩字苞儀號竹園其世族載安州陳宗伯德華所立傳及公門下士閻少司空循琦所作墓誌中

右墓表周於禮撰

國朝正史卷之二十一

四

韓光基

韓光基漢軍鑲藍旗人由副榜貢生於雍正三年補驍騎校四年補副參領旋補佐領六年擢協領旋授正紅旗漢軍副都統八年署刑部右侍郎九年授戶部右侍郎十年授鑲藍旗漢軍都統十一年三月兼管刑部侍郎事六月奏刑名重案三法司應行會勘乃都察院大理寺堂官並不親身到部或委員辦理或憑送彙畫題殊非慎重讞獄之意嗣後會勘案件刑部知會院寺堂官親至會審儻有推故不到請將該院寺堂官交部議處又朝審秋審民命攸關嗣後各直省招冊解部該部速行刊刷於會審前數日分送各衙門以便逐案詳覈屆期齊集班次平心商酌歸於至當儻

有推故不到請派御史二員稽查指參至於虧欠錢糧各案人犯前經戶刑二部奏准開明已未完分數具奏儻蒙寬免將本犯分別減等發落但部臣止於未完各犯見在勒追者方行查奏其家產盡絕已經奏明而本犯見在擬罪監禁者不入查奏之例揆之情理似有可矜請 敕部臣逐一秉公分別辦理 從之十二月調工部左侍郎十二年失察家人在本佐領下漁利盤剝 命革職乾隆元年 特旨起用管理圓明園八旗兵丁事務四年正月授工部右侍郎六月調刑部右侍郎十月奏山海關旗人出入在守關章京處報名記檔放行來往稱便惟民人領臨榆縣印票赴守關章京處放行而城守都司兵役與攬頭店主保人每票索錢

三十文至百十文不等且出關者非一省之人彼此不識但得錢文卽爲出保該縣據保給票儻有逃盜罪人亦可持票遠颺況進關時地方官漫無稽查原票毀棄道旁亦不追繳請嗣後民人出關不必令該縣給票亦照旗人例該都司於所屬員弁日派一員在關門內設立檔房詢明登記照例放行不許借端勒索旋經兵部議奏查兵役需索由地方官弁不能遵例實力奉行若如所奏恐民人出入繁多查察儻有未周匪類轉得蒙混所奏應毋庸議惟所稱領票出關後將票毀棄道旁聽其自往並不追繳殊非設立稽查本意應請嗣後民人領票出關時該員弁驗票記檔收貯俟本人進關報查符合者放入其兵役需索請行該關督飭地方

官嚴禁僱有包攬勒索計贓治罪官弁失察嚴參議處如所議行
十二月轉刑部左侍郎五年二月授工部尚書六月丁母憂 上
命照滿洲官員例百日後辦事不必開缺七年七月奏造冊送部
工完覈實奏銷原以杜浮冒天津至通州一帶河道糧船隨到酌
量疏挑向未豫估報部但既經題銷自應行修理計工呈報該倉
場侍郎派員查明卽令興修至各處挑淺應用器具若干添造若
干先期詳明置備糧艘到時如遇淺處一面報部一面挑挖 從
之八月江南水災 上命總督高斌侍郎周學健往賑光基奏言
向來查賑育司每寄耳目於紳衿因得徇私偏袒或多報花名或
分散不均致災民不得普霑實惠應令督撫會同 欽差大臣嚴

飭辦賑官員實力奉行無濫無遺儻不肖紳衿阻撓賑務立即參究再辦賑人員理應親察釐剔弊端儻有玩視民瘼不詳慎稽查致飽家人吏胥之橐卽飛章奏參分別議處如或瞻徇照例察議下部議行八年授正白旗漢軍都統九年二月署兵部右侍郎雅爾圖奏參官商范錢德等申名朋克與民人韓如海等互爭蒙古山場木植經錢聲遠代懇禁止無票之木光基允其具呈行文請交刑部究審 命解光基任候質旋鞠實革職十七年卒

右 國史館本傳

1111

1111

姚永泰

公姓姚諱永泰字石庵正白旗漢軍人父二格官內務府慶豐司員外郎公生而端靜樸誠自矢有初入關老輩之風雍正三年以筆帖式保舉引見世宗命發湖南以知縣試用題補湘鄉調武陵遷辰州府永綏同知再遷辰州府知府永綏故苗地改土歸流之後獷悍未馴有聚眾械鬪者公將往治或請以兵從公不可曰兩酋私鬪非叛也臨以大軍彼必懼懼且合謀鋌而走險矣乃袍而騎直抵其寨召兩酋歸曲責直諭以德威皆懃服感動炊糲黍獻公公卽宿其帳中鼻响响甚軒遲明羣酋大悅吹蘆笙送公跪滿箐谷終公之任民夷帖然九年王師征烏蒙調辰沅兵軍

需檄下缺行糧一條公撥倉米運濟幕府猶豫慮難開銷公曰師行糧從國家制也儻有不遵我任其咎巡撫布公蘭泰嘉公知政體檄各郡守如公所行今上御極之元年公以親老調補山東登州府知府九年奏請終養部駁旗員無此例公泣涕五請制曰可嗣後八旗許養其親皆從公始回旗補內務府慶豐司員外郎調茶庫員外郎兼咸安宮官學總管十九年服闋授河南歸德府知府尋遷河北兵備道兼管河務公到任卽跨一馬周度長隄託宿芟舍二十一年防秋陽武夜大風公立隄上驗水漏盡歸寓夢中聞有呼起起者急醒呼燭果報五堡決矣公手絮衣鐵釜馳往堵塞泥污及骭須臾開水勢倒回民以爲神公請於河督曰頃

所辦獲鼠穴耳雖潰易塞所慮者河身日高隄日卑河自三門兩崖束急怒而奔於孟縣之小金隄衛懷二郡正當其衝歲下竹楳百萬往往負岸而沒殊覺可惜爲永遠計請歲捨兩修外加帑銀以三年爲率每年增隄一丈闊若干需用丁夫卽以見在堡兵充數畚築轟礮兵較民夫尤熟可使也河督笑公無病而呻公頤蹙曰治水如治身平時調養原可無病待病而呻不已遲乎卒不許後任張公師載來聞公議而是之奏請 允辦其年南岸崩北岸安瀾公之力也薦卓異引 見 上召對良久賜朝衣一襲二十四年授山西按察使調四川遷河南布政使護巡撫印再調雲南其時緬甸頭目有宮裏燕者平時與緬子比肩事主緬子弑主自

立燕不服伯大義討之反爲所敗乃率其屬來投孟連土司孟連利其有欺其孤令繳兵械出口糧尋又竄取其子女燕妻攘占素崇雄心懷不平時有報仇之志故事苗俗印信兵權統歸妻掌號曰印娘領軍陷陣率在夫先調兵以帚箬爲號箬下則能食者行帚下則婦境全出二十八年秋燕妻夜舉帚傳令率麾下男女三千人焚孟連署庫滅其家驅財帛牛馬而歸猛良猛良者燕妻之母家也燕多內寵妻惡之不與同宿別居一帳相離遠故孟連滅而燕猶不知內地官有貪功者誘燕入關誣其反公聞大驚急請督臣曰孟連貪淫被印娘賊殺罪由自取與天朝無干請以實情具奏天子聖明必有處分督臣先入貪功者之言竟以叛聞

而戮燕於市居亡何燕妻峻緬子犯順勞王師捷伐明將軍忠烈公殉焉人始服公之先見也二十九年調貴州布政使再調江甯兼織造龍江關稅務在任二年以老入都補盛京佐領又授泰陵總管內務府大臣以兩次失物私償未奏引大不敬律擬斬監候在獄七年卒年七十九公廉儉而慈任方伯時凡收支解給者原收原放不揭印封廠課盈餘給微員爲薪水費袍裙敗裂補綴衣之出巡僦從止三五人權關稅不發囊篋料簡徵課足額而已秉臬蜀中奸民宋朝倫以邪教惑眾從者數千公殲厥渠魁少所株累有教主妻楊么姑者未婚事發公引律苦爭擬流收贖行棧道中見赭衣婦而憐之卽具奏婦人秋審緩決一次者可免解

府部議允行遂永爲例守登州奉檄查封閩撫王士任家產籍其資印立檔冊仍給與家用撫軍大怒將劾以徇私俄而奉旨賞還所封公乃得免官滿臨去軍民送者牽衣嗅鞞造生祠置酒擲馬不能行其得民心如此然公雖善氣迎人而義之所在強直自信不知有風氣有權要並不知世上有周旋夤緣之事江甯理事同知名按圖以愆忤制軍大計劾其老公諫不從乃聘其女爲子婦而資其歸初宰武陵受知於節相西林鄂公夸非百里才在江甯受知於節相望山尹公恨相見之晚嗚呼此二公者皆君子也惟君子能知君子公之爲人蓋可想矣初娶某氏再娶某氏子二明新明華俱舉京兆以能文世其家

論曰公官中外四十餘年恩吏勤民靡所不施不可謂之不遇也
乃衰年終請室中雖蒙 聖主矜憐獲保首領以歿而論者覺惠
迪之報尙未盈量豈古人慎毋爲善之戒竟爲公設乎不知記有
之曰與人同功其仁未可知也與人同過然後其仁可知也公之
過天欲發露之以大彰其仁故不得不加挫折猶之旃檀之香非
燒灼不能遠聞也公之末路坎坷或以是哉

右傳袁枚撰

緬夷古朱波地明設宣慰司聊以鞫縻至莽應裏漸強盛明設之
三宣六慰皆服屬康雍時緬有貴家貴家者隨明主由榔入緬之
官族其子孫淪於緬自署曰貴家據波竜廠採銀貴家頭目曰宮

裏雁緬酋莽達拉荒淫無道乾隆十七年敏家攻阿瓦即緬都破其

城緬酋避居無定所十九年莽達拉爲得楞錫箔所弒子色亢瑞凍出奔緬國無主木梳頭人寶藉牙起兵聲言復仇糾合緬屬土司有不服者治兵攻擊無虛日貴家採銀向有歲幣至是不復輸寶藉牙擊潰之遣人四出求緬酋子色亢瑞凍避入木邦二十年色亢瑞凍挈妻及親屬頭目等八十餘人渡江入猛卯總督愛必達巡撫郭一裕會檄猛卯土司遣之出境寶藉牙猶遣人在木邦徵索木邦土司罕蟒底乃置色亢瑞凍於滾弄江內二十一年復遷至蠻弄砦並偏近內地之耿馬鎮康督撫會檄防禦甚嚴景邁屬之猛放緬目波顛遣迎色亢瑞凍遂渡江而南猛放距木邦三

十餘程後遂莫知其蹤二十三年緬酋賽藉牙攻陷木邦木邦在
耿馬外爲耿馬孟定鎮康孟連之藩籬落卓土司地大而強賽藉
牙據有阿瓦落卓首歸附於是賽藉牙寇劫波竜廠遂威脅木邦
索其賄貴家宮裏雁與結些國人糾約廠眾至木梳劫殺兵始退
時前緬酋莽達拉之族弟占朵蟒者先分居景邁宮裏雁逃附應
之十二月宮裏雁謀攻落卓會占朵蟒及木邦土官之弟罕黑至
落卓劫殺落卓大敗復引緬酋賽藉牙及各土酋之兵謀攻貴家
及木邦以泄忿二十四年三月落卓兵至臘戍是時占朵蟒率猛
交兵駐猛乃乘落卓兵遠出閒道已赴落卓木邦土司罕蟒底聞
緬甸落卓兵至翌日與宮裏雁出戰越二日木邦城陷罕蟒底奔

麟夏緬兵入踞木邦人民逃散波竜廠衆多歸內地沿邊土司撥練防守宮裏雁率兵練男婦二千餘人渡滾弄江奔蠻東蠻弄勢甚窮蹙又由白沙水駐南溯欲假道孟良耿馬往狝獠猥求占朵蟒所在會兵復戰而占朵蟒已襲破落卓率兵練還救木邦復定罕蟒底宮裏雁復渡江回禾昌鎮府聞報率兵二百名於四月辛酉出禦行抵姚關旋即撤回二十五年緬酋獲藉牙死其子莽紀覺嗣與各部構兵如故二十七年正月宮裏雁被緬酋追殺甚急由猛榜奔至耿馬又由孟定之邦模南板入莽且窮蹙無歸五月丁酉至猛夏並至孟連之猛尹散處各村若初宮裏雁自阿瓦奔出帶練千三百人至木邦撥給占朵蟒五百人實止帶練八百人

又脇從阿瓦緬子木邦擺夷及擄掠男婦兵三千餘人既抵猛尹頭目率眾驅之宮裏雁乞內附寄住孟連地方孟連土司刀派春遂赴猛尹收其兵器戶索銀三兩將其眾安插於猛尹各圍砦宮裏雁不欲受土司管轄已相嗟怨總督吳達善知其有七寶鞍乃亡明至寶太監王坤由北京內庫竊去者向其索取宮裏雁以其祖宗所傳重物恡不與遂挈其妾婢六人赴石牛廠刀派春率宮裏雁之妻孥占及男婦千餘人至孟連城刀派春又向孥占及頭目撒拉朵索牛馬童女以賄吳達善孥占忿於閏五月丁丑夜糾眾焚殺孟連城刀派春家屬三十餘人俱被害逃免者僅應襲刀派先及刀派春妾二人戊寅孥占撒拉朵率眾逃散至猛養犴狽

各處刀派春族兄刀派英聞變率練追剿而猛養犴狽兩處夷眾亦各要路劫殺擄占大敗逃竄無蹤派英寄信石牛廠民龍得位王天和等將宮裏雁好爲款畱宮裏雁實不知也七月永昌守楊重毅檄耿馬土司罕國楷帶練誘擒宮裏雁其妾婢六人及另行拏獲之餘黨阿占阿九二人囚解赴省布政使姚永泰曰孟連之變雁不與知況其夫妻不睦雁是以避居兩地今若畱雁可以爲緬酋之忌憚不可代敵戮仇也按察使張坦麟審稱宮裏雁雖堅供不知情但勢窮來歸先令妻屬詭計歸服以致其劫掠罪有攸歸且連年與緬酋擄殺既經拏獲斷不可仍畱夷地之害應正法吳達善以前鞍不與故切齒於雁遂左袒張議適緬酋至木邦聲

言前往整欠景線相戰因遣頭目蟒散至孟連索宮裏雁所賜從
之緬人刀派英悉將緬眾遣回益知內地虛實十月丁未殺宮裏
雁以其妾婢分給功臣吳達善既遂其志乃檄緬人諭以宮裏雁
業經誅殺宮裏雁之妻擄占及兇目等當卽擊送以靖餘孽時擄
占已嫁莽酋弟惜駁故緬人以爲有心羞指益加忿恨遂滋擾內
地之耿馬耿馬雖屬內地於緬亦有歲幣緬目普拉布率兵來索
闌入孟定兵及茂隆廠耿馬土司罕國楷禦緬於石牛廠廠委周
德會率廠練於滾弄江截緬人歸路擊殺普拉布吳達善以周德
會爲殺良冒功竟置之法緬益輕中國二十八年緬酋莽紀覺旣
兼并諸土司復揚言普洱之十三版纳原隸緬甸

普洱在省城西
南幅員遼闊與

緬甸之孟良猛勇整欠接壤南通南掌所屬有九龍江車里宜慰
司及倚邦六困土守備猛遮普藤土千總猛阿猛籠猛臘猛旺整
董猛烏烏得土把總大小十三土司俗稱十三猛又稱十三版納
雍正年招降而亦常輸賦於緬其間九龍江猛遮猛阿猛籠猛臘
等處均偏近外域遂犯猛籠二十九年春始退復分兵至我遮放邊外揚
言來索木邦官吳達善畏憚惟戒官兵勿與之戰而已會莽紀覺
死賊乃退三十年其弟懜駁嗣立勢愈強橫時吳達善已調陝甘
接任總督爲劉藻繼以楊應琚代之剿撫俱無功藻自到應琚被
逮承恩公明瑞以將軍兼總督代應琚決計大舉由木邦乘勝直
抵象孔距阿瓦七十里失道糧盡援絕自猛籠取道大山土司以
歸且戰且退過波竜老廠新廠貴家採銀處居民遺址數十里計
當時廠丁不下數十萬已皆爲賊衝散盡明將軍愀然者久之行

抵小猛育四面皆賊血戰負數傷縊於樹三十三年二月之十日也嗚呼良可悲矣

右錄宗室昭榘撰

SHIRAZ

1911

111

邵泰衢

邵泰衢字鶴亭錢塘人精研禮學兼明算術雍正初以薦授欽天監左監副嘗以禮記出自漢儒檀弓一篇頗多附會摘其可疑者條列而論之爲檀弓疑問一卷言禮之士多許之又太史公書功臣表漢九年呂澤死爾侯世家所紀漢十一年又有呂澤泰衢以爲失其實乃抉其疏舛爲史記疑問一卷所論多精確論者謂過於吳縝之糾新唐書矣

右文獻徵存錄錢林撰

陳朝書局刊行
卷之二十一
三

國朝書獻類微初編卷七十八目錄

卿貳三十八

陸宗楷

雅爾圖

託庸 子富察善

蔣炳

彭啟豐 孫希濂

楊嗣璟

鄒一桂

瑋古泰

Vertical text on the right margin, likely a page or chapter number, possibly reading "卷之五" (Volume 5).

--	--	--	--	--	--	--	--	--	--

國朝耆獻類徵初編卷七十八

通奉大夫前署江西巡撫江蘇布政使司布政使湘陰李桓輯
卿貳三十八

陸宗楷

陸宗楷浙江仁和人雍正元年進士是科有記名進士十七員
命在各館效力若行走勤慎學問好者仍拔爲翰林宗楷充景山
官學教習三年授翰林院檢討十一年充日講起居注官乾隆四
年擢國子監司業五年遷司經局洗馬六年復充日講起居注官
七年丁母憂九年五月服闋以原官候補十月重葺翰林院落成
聖駕臨幸羣臣分韻賦詩宗楷與焉十一年二月補司經局洗

馬十二月升國子監祭酒十八年疏言順天鄉試錄科直隸生員
向由學政錄送貢監由國子監錄送近科貢監有赴監考錄者亦
有學政錄送者請飭部畫一辦理部議直隸貢監在監肄業者由
監錄送其在籍者應由學政錄送二十六年教習陶若木期滿引
見摺內聲敘該員係進士曾經有旨歸班以知縣選用 上
以宗楷與沈若木同係浙江科目其爲曲意瞻徇情蹟顯然下部
嚴議尋議革職 上加恩改爲畱任三十年五月授兵部右侍郎
六月 命兼署吏部侍郎三十一年正月調吏部左侍郎二月充
會試副考官十月遷兵部尙書管理國子監事務 賜紫禁城騎
馬三十二年二月 命充三通館副總裁五月奏言下五旗包衣

人等自裁去義學讀書應考無階請每旗各設額缺十名附入國子監官學再向設有義學時包衣人等准考繙譯生員文生員中書筆帖式監生等項今請照滿洲蒙古漢軍之例一體與考又查八旗官學生錢糧係由本旗養育兵項下動撥下五旗包衣佐領下並無養育兵無項可撥增額之後但准應考不必給與錢糧下軍機大臣議行三十三年八月充順天鄉試正考官十月充經筵講官三十四年三月奏言 文廟向設祭器皆木瓷等物收存南
北園房有廟戶十三名看守今自發帑興修復 頒周朝法物十
件五磬二件及添修禮器樂器雜項等物均金銀銅錫計數千餘
件敬存庫藏惟廟戶看守實不敷用應請添設步甲十二名每日

四名輪班巡邏並請交提督衙門飭令步軍校等巡查堆撥守護
牆垣柵欄以肅觀瞻如所請行四月充殿試讀卷官六月 諭曰
陸宗楷年逾七旬兵部尙書有本任應辦之事不必兼管國子監
事務七月調禮部尙書九月吏部左侍郎兼管國子監事務德保
奏參國子監歷年 欽頒書籍遺失甚多請令歷任堂官助教等
賠補 諭曰該監所存書籍自應隨時稽查毋致散缺何以遺失
如許之多陸宗楷在監最久乃漫不經心尤難辭咎下部嚴議尋
議降調 上以宗楷居官年久由國子監祭酒未及兩年擢至尙
書屢經召對惟事唯諾 命降二級調用十二月補內閣學士兼
禮部侍郎銜三十六年三月京察屆期宗楷以原品休致十二月

賜三班九老宴遊香山並令畫工繪圖宗楷與致仕九老之列
三十八年卒

右 國史館本傳

雅爾圖

雅爾圖蒙古鑲黃旗人雍正四年由兵部筆帖式捐主事簽掣工部六年遷員外郎七年遷郎中十三年授鑲藍旗滿洲副都統乾隆元年六月疏言京員俸祿外向無養廉請將戶部餘平銀兩給部院辦事各官又入旗參佐等員亦請照步軍營例子以空糧經王大臣議行十月授參贊大臣往準噶爾軍營兼辦糧餉事三年三月奉 旨參贊大臣雅爾圖在副都統任內因錯辦賞卹兵丁銀兩令其分賠今伊在軍營效力奮勉著從寬免其賠補十月命暫管定邊副將軍印務四年三月 諭來京七月授左副都御史尋遷兵部右侍郎九月因衛輝府屬新鄉縣刁民聚眾及汝州

屬伊陽縣教匪不法 諭雅爾圖往訊並查散賑事十一月授河南巡撫十二月疏言豫省近年多盜緣地方不逞之徒平時窩賊盜窩一日不除則盜一日不靖伏查保甲原以稽察盜窩地方官視爲具文雖保甲甲長等有不首治罪之例而其畏窩家之兇悍甚於官法之責處是在州縣官畱心訪察密委幹捕設法嚴緝又疏言豫省大河以南深山邃谷奸匪匿其中而山居百姓借防鳥獸爲名皆有刀械等具此等人惑於邪教懷私角鬪兇暴何所不爲見今審理梁朝鳳案據供未獲梁周一犯及官兵所殺之首惡道士張位黨類尙多愚民易遭煽脅與其發覺後盡置諸法何如於未發覺先設法潛銷使已聚者漸散未萌者自新臣已飭各地

方官密查務盡根株並令文武會道兵役搜查仍嚴禁騷擾本犯首從及家屬鄰佑自首者免罪又言各省額設營兵分隸將備千把等官而以提鎮統之俱有隨糧定額此外不許再有空糧以致兵額缺少臣前在軍營知直隸山西兩省各將備皆有伴傭兵丁又各色工匠甚多竊思伴傭向無額設豈有擅用多人至一營有數名工匠之虛糧卽少數名操練之額兵請覈定官弁大小酌畱伴傭幾名造冊開報不得額外多畱一名工匠例應於工項銀兩支取工銀銷算亦不得虛占兵糧俱下部議行五年正月疏言豫省民情愚悍每有奸猾剗立邪教妄言禍福黨羽煽惑此不僅爲風俗人心之害臣到任後嚴加查察訪有女教首民間謠言一枝

花潛匿山中因遴選謹慎幹練之人誘擒到案並供出要犯王國臣俟全獲卽行按律審擬此外鄉愚被誘者限三箇月許自首免罪酌量辦理若過期不首卽行嚴拏以靖地方奉 旨嘉獎交部議敘尋 諭曰豫省止設河北南陽二鎮與巡撫不相統屬諸事未能畫一著照山西之例兼提督銜二月疏言豫省撫標額兵九百六十三名鎮標九百九十五名本不爲多且地處中州差使繁重今謹酌定營制緊要事宜九條並設法調劑三條一曰足兵額各營兵丁除額定公費隨糧外應募補足額其雜役朋名盡行革除一曰勤差操操演向有定期但多飾外觀見在操演日必令人人皆到盡一日之長窮一技之精仍於逢五逢十輪考以兵之優

劣定營員之勤惰一日明賞罰馭兵全在賞罰公當凡由戰守拔補馬兵由馬兵拔補外委由此而干把總必擇其技勇超羣者始准選拔送考一日練技藝凡弓馬鳥槍之類有兼長者亦有專長者必須各盡其技方收實用至陣勢尤在平時練習不可有名無實一日整軍械凡器械旗幟除小有缺損者照例支用口糧令弁兵自行修補外其實在殘毀過甚本營無項製辦者請以閒款修補仍嚴飭勤加收拾一日重兵食俸餉銀米均關國帑必須按數實給不得稱使費雜用剋扣一日驗馬匹應責成營將隨時點驗均勞逸時餵飼以期騰壯一日謹守望分防汛守係兵丁專責晝則往來遊巡夜則登高瞭望一遇盜賊或就近截擊或窮追擒

獲儻敢離汛偷安分別責處一日嚴約束兵丁強悍不法及酗酒賭博生事法所難貸各該將弁務認真約束有犯必懲一撥民壯以足兵查豫省額兵單弱請增又不免糜帑州縣有額設民壯令酌撥一半交駐防汛弁隨營操練仍畱半交州縣差遣更替輪班記名者准其拔補技藝平常者斥革一兵民貴在和衷儻存私偏袒兵民或爭功尙氣或希圖挾制致僨公事者嚴參一騎射期於嫻熟必須預備官馬平時試習因查司庫有灘地種銀一千八百餘兩請交地方官照例取息卽將官馬十匹交與該將弁支取息銀餵養與本兵之馬輪值騎操以均勞逸得旨均照所請行三
月奏請釐剔百姓供應諸積弊得旨所辦甚妥協須行之以實

而要之以久則將來必大有起色矣又言豫省上年霖雨連旬省城多積水臣酌令淺處挖深窄處開寬爲合城受水之區仍於通溝水道建閘時其蓄洩並養魚植木以利民用奉 諭甚善此卽古人開渠之遺意也五月疏言豫省見獲盜百餘盜風稍息惟是此等盜匪多係鄰省人稍有疎懈仍肆竊劫經臣添派員弁各路訪拏今據稟稱直隸江南湖廣山東等省與豫省聯界處多有巨窩外省訪拏必須赴地方官挂號彼此捕役聲氣聯絡聞風潛逃勢難擒捕請聞盜徑行往拏俟緝獲後始知會該省庶豫省盜風不致復熾而鄰省亦得甯謐奉 諭勉力爲之又言豫省上年偶被水患荷蒙 聖恩軫念民生 特命開濬省城之乾河涯及淮

潁汝蔡諸水洶屬緊要工程此外支河細流果於田廬有關必須
開通者亦酌量辦理惟是地方有司凡遇開河乞渠多以興工代
賑爲名希圖肥藁況目前二麥成熟農務正殷儻拘役於官必致
廢棄臣覓就乾河涯及賈魯新河等工程俱照漕規定例銷算其
餘請與停開濬 上是之七月疏言嵩縣城內原設守備請令帶
存城兵移駐孫家店另於河北鎮左右營內派把總一帶兵二十
駐嵩縣其把總歸守備轄並請將河南府通判移駐孫家店汝州
州同移駐楊家樓陝州州同移駐朱陽關令該員彈壓協同武職
率各巡檢不時入山嚴查下部議行六年三月疏言豫省地界連
五省西南一帶如伏生嵩山桐柏等山支幹交錯於三府二州路

徑雜出於荆襄秦晉地多林木易以藏奸卽文武員弁偶一巡查而路通外境礙難驅除請嗣後本省外省聯界山場除地熟民稠設有防汛編有保甲者照常稽察外其崇山峻嶺每年於秋冬之交聯界各省文武大員訂期巡查一次至交界地方彼此會合申報本省督撫儻不能查出者嚴加議處奉 旨照所請行五月疏言豫省居天下中產糧最繁豫民不知撙節每遇豐年輒耗於無益之地致儲備空虛我 皇上屢降諭旨飭各省督撫講求積貯伏查儲蓄首在社倉積豐歲之有餘備歉年之不足收掌在民旣無滋擾之患稽察在民又無虧損之虞惟在地方官因勢利導開誠布公踴躍樂輸方爲有利無弊見令惜其物力時其耕耘去煩

擾之政禁耗費之端民力漸舒興行教化頒勸善之名目定獎善之條款刊刻儲備諄言分發紳士富戶俾知浮費無益儲備宜充俟捐輸既多平時照例出借以惠貧民偶遇歉收或官爲賑貸或聽捐戶領回濟用以民間之積蓄散之民間不必仰給於公家亦不放假手於胥役奉 諭此實爲政之本也但須行之以實而明以察之使無胥役之擾則善矣七年二月奏稱事主被盜未經呈報者免其議處下部議行四月疏言查江南沛縣有姚姓巨窩黨夥多人各處剽掠逃至夏邑縣被獲見在多道幹捕嚴定賞罰以期餘黨就擒奉 旨汝到任之始原有弭盜之念二三年後遂以爲行之有效而盜案少此其所以多盜也戒之慎之七月奏開歸

等屬積水無妨田畝。上以近聞豫省頗患水災，此奏似有掩飾之計。尋奏言豫省地平土鬆，水利工程誠不若東南之通達。臣當卽嚴飭所屬躬親相度，專委大員總司稽察。除田間零星開段工程隨時修濬外，其縣境之大者導水灌田，其改種水田一萬八千餘畝，俱詳定規制，第以開歸陳等處地當下流，每逢夏秋大雨時，澗水匯注窪下村莊，難免受水。要皆刻期疏導，不誤耕種，其積水未銷之處，多係鄰近黃河州縣地土，皆豁免錢糧於民生並無妨礙。而土性俱鹹，難以種植，未便輕議宣洩，致損田廬。奉旨若實難宣洩，亦祇得聽之。但汝應剖心詳察酌量可爲，則爲之。朕不怪汝不剖心地方，若避而爲飾辭，則不可耳。八年五月奏豫省開歸

陳汝等府所屬一切賑恤次第舉行並自陳辦事認真居常慙直
忤物以致人言傳播仰荷 聖明洞鑒等情奉 旨朕從不以地
方偶有水旱歸過督撫惟令其加意撫綏使朕赤子不致凍餒耳
汝則不然從不體朕此心必欲以地方屢豐爲汝政之效試思汝
一省尙可若朕亦存此心其如蒼生何且堯舜不免水旱若視水
旱爲固有之常而不知濯此則致亂之由而必欲以無水旱爲政
治之符亦惟勤其政耳豈有政治之失處尙多而侈談豐豫將水
旱漠不關心之理卽如前次陛見朕觀汝高視闊步昂然自得之
意已知汝必有滿招損之咎此奏殊屬客氣汝其候旨可也等

諭來京授鐵嶺州副都統十年三月授刑部侍郎五日廣東

部侍郎十二年正月兼管太醫院事四月 命往山東會同巡撫
愛必達查拏安邑刁徒萬泉縣搶犯案尋以患病 命御醫馳驛
往診 上以雅爾圖身爲大臣不能力疾前往自稱病勢危篤遲
遲不前較之從前入旗公忠勇敢之風大相徑庭著解任調理八
月授內閣侍讀學士十一月授兵部侍郎十三年四月調倉場侍
郎劾前任倉場侍郎吳拜諸事廢弛及其婪贓各款並坐糧廳福
壽草率辦工冒銷等弊經軍機大臣會同刑部審訊屬實得 旨
吳拜福壽著革職十一月兼正紅旗滿洲副都統十四年署戶部
侍郎十七年署步軍統領十八年因病請解任調理得 旨准其
解任三十二年卒

右 國史館本傳

託庸 子富察善

託庸滿洲鑲黃旗人姓富察雍正四年由筆帖式授戶部主事崇
遷郎中初託庸曾祖吉勒塔巴以軍功授雲騎尉遞加至二等輕
車都尉八年託庸降襲雲騎尉乾隆五年擢署安徽布政使六年
調署廣東布政使七年實授九年署廣西巡撫疏言柳州慶遠二
府偏近苗寨不肖之徒包攬詞訟勒謝或冒稱兵役入寨滋擾臣
飭屬嚴拏究懲 諭獎其畱心尋疏劾布政使唐綏祖擅動庫帑
假公漁利 詔革綏祖職尋 命總督策楞察審十一年正月審
明所參全虛惟託庸購人浸屬實已革職毋庸議事詳綏祖傳先
是廣西銅礦二八抽課餘銅官買供鑄每百斤給價六兩八錢綏

祖爲布政使時請增價十三兩零部議准增至九兩二錢託庸旣劾綏祖因請將增價官買事停止改爲三七抽課餘銅聽商自售閏三月奏言試辦已閱八月商本尙屬不敷請仍加二抽課官買餘銅每百斤應增價十六兩二錢 諭曰從前託庸奏稱唐綏祖收買銅斤增價十三兩有零之處應行停止請將二八抽課之例量加一成作爲三七抽課餘銅聽商自賣商民自必爭先認採出銅日多可得源源鼓鑄朕交大學士等面詢楊錫紱據稱將來銅廠果旺每年出銅七八十萬或百萬斤方可抽課二三十萬斤若如數年以來抽課不及十萬則於官銅轉絀交部一併定議部議若照三七抽課恐不敷鼓鑄之用應令該署撫具題嗣據託庸議

稱商人趨利如鶩有利可圖孰不踴躍從事請將三七抽課之處
試行一年再定今則奏稱商本不敷試辦八月不能有濟仍應加
三抽課并請加增至十六兩二錢方敷收買之價此案經朕往返
致詢託庸堅執己見以爲事屬可行今試行八月不能有效仍請
照前辦理不但與唐綏祖所請之意相同而價值更爲增多此又
何說可見託庸彼時不過因參劾唐綏祖之後有意將此事更張
以顯唐綏祖之過耳朕又聞得粵西辦理此事自託庸奏准以來
各處搜查民間藏銅定限此役甚爲擾累而伊奏摺中並不自知
辦理未善引過認咎巧於迴護掩飾前非著交部察議尋議革職
八月授山西冀甯道十一月調河東道十三年閏七月巡撫準泰

疏參託庸承勘山陝沿河灘地偏執市恩得旨革職八月命以郎中銜補杭州織造兼管關務十五年廣西巡撫舒輅疏參託庸前任應賠銀兩屢催不完諭曰託庸由部曹擢任藩司簡畧巡撫乃乖張任性於參劾唐綏祖一案經督臣等審明俱屬誣妄因薄示懲倣旋復授爲山西道員又因承勘所屬雞心灘一案偏執已見經巡撫準奏參朕因其意見偏謬不勝有司之任但久隸部曹特授浙江織造予以報效自新而伊全無感激黽勉之意召見時仍支吾取巧因飭山西巡撫提勘適大學士忠勇公傅恆歸途之便令其公同閱看仍照巡撫所議觀此則託庸之妄誕殊屬無恥著革職該旗查明家產抵補贖項二十年授安徽布政使

兼管江南織造二十五年調江南布政使二十六年遷廣西巡撫
尋調安徽二十七年 上南巡 賜詩曰連驅來接駕咨政引同
舟共濟義應釋勤宣業可修老看身益健人寶食無浮虹宿被災
地欽哉善恤賜八月疏言安省應修懷甯桐城等處城垣三十四
處需銀八十萬有奇若僅動匣費三萬兩興修告竣無期請照減
二五捐監之例於安省勸諭報捐爲城工費軍機大臣議如所請
二十九年二月奏捐項足用 命卽停止十二月疏言沿江各屬
圩田隄壩向皆民修本年下江漲漫缺處多無爲州尤甚計二百
五十餘處民力一時不能修築請於廬鳳道水利餘銀內借動三
萬兩三年歸款得 旨允行三十年 上南巡 賜詩曰又下大

江來舟行許扈陪率因咨眾隱遂以訪羣才節操古松似精神秋水哉恐防謨程吏數日便教回尋擢兵部尙書兼議政大臣三十一年 命紫禁城內騎馬三十二年調工部三十三年四月調刑部六月授鑲黃旗滿洲都統尋調正黃旗七月復調兵部尙書晉太子少保三十四年遷吏部尙書三十八年九月以病乞解任遣醫診視 命以原官致仕晉太子太保十月卒 諭曰吏部尙書託庸練達老成恪誠匪懈歷中外盡職宣力比年以來雖齒逾八旬而精力尙未衰邁昨據奏病後步履漸艱懇請解任因准其所請晉太子太保以原官致仕俾得安居頤養以葆大年茲聞溘逝深爲軫悼著派散秩大臣一員帶領侍衛十員往奠茶酒應

得卹典仍著該部察例具奏尋 賜祭葬如例謚誠毅子富察善
襲雲騎尉世職官至盛京工部侍郎兼奉天府尹

右 國史館本傳

東粵近海南諸夷中國兩戒之守以廣州虎門爲限乾隆八年紅
毛國伐呂宋勝之俘五百人千其眾順帆泊虎門粵東大駭總督
策楞召布政使託公曰外夷交攻揚兵我境勦之乎聽之乎於國
體奚宜公曰當使進表稱貢獻所俘五百人請公處分策笑有愠
色喏曰君直戲耳紅毛雖夷非癡人其何以萬里全勝之師受驅
使耶君言之君能之乎公曰不能固不敢言策愈愠曰君果能恣
君所請公笑曰無多請也請飭印知縣楊參將聽指揮六日內復

命印令者才而敏楊參將者修幹偉髯有將貌者也策許之公出
召印令曰我欲使汝教紅毛國進表稱貢獻所俘五百人請制府
處分印令驚如策所云公曰汝直未思耳紅毛伐呂宋涉大海數
千里糧能足乎船漂浪擊風必損壞不於此修遠勝其能歸乎此
如嬰兒寄食於人小加裁禁立可餓殺何說之不能從制軍易吾
言不問吾故未以此意曉之印令大喜奮曰如公言足以辦矣與
參將楊領百人短後衣持彈據獅子洋而營焉密令米商閉戶遏
糴紅毛人來探告曰中國無他意慮奸民欺汝外夷以行濫物誘
汝錢故來相護耳紅毛人不解意去然望其炊煙漸縷縷希矣居
亡何紅毛總兵求見坐定未言印令訶之曰中國久以虛門爲限

條禁森嚴汝兩國交關不偃旗疾過乃揚兵於此大悖我制府性暴好用兵我等未敢遽白所以守此者欲斷汝糧餓死汝然後白制軍紅毛總兵意大沮目參將參將禁聲鬚怒張叱咤而已總兵愈恐伏地請曰誠然糧盡然終非有心犯天朝也公幸赦之且教之令微露其意紅毛人泣曰若然誠天幸也請代申此言令曰不可吾爲汝告方伯大人方伯大人爲汝告制軍階級尙多通達尙難汝一旦失信則我等先爲汝獲罪故不敢也曰紅毛自具牒申請何如令爲不得已而強應曰可紅毛人抱弩負鞬手加額匍伏進表貢所俘五百人乞制府處分策公大悅竟以五百人仍還呂宋而賞賜紅毛聽其還國越一年呂宋修怨於紅毛遣兵數

千駐澳門揚言待紅毛來戰總督又詢公公曰此可一罵遣之也
紅毛國小而強屢勝呂宋國大而弱屢敗以大國敗於小國慮四
鄰輕之欲洒削其恥又不敢從海直下挑戰紅毛故逗遛我地自
張虛聲公前將紅毛所俘五百人送還伊國恩甚大可仍命印令
往道破彼情歸曲責直彼雖夷必無辭而退如公言呂宋兵船卽
日搖鰲去

乾隆七年粵東旱攘竊填衢總督張示禁小錢且曰平糶三米廠
宜減一糶者無過二升公聞大驚召廣州知府曰民情甚迫而糶
廠轉減汝能保十日內無事乎曰不能五日何如曰不能公厲聲
曰吾欲汝保十五日無事汝不能吾手斬汝知府跪而請曰今一

日難保而公云十五日何也公曰固也待吾言之制軍所以減糶者慮米不繼故畱餘於倉也不知民情一變倉之餘官能畱乎不若傾倒出之使民知之爲今計宜增一廠爲四廠宜不計斗石宜兼收小錢如制軍教朝夕難保如吾教十五日可保十五日中倉未竭雨必至民將大安第恐汝違吾言先白制軍致掣吾肘則事敗矣事敗民變均死也不如斬汝死死乃有名知府叩頭出如公教民權聲如雷越八日天雨米尙餘五千石有奇雨後大官行香謝神將軍某謾曰吾欲絕公交公驚問將軍曰當制軍令下時民心震動意在必亂吾臥夜不閉目公陰行善事消釋禍源而不先告我以甯我其能無絕交乎公署廣東布政使前官程公仁沂被

劫待罪廣州知府來手一冊呈公曰此程獄詞公問訊乎曰未也然則何以有詞曰向例撫軍劾官無所待訊不過擬供狀具獄而已公微笑不應取所呈冊付家僮內藏之知府探公色甚和必重違撫軍意而喜已署藩司之將卽真也媵媵然喜公正色責之曰訊百姓無先擬供法今訊藩司大員而汝乃代爲之供藩司汝長官撫軍亦汝長官殺長官媚長官於義何當我才短不能覈人僞供故收藏之明日將此冊奏 皇上候 聖裁知府陰喝汗下長跪請曰某死罪此案良不實不圖公公正平恕一至於此求賜還原冊訊明再啟公笑曰能如是吾何求與冊令出而遽呼騶從見撫軍撫軍者高郵王安國也初及程事王起立拱手曰微公言吾

早薨死矣疏程陰事者程之同鄉同年知縣某也訪之臬司某曰
頗聞之訪之巡道某佯驚曰聞之久矣聞制府先奏矣予不得已
奏出今聞諸員覲覲遷缺而然事大可疑我悔之折骨此段歉懷
曾告阿將軍知之公不信請質我於阿將軍公曰改過不吝古大
臣風也某請按覆再啟公甫出而知府已赴轅跪白程藩司事訊
明全虛惟以平餘充公未奏擬罪公於奏程罪前十日先奏司庫
動用平餘歷任官從不奏聞臣初到不敢蹈程某故轍致滋重罪
仰乞 睿示 上硃批此等小事任汝爲之但當慎重儻遇別案
連及朕亦不能爲汝寬也後程奏入 上入公先言竟得寬減程
夫人每早起盥沐畢嚴妝不食不言命家人身至公生祠內焚香

膜拜然後還家飲食笑言

乾隆四年詔丁銀攤入地畝永爲例海內便之惟山西解州安邑五州縣不肖曰此地富民無田若攤丁於地是貧民代富民完糧也徵輸者以爲然竟私用舊法七年上風聞命巡撫某議覆巡撫請如新例公爲冀甯道爭之曰五州縣執貧富之說因循已久一旦改更民必變此事宜三思巡撫忿然召河東道某趣辦河東道心知不可而難於抵牾謾與兩司議曰事起解州牧令嚴牒下牧足矣牧懼卽製巨槌千長枷百餘驅迫呼號安邑民搗竿起罷市燒城門毀公署而堵焉報急者日三四至巡撫擾急不知所爲命公領兵往公笑曰我願往然無兵我往有兵我不往巡撫問故

曰彼蚩氓也雖生變尙懷狐疑聞有大兵則反志益決今合山西
全省兵不過數千與我領者不過數百其足當五州縣人無萬數
乎請單騎獨行而暗與我調兵符相機行事巡撫強應曰諾諸司
道及府州縣餞公於郊酒行泣下若永訣者然公自省城至安邑
一千二百餘里五日而至先張示稱爾曹皆 國家愛養元元急
迫生變我來非征爾欲平定安集之爾自首歸誠者赦民未曉公
意閉堡門不出邑令來謁問誰爲首對不知公曰可以知縣而不
知乎曰聞某已被劾心灰且人眾無所於訪公曰以民變劾官
皇上必不悅或別遣欽差訊汝汝努力助吾何遽不爲福令拜謝
出獲夜行少年訊之手疏七十二人喜甚不請於公遽往擒犯歸

半塗追者至槍礮騰起弓役傷奪所拘七十二人入堡公嘆曰禍成矣庸人誤乃公事奈何將具牒請兵慮不發乃命副將率二百人傍堡而營告之曰不必戰但得堡中情狀卽以聞如公言堡內人推牛而糶公立召還以狀白撫軍請兵兵未至公陰念山西兵少且弱不可用而安邑民可先聲奪也乃檄取四城大礮及他兵器待用又雜取鋤犁鉤盾揚言將毀堡日昃巡撫羽檄下公發之楚額歎曰孽矣殺一縣老弱安用全省兵耶吏胥聞之震恐轉相告語公遣人以酒干罌羊百羸犒兵命毋進城駐將軍廟聽召廟離堡三十里夜大風颭踴踈煙沙障天屠羊霍霍兵酣飲叫呼望者聽者人數莫辨堡中民股栗公笑曰此擒犯時也命知縣副

將戎裝大呼堡前日縛七十二人獻者兵立能稍遲天明大軍至
金鼓一震玉石焚矣堡中人不得已縛七十二人詣府受譴次日
點兵三百人而已遠來足駁腫手不能弓幸無所用歸營偃旗未
幾 天子果以巡撫爲民變劾官懦特命大學士訥親來鞠駐省
城訥別訪亂民五百人檄公與副將擒訊公具牒稱七十二人尙
多冤餘眾宜可闊略訥愈怒文書火急且曰黨惡聽參公不爲動
抵攔者三副將意不能無怯來矚公公無言副將曰公何無言公
曰難言也以爲可耶妨五百民命以爲不可耶妨君官職民與官
孰重君當自謀我不敢以己律君安得有言副將歎息而去五百
人聞之泣曰攤丁非託公意擒七十二人非託公意我輩早從公

言自首歸誠大家抱兒子臥矣今又以不擒犯故累公我山西以
俠烈聞若然非壯士也請與偕出五百人竟面縛出投公公不受
投副將副將受之來謁公坐赧發於面公賀得大功君何不自喜
副將手指天歎曰五百人爲公來乎爲我來乎我武官也不折一
矢而冒公功其如天何乃將安邑畏威歸順之意啟訥公訥亦怒
解命且保釋五百人父子妻女爭來迎歸扶攜歡呶祝延之聲數
里不絕獄具前七十二人杖十人公諱庸字師健滿洲
富察氏

古記事袁枚撰

富察善

富察善富察氏滿洲鑲黃旗人由監生考取內閣中書於雍正十三年補貼寫中書乾隆四年補實缺中書十三年升侍讀充軍機章京十九年二月調管戶部銀庫二十二年差滿仍補內閣侍讀二十四年四月京察一等六月授奉天錦州府知府三十年失察所屬廣甯縣知縣奎福自戕經府尹耀海奏參解任質訊旋復原任下部察議三十二年七月因親老呈請改就京職 上允之以郎中補用十月補戶部郎中三十三年遷內閣侍讀學士三十四年擢內閣學士兼禮部侍郎銜十月 命偕刑部左侍郎錢維城及湖廣總督吳達善赴貴州會鞠威甯州知州劉標虧空銅本並巡撫良卿按察使高積營私執法案得實論罪如例將還京適古

州黨堆寨逆苗香要等不法復偕吳達善等督兵捕誅之 上以
所辦迅速妥善下部議敘三十五年八月 命監糶西城麥石奏
言監糶以來虚心體察糶賣已經多日而市價並未平減查各廠
買麥民人雖逐日紛紛不絕其家中安能設有磨具雖買麥回家
亦不能食用恐市僧鋪戶雇人零星買去私行囤積以冀來春官
麥賣完價昂之時糶賣以取厚利莫若磨麵糶賣於小民日食更
有裨益而囤積之弊不禁自除 上如所請行十二月授鑲藍旗
漢軍副都統三十六年調鑲紅旗滿洲副都統三十九年擢倉場
侍郎四十年十月調盛京工部侍郎兼奉天府府尹十一月疏言
奉天各州縣及旗莊地方旗民錯處並無界址之限是以歷來俱

係旗民官員會同查辦一體給予門牌若以旗人毋庸編查恐旗民所雇流寓傭工潛匿奸匪雖有旌員查察究不若編入保甲一體會查更爲周密至奉天州縣及通判等官所轄地方遼闊旗員較多若止令民員辦理遇有重犯旗員前往查拏民人以保甲非旗員應辦或致抗違兼恐旗員以無編查民人保甲之責不肖實心究察請仍照向例令旗民會同編查得旨允行先是上檢閱各省呈繳應燬書籍內有千山和尚詩本語多狂悖諭曰千山名函可廣東博羅人因獲罪發遣瀋陽刻有詩集恐無識之徒目爲縉流高品並恐瀋陽地方或奉以爲開山祖席於世道人心甚有關係著宏明富察善確查函可在瀋陽時曾否占住寺廟有

無支派流傳承襲香火及有無碑刻字蹟查明據實覆奏旋奏盛
京通志內載千山和尚來至瀋陽之千山雙峰寺建有小塔當卽
馳赴查明並無承襲支派惟雙峰寺查有函可碑塔並語錄詩句
其支派僧人法貞等實皆愚蠢均屬務農山僧查函可係獲罪發
遣之犯膽敢放蕩詩詞肆意狂悖請將雙峰寺所遺碑塔盡行拆
毀及盛京通志內所載事蹟逐一刪除報 聞四十一年疏言甯
遠州中後所地方向設巡檢後改設州判管理詞訟等事但究係
佐雜旗民視非正印不甘聽斷請裁歸甯遠州知州自行經理惟
中後所係關外要地應仍設巡檢專司巡緝 從之四十三年五
月以不修倉廩下部察議尋議降二級畱任十月因病解任五十

一年卒

右 國史館本傳

國史館本傳

三

Vertical text on the right side of the page, possibly a title or header, written in a non-Latin script.

1177

蔣炳

蔣炳江南陽湖人雍正七年由舉人考授內閣中書十年遷額外
侍讀十一年遷廣東道御史乾隆元年二月疏言風俗之轉移在
世家巨族爲之倡教化之行先自貴者始近日士大夫於宗族親
黨固有好行其德者亦有祇知自私自利者且有妻子饑寒肉而
手足糠粃不繼奴僕乘堅策肥而族黨凍餒不顧者更有起於寒
微胥受族黨侵侮一朝得志便思報復攻訐訟奪過於仇讐其子
弟化之爭財互控視骨肉如路人士大夫家尙如此何以責細民
之器陵詭譎臣愚以爲大臣官員俱宜敦實行篤族誼各隨力之
所能恤其宗黨有能捐產入宗祠贖族人者有司另列其田數於

籍免其雜徭并交部議敘士庶之家族姓五千丁以上許本族公
舉謹厚者一人爲長訓迪族眾三年內族人無干禮犯法涉訟公
庭者州縣給扁示獎五年無犯督撫給扁示獎歲歉有能周恤族
眾不使流離失所者督撫酌其輕重或給扁示獎或題請給以冠
帶榮身如身膺祿位恃勢擁貲欺蔑宗族者據實題參輕則示罰
重則削秩其身列學校者歲許族人將實行具呈教官申學臣閱
文而覈其實爲宗族所稱許者文雖遜亦得免下考指斥者文雖
優不得列上等案內詳加分別敘其實於下以媿恥之復誠勉之
如此則有所勸以動其企慕之情復有所懲而去其澆漓之習卿
大夫倡於前士庶人興於後大吏有司實力訓勉庶數年而後禮

讓成風 上嘉其言交部議敘六月疏言州縣徵收漕米本應隨到隨收而蠹書故意遲延令其守候及驗看又以好作醜多方刁難戶書從旁說合至收米時或敲鬆制斛鑲入木片或用脚踢或用淋尖蠹書多收肥己不肖州縣亦復侵入私囊此係向來積弊近今江南經尹繼善爲巡撫竭力整頓諸弊肅清而他省未能盡然請 敕有漕各督撫嚴飭所屬通行禁革部議 從之時奉旨令諸臣直言時政九月炳疏言慶賞刑罰進退用舍帝王馭世之本臣伏見一年內挾私卑鄙如程元章而仍用侍郎剛愎怙過如蔭昇而仍用副都統近則更有奉 旨逮問如元展成董芳等而復用爲大吏爲將領在 皇上愛惜人才委曲成就固無所不

至但臣思一人之身或悔心於末路或變節於崇朝前後始終雖難必其一致然未有今日爲賢明日爲不肖今日爲不肖明日爲賢今日在囹圄之地方顯斥爲罪人明日卽授以兵民之司又責以安邊治民之略如此驟且速者也上年海塘之衝坍罪在程元章隆昇黔苗之叛亂罪在張照哈元生董芳明知其罪而復授以高官大職思其晚蓋恐未可必得至大臣尤當養其廉恥乃可責以有爲近如孫嘉淦福敏傅鼐降革之議方行而復官之命旋下無論士民官吏各懷慢侮卽在彼亦必面沮無顏與士大夫相見何以責其從容盡職又九卿會議彼此周旋各懷瞻顧外託老成持重之名內懷持祿養交之念引身事外惟恐及己各部議處

之案於援引律例下加以轉語揣摩迎合隨徇營私無罪者可入
其罪有罪者可出其罪濫刑僭賞之弊恐卽此而生 諭曰朕卽
位以來屢下求言之詔至再至三出於誠切並非尙納諫之虛文
誠以朕躬闕失無由自知必賴直言之匡正而隨時納詢者乃臣
子事君之大義胸有所見卽當直陳於君上之前使言之果當朕
當卽時改易可收轉圜之益卽使其言不當亦得以己意明白剖
示釋其疑心亦開誠布公之道也今覽蔣炳所奏直據所見剴切
敷陳不負朕求言之意乃近日言官中所罕見者朕甚嘉之但伊
奏稱哈元生董芳元展成張照等旣明知其罪不宜復授以高官
大職哈元生身爲提督貽誤封疆朕所痛恨因念其尙有勇力曾

著軍功是以從寬免罪發往西路軍營以副將空銜效力贖罪並未昇以見任官職董芳到黔不久因與哈元生齟齬以致軍務稽遲其罪尙輕此中外所共知者今發往滇南止以副將效力亦未復其原官元展成本屬中才適當地方最難辦之事遂至經理周章巡撫無領兵之責情尙可原今補用臬司令其自效而官階已降數等矣至於張照不過令在殿中修書行走亦未授以職任況棄瑕錄用或降旨訓諭後而仍改用他途予以自新之路此從古帝王罪疑惟輕愛惜人才之意朕亦或做而行之若事關名節大玷官箴者朕斷不輕貸也此數人之用舍黜陟原出朕之大公並無偏私之見爰因蔣炳之奏將朕意宣示之然先事防微人臣事

君之大義設因此而用舍任意則大非慎簡庶僚之意此朕所時時自警而羣臣皆當隨時繩糾者也蔣炳知朕求言之心直陳已見應加獎賞以爲言官勸善交部議敘十二月擢太常寺少卿二年四月疏言直隸有亢旱之象山東州縣雨亦多缺在國家固不惜倉儲多方賑貸亦須外來商賈輓運源源接濟請暫免關稅敕天津臨清等關凡載糧舟車到關卽放免其徵稅及交納船料庶商賈聞風趨販口食充裕 詔如所請十月丁憂回籍服闕補原官五年八月遷右通政十二月授順天府府尹八年二月疏言向來辦理京差車三百輛以內係大宛兩縣於京城雇覓三百輛以外始令近京州縣協辦今夏秋雨水不時外來車少京城雇覓

較難請將大宛兩縣承辦之車以二百輛爲率並將應用數目先期覈定行各州縣預辦至任載之車平地可載二千斤路險行遠必宜量減請令查明車數約計運之多寡均分量載則車戶更樂於趨事 從之九年二月疏言直隸農民罔知盡力耕鑿臣畱心訪察凡有井之地悉爲上產每大井可溉田二十餘畝中井亦十餘畝雨澤偶愆足資綆汲上年直屬歉收蒙 恩發粟發帑多方拯濟今農事初興甘澤未普當思以工代賑請令督臣詳議曉諭農民有能鑿大井者給口糧工本中井半之俾貧民得傭工餬口地方官親爲相度計及久遠庶礮瘠可變膏腴 諭下直隸總督高斌酌行五月疏言五城設廠平糶官粟而遠鄉難於赴領請發

四萬石於四路同知處分設四廠以就民便 諭如議速行八月
疏言今科順天府鄉試搜檢嚴密情弊一清臣思外省鄉試亦應
嚴爲釐剔其法莫如覆試中式之人赴省填寫親供時撫臣會同
學政覆試真僞立見卽將試卷解部磨勘 詔如所請十三年擢
兵部右侍郎仍管順天府事十七年三月授河南巡撫八月疏言
豫省界連秦晉向來鄰屬荒歉每資撥濟本年山西被旱臣將陝
州及靈寶閩鄉並沿河之偃師孟津等十七州縣漕穀二十萬石
預備協撥均令運貯陝州水次又運穀腳價不若運米爲省臣令
貯穀各州縣卽碾米運貯 上以其甚合機宜 諭獎之二十年
丁憂回籍二十一年 命署河南巡撫尋調湖南先是湖南布政

使楊灝以侵扣穀價爲巡撫陳宏謀所劾鞠實擬斬二十二年秋
識炳以灝於限內完贓擬入緩決具題部議如所擬 諭曰秋審
冊內擬斬之原任布政使楊灝擬入緩決甚屬紕繆楊灝身爲藩
司乃侵漁剋扣至三千餘兩此其貪黷敗檢本應立行正法以彰
國憲監候已係朕格外之恩朕以爲該撫審擬招冊及三法司九
卿科道等廷識時自當入於情實乃冊內妄以該犯限內完贓歸
入緩決試思藩司大員狼籍至此猶得以限內完贓槩從未減則
凡督撫大吏皆可視婪贓虧帑爲尋常事侵漁剋扣肆無忌憚幸
而不經發覺竟可安然無恙卽或一旦敗露亦不過於限內完贓
仍得保其首領其何以飭官方而肅法紀耶此案原擬之蔣炳著

交部嚴加治罪三法司嚴加議處九卿科道等俱交部議處又諭曰楊灝受旬宣重寄恣意侵貪斷無令得倖免之理而蔣炳竟敢入於緩決者其亦有故因思向聞陳宏謀與楊灝本有夙嫌是以嚴參周納審如是則陳宏謀挾嫌誣讎散法人人死罪而楊灝無辜負屈致罹重辟蔣炳身爲巡撫卽當明目張膽據實申理代爲昭雪朕亦何難治陳宏謀欺罔之罪如此則蔣炳爲能實心任事不媿股肱之寄朕所嘉予矣今蔣炳於此案並無一語爲之置辨而但以限內完贖混入緩決之內希圖開脫是誠何心在蔣炳之巧於彌縫其意以已成之獄既不肖與陳宏謀顯相抵牾而楊灝已得陰爲保全無知之流必且歸以長者之譽是非倒置莫甚

於此朕臨御二十二年辦理諸事孰敢逞其私臆威福自擅者秋
審大典生殺所繫必求情理之平在無知小民尙當反復研究況
督撫藩臬不但爲闔省屬員之表率乃天下臣民耳目所屬而班
聯相護之惡習牢不可破如此法紀安在楊灝與陳宏謀不睦一
節情事即使屬實蔣炳亦無所辭咎蔣炳著革職拏解來京治罪
尋擬斬 諭曰今刑部審訊蔣炳擬以斬監候實屬罪所應得但
蔣炳辦理此案雖營私沽譽尙無受賄情弊著從寬免其斬監候
發往軍臺效力贖罪二十三年三月奉 旨宥罪來京以員外郎
在軍機章京上效力行走五月授甘肅布政使 命辦理軍需二
十五年擢倉場侍郎二十九年卒

右 國史館本傳

公諱炳字曉滄陽湖人其先居常州之義興五世祖敷始遷於府治曾祖諱士英祖諱紹元皆以公貴 贈資政大夫曾祖妣吳氏祖妣王氏皆 贈夫人考諱梧嘗倣朱子社倉法行於鄉 封資政大夫妣張氏 贈太夫人生子二公其長也公自少魁岸負經濟略雍正四年舉順天鄉試七年考授中書舍人直軍機處十年鄂文端公經略西陲請以公偕行比還授廣東道御史乾隆初上屢詔求直言公上疏極論進退黜陟之宜反覆數千言其大要歸於裨主德尊國體 上嘉其剴切特詔部紀錄其居言路先後凡四年章凡十餘上嘗言守令宜久任以責實效其未滿三年者

不得輒行遷擢又言州縣徵銀之弊請 敕下有司以部頒定額
刊示民間俾胥吏無得暗行飛灑又請撤太原保定額外兵以省
煩費又請禁按察司刪改供招以慎刑獄又言漕務通弊請嚴書
吏抑勒斛手浮收以除民累 上皆敕部議行元年冬擢翰林院
提督四譯館太常寺少卿明年夏以天旱奏請疏滯獄免各關糧
稅五月奉 命祭金太祖諸陵路出良鄉房山諸邑見兵民廬舍
多被水還奏請遣官賑恤秋又請除武進陽湖役田租以甦民困
冬以母憂去官五年服除赴京補原官累遷順天府府尹七年順
天旱請緩徵新舊錢糧八年會 上謁 陵條奏調發民車事宜
五條行之又請增廠減糶竝給米二百石於養濟院諸處收養流

民又請發帑往奉天買豆數萬石由海運至天津俱報可九年
春奏直屬有井地悉爲上產請飭各州縣給民口糧於少水處
掘井既可變磽瘠爲膏腴兼可以工代賑是歲夏旱五城設廠糶
官粟而遠鄉之赴糶者苦之公請發粟四萬石於四路同知處分
設四廠以就民便上遽行之十三年冬授兵部侍郎仍理府尹
事十四年請毀直屬淫祠以修義學及養濟院十五年請發帑給
車戶置官車平時聽民間私賃遇徭役調集應用由是畿民之有
車馬者益得休息十七年春奉命巡撫河南會往歲河決陽武
凡水所過諸邑民不得耕種因請借給口糧籽種及緩徵新舊錢
糧各有差是時山西陝西亦皆旱公豫儲粟十萬餘石已而山西

檄適至卽撥遣之十八年春 上以陽武封邱延津武陟諸邑累
被水 諭緩徵積欠倉穀公請竝緩祥符等十八州縣商邱永城
等五州縣其秋陽武再決隄壞四十餘丈晝夜堵築閱數日而成
民間被水者不待奏報遽發帑給之遂開茆河以醜河流而河患
稍息二十年西路兵由河南赴陝公豫爲備自安陽至閩鄉分十
五臺每臺車馬令其一日負載一日空返擇平廠地設營募商爲
具食兵至復躬往監之兵入境出境歷五十餘日而民間若弗知
以父疾請終養 上慰留之夏封公卒持喪歸明年冬再起爲河
南巡撫中途調湖南二十二年秋前布政使楊灝以侵帑下獄當
會審時公以緩決讞不稱 旨謫赴軍臺明年春 召還仍令直

軍機處尋出爲甘肅布政使公至官會所屬游饑親往巡勘所奏賑恤事一如在河南時時西陲方用兵徵發旁午公擘畫經費每夜治軍書中且不寐奏銷三百八十餘案軍務告竣上念公久勞遂有總督倉場之命而公之心力亦瘁矣公生平善知時務忼慨自奮中外所設施皆有成效每與同僚論天下事條析并辨若指掌上文好獎率後進推輓不遺餘力里居時置義田三百畝以贍族歲餼輸金以賑鄉人德之督倉四年以乾隆二十九年十一月十九日卒年六十有七明年秋其孤將歸葬公於某所齋行狀及奏彙數卷乞銘於余余故公同年友又稔知公乃書其大槩歸之夫人陳氏事姑謹能飭其家政年二十七卒附公葬繼夫人

國朝文獻通考卷之十一
楊氏子四長麟昌翰林院編修先卒次龍昌山西永甯州知州次
熊昌戶部廣東司主事次騏昌國學生女四壻國學生沈鄆方某
史某一未字孫四純裕國學生純禧純耀純祐俱幼孫女三曾孫
二王祥王喜曾孫女一銘曰

英英蔣公天質挺拔唯靖唯其謙言奮越 天子毗公屢膺節鉞
宣敷中外心力單竭公今往矣餘風有映行蹟在人粲如眉列子
孫繼之溯乃貽厥陽湖之里高墳辟集銘茲幽室垂於來哲

右墓誌銘彭啟豐撰

彭啟豐

孫希濂

彭啟豐江南長洲人雍正五年一甲一名進士授修撰入直南書
房七年閏七月署日講起居注官充河南鄉試副考官十年充雲
南鄉試正考官十三年二月遷左中允六月充江西鄉試正考官
十月充順天武鄉試副考官乾隆元年充山東鄉試副考官三年
遷侍講五年遷右庶子六年六月充江西鄉試副考官七月遷侍
讀學士九月遷右通政尋遷左僉都御史十一月疏言臣由江西
驛路經宿州州境蒙 恩賑卹水災知州許朝棟不實心經理饑
民戶籍六七口僅登記三四任甲長胥吏索取報冊錢鳳陽知府
梅疏健並不到廠親查 敕下兩江總督那蘇圖查奏尋奏覆許

朝棟照料不周已飭員前往協辦七年遷通政使提督浙江學政十一月條陳學政事例一請定條對經義畫一章程乾隆元年

諭令學臣於歲科考試文藝後就諸經中舊說異同別彙處摘錄發問依義條對後陝西學臣嵩壽奏請於四書經義外摘錄本經四五行令作講義大都敷衍塞責且既試條對又作講義亦屬繁複請嗣後不用講義欽遵 諭旨在 御纂諸經中專取先儒異

同令其條對一請嚴甲商濫保商童之例查浙省商童由鹽道錄

送學政衙門收試雖有廩保商結爲憑往往招別籍之人

同考頂替請嗣

後甲商如有混保籍入場者照不應律治罪一請隨場出題考試歲貢查向例考貢之年出題一次考究將卷彙齊送部伏思先後一題則考過一棚凡陸續赴考者預知題目皆可宿構請嗣後

各屬就近送考隨時命題不拘先後一題例庶得各展所長一鄉場對讀不敷請兼用四等武生查鄉場對讀例用五等文武生浙省科場需用二百名不敷則用樂舞生或臨期招募臣思考居四等原無不許鄉試之例四等文生有礙場期固難對讀若四等武生鄉試在十月中並無妨礙請嗣後各省如五等生員不敷對讀兼用四等武生俟對讀後免其錄遺准入場鄉試當亦踴躍從事下部議行十二月遷左副都御史八年遷內閣學士均畱學政任十月擢刑部右侍郎十年四月疏陳浙省利弊四事一浙省山高水駛猾吏奸民侵占蓄水之湖洩水之溝以爲田地上年藩司潘思渠疏請禁占官湖部議除已報墾地畝餘蓄水處劃界限不許

再壑然如餘杭南湖發源天目注蒼下灌杭嘉湖三郡自前撫朱
軾加意濬治今已沙淤其他會稽餘姚慈谿等湖皆僅存其名請
敕督撫次第開濬一江南漕米每石收費五十四文半給運丁
半歸州縣爲修倉鋪墊人工飯食紙張以及折耗等費浙省杭嘉
湖運丁設有漕截一項由州縣徵給而州縣漕費並未議及收漕
賠累爲苦每石漕米私加一二升至五六升蠹役乘機竊取運丁
嚇詐勒加請 敕漕臣援江南例每石收錢二十四文爲州縣修
倉鋪墊等費嚴禁浮收一浙江額設均平夫銀供夫役差徭之用
差簡可以敷用差繁每苦賠墊欵差馳驛官員照勘合定數易以
應付本省官員來往吏役任意多索或卽折銀請 敕兵部按官

員大小差使煩簡覈定人夫名數俾州縣有成例可遵一浙省黃
巖太平地多斥鹵產鹽甚旺兵丁借端挨戶搜查稍有食鹽存積
多方嚇詐一不遂欲卽指爲私煎私售甚或並數家數人之鹽湊
數扳誣祈 敕合省文武大臣禁兵弁借名搜緝指食鹽爲私鹽
下部議行尋丁父憂十五年五月授吏部右侍郎八月提督浙江
學政十八年調兵部左侍郎二十年二月疏請終養得 旨昨因
論臣工終養一事降旨宣諭今日嵇璜彭啟豐各具摺呈請終養
此奏若在降旨之前出自伊等至情迫切固當曲體允從之特以
面聆朕訓感發天良則所請乃導之自朕而伊等本未有迫不及
待之情此亦如禮部鄉賢在可准可不准之間其去畱朕得而權

衡之又當各視其人矣彭啟豐才本中平辦理部務亦屬竭蹶且
伊係內廷翰林以文學爲職而上年扈蹕和詩視前遠遜所學日
漸荒落著照所請准其回籍終養二十六年十月署吏部侍郎二
十七年四月報滿實授五月 諭曰昨引見京察一等各員覈之
各堂官保列名單其中等第參差率不甚相遠惟吏部郎中阿敏
爾圖各堂官俱列一等而彭啟豐獨列爲二等不免有心示異非
偶然品題高下之比阿敏爾圖係滿洲世族朕習見熟知伊果有
出眾長才堪膺重任外而封疆內而卿貳當已早經擢用豈尋常
曹司必待畱心甄擇而定者況京察等次不過就本任職守而言
並非卽爲一生定評卽如阿敏爾圖在部郎內安分供職而又能

持正無私顧情顏面若選司之銓務銀庫之出入以該員素守論之實可信其無他彭啟豐之意不過以其望族所在非特爲區別何以知其獨立不懼彭啟豐人不如其學學不如其文亦從無一言建白一事指陳乃欲於隨眾具摺之中小示異同如此獨立誰則不能朕衡量人才如各部院兼攝大學士尙書侍郎等亦祇令竭其分各抒己見並不倚爲黜陟其間或同或異原不加之責備試問吏部各堂官列阿敏爾圖於一等是保爲封疆乎卿貳乎卽彭啟豐之斤斤示異若此爲京察大典乎爲取巧市名乎其事固不煩言而易曉第恐不能見用之人妄生議論以爲卽如彭啟豐之不與人同究可謂能自立崖岸或人謂因有此奏始有此旨中

外得悉朕甄才用人之意然朕之勤政與否能識人與否二十年於此矣天下宜共悉固不待朕之朝綸暮綍以口舌化天下也六月充浙江鄉試正考官十二月遷左都御史二十八年六月遷兵部尙書充經筵講官三十年充順天鄉試正考官三十一年 諭曰史奕昂朕念其爲大學士史貽直之子且曾任藩司辦事尙無貽誤服闋來京候補其階級與侍郎相等是以擢用兵部侍郎偶值召對之次諭及兵部大臣大學士尹繼善在軍機處行走不能每日進署託言年齒近邁且係初理部務彭啟豐又屬碌碌無能爲之人鍾音蔣櫛亦未能練習部務汝與期成額尙能辦事應隨處畱心此原不過令其於日行事件稽覈司員勤惰查察書役弊

端甫已乃伊恃有此諭遽爾沾沾自喜大言不慚遂欲獨侵事權
放恣自用竟似朕以部務專任伊一人者昨期成額奏伊在部面
斥彭啟豐有不稱尙書只宜爲司員之語今詢之彭啟豐堅稱史
奕昂並無此言但其平日有願爲外任之意及召詢鍾音則稱實
係共聞因令彭啟豐面爲質對伊始唯唯承認史奕昂此語本屬
無稽彭啟豐亦何妨直陳不諱而乃自居蘊蓄不言人過甘效唾
面自乾則不但選悞無能其居心並欠誠實此又彭啟豐之結習
未除也史奕昂姑從寬降爲三品卿銜令其回籍彭啟豐學問尙
優辦事本非所長今復意存模稜並不據實奏對殊失大臣之體
史奕昂兵部侍郎員缺卽著彭啟豐降補三十三年京察 諭曰

侍郎彭啟豐才識拘牽服官竭蹶著以原品休致三十六年詣
闕恭祝 孝聖憲皇后八旬萬壽 賜遊香山詩 詔分大臣爲
三班九老致仕者九人啟豐與焉四十一年 上東巡啟豐迎
鑾山東 恩賞給尙書銜四十九年卒

右 國史館本傳

乾隆四十九年六月旣望致仕經筵講官兵部尙書彭公卒於家
諸孤紹觀紹升等以其年十二月旣望葬公吳縣穹窿山冠子嶺
下公諱啟豐字翰文其始出江西之清江自明洪武中始遷蘇州
爲長洲縣人世有休問公祖侍講公諱定求以篤行大儒顯名康
熙中蘇州之彭遂稱天下公年十六補諸生雍正五年繼侍講公中

會試第一廷對復第一朝野夸榮公怡然若未始有者 憲皇帝以公入南書房充日講起居注官遷左中允 恩數常與大臣等乾隆三年 今上嘉公有文擢公侍講累遷左僉都御史提督浙江學政積三遷至刑部侍郎領學政如故還丁父憂憂除補吏部再督浙江學政就改兵部官滿還乞終母養母終踰年起公署吏部右侍郎明年補左侍郎遂遷左都御史二十八年以公爲兵部尙書充經筵講官越三年左調復爲兵部右侍郎又二年致仕歸歸九年 上東巡公朝 行在復故階先後立朝垂四十年 國家有試士之典未嘗不在列文學之任當時莫比其卒也年八十四公少及事侍講公受儒家言孝友祥順旣貴謙謙有子弟之容

其在官大抵以謹慎見稱不好激言畸行而亦介然時有所不可爲僉都御史典試江西還過江南之宿州宿方被水有司賑不以時饑民號訴滿道上公立奏入時學臣有諂事大吏以屬官門生自居者公又疏言之皆見施行督學浙江還言利病四事其一曰餘姚南湖之水發源天目注茗谿下灌杭嘉湖三府今淤塞侵占者多古稱西湖之水溉田萬頃今淺狹不稱舊聞會稽上虞慈谿諸水利多不修復旱潦無備非宜其一曰浙省收漕每石私加五六升及一二升不等宜禁其一曰浙省官水陸往來非奉使馳驛者皆例外自發驛傳多者役及千夫少亦不下六七百人騷擾實甚宜與限制其一曰溫台諸府產鹽地例設巡鹽兵兵利賞輒按

戶搜索或將數家食鹽併少報多誣民私販大不便章下所司
議頗施行如所請其後二十餘年浙中督撫相繼得辜死州縣
漕弊亦雜發益熟爛不可問其所以使然者漸矣公可謂識微
者歟史侍郎者習於公因戲詆公眾中已而事聞於上召問
公公曰無之坐爲同官隱過不實奏失尙書其生平坦闊得過
失不自知多類此在翰林久所奏進文字多切於治體後當有
論其世而知之者詩古文集二十餘卷具有家法其碑版文尤
推重於世公旣老壽家居十餘年掌紫陽書院興起後進如其
爲學政主考官時不懈所居十泉街仍世通華子孫皆列官內
外而門館蕭閒簾閣據几一鐙諷卷如老諸生歲時伏臘婚嫁

徭役糧稅如平人家芑孫及公門最晚以文字辱公知愛又從
公子紹升遊得悉公服官制行始末及公葬紹升爲書援古義
屬銘公墓道之碑固辭不獲謹按公生平遭際之盛載於里巷
婦孺之口其清望著於士大夫之列獨其忠言亮節或有不得
而聞者矣爲刪取行狀舉其事言之有效於世者序而銘之銘
曰

於休我公儒行是崇有蔚其華益大其家 憲皇庸之芝出告時
躋公顯地唯 今皇帝清步如鶴翔我廟堂綽然進退心享用光
權路爭趨公不欲居不欲而居處以虛徐人所碌碌公獨嶽嶽當
其嶽嶽疾雷在腹 帝實石公公不自榮天實篤公公不自盈吉

孚乃惠納約於誠唯惠唯誠以有休祐神之聽之則茂爾後嗟爾
後人尙服厥舊穹窿之側卜公安宅螭首龜趺有穹斯石刻我銘
辭風霜不蝕

右墓碑銘王芑孫撰

乾隆四十九年六月兵部尙書彭公薨於里第遺疏上聞 天子
震悼一時士大夫走位相弔泣且歎曰 先皇帝老臣盡矣存者
惟嵇相國爲先輩而彭公科尤先海內望之如晨星孤月儻假一
二年重宴鹿鳴瓊林豈非 熙朝盛事而天徧斬之悲夫然公之
清節重望恩榮壽考於古爲稀勒之貞珉備國史之採不可廢也
其同館後進袁枚受公知五十年爲按其狀而銘之曰公諱啟豐

字翰文應鄉舉時芝生庭中因自號芝庭先世由江西遷蘇郡之
長洲祖定求康熙丙辰會試 殿試俱第一父正乾考授州同知
三世皆以公貴 誥贈光祿大夫吏部右侍郎公貌清羸長不踰
中人而風骨珊然如鷺飛鶴翔凌風欲去雍正三年舉於鄉五年
會試第一 殿試亦第一大學士張文和公奏科名與而祖同
世宗喜卽召入南書房七年充河南鄉試副考官時未散館而有
是命皆異數也十三年遷左春坊左中允 今上登極之元年遷
侍講累遷至侍讀學士通政司左通政吏兵刑三部侍郎尋授兵
部尙書充經筵講官 兩聖人知公廉明能文章凡掄才大典倚
公如金鑑 命校順天鄉會試者三主直省試者七視學政者二

經歷滇南中州江右山左浙西輜軒所臨庶士懽廷其他讀卷

殿上及闕迴避拔貢教習 朝考 召試諸卷皆疊次任委連縣

不斷公亦飭躬齋心克與 上意相副從江西還奏所過宿州有

司賑災不實又奏請 敕各省學臣見督撫毋卑諂應遵會典儀

上是之後在浙時奏官河宜開濬漕費宜遵舊制毋浮收本省

官出巡應額限役夫毋過千名任兵部時奏武職銓補遲速不均

宜與卓異官均以雙單月輪班間用奏馳驛官奉使者有廩給口

糧而夫役俱向驛站借雇慮開多索濫應之漸宜停例支改一馬

三夫 上皆可其奏發部議施行當是時 上方嚮用公適有同

部兩侍郎不相中造蜚語聞 上引公爲證 上問公公對未聞

上疑有私降爲侍郎越二年以原官休於家先是公乞養歸爲
娛奉太夫人故箕山濬池蒔花竹極園林之勝至是再歸山水益
清幽樹益茂公擁萬卷嘯哦其閒雖大耋聰強不衰或春秋佳晨
出遊石湖寒山士女皆知兩朝元老擁觀塞路初公侍 內廷時
世宗賞大臣福字偶未及公 特手書以賜侍 今上泛舟賞
花釣魚 命和詩至二百餘首所賜珍玩無算祝 皇太后萬壽
與九老會圖形中禁金川蕩平公迎 駕山東進凱歌 恩復尙
書銜與宴在江南三次迎 鑾皆 召見溫諭四十九年公迎
駕跪龍泉莊 上遙望見卽 命侍衛扶起 命秋冬北上與千
叟宴公方感 上恩修安車欲行未及期以無疾終年八十四性

峭直稍不可於意卽形詞色然過後輒不省慊慊自下遇布衣文學之士皆抗禮與鈞枚弱冠入都卽奇賞之聞其入穀特呼車往賀主司得人晚年猶端書細字往來唱和尤密常語人曰袁君非徒詩文佳也聽其議論如魯公書徹透紙背其見知如此妻宋氏誥封一品夫人子五人長紹謙山東桃源同知次紹觀翰林侍讀學士次紹咸增廣生次紹升丁丑進士次紹濟尙幼女三人其一適常州學士莊公培因甲戌科 殿試第一孫十二人皆有科名曾孫六人銘曰

庭實九獻特達圭璋簫韶九成來儀鳳皇天生彭公爲世休祥履星長上立日月傍 帝畀玉尺東度西量公洗心眼清儷冰雪萬

蟻戰酣一鏡破黑拔茅使高升珠使跳爛其盈門八座三貂扞所
蘊蓄施於爲政擗多爽鳩廡拜 寵命周官司馬權重中樞公靜
鎮之四海晏如 帝謂古賢七十懸車卿年已屆可以歸歟公拜
稽首 聖恩優老臣願歸田詠歌天保都人羨公祖餞盈道一十
七年煙雲花鳥臣請 主安 帝問卿好以其餘閒爲書院師胡
環孫復歐范優爲以其餘福蔭及孫曾玉堂蕊榜縣縣繩繩齊門
之外新塘之東百尺華表萬古清風

右神道碑袁枚撰

乙酉七月 召對詢及鄉試應裁去官卷否謹對官卷業經裁額
不爲濫觴若混入民卷恐開徇情之端有妨孤寒進路仍宜照舊

右芝亭自訂年譜張維屏錄

彭希濂

彭希濂江蘇長洲人祖啟豐官兵部尙書自有傳希濂乾隆四十九年進士授主事分刑部學習五十四年補主事五十六年遷員外郎五十八年升郎中嘉慶三年提督貴州學政五年丁母憂八年服闋十年補郎中十二年五月充福建正考官十月遷內閣侍讀學士十三年內閣侍讀學士文通德祥籤掣 詔差不與同官公議希濂劾之 上以文通等專擅下部嚴議十五年九月稽察西四旗覺羅學十月充順天武鄉試副考官十二月授鴻臚寺卿十六年以京師旱 命偕副都御史潤祥等監視平糶九月遷通

政司副使是月直隸饒陽縣民人劉達添以劉長安等捏契霸產
致斃三命等情於都察院具控 命偕副都御史佛柱馳往審辦
坐誣問擬如律十月遷光祿寺卿十九年五月山西大同鎮標馬
兵武生秦仲喜控大同鎮總兵張績遊擊安惠等剋扣各款偕刑
部右侍郎成格馳往查辦訊明安惠扣畱兵餉驟價守備西蘭布
等冒領馬乾等款屬實餘坐誣張績交部嚴議餘依律定擬有差
七月遷內閣學士兼禮部侍郎二十年五月稽察中書科旋升刑
部右侍郎十二月因刑部題本於一日內進立決本二十二件未
將立決絞候二項按日均勻呈進 上責刑部堂官因循積壓疲
玩溺職又題本內將十九年誤寫二十年經部議革職 上從寬

降爲三品頂帶仍革職畱任二十一年三月因直隸總督那彥成具題命案將原供穢言連敘二處刑部照原題直書上以措詞失禮命大學士董誥等將堂司各官分別議罪尋議希濂降一級調用無級議抵復因召見時強詞支飾降補正三品京堂九月補都察院左副都御史十一月仍授刑部右侍郎二十三年八月兼吏部右侍郎二十四年三月刑部主事余繼生舞弊獲罪繼生係刑部堂官保升御史王允輝劾之部議各堂官均降二級調用命俱畱任惟希濂復以從耕藉田失儀如議降調旋授福建按察使九月卒

右 國史館本傳

楊嗣璟

楊嗣璟廣西臨桂人雍正五年進士改庶吉士八年授編修尋改御史掌京畿道事十一年巡視南城乾隆元年奏言漕糧運送京倉雖沿途設有船隻然路經閘座數處需夫扛運有承攬雇夫總役名爲水腳號頭每閘設號房十餘間擡夫二三百名皆游手無藉之徒往往倚眾橫行號頭隸倉場管轄補用巡邏莫敢過問一經罹法免脫無蹤請 敕下倉場衙門飭坐糧廳大通橋監督協同地方官不時稽查並取具號頭不敢容畱匪類甘結若倉場及所屬地方官不行查拏者從重議處俾靖姦宄如所請行二年遷鴻臚寺少卿三年升通政司副使四年正月 上御乾清宮宴羣

臣賦柏梁體詩 賜箋筆硯墨有差嗣璟與焉六月擢左僉都御史七月遷太常寺卿五年三月升刑部右侍郎五月調吏部右侍郎六年三月以山西布政使薩哈諒學政喀爾欽婪贓不法經巡撫喀爾吉善疏 聞 命嗣璟往鞠得實置於法十月乞假省母疾十一月丁母憂九年丁父憂十一年服闋時以大員簡用需人命廷臣各舉所知以備任使大學士陳世倌舉十人 上以所舉惟嗣璟不當 諭曰楊嗣璟前往山西審事時回於朕前痛貶喀爾吉善朕卽洞燭其隱直欲得山西巡撫耳彼時向大學士等言之由今觀之喀爾吉善豈非巡撫中之錚錚者楊嗣璟之居心尙可問乎十二年四月降補宗人府府丞尋復任禮部右侍郎五

月因京察自陳薦廣西學政官獻瑤自代 諭曰朕令大臣等於
自陳本內舉賢自代原期各矢公心全無瞻顧楊嗣璟係廣西紳
士舉廣西學政官獻瑤且侍郎與中允官階相隔甚遠雖朕有韋
帶之士亦許舉薦之旨原以待出眾之才官獻瑤豈卽其選卽謂
此時實無瞻徇焉知日後不緣此居功而便於請託耶且將來地
方官皆以本地指紳可操薦揚之柄此風亦不可長楊嗣璟著交
部察議尋議降二級調用十五年補太僕寺卿十七年升宗人府
府丞二十四年卒

右 國史館本傳

鄒一桂

鄒一桂江南無錫人雍正五年進士改庶吉士散館授編修十九年充廣西鄉試副考官尋授雲南道監察御史十二年疏言民間嫁娶及契買奴婢不用官媒惟戶婚詞訟或入官發賣之人始用之然亦止令書名畫押近不法之徒私養婦女覓主局姦吞騙無所不爲請 敕步軍統領順天府五城各衙門訪拏嚴禁並定地方官失察處分下部議行十三年提督貴州學政乾隆三年奉旨畱任四年疏言黔省漢苗錯處雍正三年前學臣王奕仁奏准歲科兩考於定額外加進苗童一名卷面填寫新童字據查歸化已經百年之苗俗尙文風與漢無二請准入漢童內應試其歸化

未久者照例歸入新童六年疏言歲科考一二等生員例得幫增補廩黔省歲案幫補以行文科考日爲止與各省同科案幫補則於鄉試前科冊解部日卽停是歲案得缺倍多科案得缺至少請改於下屆行文歲考日停止以昭平允部議均從之七年疏言刑部向例秋審結案者歸北監見審未結者羈南所司獄禁卒例不更換益以結案之犯恩旨於每月初二十六兩日許家屬入視家人在監者每日准出入買辦而未結之犯案情未定槩不許人出入以杜傳信串供今臣查視南所北監已未結雜收不無滋弊請敕部分禁於收禁時立檔開明已結未結人犯字樣庶易稽查得旨照所請行是年遷禮科給事中八年七月疏言近見

奉 旨發議之事科道於部議未上之先攙越瀆陳徒滋繁擾應請申飭 諭曰科道職司言路凡有見聞自應陳奏但如鄒一桂所奏攙越瀆陳則大不可嗣後遇有交部議事件如科道不待部覆參差具奏者該部於議覆本內將伊等意見參差之處聲明請旨九月疏言樂舞生向來多弊是以定例令州縣官會同教官選補文童取鄰族冊結送學政查覈見經禮部覆准河南學政林枝春條奏改由學臣錄取此法一行恐不肖學臣藉以網利請照舊例補送下部議行九年與給事中陳大玠先後疏劾革職巡撫許容不宜仍署湖北巡撫 上嘉納之詳許容傳十年四月遷太常寺少卿九月疏言監獄重犯雖防範不得不嚴然律載獄具全圖

鐵索鈕鐐俱有定式獄官果遵式慎選禁卒不時查點安有越獄之虞從前禁卒人等因需索故以防範爲辭或用榷牀以束其身鐵簫以直其項觀音圈以攀其手足種種非刑經部議嚴禁載入則例乃日久另拗新制囚徒無分多寡槩令排頭仰臥於腳鐐手鐐之中橫穿長木鎖偪兩端壓其手足不能屈伸轉側攢抑痛癢實與榷牀無異獄囚多緣斃命該管上司以脫監處分最嚴並不嚴禁以穿木束因爲通例直省類然晉豫尤甚請 敕督撫臬司諸臣嚴禁部議 從之十一年遷大理寺少卿十二年授僉都御史十三年遷大理寺卿一桂工繪事所進圖畫多邀 御題十五年遷內閣學士十七年八月充會試副考官十二月擢禮部右侍

郎十八年轉左十九年同部侍郎張泰開保舉一桂子志伊爲國
子監學正 詔下部議泰開以瞻徇革職一桂降三級畱任二十
年以瞻徇尙書王安國左都御史楊錫紱准其父入祀鄉賢祠降
二級畱任二十一年 上以一桂年老不勝侍郎之任調補內閣
學士二十三年十二月疏請致仕 允之 陸辭 御製詩二章
賜之其一曰懷鄉念切老年率弗許翻嫌不近情一晌陸辭雙淚
下原猶戀闕可憐生其二曰簪纓歸里榮依舊花鳥怡情樂正餘
吳下詩人應好在白頭相聚話煙霞時沈德潛致仕家居 上讀
及之故云二十六年來京恭祝 皇太后萬壽蒙 恩與九老會
賜遊香山二十七年三十年 上南巡一桂兩迎 駕 賜齋

禪頤壽額三十六年復來祝 萬壽與會 賜遊如前 命加禮部侍郎銜在籍食俸三十七年歸里道卒 諭曰禮部侍郎銜鄒一桂供職有年人亦醇謹前以老告休昨冬來京見其精神尚能如舊特加恩准其在籍食俸俾資頤養令於春和就水程南歸頃聞行至山東汶上縣地方患病溘逝殊爲可憫著加賞尙書銜仍著該部照尙書應得卹典察例具奏尋 賜祭葬如例

右 國史館本傳

公姓鄒諱一桂字原襄常州無錫人系出宋道鄉公弟洄後十五傳龍光與弟鳳光迪光有大名世稱鄒氏三光公其六世孫也太公生子多以痘殤晚得一女奇愛之生公而女天以爲不祥由是

失愛育之變下太夫人私乳之及長聰穎過人太公又驚喜過望
爲授書遂鍾愛焉雍正五年登進士二甲第一入翰林官編修十
年主廣西鄉試尋改授御史巡視中城公嚴剔利弊一時豪強脅
息十三年奉 命督貴州學政條奏科場之弊七年轉禮科給事
中 上命許容巡撫湖北公上疏曰許容誣奏謝濟世奉 旨革
職總督藩臬以下承審官咸被罷斥不特湖南一省得見天日而
天下臣民罔弗額手加慶此彰瘴之公吏治所由以知戒者也昨
讀 上諭仍命許容巡撫湖北中外聞之無不驚駭許容徇庇縣
令反將參揭之道員捏款誣奏狡詐欺公於是爲甚荷蒙 聖恩
僅予革職已邀寬典今復任以封疆何以訓示天下乞降 諭旨

宣示臣民俾曉然於黜陟之所以然斯國法昭而吏治有所率循矣疏入 上遂寢其事十一年八月 賜宴瀛臺時公位未顯例不得列 特命公與沈公德潛與馮冬轉大理寺少卿多所平反脫死學二人由大理寺轉僉都御史再遷大理寺卿上疏論律載獄具全圖鐵索鈕鑰俱有定式乃司獄者輒以貪婪未遂任用非刑慘毒呼號不忍聞見夫囚有應得之刑 國家有當用之法法不當其舉猶不可以爲法矧令其死非法之刑哉 上特下其奏於各省按察司有敢違者議其舉十四年 詔舉經學以同邑顧棟高薦一時被薦者百有餘人廷論得四人以進公所薦與馮遷內閣學士兼禮部侍郎以 皇太后聖壽 誥授資政大夫十七

年主禮部試尋以事鐫級二十二年復遷內閣學士兼禮部侍郎
明年以年老告歸 上以詩寵其行歸三年詣 闕恭祝 皇太后
聖壽 賜公杖命致仕諸臣年最老者爲九老會公與焉又十
年以祝 聖母八十壽加尙書歲給俸錢再與九老會公年既篤
老其歸也以三十七年三月二十七日薨於東昌道中年八十有
七公歷官數十年挺挺直節著於 朝廷及居家屏跡不入官府
時杖策尋佳山水與緇流羽士賦詩飲酒爲方外交工繪事得文
待詔遺法其在御史時大官有索畫者促之急公曰吾不能受人
役卒不應然公畫流傳頗多亦未嘗故自矜重也配惲氏 封夫
人子一人志伊乾隆九年舉人早卒孫二人長國學生琦次驥公

之喪既歸琦奉公年譜請編錄行事獻之太史爲撰次如右謹狀
右行狀彭啟豐撰

無錫鄒小山侍郎一桂工詩善畫嘗繪菊百種各題詩其上以進
上賜額四字曰黃華知己著有小山詩鈔

高宗在藩邸鄒宗伯一桂方以工畫直內廷令內侍持箋命
畫宗伯以未奉諭旨不敢應高宗登極賞其謹慎擢用卿貳
右紀聞陳康祺撰

瑯古泰

瑯古泰伊爾根覺羅氏滿洲正藍旗人雍正五年由文生員考取
繙譯筆帖式補禮科筆帖式乾隆元年遷主事尋升員外郎十七
年授山東道監察御史二十年轉吏科給事中二十一年命巡
視南城二十二年偕御史陳作梅劾吏目盛朝臣濫差縱役因拘
休致御史叢洞家人誤拘叢洞請照溺職例革職上以盛朝臣
不過簽差不慎處分瑯古泰等爲同官吐氣甚屬不合併交部察
議二十三年轉刑科掌印給事中二十七年京察一等二十九年
命巡視盛京尋奏盛京各衙門逾限事件九十六案請交部察
議諭曰官司承辦公事自當遵限完竣但其中有逾限一二日

以上者情尙可原應從寬免其交部在五月以上者爲時較多如
節次增加易成闢茸之漸咎屬難辭著交部察議三十年京察一
等三十三年復京察一等三十四年起升內閣學士兼禮部侍郎
銜三十五年遷盛京戶部侍郎三十七年五月奏言回贖民典旗
地見已查辦清楚應行動帑回贖嗣後儻有違例典賣與民人者
將兩造從重治罪地畝及原獲價銀盡行入官其不能查出之該
管官員不行首報之屯首領催保書一併分析嚴加治罪報聞
七月奏言部屬莊頭孫鏗等名下被水衝壓地五百一十九晌查
勘明確宜令採荒撥補惟遼陽一帶所有堪種荒甸近年以來報
墾幾扁間有零星窪荒不堪墾作官地盛京戶部莊頭等承種地

畝係額設官田填備 陵寢供獻之外例有額徵差徭不比旗人
冊地有荒撥補照舊納糧無荒撥補除糧報部懇將遼陽界餘騰
扣畱地七百一十九晌五分內撥補莊頭孫鏗等五百一十
九晌以足原設官額於一切差使均有裨益下部議行十月以奉
天額解黑豆轉運遲誤奏請交部議處得 旨下部察議十二月
上以塘古泰年力就衰 召來京三十八年 命在內閣學士
上行走三十九年復授內閣學士兼禮部侍郎銜四十年以原品
休致四十五年卒

右 國史館本傳

國朝耆獻類徵初編卷七十九目錄

卿貳三十九

呂熾

旺扎爾

託恩多

衛哲治

陶正靖

敷文

孫灝

吳嗣爵

許希孔

完顏偉

嘉謨

宮煥文

皇朝通志卷之六十一

--	--	--	--	--	--	--	--	--	--

國朝耆獻類徵初編卷七十九

通奉大夫前署江西巡撫江西布政使司布政使湘陰李桓輯
卿貳三十九

呂熾

呂熾廣西臨桂人雍正五年進士改翰林院庶吉士八年散館授
檢討乾隆二年充會試同考官尋遷侍讀三年擢侍讀學士四年
正月 上御乾清宮 賜諸王大臣以下及督撫學政之在京者
九十九人宴賦柏梁體詩熾與焉二月充日講起居注官五年遷
詹事府少詹事兼翰林院侍讀學士七年擢內閣學士兼禮部侍
郎銜九年四月遷工部右侍郎十月充順天鄉試正考官十一月

提督順天學政十年五月調戶部右侍郎仍畱學政任十一月奏直隸唐山屯地方分隸順德府唐山任縣向例新進童生撥入正定府且由正定府學教官考送辦理殊未允協請將唐山屯文武童生並從前撥入正定府學者改歸順德府又唐山屯地方隸唐山縣者十之七八隸任縣者十之二三應將任縣童生移少就多統歸唐山縣考試申送下部議行十一年奏大興宛平兩縣童生向係就試通州後經改歸貢院與入旗分場考取見今府學額數旣在闔屬酌撥仍應將大興宛平兩縣歸入通州考試其各州縣撥入府學諸生教官遠在都城未能約束除由大興宛平撥入者專責順天府學教官督率外其由外州縣撥入者令府學教官造

冊申送府丞分發各屬教官就近訓課 從之十二年 命仍留
順天學政任十三年奏遵化州見升直隸州並撥永平府屬豐潤
玉田二縣分隸其文武生童俱隨遵化州附通州考試查通州一
棚彙考順天府屬生童幾二萬人請將遵化州屬改附永平府考
試得 旨允行十五年八月調禮部右侍郎十一月轉左侍郎十
六年充會試知貢舉十八年乞養回籍二十八年來京補都察院
左副都御史三十三年休致三十五年來京祝 高宗純皇帝六
旬萬壽 賜表裏六端三十六年來京祝 孝聖憲皇后八旬萬
壽 賜朝珠如意等件尋與九老會繪圖香山 賜御製九老詩
石刻四十三年卒

國史館本傳

右 國史館本傳

二

旺扎爾

旺扎爾圖伯特氏蒙古正白旗人父拉錫官領侍衛內大臣以盡心職守給騎都尉兼一雲騎尉世職有傳旺扎爾雍正六年由廕生授三等侍衛擢御前二等侍衛十二年賜其父拉錫世職十三年授鑲藍旗滿洲副都統乾隆元年以扈從失儀議革職命在三等侍衛上行走三年正月噶爾丹策零遣使求北路副將軍策稜轉奏喀爾喀與厄魯特以阿勒臺山爲界上以其詞恭順命旺扎爾偕侍郎阿克敦台吉額墨根齋敕往諭議定地界十二月旺扎爾率使哈柳自準噶爾回京奏噶爾丹策零遵旨定界狀上允其進藏煎茶並貿易欽派大臣與哈柳議行

詳阿克敦傳四年遷頭等侍衛八月授正黃旗滿洲副都統十二月命往蘇州同總督郝玉麟會審織造海保貪縱各款得實論罪如律五年閏五月命查審喜峯口管理臺站員外郎班第永昌交代受賄隱匿狀鞠實議罪如律八月奏言殺虎口等處臺站原爲接遞喀爾喀眾蒙古事件而設甚關緊要因無大員兼管致馬匹疲瘦缺額請將殺虎口臺站令綏遠城將軍轄古北口獨石口令提督轄喜峯口令熱河副都統轄下軍機大臣議行十一月巡察寶坻八城官兵六年五月署正黃旗護軍統領六月左都御史劉吳龍疏參浙江巡撫盧焯受賄營私各款上命旺扎爾會同閩浙總督宗室德沛查審得實焯擬絞餘論罪有差七年二月

署鑲紅旗護軍統領六月以獨石口張家口等處多盜 命旺札爾前往督緝分查界址酌立章程八年二月授鑲白旗滿洲都統六月授嚮導統領旋授理藩院右侍郎九年兼管火器營事十一年兼管武備院事十三年擢 御前大臣暫攝鑾儀衛事 詔赴金川軍營查閱沿途驛站 諭曰旺扎爾抵營應在經理大學士傅恆抵營後四五日其時一切布置大局已定礪卡路徑著領旺扎爾隨便閱看此際滿兵有交鋒克捷之事亦令目覩一二次經理大學士抵營宣布恩諭賞賚兵丁軍心如何奮勉傅爾丹等情形何似旺扎爾還朝俱可回陳朕得備悉軍營大槩尋回京奏劾山西境內惟腰站有馬數匹尙未設定軍臺亦無馬匹呈驗聞道

員葛爾福在平定州及過彼處並未謀面大站馬匹均疲瘦不堪平陽府衙途既無馬匹亦未見該守令等奉旨切責巡撫阿里袞並議處葛爾福等十四年金川番酋乞降奉旨議敘尋晉領侍衛內大臣十五年總管圓明園八旗官兵及上駟院健銳營事十七年御史周燾密奏通倉米石有虧缺上命旺扎爾同協辦大學士吏部尚書梁詩正刑部尚書劉統勳盤驗尋疏劾中西二倉米虧請將監督革審南倉米數無虧惟贏餘米石不歸本廠請將監督察議再臣查過各廠因盤驗數目不符後詳加丈量但丈量之法較之盤驗米數相懸約皆一二百石若以此爲準米少丈多卽信爲多則有關倉儲米多丈少卽信爲少亦難定監督情罪

之輕重見值關放俸米請交戶部將丈過廩座開支可得虧缺實數並請派大臣監放以杜那移掩飾之弊倉場侍郎漫無覺察請交部察議 從之二十七年轉理藩院左侍郎尋卒 諭曰旺扎爾內廷行走宣力多年今聞溘逝深爲惻惻加恩賞銀二千兩辦理喪事著縣德阿哥帶領侍衛十人往奠茶酒應得卹典查例具奏尋 賜祭葬如例諡恪慎子博靈阿乾隆二十七年襲世職擢三等侍衛三十六年擢 御前頭等侍衛署鑲黃旗蒙古副都統尋授正藍旗蒙古副都統三十七年二月隨征金川八月大兵由墨壘溝進攻甲爾木山梁乘夜霧奪石卡甚眾扼賊來路博靈阿在事有功十二月授領隊大臣三十八年正月大兵攻納圍山梁

博靈阿同和隆武由東溝進攻與賊相持會侍衛綏庫等由納圍
納札木中間小路進兵賊出礮拒博靈阿與綏庫等合兵擊斃賊
甚眾三月隨大兵分攻當噶爾拉博靈阿力撲賊礮類受槍傷尋
卒事 聞 諭曰副都統博靈阿自派往軍營頗加奮勉今因傷
亡故其情可憫念伊父子俱屬出力著將伊兄弟內選擇一人繼
博靈阿爲子仍加恩贈都統銜尋 賞卹如陣亡例議給騎都尉
加一雲騎尉併原有之世職爲一等輕車都尉以嗣子濟魯穆圖
襲金川平 命圖形紫光閣贊曰由納圍前擊當噶爾拉禦賊鏖戰
矢風 皆摧礮越險因傷殞生不忝祖父晉職加旌

右 國史館本傳

託恩多

託恩多孫佳氏滿洲鑲紅旗人雍正七年由繙譯舉人授內閣中書洊擢兵部郎中乾隆十年授浙江金衢嚴道調江南蘇松太道二十年遷江蘇按察使二十二年四月遷布政使十二月擢巡撫二十三年二月疏陳上年淮揚徐海四府州被災各屬蒙 恩截漕撥帑先撫後賑復以貧民距麥收尙遠分別加賑查加賑需銀百八十萬藩庫見存可撥項止九十萬兩請將兩淮運庫江藩糧道庫兩淮許揚三關續收銀撥用再上年被災之淮安大河徐州三衛饑軍各州縣屬貧生照例分別極次一體加賑 詔允其所請四月疏言臣於海州二次據布政使吳嗣爵請緩徵二十年各

屬災借口糧臣查江省錢糧如不隨時清釐易滋觀望江甯蘇松常鎮淮揚徐太海通十一府州二十年災後出借口糧內淮徐海三屬奉旨豁免又揚屬之泰州因二十二年被災已將所借口糧緩至今年麥熟起徵其餘江甯等三十四州縣連獲豐稔民力尙紓非淮徐海積歉之區可比是以臣於司撫兩任內切催各官徵輸并行司查造完欠開參職名在案茲將屆奏銷似未便再請緩徵徒使催徵不力各官倖免處分上是之旋調廣東巡撫二十四年疏言廣州駐防更換滿洲兵初二次漢軍出旗兵丁自乾隆二十年七月至二十二年十月共截贖俸甲米萬四千餘石先經督臣李侍堯奏發南海番禺二縣減價平糶粵東地溼久貯易

霉爛且每年青黃不接時例應減糶倉穀請仍上年例照價糶賣
將米價提存司庫咨部撥用 詔允所請二十五年疏言陽山縣
屬鞏門槽等處前明開設鐵廠時遺有鑪底渣滓前督臣楊應琬
奏准於縣屬淇潭堡官爲設廠募民創運招商市販繳餉充公嗣
據知縣楊紱詳稱此項鐵渣係鑪底煎過渣滓悉同瓦礫並無鐵
質在內商人既不用價收買卽貧民亦不致竊取滋事臣查勘
屬實應請停止報 聞二十六年七月 命同尤拔世管理粵海
關稅務十二月疏言瓊州府同知並崖州感恩昌化陵水四州縣
牧令佐雜教職係二年半俸滿儋州萬州欽州各知州五年俸滿
知縣以上督撫出具考語畱本省以應升缺題補佐雜教職咨部

以應升缺升用查瘴地各員黽勉辦事者多而苟且自安者意以
身居瘴地只求無事坐待俸滿推升是邊徼要區徒爲庸碌者升
遷捷徑見畱心甄別其政績卓著者於俸滿時調回內地保題升
用如無實政而年壯堪驅策者於俸滿時調回內地將應升處註
銷仍以原官用照內地腹俸升轉其辦事因循兼年力就衰者照
武職調邊缺俸滿日考驗弓馬平常勒休例查參若該道府捏填
事實保結者照徇情例降二級調用下部議行二十七年借總督
尤拔世疏言英吉利夷商咆嘯等以絲斤禁止出洋夷貨艱於成
造斷懇代奏酌量准其配買得 旨前因出洋絲斤過多內地市
值翔涌是以申明限制俾裕官民織紵然自禁出洋以來並未見

絲斤價平亦猶朕施恩特免米豆稅而米豆仍然價涌也此蓋由
生齒日繁物價不得不貴有司恪守成規不敢通融調劑致遠夷
生計無資亦堪軫念著照東洋辦銅商船搭配紬緞例每船准其
配買土絲五千斤二蠶湖絲三千斤以示加惠外洋至意頭蠶湖
絲及紬緞匹仍禁止如舊不得影射取戾八月丁母憂回京十一
月署兵部侍郎二十八年署兵部尚書二十九年七月署戶部尚
書十一月授兵部尚書三十年三月兼署禮部尚書七月充國史
館副總裁官旋充經筵講官十一月調吏部尚書疏言潘桃口木
稅前經部議准歸張家口監督管理每年春秋木植下河時該監
督親赴大河口稽查今據監督圖思德請於張家口到任後卽赴

多倫諾爾預爲籌辦以免遲誤但恐該監督甫行管理或有不善請 敕下直隸總督飭委口北道率多倫諾爾同知募誠實商人領運照例納稅仍令將會辦處呈直督咨部備查下部議行先是八旗襲職之員有遠族承襲者代人坐扣應追銀兩 特恩寬免至是託恩多借入旗大臣等將應完父欠官項亦入於代人坐扣數內具奏 上以辦理錯謬其欠項銀兩卽著錯辦之該部八旗大臣賠補仍交部嚴加議處部議降一級 詔畱任三十一年正月署工部尙書七月疏言江西道御史素爾納奏五城正副指揮吏目分辦命盜等事且有各部院交辦事件各處差務此等人員應升班次在各省卽升人員之末未免壅滯臣酌議應如所奏遇

卽升月分先用卽升五人次用照例升轉一人輪缺閒用抑更有請者大計應薦舉者多賢能之員而升轉獨在各項應升後至終歲不選一人應將運同等官以下凡遇卽升班次俱先用卽升五人次用照例升轉一人次用卓異一人如照例升轉無人卽以卓異人員抵升庶各項卽升者仍屬從優而卓異人員亦漸次疏通從之十月 賜紫禁城騎馬三十二年署兵部尙書三十三年二月署步軍統領六月管理崇文門稅務八月加太子太保十一月以私買官物入己 上鄙其小器 命照原價加倍賠補嗣尙書福隆安劾步軍協尉等查夜曠誤託恩多曾署理統領半載有餘一任屬員怠惰廢弛並不查參請嚴加議處部議照溺職例革

職三十四年 命署左都御史旋授 泰陵總管四十二年四月
恭辦 泰東陵工程 上嘉其敬敏襄事交部議敘四十五年卒

右 國史館本傳

衛哲治

衛哲治河南濟源人雍正七年拔貢生 廷試優等 命往江南
委用九年十一月署贛榆縣知縣十一年署鹽城縣知縣乾隆五
年補長洲縣知縣八年升海州知州擢淮安府知府十三年二月
遷安徽廬鳳道四月兩江總督尹繼善委起山東臺莊鹽交兩省
協濟賑米五月 諭曰山東賑務緊要必得熟練之地方官始能
承辦無誤衛哲治朕聞其精悉賑務查辦妥協卽畱於該省調補
登萊青道俾得經理一切災黎更爲有益十月擢山東布政使十
四年四月授安徽巡撫九月奏言鳳陽關向設委官六員嗣經裁
去二員監督事務歸鳳陽府知府兼管其正陽大關請以鳳陽府

通判就近稽查彈壓。從之。十二月奏安徽甯池太廣六府州屬馬田租稻向係折米搭放兵糧其不通水路之州縣俱折徵充餉。十二年改徵本色。今查徽州府屬歙縣馬田坐落休邑嶺路崎嶇運腳浩繁請折徵充餉爲便。下部議行。又奏徵收錢糧有以糧戶住址完納認人不認地者是謂順莊之法。有於每里中或五戶或十戶用一滾單於某名下註明田地徵銀限額各若干給甲內首名挨次滾催是謂滾催之法。查廣德州向屆開徵卽按圖僉單頭一名數圖僉經催一名如花戶抗延提比經催故錢糧易完並無民欠役侵前撫臣潘思築奏改行順莊轉有未便請仍照舊辦理。下部議行。尋命來京十五年二月以酌裁各省衛所武員分隸

州縣哲治請將鳳中衛歸併鳳陽宿州衛歸併長淮各裁守備一
安慶衛歸併前後兩幫爲一甯國太平幫併兩爲一各裁千總二
隨幫一三月奏安省採買工程兩項向例事竣彙報多閱年所於
應追覈減之項每因承辦各員參革物故以致咨追費力帑項虛
懸請嗣後於奏請採買之案以奉文之日爲始勒限一年買竣州
縣限一月報銷督撫限兩月彙題如遇價昂不能依限買竣准督
撫奏展至彙案題准工程有先完者陸續咨部報銷仍於年終彙
題俱下部議行七月 諭仍畱原任復 諭曰汝前任甚不滿朕
意茲以一時無人故復畱汝若不奮勉改過以此爲得計則非矣
十一月調廣西巡撫十六年 諭曰衛哲治親老不能迎養奏對

之時孝意可矜朕所嘉許著仍畱安徽巡撫之任尋丁憂十八年六月服闋命署兵部侍郎八月命暫管戶部侍郎事旋授安徽巡撫十九年正月奏外省案件應取冊結之處甚多各屬恐譌錯舛混遂有令經承齋帶空白之弊又如營員赴領錢糧每用空白領狀赴該管衙門詢明填寫請嗣後凡有冊結不符者該管司道卽於原文內改正發回照繕申送應送部者聲明補咨至於赴領錢糧領狀如有不符一面照實支之數放給一面飭取確領存案三月奏徽州府屬山多田少全賴江西浙江等處販運接濟而距江浙遠者歙縣爲甚乾隆十七年有該縣商人樂輸銀六萬兩以一半買穀積貯一半交與生息爲將來增貯之計應請建立惠

濟倉 從之八月奏本省承追覈減分賠代賠各項銀兩均請統
於年底彙冊題報下部議行十月調廣西巡撫二十年四月議覆
前任廣西學政羅源漢奏請將泗城甯明東蘭三學教官俱改煙
瘴調缺三年俸滿撤回內地補用下部議行十月擢工部尙書因
病請回籍調理二十一年卒

右 國史館本傳

公姓衛氏諱哲治字我愚號鑑泉河南懷慶府濟源縣人由諸生
選拔起家縣令性恂悞能急民疾苦爲興久遠利而於籌荒政也
尤詳累官至監司開府初終如一雍正八年 廷試太學貢生列
優等發江南試用初署贛榆縣未甚知名十年調知鹽城尋實授

時值蝗災著有災賑紀略例數千百言文繁不載又設六條以拊循里戶一日優禮德望二日饋餉高年三日旌獎孝義四日經理莞獨五日譏警游怠六日約束過犯蓋卽近世保甲法而寓以古意最爲切實邑北門二里有司河匯上游七縣之水入海每患夏旱水不得畱內水微弱則海潮越口而上致河鹹苦不可飲甚乃漫溢民田農事以廢其秋水盛時則又患河寬流緩入海不速公乃建閘立斗門五磯心四又建越閘斗門三磯心二蓄洩有備化斥鹵爲膏腴又歲有涸出灘地給無業人領種毋許豪占其已沈沒而糧未除者悉請豁免貧戶漸饒沿灘築土墩九十餘座以防大潮猝至漁者得就墩逃溺號之曰救命墩由是循聲大著乾隆

二年調繁長洲請豁坍荒逋賦十餘萬兩七年兼攝吳縣篆其冬
遷知海州會州饑設法賑救全活二十萬人流民自山東來就食
者更不在此數 上聞嘉其治行擢知淮安府河決陳家堡漂溺
男女田廬無算哭聲聞數百里公亟遣小舟數百載餅餌分給流
移躬涉風濤所在存問民慶更生勘使至巡閱所部公隨行百姓
各手炷香前迎填塞街巷使者以爲迎己也辭之令退眾應聲曰
衛公活我故來致謝微衛公我曹魚鼈久矣使者爲停輿歎息久
之事在乾隆十年是年山東歉甚四境流民至者不可數計公輒
自捐俸益以勸募樹草屋百千間銜接二百餘里清江浦屬之魚
溝以北號曰棲流所每所給粥糜儲米薪衣藥之屬賤其值以市

流民如歸制府尹公上其事 上益以爲賢明年遷廬鳳穎巡道
尋調任登萊公於山東民有舊恩所至繞輿褰帷諦視輒喜曰果
衛公也尋遷布政使再擢巡撫安徽十六年迎 駕行在 賞賜
甚渥 御書化洽皖江四大字榜以示寵榮其年二月以母憂去
位公仕宦二十年纔兩任山東實未滿歲前後多在江南江南故
澤國苦潦多偏災而荒政之弊百出能吏難之又水患迭興類由
平時不預籌蓄洩加以大部持例嚴苦一不中程輒責賠償以故
守令逡巡竄患噤口不敢倡聲卒至大耗帑金萬萬猶不能救而
公累任以辨賑顯其孜孜興建歷有實績最後在安徽用沈石聚
沙之法以移無爲州急濶而防未然至今潁江郡縣多遵用之蓋

惟民事是急不恤己私卒亦未嘗因是坐累且階以進秩至大官則向者諸守令所藉口殆未必然也十八年六月服滿入 覲

命留京署戶兵二部侍郎事是年秋江南安徽甯池滁和鳳潁泗九郡復被水而徐州張家口河決入洪澤湖下游鳳陽懷遠等處患且亟大吏以 聞時 上在熱河復 命公馳驅出撫至則部署精審南人復賴以安明年十月調撫廣西二十年三月以父逾七十請養不許八月以疾告又不許尋內擢工部尚書在任候代明年正月固請得回籍調治卒於家年五十有五

舊史氏曰衛公在兩部時予爲京尹每朝參遇公端門輒一握手蓋篤實長者殊與意所擬才能大吏不類嗟乎是古所謂悃悃者

歟公又喜爲詩祕不肯出余獲見一篇於年譜中泯泯乎元次山之遺也次山當藩鎮擅命崎嶇容管閒自謂與世聳牙而公遭遇聖明擢以不次名榮朝列澤在生民其福命豈不遠勝古人哉吾於公又何憾焉

右別傳陳兆崙撰

衛司空哲治歷任封疆以廉能著其撫粵西時謝侍御濟世子犯法公鍛鍊其子因波及侍御袁簡齊太史曾作書規之劉文清公亦言其官每高一階而其品乃下一級蓋亦不能自守之士然先恭王親見其召對純皇帝問近日封疆大吏之臧否公自謝無狀上言置汝姑勿論其外究竟孰爲最劣公對曰惟江西巡

撫阿思哈耳時阿寵眷最渥而公敢撻之亦難能也

右錄宗室昭榘撰

國朝通志卷之二十一

五

陶正靖

吾邑以文章氣節名於時者有四君子焉太常寺卿陶公兼裕經
濟之學尤爲世所推重四君子者贊善杜林汪公應銓司業見復
陳公祖范侍御良齋王公峻與公而四夫三公名位未甚通顯所
學未獲用於世公位至正卿忠言讜論簡在 帝心駸駸乎可以
大展其志矣卒亦設施未究不克竟其所學此海內賢士大夫所
爲咨嗟歎息而不能已也公諱正靖字穉衷以晚聞名其集世稱
晚聞先生高祖諱聞詩曾祖諱士奇祖諱世澤 贈文林郎考諱
元瀉字紫筍以文章名世起家進士爲昌化令治行見南崖集公
雍正八年進士選庶常壬子分校北闈癸丑授編修充一統志纂

修官論戶口田賦例詳略各有所宜上西林鄂公書言州縣添設
改隸之無益 世廟升遐急需翰林諳掌故者眾推公及江右萬
承蒼一切典禮皆二公手定乾隆改元上高安朱公書言陰陽消
長之幾乃治亂安危之所繫論相道者不可以或忽是年典試四
川丁巳選御史拜 命後首疏昌化浮糧昌化地瘠賦繁民弗堪
命昌化公乞減浮糧涕泣陳請不得公懷之數十年至是奉 旨
允行戊午 皇上臨雍疏請十哲後裔許襄事並給祭田疏劾衍
聖公廣梃納賄鬻執事官疏請革經紀以平錢價於守令養廉耗
羨得失指陳尤切輪奏經史摺引周禮陳殷置輔論佐貳闡葺宜
用辟署引三德教國子論學校教養無術又引易泰二爻紬繹馮

河之義破難行之說極論儉爲一切自恣苟簡之害所言有行有不行要其關乎吏治民生至深切也每奏必蒙 召對再三嘉予已未遷鴻臚寺卿再遷右通政月餘拜僉都御史時博野尹公會一爲中丞同邑王公峻爲御史三人守正不阿思各有所建白以肅紀綱公上論祀典疏恆山當祭曲陽引周禮鄭注漢書郊祀志水經鄜道元注以證之無何遷太常寺卿 召對便殿因旱災詢時政闕失公奏處分魏廷珍事望吏議左遷當是時 朝廷清明百司守職非有簠簋不飭納貨賄以變亂黑白也非有嫉賢蔽美如牛僧孺李宗閔之齟齬李德裕也亦非有黨同伐異如洛蜀之互相排擊也 聖天子公聽並觀勤求治理公以直辭正色上結

主知識足以通古今之變學足以轉治忽之樞 皇上識公之
誠賞公之直並知公朝無汲引之階旁無左右之助徒以汲黯愚
慙懲勸並施乃陶冶人材之大用也親厚者或咎公不能爲尺蠖
之屈以希進用公謝曰吾上不忍負 主知下不敢違先志餘非
所知也嗟乎公之經術閎深所欲發揮以佐太平之治者甯僅此
數端已耶公體貌瓌傑風采毅然鳶肩而鶴步聲出隱動牆壁年
十五從宦嶺表時海氛未靖昌化公以官事上府公率僚從與尉
弁書地巡微積歲城圯不及請帑出私財連日夜修築比昌化公
歸進屨已屹然矣昌化公以勤事死目不瞑公泣曰明史彙及昌
化浮棉不敢忘後浮棉得請明史彙鄞縣萬斯同草定雖大體無

失猶以爲未盡合史法佐楚學使校士雪兩生冤獄阻淮關使添
設柵口蓋未第時卽留意當世之務旣已降調候補猶草捐納流
弊疏欲上其惓惓愛國之忱如此邇者 皇上蠲租免賦大沛
鴻恩因有捐納一事不復舉行之 諭盛哉乎斯世 主聖臣忠
道符默契惜乎公不及見矣古文本之經史於漢唐注疏歷代典
章制度盛衰興廢之端靡不條貫尤善說詩及春秋有良史才讀
公常熟志序論及列上史館條例非具三長者不能曾奉 敕分
撰 國史賢良傳十五篇又有擬撰明史張居正傳王守仁徐階
孫承宗等十五贊使公入史館志表紀傳成於一手雖馬班范陳
何多讓焉在翰林日高安朱文端江陰楊文定漳浦蔡文勤以道

義相許足不及貴人之門歸田後寓書侍御沈廷芳論出處大略
末云擇有志者相與討論經世之實學以究極乎根本庶幾成材
爲時效用此則閒廢之人所藉以仰報 主恩也公之志事夫豈
大賢以下之所能及與賃屋一椽僅可容膝偕二三同志講論文
藝而已先君子味閒公與公自幼投契老而彌篤兩兄齊烈齊薰
皆遊公門齊熊少時以文字謁公爲講蘇文忠赤壁賦因縱論韓
歐諸家義法由此知古文在修詞立誠非沈潛反覆於經史諸子
百家之書而溯其源流未容瞽然下筆也今年已遲暮迄無成就
言猶在耳而公墓木已拱矣公卒於乾隆十年五月二十三日年
六十有四卒之前月作春秋說序乃絕筆也文集十六卷越明年

月日葬於北山伏虎鼎橋之原配錢宜人耐閱四十九年公外孫
魏君兆蕃以外碑相屬俯仰生平孰是愛我深期我厚教誨勤懇
如公者於是盥手端坐敬述行己致身之大者而著之於碑系以
辭曰

虞山蟠鬱英賢挺生學承父兄識究天人立朝審諤經術之精其
說苟行如懿啟寔昔在賈生陳政事疏適遇漢文忌諱弗顧設非
其時亦莫敢忤公際 聖明直聲乃著公之文章久而彌光公之
風節剛而不折公之行義不計趨避公之愛才百物愛裁當世有
公朝野一老底柱中流人倫師表自公騎箕正氣孰持讀公奏牘
可使國肥而公抱負未見端倪舉世所爭榮辱之迹或靳厥施獨

爲公惜公遇則卮公名不蝕

右神道碑文邵齊熊撰

乾隆四年工部尙書景州魏公罷官已而天旱四月十有二日新授太常寺卿陶公入謝 上特召見問以時政得無有關失者當陳之以爲修省之助其無有所諱公猝未及有所陳 上曰爾尙有直氣試據實言之公言近日庶政修舉惟魏廷珍負清望無大過近日放還 天語峻厲非所以優老臣尙望申求舊之禮 上霽顏聽之且曰爾朕所特簡尙當進用公辭謝出相去再旬突奉嚴旨申飭下部議部議左遷公遂南歸貧甚無以爲生則授徒自給先是 上之罪公也獨申前論謂朕方欲用正靖以侍郎學

士之選不料其妄言至此世乃知公邀 上眷尙未衰勸入京補
官公笑而不荅凡六年以病卒其家未及赴予也逾年予至吳始
知而哭之又踰年其故人長洲陸君茶塢屬予以表闕之文又踰
年始克詮次其事嗚呼子序公父子兄弟而更重悲之公之烈考
元滄學者所稱紫筍先生者也以古文雄於吳下時論比之范蔚
宗崑山徐尙書雅重之延之書局其後以昇元致失歡而同里翁
尙書排之尤烈及成進士不能入詞館知廣東之昌化縣孤羈窮
島竟卒於官公之兄正一亦以古文世其家成進士爲翰林矣顧
落落莫莫不見知於世竟未獲遷一階以老公承其父兄之傳晚
而得第浮沈中祕者八年改爲御史以進經史講義稱 旨再賜

對不一年累遷至左僉都御史改長奉常然公生平坦夷性成不
屑與時逐逐又疎略不治威儀古心古貌蓋父兄之餘風當路者
素不喜而事出意外忽膺盼睐無如之何公嘗上言學校科舉之
壞爲方今世道人心所關第一在官者旣無昌明正誼之心在下
者遂無淬厲束脩之志時風眾勢不過僥倖進取以爲富貴利達
之地斯其可憂不少急宜有所振起 上是之又言近日在廷諸
臣似寬裕而實縱弛似詳密而無關體要至樂因循而畏遷改尤
其膏肓之病如一切條奏下部議者其說在可否之間行之無益
不行亦無所害而一紙空文可以塞責則姑議行以稱 上求言
之心以示不拒人言之意若稍難行者則置之矣夫事但論是非

豈論難易今之便文自營朱子所謂架漏牽補過日者也 上以
公言宣付閣臣知之此論出聞者以爲切中時弊而公之不安其
位始於此又嘗言設官太多則案牘文移日繁足以耗任事者之
氣不獨廩祿之難周也宜詳爲合并而沙汰之又嘗草諫開捐疏
力言貨郎之進先自居於貨取安能潔身以報主下以貨投上以
貨授美其樂善好施之名而實則懷利以相接其弊也至有貨倍
稱之息期以到任而還斯其心爲何如心其俗爲何如俗豈可以
漢有張釋之下式浸思解嘲乎會去國不果上然竟屬其門生奏
之嗚呼以公之揚歷雖亦嘗登三品陪獨座僉書柏臺膺次對校
之父兄似足稍吐鹽車之氣而豈知其不得少有發舒齋志以死

則固多此揚歷者爲也公諱正靖字穉中一字晚聞江南蘇州府常熟縣人也生於康熙某年月日卒於乾隆某年月日春秋六十有四娶某氏葬於某鄉之某原子四所著有晚聞集如干卷公於經術最喜說詩其獨到處范邈齋嚴華谷不能過也古文淡簡有法尤熟於明史予之交公也其初相賞以文辭旣而以予之疎略有相近者遂成莫逆乃十年去國竟無再見之期諒亦重泉之所同悵也惟茶塢爲故人之篤於存歿者其銘曰

吾近接東狩之邱鈔兮 天子詔魏公而復之官言竟行於身後
兮孤臣定欣然於九原海虞之山蒼蒼兮以表茲邁直之阡

右神道碑銘全祖望撰

敷文

敷文富察氏滿洲鑲黃旗人雍正八年進士改庶吉士十一年散館授檢討乾隆二年擢侍講充日講起居注官三年遷國子監祭酒四年 上御乾清宮西暖閣 賜羣臣宴賦柏梁體詩 賞筭墨筆硯有差敷文與焉七年升詹事府詹事八年復充日講起居注官尋調通政使九年 上幸翰林院分韻賦詩敷文復與焉十年二月授盛京兵部侍郎十月疏請變通驛站事宜一盛京西路北路等站馬乾應分別地方量爲增減查西路之山海關外沙河店等十二站北路之開原等三站額馬各五十四匹每匹馬乾銀五分西路乃四達之衝此路差務較簡請將北路開原等三站每馬

裁馬乾銀一分攤貼西路距省寫遠之沙河等四驛一各驛馬匹
宜計差役繁簡酌請調撥查鳳凰城南八驛額馬各十五匹止係
轉遞文移閒有齋 命朝鮮之使用馬過多卽調取近驛協濟穆
奇等東三驛額馬各十匹馳送 陵寢祭品及一切文移差務較
爲緊要而額馬轉少勞逸不均請將鳳凰城等八驛每驛裁馬二
匹以十五匹添撥穆奇等三驛餘一匹裁汰歸公一幫貼之弊宜
行革除查盛京兵部檔房左司向無書吏挑選漢字之驛丁充當
貼寫衣食之資各該驛丞驛丁名下攤派幫貼恐滋弊竇請於驛
丁內選設書吏五名分派左司以供寫辦其工食役滿等事均照
各部書吏之例下部議行十一年八月奏盛京各衙門及外城額

設滿洲筆帖式共一百三十六缺向不拘旗分補用續緣分別考
取補譯清字二項經侍郎永福於乾隆元年奏准始按旗均分及
更定之後各旗或有人無缺或有缺無人皆因分定旗分所致請
嗣後仍照舊例不拘旗分但以考取名次高下爲補缺先後如所
請行十月因病乞休十七年卒

右 國史館本傳

國朝詩人集卷之十一

三

孫灝

公諱灝字載黃一字虛船又字竹所先世新安人明嘉靖間有贅杭者因家焉公之祖以能治案牘常客遊四方父業儒邑廩生有孝行公少沈敏刻志勉學補諸生成雍正八年庚戌科進士改庶吉士奉命隨相國史文靖公宣諭三秦還授編修十三年充湖北鄉試正考官乾隆六年擢監察御史時錢價翔貴公言錢少由於盜銷其故在民銅不足請敕雲南守臣計歲出銅額弛餘銅售民與官俱足卽盜銷自息又言督撫劾吏當秉至公不宜寄耳目於近暱恐覬覦橫生長告許請嗣後參劾款證明白方許列疏兩疏皆交九卿議八年六月上因天暑命刑部釋輕罪挺囚

給藥食公請推恩行之各省次年京察一等明年三月掌京畿道
事是歲蠲免天下錢糧 詔以有田之家邀恩蠲免佃戶亦應酌
減租糧令有司善爲勸諭公言田主佃戶瀆澆不一請爲之定則
如納銀一錢者田主旣免佃民卽準五分銀數減租穀天下通免
錢糧二千四百餘萬田主佃戶各霑一千二百餘萬之恩得 旨
交大學士會同戶部密議擢太常寺少卿游擢至光祿寺卿十四
年先文莊公薦公端謹詳密足勝侍郎之任因得 召對其冬授
湖南布政使屏苞苴慎黜陟一無所瞻顧在任以失察奸民詐冒
職官事罷歸里十六年 高宗純皇帝南巡公迎 駕道左復用
少詹事擢至太僕寺卿十八年提督河南學政所以教士甚備滿

任還都豫士刊石頌德泣送不忍念是冬命直上書房二十一年擢左副都御史兵馬司吏目有捐副指揮者當離任都察院請畱遇缺題補廣成實主之成傅相國兄同官依阿畫諾公以爲紊選法不可比入奏不列公名具以聞上右公罷成副都御史二十三年冬日食降詔修省公因上言聖駕將以明年幸索約爾濟其地在京師直北途經蒙古諸部與鄂羅斯接界僻遠荒寒非萬乘所宜往請停止以答天意上以講武習勞本朝家法蒙古皆子孫臣僕恭誠望幸孫瀨不諳國體以遠涉爲勞開旗人頽廢之習妄言宜罪猶以言官薄其譴以三品京堂改用方公奏上時上召對盛怒詰責殿中皆讐慄公反覆申奏數百言音制

清和既出侍衛者皆爭前識公其後因西陲逆回構亂軍行需馬
停遠幸 上諭中尙以公前疏爲言公由是悚感矢力勤慎以求
補過是冬授通政使數與扈從得恭和 聖製詩三十一年冬卒
於官年六十七家素貧困旣歿歷內外疏水自厲不妄取一錢意
亦蕭然足也夫人陳氏能贊君之清節無子以弟沆之子同珍爲
嗣同珍幼育於公年十一諸城劉文正公器之賦詩稱美以州同
試用安徽嘗奉檄察饑戶慨然曰民方困委員往益之擾力辭於
上官時論美焉補合肥縣丞嘉慶十年卒公有側室張氏年十四
歸於公公歿時張甚少矢志自守今尙存年七十餘矣
舊史氏曰公與先文莊公爲進士同年同書侍公教甚久以公之

清峻宜若不可近然遇人愉愉無所選孝於親愛於兄弟君子人也嗣子克肖限以卑位不竟其緒又重可惜已

右家傳梁同書撰

國朝文獻通考卷之六十九

三

吳嗣爵

吳嗣爵浙江錢塘人雍正八年進士授吏部主事乾隆二年游遷至郎中六年六月授保甯府知府奏留部十二月提督湖北學政九年調福建學政十三年四月授淮安府知府九月授淮揚道十六年二月調兩淮鹽運使十八年八月調淮揚道十月丁憂 諭曰吳嗣爵見在丁憂昨因河員諸弊叢生是以特由運使調用目今河防緊要一應堵築漫口工程稽覈工料正資人料理在任守制之例朕從不開但河工與地方官員不同實不得已吳嗣爵著給假兩箇月治喪事畢卽赴淮揚照例在任守制二十四年四月命隨侍郎夢麟勘辦六塘河以下積潦七月遷江蘇按察使十

二月遷布政使二十三年三月調湖南未赴任以前奏緩徵江甯等三十五州縣積欠事與巡撫託恩多覆奏不符 諭曰前據江蘇布政使吳嗣爵奏江甯等三十五州縣應徵口糧積欠銀兩奏銷例限五日爲日無多請特降諭旨緩徵等語朕以江蘇所屬州縣民借口糧積欠如果應緩徵以紓民力該布政使自應稟請巡撫具奏當卽批令告之巡撫請旨今據調任巡撫託恩多奏稱江甯等三十五州縣二十一二等年連獲豐收民力尙紓各官俸免處分茲將屆奏銷未便再請緩徵徒使催徵不力各官俸免處分等語乾隆二十年江省被災朕多方賑恤格外加恩並於勘不成災例無撫恤之江甯等三十五州縣亦令一體酌借口糧以資接

濟今此各州縣於二十一二等年既連獲豐收又非淮徐海等州之連年被災者可比吳嗣爵以特恩擢任藩司乃莅任之初並不告知撫臣託緩徵之名實卸己之過且爲催徵不力各員圖免處分具摺瀆請可謂不知朕恩何以居方面大員之任本應交部嚴加議處但念其尙習河務姑從寬發往江南河工以河務同知補用二十五年正月補宿虹同知三月授淮揚道三十年三月調淮徐道三十三年七月以搶護徐家莊險工迅速合宜下部議敘九月署理河東總河因鹽運使任內兩淮商人侵蝕堤引應繳公費銀嗣爵不能詳請早定章程部議降三級調用 詔從寬改爲革職畱任三十四年正月奏言泃河廳屬丁廟閘雁翅裂縫六里等

開石剝落應修補新石運河廳屬南旺壩分水口對岸口埝卸應
修補捕河廳荆門土閘底漏水應補換新石底板戴村壩南北中
三道長百二十六丈北壩衝埝二十六丈中壩下碎石坦坡及兩
邊石脫落應修補至運河兩岸土工臨清以北保民堰南旺以南
係官隄由臨清至南旺官隄民堰錯雜借以保衛田廬爲糧船繹
路見將民堰卑薄殘缺之處督民修築官隄多內沙外坡兜灣近
溜請酌量緩急輪流幫修 上嘉之六月署河南巡撫三十五年
四月奏言兩旺湖北高南下在運河西岸適當分水口之衝伏秋
汶水漲發由關家常鳴等斗門灌入祇能收水入湖不能出水濟
運乾隆二十五年河臣張師載奏於寺前閘下建涵洞二復以涵

洞出水無多於迤上土地廟前遇漕艘至日開隄洩湖水濟南旺以南運河臣思湖水濟運涵洞既不敷宣洩連年開挖修築計非經久查所挖隄工當南旺湖下游出水甚暢應卽於其處添建石閘一啟閉由人實屬便捷奏入報 聞三十六年京察 上以嗣爵宣力稱職下部議敘七月復以防護黃河盛漲隄工穩固議敘加一級八月調江南河道總督三十八年七月奏清口舊有木龍五架臣請將第一架移於第五架迤下七十丈建立新長游灘一百三十五丈查第三架涵勢稍緩原長五十丈應改造減去二十丈足資捍禦卽將減去之木於新移木龍四十丈下緊對陶莊再移建一架新淤更資保護涵勢更可北趨 敕將舊立第二架木

龍一併移置挑酒深處妥辦四十年閏十月奏言丁家集黃河向
流北岸因河勢生灣溜向南趨北岸漸長新灘挺入河心致本年
南岸外灘民堰被衝毛城鋪過水較大下游不能容納臣勘南岸
漫坍民堰五百餘丈就臨河灘面堵所衝薄槽補築民堰俟堵閉
斷流毛城鋪迤下洪腫二河水立見消涸至來年毛城鋪過水須
由丁家集迤下唐家灣分洩不致掣溜有礙下游惟河頭勢順河
脣高仰不能收分洩之益今收正河頭測量河脣挑深淤墊引渠
臨黃築子壩以資收水北岸嫩灘形勢兜灣應於傍裏黃河故道
取直挑引河千一百六十丈深九尺於來春相機開放俾河改由
北岸東下南岸丁家集一帶更無旁注之虞奏入報 閏十月奏

言裏河應屬運口設惠濟通濟福興三閘每閘有正越二閘惠濟首閘尤爲淮水入運關鍵今閘底閘牆迎水雁翅年久損壞若非一開關擱卽少一重束水本年淮漲入運河俟水消先築壩斷流春融興修汛前可一律竣工 從之四十一年三月奏言清口通湖引河五爲洪澤湖尾閘禦黃濟運上年伏秋汛內黃水倒漾停沙河水加長俟高堰誌椿水消疏濬 命會同總督高晉籌辦尋會奏測量張福口天然引河太平引河俱深通惟張家莊河尾裴家場河身前此水僅二尺餘濬後河尾見深四尺五寸河頭水淺宜多添器具續濬總以深五尺爲度愈寬深愈爲得濟奏入報聞是月授吏部侍郎四十二年以老病疏請解任得 旨原品休

致四十四年卒子璫見官河南布政使

右 國史館本傳

許希孔

雍正中滿洲副都御史缺出 憲皇帝命九卿密保鄂文端公奏
許公希孔忠直可任 上曰彼漢人礙於資格文端曰風憲衙門
爲百僚表率臣爲 朝廷得人計不暇分滿漢也 上可其言踰
年始調漢缺

右紀聞陳康祺撰

按許公雲南昆明人
雍正八年庚戌進士

完顏偉

完顏偉滿洲鑲黃旗人完顏卽其姓雍正九年由內務府筆帖式授堂主事十年遷戶部員外郎十二年命往江南學習河務乾隆二年授浙江海防兵備道四年調江南河務道尋轉浙江按察使時建尖山壩工巡撫盧倬以完顏偉素諳工程奏派赴工督察給公項爲往來費諭每年賞銀五百兩五年條奏見行事宜一歲暮封印遇緊要文移向於年月兩旁硃寫印信遵封上司牌票則刻本官花押鈐蓋年月上行用易滋詐僞請於封印時地方官各備空白文移用印鈐蓋貯內衙遇緊要事項用上司亦備空白牌劄如批發各屬文書不能鈐印者先用牌劄飭知仍登記號簿

其用贓空白關印時銷燬一竊盜拒捕及白晝搶奪殺傷事主之
案例照強盜案題參疎防勒緝第強盜無分首從斬決竊盜拒捕
搶奪殺傷止下手者當以重罪且竊盜因追逐始拒捕而搶奪在
白晝與黑夜行劫者有閒僚照強盜案不論已未獲槩參疎防恐
地方官轉多諱匿請嗣後竊盜拒捕與白晝搶奪殺傷人命若未
經獲賊與雖獲賊而爲首及下手兇犯未獲者仍照例題參如限
內已獲爲首及下手兇犯惟夥賊未獲者免參仍勒限緝拏庶輕
重有別部議 從之六年二月 命爲江南副總河八月授江南
河道總督初高郵州南關五里車邏三壩遇河湖盛漲洩水輒浸
下河州縣民田前總河高斌遵 旨閉洪澤湖天然壩及南關等

三壩不使入下河至是知州沈光曾因上河濱湖灘地被水詳請將濟運有餘之水由三壩減洩竝易芒稻河開爲壩以疏竇應高郵甘泉諸湖南注之路完顏偉劾其擾亂河工得旨河工關係緊要沈光曾以必不可行之事顛倒是非且不具詳於高斌在任之時而詳於完顏偉新任之際明係倡論惑眾擾亂河務著交部嚴加議處尋將沈光曾議以革職先是上以黃河大溜偏近清口每例漾爲患命循康熙年間舊跡開陶莊引河導黃使北大學士鄂爾泰往會河臣高斌勘奏議甫定以汛水驟集積淤停工高斌等已去任至是復命完顏偉相度施工完顏偉因奏自清口迤西黃河南岸設木龍挑溜漸向北趨木龍之議倡自高斌完

顏偉踵而行之蓋慮引河功不易就圖補偏救弊之爲然自是陶
莊引河之議遂寢厥後四十一年上獨申齊斷決意開之踰年
而工竣新河直抵周家莊始會清東下去清口較昔遠五里倒漾
之患永絕詳見御製陶莊河神廟碑記七年七月疏報本年淮
源上游雨多水發河南西得河水勢盛漲由渦達淮歸洪澤以致
異漲其自三石滾壩減下之水已歸高寶邵伯等湖而古溝東壩
漫刷過水又從白馬湖會之致高郵邵伯一帶水勢過大臣督員
加築子堰捍禦并將入江入海要道相機開放高郵之柏家墩南
老土壩並南關五里車邏三壩次第開放水勢始定諭曰朕心
正爲此慮念覽奏稍慰朕懷是時黃河水漲石林口減水過多沛

縣被水竝及山東魚臺滕嶧等縣完顏偉具疏請罪下部議罰俸一年十一月御史吳煒疏參完顏偉劾罷知州沈光曾信任參將朱永凡用舍倒置 命完顏偉回奏尋言光曾因倡議惑眾題參永凡歷練辛勤故請畱任 諭曰今年河湖異漲議者皆歸罪河臣甚非情理之平但完顏偉未諳河務驟遇此災未免倉皇著調補河東河道總督九年正月奏言山東連年被水由於上游散漫下游梗阻運河東接汶泗沂濟諸水洩入微山蜀山南旺馬踏等湖北接漳衛二水洩入鹽河徒駭馬頰鉤盤等河遇伏秋異漲每宣洩不及應於運河內增開壩以分其勢疏下河以暢其流其經由州縣支分派別或有淤狹溝渠殘缺壩閘均查明修濬報

... 閱十年以母老陳請回京 上慰留之十三年三月授左副都御史六月卒

右 國史館本傳

蘇松

嘉謨蘇舍里氏滿洲鑲藍旗人雍正十年由繙譯生員考取筆帖式乾隆十五年升光祿寺署丞遷署正三十二年擢湖北德安府知府三十三年遷江南河庫道三十七年超擢漕運總督先是江西巡撫阿恩哈奏請清釐運丁屯田著有成效至是嘉謨疏言原係給丁墾運因其以隱漏典賣者多以致田不歸運丁力益疲請將湖廣江南浙江山東等省照江西查辦章程徹底清釐 上是之三十九年二月奏江南水勢未充其運上北河之尤淺處所亦不一而足因調委輪押二進之蘇松糧道朱奎揚改押頭進浙江糧道李農葵改押二進直抵通州向例糧道押運祇到臨清因本

年水勢較小是以通融酌委 上以漕船銜尾北上一切督辦撈
淺起制事宜均關緊要若以道員管押呼應較靈於漕務更爲有
益嘉謨此奏事屬應行凡水小之年卽援此爲例八月奏運河水
源微弱回空恐不能迅速請將東省各關下板蓄水以免稽遲
從之九月山東壽張縣奸民王倫聚眾滋擾時嘉謨督押回空糧
艘沿途獲逸犯數名 賞戴花翎四十年八月奏各營將備新舊
交代祇出具交盤無虧冊結呈送漕督衙門備查並不咨部實與
文職兩歧查各營軍裝器械易於按冊查驗非州縣倉庫錢糧盤
查需時可比請嗣後各營將備遇有升遷事故無論正署統限一
月交代後造具冊結由該管上司加結轉送漕督衙門嚴覆咨部

如有遲滯附參議處疏入報 閏四十一年正月授倉場侍郎二月 諭曰嘉謨在漕運總督任內辦事不能扼要且局面亦小但其人尙無大過於倉場侍郎或堪勝任正月高晉在京朕偶詢及嘉謨辦事如何據奏伊性情急躁有任意責打弁兵之事茲嘉謨來赴行在召見時據奏不但無擅責弁兵之事卽旗丁亦未責打一人因令軍機大臣傳旨詢問據稱遇有糧船無故停泊嘗令運員責懲伊既有此情節朕詢及卽應據實陳奏乃以詭詞支飾嘉謨著交部嚴加議處尋部議革職 詔改爲革職畱任三月奏漕船每隻向祇載米四百餘石繼因丁疲船減漕米分散各幫見在各船載米自八九百石至一千一百餘石不等載米既多船身更

重遇水小之年起剝費重則丁力益疲欲紓丁力莫若多添挖淺之夫請於額設六汛外再添設二汛每汛設夫一百名卽交遊巡千總二員專管一遇淤淺之處卽按汛挑挖務將沙土挑出河沿河身自易深通又奏挖淺千把外委原有咨部拔補之例但向來定有年限如該弁等果能實心撈挖起剝較少請將遊巡千總於六年俸滿時咨部以衛千總補用把總外委遞相拔補如不能出力雖屆俸滿不准咨用奏入均報 聞四十二年以徇庇領運千總賴雋揚罪革任復授 東陵總管內務府大臣四月卒

右 國史館本傳

宮煥文

磨勘之例自乾隆己卯始嚴時磨勘官官太僕煥文閣侍御循琦朱侍御丕烈朱侍御稽盡心細覈指摘較多世以爲魔王蓋借磨作磨也

右紀聞陳康祺撰

按宮公江南秦州人雍正十一年癸丑進士

三十一

三

國朝書畧類微初編卷八十月錄

御貳四十

任啟運

雷鉉

張映辰

董邦達

傅為著

雙慶

羅源漢

田懋

吳紹詩

宗室德沛

補錄

張映辰

皇朝通志卷八十一

國朝書獻類徵初編卷八十

通奉大夫前署江西巡撫江西布政使司布政使湘陰李桓輯
卿貳四十

任啟運

任啟運江蘇荆溪人雍正十一年進士改翰林院庶吉士授編修
官至宗人府府丞直上書房十餘年著周易洗心九卷宮室考十
三卷肆獻裸饋食禮三卷四書約指十九卷儀禮一經久成絕學
啟運研究鉤貫條理秩然精覈足與鄭注相參不愧窮經之日其
說易頗務新奇然觀象玩辭亦時闕精理又有所著清芬樓遺藁
藏於家

右 國史館本傳

任啟運字翼聖一字鈞臺宜興人今分荆溪雍正十一年癸丑年

已六十有四計借畱都下會 世宗憲皇帝問有精通性理之學

者六部九卿各舉所知於是司寇張照以啟運名上 特詔廷試

雍正十一年以太極似何物對進呈 御覽蒙 憲皇帝恩獎人

三月十四日 很聰明適會榜發獲第春官遂於臚唱前一日引 見是年傳臚

日引 見在四月朔 奉 上諭任啟運授翰林院檢討 實錄作在

日見 上諭內閣 阿哥書房行走于開泰焦以敬吳超桑調元李光型劉學祖著賜

進士補入殿賜榜 錄見實 逾年抱疾 賜藥 賜醫越月謝 恩

特諭繞廊而進面稱知汝非堯舜不敢以陳於王前再四慰安務

自保愛令侍臣扶掖以出且遙望之乙卯八月 高宗純皇帝登極仍 命書房行走是年十月署講官明年升中允四年三月升侍講六月升侍講學士七年四月擢都察院左僉都御史八年五月充三禮館副總裁八月升宗人府府丞九年歿於所 賜第賜帑金治喪具 賜祭葬在翰詹十年不與散館亦不與大考充丙辰順天鄉試壬戌會試同考官皆由 特旨入闈真異數也初侍郎黃叔琳主雍正元年江南鄉試歸曰他人但以榜中有狀頭爲意滿耳予得三人曰任啟運陳祖范徐文靖其學博而醇見盧文竹書統箋序又見錢大見盧迨乾隆己巳 詔舉經學奉 上諭故宗人府府丞任啟運研窮經術敦樸可嘉猶舉爲多士之式乾隆壬

辰正月 命中外蒐輯古今羣書 諭曰歷代名臣洎本朝士林
夙望向有詩文專集及近時沈潛經史原本風雅如顧棟高陳祖
范任啟運沈德潛輩亦各著成編並非勦說卮言可比均應槩行
查明在坊肆者或量爲給價家藏者或官爲裝印至有未經鐫刊
祇係鈔本存畱者不妨繕錄副本仍將原本給還庶幾副在石渠
用儲乙覽見寶錄於是上周易洗心九卷肆獻禘饋食禮考三卷宮
室考十三篇四書約旨十九卷見四庫提要別有禮記章句十卷清芬
樓遺彙四卷行世

右傳任泰撰

吾師諱啟運字翼聖號釣臺籍隸江蘇之荆溪先生世有隱德生

卽穎異性嗜讀書蒙時大父雲巖公授以孟子讀至卒章輒哽咽
流涕大懼道統無傳人立志遠大已若此家貧無藏書從人借閱
夜缺膏火讀常就月至梯牆不輟間遇疑義苦無師授輒以己意
默會之父慕雲公集家訓珍言奉行罔替事母許太淑人克盡菽
水歡壯歲偶接危疾心禱於神曰死何憾願先菴期之母死不可
卒得無恙有學使者以重金聘先生卻之曰吾館里閉時得歸省
豈忍以多金遠離吾母哉得遂終養年亦已六十矣父歿時幼弟
纔七齡飲食教誨俾成立其教生徒亦先器識而後文藝久困童
子試年三十一始補博士弟子員又三年食餼又二十年乃鄉舉
足不履公庭至風化攸關則侃侃曾上書邑令謂宜於風俗極敝

處先爲拯救所言公公言之也雍正十一年年六十四始成進士
奉 詔求能通性理者列首薦 召對稱 旨授翰林院檢討上
書房行走 今上御極仍 命侍 皇子講席歷升左右春坊左
右中允由侍講學士遷僉都御史擢宗人府府丞累 賜御書福
字並貂裘蟒服先生忠孝天成生平遠於經學思續子朱子未成
諸經所著傳說咸折中至當求不失考亭遺意爲經師祭酒三十
年先生之初擢也 憲皇帝詢以朝聞夕死之旨謹對以生死一
理未知生焉知死 上諭云此是賢人分上事未到聖人地位從
此作去久自知之又嘗 詢及內典先生謹對曰臣愚魯讀聖賢
書數十年尙未窺見萬一無暇他及 憲皇帝大聲曰朕知爾非

堯舜不陳先生感特達之知自以犬馬就衰恐一旦先朝露不克
報稱一二刻刻窮研常若不及歲辛酉書自責語曰疇孝疇弟汝
亦喜之匪忠匪信汝亦詆之上古下今言之亶亶躬之不逮曾不
自恥孔曾思孟實惟汝師日而命汝汝頑不知既頑且鈍扑教宜
施痛自懲責涕泗漣漣於乎老矣曠以爲期時年已七十有二恆
以聖賢爲必可學尙痛自懲責不怠曾得句云讀書讀到無書處
魚躍鳶飛任我參蓋先生於道理得之深養之熟矣少本羸弱後
漸充壯週甲後讀書談道精神益固嘗云諸經已有子朱子傳獨
未及禮經著禮記章句纂天子肆獻祿饋食禮及宮室考以附尙
書蔡傳二典乃朱子酌定餘多於心未安且古文僞篇雜出著尙

書內外篇傳得孝經古本於山右時值 龍飛 天子以孝道治天下仰酬文治成孝經章句其周易洗心精微獨造兼參術數則年六十時作也初以儀禮爲朱子未成書上書中丞張儀封請入奏開館校定不果行幸逢 聖朝崇尙經籍元年丙辰 簡命築修三禮局獲罄所學及癸亥總裁三禮館 命下乃拜手稽首屢言曰臣一生志願未有所發念世莫大於禮而臣之報 國適得以是成一代經教立萬世綱常其敢易而爲諸因盡發中祕所儲平心參訂目營手寫漏常至二十刻猶不已論必本天道酌人情務求合于朱子遺意而先生亦用是心血煎耗雖綱舉目張尙未遑葺事竟以積勞終於 賜第易簀前一日猶手校禮經數葉至

不克舉筆口誦命子判代易彙先生感 兩朝高厚殊恩雖當屬
續時猶不敢自有其躬也嗚呼其可傳也已先是官起居注時每
遇經筵日講既口陳指畫闡揭大義退復疏通奧旨日進積六十
篇 天子知先生經術湛深時時 乙覽一歲未終三晉崇階及
聞先生溘逝知其清貧 特賜帑金治喪具 聖恩優渥存歿均
霑嗣又允督撫大臣請崇祀鄉賢人臣稽古之榮於斯極矣先生
晚歲得遇侍直 禁廷十二年 欽點鄉會試同考官各一壽七
十有五所著述最富諸經外有四書約旨夏小正注竹書紀年考
逸書補孟子時事考史要女史通纂女教經傳白虎通正譌任氏
家禮酌任氏史冊備考同姓名考記事珠清芬樓文集等書乾隆

十四年 詔求經學奉 上諭以先生研窮經術敦樸可嘉與侍
郎蔡聞之並荷 宸衷眷注三十七年恭遇 皇上右文典學
詔開四庫館追念本朝士林宿望沈潛經史者特舉公名與顧棟
高陳祖范輩並飭內外大臣查明著作錄備石渠之選夫先生身
赴玉樓已多歷年所矣猶得邀 聖思念舊頻 賜恩綸此臣子
身後殊榮非尋常之文學侍從可比倫也保於乾隆丙辰京闈幸
出先生門下維時髫齡薄植不克仰窺山海之崇深而晨夕趨承
每恨吾師家境之清遭遇之晚幸荷 聖朝殊恩疊沛雖山頽木
壞猶令親炙門牆者追述之與有榮施也

右家傳德保撰

任啟運字翼聖少穎悟嗜讀書祖贊授以孟子讀至卒章輒哽咽
大懼道統無傳人祖心異之家貧無藏書從人借閱夜乏膏火持
書就月至梯牆不輟閒遇疑義苦無師輒以己意默會之理精學
粹事父母以孝聞父歿幼弟甫七齡教誨俾克成立願困於小試
年五十四舉於鄉雍正十一年年六十四成進士奉 詔求能通
性理者列首薦 召見稱 旨授檢討上書房行走乾隆初元
命侍 皇子講席歷升左右春坊左右中允由侍講學士遷僉都
御史擢宗人府府丞累 賜御書福字並貂裘蟒服有差啟運忠
孝天成達於經學思繼子朱子未成諸經所著傳說折衷至當爲
經師祭酒三十年方啟運之初擢也 憲皇帝詢以朝聞夕死之

旨謹對以生死一理未知生焉知死 上諭云此是賢人分上事
未到聖人地位從此做去久自知之又嘗 詢及內典謹對曰臣
愚魯讀聖賢書數十年尙未窺見萬一無暇他及 憲皇帝大聲
曰朕知爾非堯舜不陳啟運感特達之知自以年齒就衰恐不克
報稱益刻苦研窮舊書自責語曰疇孝疇弟汝亦喜之匪忠匪信
汝亦詆之上古下今言之亶亶躬之不逮曾不自恥孔曾思孟實
惟汝師日面命汝汝頑不知既頑且鈍扑教宜施痛自懲責涕泗
漣沔嗚呼老矣瞑以爲期時年七十有二恆以聖賢爲必可學曾
得句云讀書讀到無書處魚躍鳶飛任我參嘗謂諸經已有朱傳
獨未及禮經著禮記中庸章句纂肆獻裸饋食禮及宮室考以尙

書蔡傳惟二典爲朱子酌定餘多未安且古文僞篇雜出著尙書
內外篇傳得孝經古本於山右著孝經章句其著周易洗心精微
獨造兼參術數初以儀禮爲朱子未成書上書中丞張儀封請入
奏開館校定不果行乾隆丙辰恭膺 簡命纂修三禮局獲罄所
學癸亥總裁三禮館 命下啟運喜甚因盡發中祕所儲平心參
訂目營手寫漏常至二十刻不輟論必本天道酌人情務求合考
亭遺意而啟運用是心神煎耗雖綱舉目張尙未歲事竟以積勞
終於 賜第先是官起居注時每遇經筵日講旣口陳指畫闡揭
大義退復疏通奧旨日進 御覽積六十篇 天子知其經術湛
深時時 乙覽一歲三晉崇階及聞啟運溢逝知其清貧 特賜

帑金治喪具嗣又 允督撫大臣請崇祀鄉賢啟運晚歲得遇侍
直 禁廷十二年欽點鄉會試同考各一卒年七十有五乾隆十
四年 詔求經學奉 上諭以啟運研窮經術敦樸可嘉與侍郎
蔡聞之並荷 宸衷眷注三十七年 詔開四庫館追念士林宿
望沈潛經史者特舉啟運名與顧棟高陳祖范輩並飭內外大臣
查明著作錄備全書館啟運著述最富諸經外有四書約旨夏小
正注竹書紀年考逸書補孟子時事考史要女史通纂女教經傳
白虎通正譌任氏家禮酌任氏史冊備考同姓名考記事珠清芬
樓文集等書行世

右傳吳德旋撰

任啟運字翼聖宜興人居近釣臺世稱釣臺先生篤志力學以聖賢爲必可爲雍正元年舉於鄉聘修江南通志十一年詔舉醇儒以華亭張文敏照薦會中禮部試卽應 詔試性理論稱 旨翌日

召對便殿問太極圖大旨從流溯源言如泉涌若不知身在

殿廷者授檢討入直上書房遷左僉都御史宗人府丞卒年七十五在經筵時成講義六十篇以進後成禮記章句十卷易學洗心傳九卷其他四書約旨孝經章句白虎通正譌女教經傳通纂家禮酌竹書證傳任氏世錄清芬樓文集

右傳孫錫疇撰

按先生女教經傳通纂二卷做朱子小學之例其子翔爲之注末有門人傅洛等跋

稱尙有女教史傳通纂一書做小學外篇之意今莫之見據翔所附記此書立教等十一門乃先生之妻所輯笄禮

喪禮二門乃妻歿後先生所補然先生序中未之及

先生任姓諱啟運字翼聖江南宜興人居荆溪生而穎異歲未周母許指壁閒字爲訓翌日復之對亦以指母喜日爲常六歲從大父贊讀書大父志氣慷慨常舉古聖賢豪傑事相勸道及忠孝事則掀髯奮發或涕泗交頤九歲讀孟子終飲泣不食祖問故曰焉有讀無有乎爾二語不泣者乎祖指注云程朱去孟子千五百年得絕學於遺經今去朱子止五百年小子宜自勵漸次讀九經悉通貫大義嘗夢二龍蜿蜒飲硯池水覺而竊喜自負時從父大任經學爲吳中大師從請業授以中庸性天之學憬然悟其宗旨益篤志力學以聖賢爲必可爲年三十一始籍於校食廩餼吳中號

多名士大都逐聲利志取科名先生獨抱遺經講習意夷然不屑也雍正元年舉鄉試尋應聘修江南通志十一年春 詔舉經學醇儒華亭張文敏公照尹順天以先生名聞於 朝會中禮部試卽應 詔試性理論稱 曰翌日 召對便殿問太極圖大旨先生言如泉涌 憲皇帝稱善授檢討入直上書房侍 純皇帝及和親王學一日 憲皇帝詢及內典對曰臣未之學也 帝曰朕知卿非堯舜之道不陳耳自是 恩禮加隆駸駸將大用矣 純皇帝御極仍命傅 皇子乾隆元年晉中允洊擢左僉都御史宗人府丞先生自通籍後間歲必遷其官或一歲數遷然每優以輔導之重未嘗跬步離講席也既受 命總裁三禮以爲生平志業

所在幸得畢力於斯發凡起例編排無間寒暑方侍郎苞李閣學
紱負宿望館中莫敢與抗時方分得周官李分得儀禮每有議論
至齟齬不相下必折衷於先生得一言而兩家之論定嘗早朝
上顧其年老有寒色解貂裘賜之令內侍扶之出俄櫻末疾賜醫
藥存問無何竟不起 上聞之嗟悼彌日 賜內帑金以斂時乾
隆九年七月某日也年七十有五先生忠孝性生事親克盡菽水
歡有學使者以重幣來聘卻之曰吾館里閑時得定省豈忍以多
金故遠離吾母耶告養時年已六十餘矣居父憂喪葬盡禮撫幼
弟有恩官副憲時適河決淮南饑黎四出 詔出常平倉米賑之
先生疏言直隸北境及山西等處土廣人稀宜乘時遷南民以墾

北土募南土之明農者倣古力田科使爲田師相地勢高下畫疆畝時蓄泄道種藝則瘠土可轉爲沃土且溝渠浚則水有瀦蓄不至悉注於河而河亦易治矣在經筵時成講義六十篇以進上嘉納焉少博覽強記諸子百家靡不探討已以爲泛濫無益乃一意治經成禮記章句十卷以小戴禮四十九篇非聖人所手定漢儒前後損益篇次頗多混淆大學中庸朱子旣成章句則曲禮以下四十七篇皆可釐爲章句但所傳篇次悉遵唐孔穎達本非劉向馬融大小戴刪併之本其序列紛錯初無義類可從爰倣鄭康成序儀禮例更其前後併爲四十二篇或刪其目而以文類併入則如郊特牲問喪等篇或補其文而以義類聯綴則如士相見義

朝義等篇事以類次分畫較然凡有關倫紀之大而爲秦漢元明
輕變易者必眾著其說以俟後之論禮者酌取焉又以儀禮特牲
少牢饋食禮三篇皆士禮因據三禮及他傳記之有關王禮者推
之成肆獻裸饋食禮五篇曰祭統曰吉蠲曰朝踐曰正祭曰繹祭
每篇各爲節次不得於經則求之注疏以補之較勉齋黃氏祭禮
尤精密儀禮一經久成絕學先生研究鉤貫條理秩然可與鄭注
相參不愧窮經之目又以考古者必知宮室之制而後行禮之方
位節次可明因考古宮室制度成宮室考十三卷繼乃潛心學易
發憤探索恆徹夜不寐雍正庚戌九月六日忽神遊乾坤圖內身
如委蛻逮見八卦劃然開朗乃甦蓋越旬有七日矣至是成易學

洗心傳九卷謂論語五十學易卽河圖洛書中數讀易須先從圖書推究故首列圖象圖書以後太極兩儀四象八卦先天後天與夫錯綜變雜共立十六圖而各繫以說原本先儒間以己意推廣之以李鼎祚所集三十餘家爲宗每解一卦則合上下內外錯綜互變伏見諸體以盡其變推之天時人事以廣其義繫辭文言則以本義爲宗而旁參眾論說卦序卦則推本於先天後天圖陰陽形象動靜剛柔見聖人所以闡明卦德卦位卦象之說雜卦傳孔子之序卦也此爲孔子之易逐節反對中具有覺世牖民之義終之以夬者與文王終未濟同意初先生計偕入都時季冬初先生居前室忽若電光閃鑠同舍詫異迹之先生方偃卧帷中蓋頂光

遊露也其所得可知矣乾隆壬辰 詔開四庫館有旨取所著入
中祕子翔登進士官吏部員外郎以經學世其家

右事略李元度撰

荆溪任先生諱啟運字翼聖進士歷官宗人府府丞著肆獻裸饋
食禮三卷其名取周禮以肆獻裸享先王以饋食享先王之文每
篇之內又各爲節次每節皆先撮己說而自注其說之所出其後
並附載經傳較之勉齋黃氏祭禮更爲精密又撰宮室考十三卷
於李如圭釋宮之外別爲類次曰門曰觀曰朝曰廟曰寢曰塾曰
宇曰等威曰名物曰門大小廣狹曰明堂曰方明曰辟雍考據頗
爲詳覈

右學家唐鑑輯

荆溪任鈞臺宗丞以雍正癸丑通籍年六十四矣 殿試之明日以能通性理八人引 見卽授檢討上書房行走由左僉都御史洊升卿貳而且官翰詹則免其考試佐憲職不責以糾彈迨乾隆己巳宗丞棄世久矣 詔舉經學士 聖諭猶舉以爲勸有故宗人府府丞任啟運研窮經學敦樸可嘉之哀嗚呼 兩朝聖人隆禮儒臣一士之身成全至此理學經術如宗丞亦自無負知遇然繩樞甕牖之士有宗丞之學之才而生不逢時韜伏堙晦以沒世者豈少也哉

右紀聞陳康祺撰

雷鉉

雷鉉福建甯化人雍正元年舉人八年以禮部侍郎蔡世遠薦授國子監學正十一年中式進士改庶吉士旋乞假歸十三年召來京命入直上書房乾隆元年散館以病未與試特旨授編修二年三月充會試同考官五月大考二等一名賜筆墨端硯葛紗等物三年三月充日講起居注官七月京察一等四年三月升左春坊左諭德兼翰林院修撰尋丁父憂歸九年召來京仍入直上書房賞額外諭德照見任食俸十年四月遷右春坊右庶子七月升少詹事十月復充日講起居注官十二月擢通政使司通政使十一年二月奏前奉諭旨戒飭臺諫諸臣處心積慮

總不外名利二途夫論臣子之分不惟不可計利并不可好名而在朝廷樂聞諫言不必疑其好名并不必疑其計利昔孔子稱舜大知曰隱惡揚善則知當時進言者不皆有善無惡惟舜隱之揚之所以嘉言罔攸伏成執兩用中之治得旨嘉獎三月命稽察覺羅右翼官學十四年乞假省母十五年假滿來京命提督浙江學政十六年二月上南巡召見賜詩云衡文慎辨僞兮真兩浙吳山近八閩爲汝便因養汝母卽斯推可教斯人曷膏良苦毋驕貴藜藿曾甘莫忘貧竹見賓興皆碩彥近名宜戒誨諄諄八月調江蘇學政十八年四月升都察院左副都御史仍留學政任九月復調浙江學政二十一年乞終養歸二十二年上南

巡鉉迎 駕江左 御書贊榮綬祉扁額賜其母二十四年丁母憂二十五年卒子定涓直隸東安縣知縣

右 國史館本傳

乾隆二十五年十月二十五日原任都察院左副都御史甯化雷公以疾薨於里第遠近人士聞者驚悼交書相弔蓋公以忠孝見信於 上而天下尊其學者三十餘年其告養洎丁艱 朝野咸望起復大用以著大儒之效於天下而公遽薨公之薨而人士竊計內外大臣鮮復有如公之畱意人才者故其始聞而驚驚已而悼人人有失其私之悲而因致夫天下賴之之意而益知公之生歿於世不偶然也公諱鉉字貫一號翠庭先世陝人也後自江西

遷汀之甯化故今爲甯化人曾祖某祖某皆不仕父諱某縣學生三世皆以公貴 恩贈如公官公爲諸生見蔡文勤公學約悅之從文勤學文勤稱公爲人類楊江陰江陰者文定公名時也鄉貢京師高安朱相國軾聞公名不可得見乃就公蔡公寓舍論易時人兩賢之而合河孫侍郎嘉淦亦先禮公舉爲國子監學正癸丑開性理試主者欲得公公謝不往旣成進士 朝考第一大員多薦者改翰林院庶吉士 今上卽位 詔起公於家侍讀 皇子賜第內城 特旨授編修充丁巳會試同考官以 御試前列受 賜充日講官起居注京察一等遷左春坊左諭德兼翰林院修撰同事余某以 皇太子薨於京奉 旨畱侍 皇子讀公言

余某父喪未葬不宜在 皇子左右聞輔臣咎其辭爲好名使在
廷人人辟好名之嫌不執親喪非細故也余得歸終制丁縣學
公艱服闋 詔起供職以額外諭德食俸遷右春坊右庶子再遷
少詹事充日講起居注官擢通政使司通政使是時 上以言事
者外沽直名自規便利下 旨訓飭公謂二者雖諫臣不肖然 朝
廷樂聞讜言不必病二者以塞言路昔孔子稱舜隱惡揚善則知
當舜之時言者亦不能有善而無惡惟舜隱且揚之故書曰明四
目達四聰又曰嘉言罔攸伏願 皇上以舜爲法因言宜任老成
遠諛佞簡遊幸屏玩好得 旨嘉獎是冬乞假省母滿假以原官
提督浙江學政調江蘇改都察院左副都御史仍調浙江梓陸清

獻公年譜教士敦實行去功利衡文取清淳一革舊習公爲政甚嚴而州縣吏亦無敢踰法虐士者有勒屬捏報劣生者其人已擢守道公特劾之因奏舉報優劣宜責成府縣官定以處分又言貢士太學宜先老成通經學者會秋大饑有司以例不敢請公密言狀得旨特賑民困以蘇母李太夫人年八十援例終養蓋侍養太夫人者四年太夫人既葬未終喪而公薨年六十四公平居雍雍以和不見喜愠之色至臨大節則斬然不可奪其在朝廷遇重臣無加禮退接故交如布衣時狀貌秀偉造次必於禮而宏毅簡重安舒自得見者知爲粹然大儒也初入仕籍大臣爭相引重公岌然中立無少依附獨以忠懇結上知在羣臣中恩意特

異二十二年南巡 御書扁額爲太夫人壽兼 賜貂緞蓋公性
純孝 上知之故體恤之尤至而公臨薨遺表亦曰臣爲子之事
粗具而爲臣之志未伸受 恩深重莫報涓埃此臣目難終瞑者
也嗚呼觀公之所以事 上與 上之所以待公者庶幾古詩書
所載君臣相與之盛者已公之學以躬行爲主其生平出處張弛
言默按之無一不合於道者至小事亦皆可法爲文章簡要冲夷
有古作者風所著經筵堂集自恥錄讀書偶錄校士偶存聞見錄
等書凡若干卷公嘗謂 國家根本在人才故聞一藝片善必加
搜討所交多巖穴奇士其奉 使出京師布衣李錯朱燉送別舟
次錯號鴈青山人與燉俱守道自重不妄見人者惟公能得之在

浙江每有造訪或邑人未曉名姓相視驚訝不測公何以知之也
公在病猶手修族譜考校無譌蓋其所存者如此公夫人同邑巫
氏有順德能宜於公長子定瀄壬申 恩科舉人次定澍監生先
卒次定源貢生女一人適太學生巫某孫男二人定澍出孫女二
人一定澍出一定瀄出定瀄將以某年月日葬公於某山某原先
期以書狀來請銘仕琇與定瀄爲男女媼家辱公以文行見知者
二十餘年公之病未薨也實以誌墓之文見屬因忘其不肖輒刪
狀語掇公行身居官之大者載諸幽以告後世云銘曰
雷世潛德始顯於公公仕以道不辱其躬正學之興 明時是逢
進禮退義旣孝旣忠非公之賢 明聖在上信賢不疑崇德無忘

爰再起公不俟自來侍經 皇子久試公才改官詹事遂掌銀臺
公督浙學 皇有特命迎養之便毋愆溫清 南巡賜詩又以爲
言教及都人彌荷 皇恩惟公篤學雍雍翼翼起秀莠蕪幽以無
匿公試都憲大江之南仍改浙學文教其覃惟公立朝無側無倚
體 皇之心以成燕喜其喜維何忠孝道光奉母歸閭色養無方
融融洩洩和樂且康諧於 帝心 天語揭堂公進不疑退省無
虧古有成人庶其在斯壽母慶終公猶孺慕喪筵未徹俄驚大故
公年六十公位豈卑未厭眾望士林齋咨城有邱園爰得吉卜公
體藏焉表以名木大儒之壟過者咸肅

右墓誌銘朱仕琇撰

公諱鉉字貫一雷氏世系出馮翊自唐遷閩之甯化曾祖某祖某父某諸生三世俱以公貴 贈通政使司通政使公年十七補諸生雍正元年舉於鄉以合河孫文定公薦官國子監學正十一年成進士改庶吉士請急歸 上卽位旋 召直上書房元年授編修三年充日講起居注官四年遷左諭德以父憂去九年被 召仍直上書房十年累遷至通政使十四年以母疾乞假歸踰年入朝 特命督學浙江尋改江南十七年遷左副都御史仍畱督學其冬復任浙江二十一年任滿以母老乞終養得 旨卽自浙侍母歸二十四年丁母憂勞毀得疾其明年冬十月某日終於家公之卒也予旣爲文以哭之越一年夏其子定瀄寓書並狀來乞銘

子與公同官翰林素知公既督學浙江又與公先後相代以是益
悉公爲人而歎公之志蓋未竟也公之學之醇守之固其立朝抗
直遇事一無所撓屈其遭際亦甚隆而卒未竟其志者豈非命哉
方 上御極之初銳意治理在朝諸臣爭自奮思所以稱 盛意
公時官諭德每進經史講義必詳析義利開設端委以推極於治
要 上嘉納焉有同官以喪歸未葬入臨 皇太子喪 上欲留
之公力疏爭事遂寢當是時也朝野無事 天子方虛己側席有
一善無不庸若谷之應響公駸駸方向用而適以髮去旣服闋入
朝會日食求言上書論臺諫以爲 朝廷樂聞讜言不必疑其
好名臺諫之所得者名政事之所收者實也其言可謂通達識治

國朝通志卷之八十一
體督學浙江浙西饑無人告者公輒以 聞遂得 旨賑貸公既
感 上知不欲以虛文荅 詔旨亦不肯以職分自諉謝惟 上
鑒其誠而信之既用其言復顯其身且使得就官迎養所以曲成
之者無不至夫亦將有待矣而公復以乞養去蓋嘗論人其器大
其意必遠以公之精誠磊落抗節不回且無有遏塞之者宜不獨
此三數事見諸言論蓋已舉其大者矣然則使公敷歷至今其位
益顯其任益重而亦無有遏塞之者將必更舉其大者以剴切一
世而惜乎其志卒未竟也公少學於蔡文勤公其學一宗朱子不
搖於他說臨卒無一語及私其遺疏云爲子之事粗具爲臣之志
未伸蓋公亦自以未竟其用而天奪之年爲可憾也公配巫夫人

子男子三長定瀆舉人次定澍國子監生先卒次定源子女子一適國子監生巫國維孫男子二女子二以某年月日葬公於某所
銘曰

器之大小隨所儲瓶甕瓶石殊盈虛峨峨雷公志不渝英辨挺特精誠孚守以醇國濟氣俱落落數事昭寰區蘊負更與常人殊尼之歲月未盡舒銘茲景烈垂史書子孫達者其嗣諸

右墓誌銘彭啟豐撰

公諱錄字貫一先世田豫章遷汀州之甯化曾祖諱某祖諱某父諱某縣學生三世俱贈通政使司通政使公年十七補諸生時漳浦蔡文勤公講學龍峯公讀其學約悅之從文勤游慨然以聖學

自任慕陸清獻公之爲人也既通籍勤學不懈肆其所蓄施於有
政氣清而守固遇義所不可必達其意初舉鄉試至京時蔡公在
朝大學士朱文端公欲見公公不往文端乃就蔡公館與公論易
器之雍正八年以合河孫文定公薦授國子監學正十一年成進
士選庶吉士明年大父母春秋高請急歸省 上卽位召至京授
翰林院編修直上書房屢轉至左諭德兼修撰每進經史講義必
明辨安危治亂之幾歸本於人主之一心以推極於民生國計反
覆詳盡無隱情會同官余棟以喪歸未葬入臨 皇子喪 上欲
畱之公奏曰侍學之臣所貴明大義篤倫理非徒取記誦詞章而
已今余棟父喪未葬遽直 內廷設講書至宰我問三年喪章何

以出口乎聞輔臣以其辭爲好名使人人避好名之嫌不求盡人子之道非細故也事遂寢繼以太公憂去官服除 召還旋擢通政使乾隆十一年三月日食求言公上書曰伏讀 上諭戒飭臺諫諸臣處心積慮不外名利二塗此 皇上裁成激厲望此諸臣盡以古純臣爲法也夫就臣子而論不可計利並不可好名計利者卑瑣不待言稍存好名之念必不能勉竭忠愛曲盡事情而在朝廷樂聞讜言但當論其言之是非不必疑其計利並不必疑其好名果其言爲上爲德爲下爲民 皇上采而納之天下後世傳而誦之正足見 聖朝之有人臺諫之所得者名政事之所資者實也昔孔子稱舜之大知曰隱惡而揚善當舜之時進言者亦

不皆有善而無惡惟舜隱之揚之所以嘉言罔攸伏明目達聰成
執兩用中之至治 皇上誠切求言臣不自揣量總總過計者如
此若夫信任忠良練達之臣屏絕諂諛容悅之習不爲無事之游
幸以增煩費不耽無益之玩好以妨幾務此我 皇上日夕乾惕
時存警戒無待臣下之敷陳者也疏入 上訓勉宣示焉十二年
冬 詔以明年春巡山東將次及江淮吳越公因稱述 聖祖皇
帝巡方故事勸 上飭諸大吏省徭役敦樸素以便民 上亦已
有 旨諭諸臣矣以公言忠弗過也十四年夏以太夫人疾乞假
歸逾年入 朝 命提督浙江學政俾迎養太夫人於官十六年
秋移任江蘇明年以左副都御史復任浙江公之教士也提倡正

學以程朱爲的其所至必訪求高行卓識之士以禮先之並徵先哲遺書擇其善者而表著之由是人知向方奮發者眾時有司有勅屬誣報劣生者公疏糾之因言舉報優劣宜責成府縣官定以處分又言貢士太學宜先老成通經學者二十年秋浙西被蟲災巡撫周人驥謂已屆秋穫不以聞公致書規之不聽遂具章入告得旨賑卹而治巡撫舉明年夏以太夫人年八十預請復命時乞恩歸養上命卽自浙江侍母歸二十二年南巡御書四言額爲太夫人壽又二年太夫人卒未終喪而公亦卒年六十四時乾隆二十五年十月也公嘗學文於望溪方先生所著經筵堂集具有家法平生多布衣交在京善李鐸朱燉在蘇善陳黃中

晚而在家與建甯朱仕琇論文尤密遇後生晚學一材一藝有過人者必委曲成就之瑞金羅有高嘗游學公門服公之教未嘗去口紹升與有高交慕公之德望久矣因詮次其略爲之狀

右事狀彭紹升撰

雷先生諱鉉字貫一號翠庭由翰林歷官左副都御史初補諸生從漳浦蔡文勤學得造道入德之方舉於鄉至都不投公卿一刺以陸平湖不敢見魏蔚州爲比謹守規矩繩墨克治嚴密踐履篤實嘗謂李貫之得力喚起截斷四字頓喚起真心敬以直內之要也每截斷思念義以方外之本也又謂朱子與何叔京云人心無形出入不定須就規矩繩墨上守定便自內外帖然按此是講學

第一緊要處小學一書所當服膺踐履又謂一刻不持重便害德性一刻不專一便荒本業一刻不警惕便墮晏安溺志則害德性荒本業不待言矣又謂朱子仁說讀既久令人見得本體融通流貫處功夫精切周徧處蓋生理涵於心爲心之德而義禮智統是矣此生理涵於心卽溫然愛人利物之心爲愛之理故朱子一言以蔽之曰天地以生物爲心而人各得天地生物之心以爲心也所謂心之德者此也所謂愛之理者此也明乎心之德愛之理非有二此溫然愛人利物之心卽天地塊然生物之心而本體有不融通流貫者乎中間引夫子之言仁則由體而用自常而變一私不容自匿一理不容或虧而功夫有不精切周徧者乎下又

發明程子愛不可以言仁而愛之理爲仁則性情之界限明而脈絡通本體之妙莫非生生之理者益以著矣辨楊謝之不識仁體泛言同體者無警切之功專言知覺者少沈潛之味則功夫之實在乎操存涵養克己力行然後可以自全其生生之理者益以明矣又謂孔子性相近之言實萬世言性之宗旨孟子性善之言正是相近之實際相近者善之相近也以萬物爲一體者堯舜之仁也今人乍見孺子入井而怵惕惻隱可謂不與堯舜之仁相近乎故曰性善也擴而充之人皆可以爲堯舜也必待擴充之力者氣質有不同也孟子言性與孔子無二旨也又謂道心卽性也人心之正者道心爲之主卽性宰乎氣也人心之偏者道心之有蔽卽

性汨於氣而失焉者也非道心爲一心人心又爲一心也如飲食男女之欲人心也而道存焉知道存卽道心也知其爲道而肆焉則危者愈危微者愈微矣故必道心爲主人人心聽命也是知謂心卽性者非也離心性而二之者亦非也又謂學問之道一以貫之孝而已矣是故以父母之心爲心天下無不友之兄弟由父母而上之則祖宗也以祖宗之心爲心天下無不和之族人由祖宗而上之則厥初生民之天地也以天地之心爲心天下無不愛之民物至於民胞物與學問之道無以加矣要自孝之一念積而充之故曰天地之性人爲貴人之行莫大乎孝嗚呼此其所以通神明光四海而爲至德要道與又謂斷一木殺一獸不以其時非孝也

此可悟孝之爲道無所不貫又謂天下無性外之物凡身之所具耳目手足聰明恭重之理皆是也凡身之所接父子君臣長幼夫婦朋友親義序別信之道皆是也凡天地盈虛消息之妙萬物生長收藏之宜皆是也朱子論格物卽孟子之言知性此可悟矣又謂太極者誠也誠之之功在敬以直內義以方外敬以直內誠之源也義以方外誠斯立焉必直內乃能方外卽主靜之意也敬義夾持直上達天德則人極立矣又謂孔顏之樂如何尋處先儒隱而不發竊思人欲盡處天理流行隨處充滿無少欠缺數語可形容孔顏樂處何也卽此生意之盎然一心藹然四達者也所謂仁也顏子心不違仁雖簞瓢陋巷不改其樂也孔子中心安仁雖疏

水曲肱此樂亦在其中也然則欲尋孔顏之樂亦默體吾心之生意而已矣大抵生意是聖學真種子克己如耨草涵養乃灌溉培育之功由是欣欣向榮暢茂條達而不容已焉孟子所謂樂則生矣此之謂也學者必有見於此實加克己涵養之功孔顏之樂方可尋得不然水流花放無非生意於我何有哉又謂以性理二字分言之性體渾然析之爲仁義禮智脈絡分明是之爲理驗之身則肅父哲謀推之倫則親義序別皆理也卽皆性也復性在於循理循理在於盡分蓋性渾淪而理有條緒然理廣大而分更親切如孝之理無窮而吾有分內當盡之孝忠之理無窮而吾有分內當盡之忠隨在盡分則理得而性無虧矣格物者格此力行者行

此豈待遠求哉先生於近代真儒宗法陸平湖張桐鄉兩先生其序陸子年譜曰古之學者未有不知行並進者也不離乎日用飲食綱常民物則曰下學不扞爲新奇詭異幽深元渺則曰正學自孔孟至程朱逮明之薛胡一脈相傳如世系之有大宗小宗其他旁門異趨分之爲庶孽假之爲螟蛉而已矣我朝治教休明名儒輩出而從祀文廟惟平湖陸子一人蓋醇乎下學之功卓乎正學之的者也表章陸子所以示學者之趨向指歸然或隱微幽獨不離富貴利達之見徒以講學立名嗶嗶焉辨異同爭得失口說自勝無益也陸子之言曰學者必從羞乞墦賤壟斷辨陽儒陰釋始鎡謂學者辨陽儒陰釋必從羞乞墦賤壟斷始嘗讀陸子文

集學術辨與湯潛庵先生諸書於姚江之學可謂攻其壁壘擣其巢穴不遺餘力矣然使陸子窮達出處有一不合乎道治身檢心無人所難能之定力兩任縣令無人所莫及之治績一載臺中無人所不敢言之正論則講說雖明辨駁雖切亦何足以厭天下後世之心而稱天下之儒宗哉河南張清恪公學與陸子同嘗刊其遺書以傳於世今嗣君西銘復增定陸子年譜考訂既確包括無遺陸子生平體用兼該知行並至具於此學者探討服習如入其門登其堂而聆其警欬瞻其儀範與親得陸子而師之無以異欤懼終身爲道外之人願與天下同志之士服膺而勿失焉其序張楊園先生全集曰向見陸清獻公衛濱日鈔極推楊園張先生繼

見寶應朱止泉遺集論學術稱楊園爲最醇者顧先生著述獨山草堂初鋟版燬於火所流傳者初學備忘錄訓子語二冊竊謂學者得此已足爲入門階梯矣然而先生明體達用之全量未之見也都門於同年傳謹齋處獲覽海甯祝孝廉人齋所編集乃益信先生在前明爲薛胡之後勁在我朝爲清獻之前茅蓋先生少嗜姚江中師蕺山卒歸於洛閩其爲學切實爲己庸言庸行慥慥不息而欲然不以師道自居閒論史及時務皆關繫社稷蒼生之計而退然不爲出位之謀嗚呼學術之敝明季極矣東林而後夏峯二曲尙多騎牆先生獨粹然一出於正且身處草野日抱葵憂荒江寂寞惴惴念亂其心固未嘗一日忘天下也學者讀是書當

思先生遭困阨流離內治嚴密究心經濟而終身韜晦不自表襮
如此吾儕幸際 文治光昭之世優游膠庠願乃闢冗偷安小得
自炫乎使者視學兩浙有董率之責前已刊布清獻公年譜以勸
多士茲喜蕭山朱學博志尙正學諸生皆知向方重鈺先生全集
成爰不揣而序之觀此可以知先生之所宗主矣他若象山禪學
考陽明禪學考鷺湖說以及金華院試示諸生東林書院示諸生
嚴州試院與諸生論格致傳義荅諸生問毛西河語不亦辨之嚴
而言之切乎與清獻學術辨同功矣所著有經筵堂詩文集自恥
錄聞見偶錄讀書偶記校士偶存共若干卷建甯朱君梅崖序其
文集有曰公之學以躬行爲主以仁爲歸以敬義爲堂戶以人情

事理爲權衡以六經爲食餌以文藝爲紳佩以獎引天下之士爲藩牆而於邪正之界流漸之潰析之尤精防之尤豫大要宗朱文公而以薛文清陸清獻二公之書爲譜牒生平出處按之固已無一不合於道所謂文章則皆本其躬行所得者而慰唁問荅解惑條指發德辨姦析事類情以綜王道之要以會天命之精斯言蓋盡其大略云

右學案唐鑑輯

閩中自李文貞蔡文勤二公重振龜山考亭之緒薪盡火傳理學大暢繼之者甯化副憲雷翠庭先生鉉也先生隨計入都寓文勤邸朱高安方居比鄰文勤語先生曰高安素知子子可一見先生

以陸清獻不見魏蔚州爲比後高安禮先焉乃往見又一日孫文定過文勤文勤語先生曰孫公實爲子來當一往以荅其意先生曰不敢也將有保舉恐近自媒文定終薦之補國子監學正

乾隆初元甯化雷公以庶常蒙 特召侍 阿哥書房講讀嚴正

恪勤於中貴不假辭色嗣丁憂編修余棟以 皇太子薨入京被

命畱侍諸 皇子公奏 皇子侍奉之人必明大義篤倫理方

於學術性情有助余棟父喪未葬若隱忍行走則講書至宰我問三年章何以措口於天下風化有關於是編修得終制按公之學出自漳浦蔡文勤公文勤則李文貞嫡傳也公劾奏奪情侃侃如此於安溪一脈不能不謂之青冰

結埼亭傳二楊文定公行述稱余編修奪情時文定力言其不可

上收還成命文
定亦安溪高弟

雷翠庭副憲鉉立朝審諤貞介絕塵其雅量亦不可及家居時客
至三呼從人捧茶來未應公亦怡然或問之曰在家廩給薄此輩
自懶於趨承耳

右紀聞陳康祺撰

張映辰

張映辰浙江仁和人雍正十一年進士改庶吉士乾隆元年散館授編修二年大考一等擢侍講三年充湖北鄉試正考官四年正月 上御乾清宮西暖閣 賜羣臣宴賦柏梁體詩 賞箋硯筆墨有差映辰與焉三月 命提督湖南學政十一月疏陳三事一 生童臨考每因細故輒與小民忿爭率眾稟官有司過存姑息多將小民飭責以致易生驕玩請嗣後遇有生童臨考稟控小民之家止許本人赴審如多人爭辯卽照聚眾生事例治罪一考試武童騎射例由督撫提鎮飭委副參遊擊一員會同校閱恐有聽受賄屬情弊請一體迴避關防一生員隨任遊學有寬限補考之例

報部冊卽附在見考各生等第之末查有欠考數多僅補一次者並有徇情免考徑行附等者請嗣後補考生另冊報部不得蒙混並嚴禁徇情附等之弊下部議行六年差滿回京七年十月擢侍講學士十一月充日講起居注官八年四月遷右通政使閏四月轉左通政使九年上幸翰林院錫宴賦詩映辰復與焉十一年三月遷太僕寺卿旋被議歸十六年上南巡映辰迎鑿江左恭獻詩章賜大綬豐貂十七年來京補大理寺少卿尋充續文獻通考副總裁十八年六月充陝甘鄉試正考官命提督江西學政十九年復授太僕寺卿二十年以瞻徇議准尙書王安國左都御史楊錫紱之父入祀鄉賢祠降二級畱任二十一年八月

擢內閣學士兼禮部侍郎銜九月調陝甘學政二十四年差滿回京二十六年五月遷兵部右侍郎九月充武會試知貢舉十月奏內場點名冊向於入場後書吏請外場監箭原冊照寫殊不慎密應令照兵部司員記箭冊繕寫同試卷送入至分東西坐號時止令監試提調等官密拆親印卷面仍行封固俟受卷彌封後始拆閱分別雙單好及合式字樣交入內簾從之二十七年四月以前陞陝甘學政任內濫保邠州學正史萼堪任知縣降一級調用十月署內閣學士兼禮部侍郎銜十二月補都察院左副都御史二十八年七月疏請巡城科道遇有出差事件期在一年以內應行委署者請由都察院堂官公同揀選不得照前按資輪派上

可其奏九月充武會試副考官十二月卒

右 國史館本傳

董邦達

董邦達浙江富陽人雍正元年拔貢經刑部尙書勵廷儀保舉
命在戶部七品小京官上行走七年鄉試中式十一年進士改庶
吉士散館授編修乾隆三年六月充陝西鄉試正考官九月奏言
陝西官卷額中六名今科卷數少祇遴中四名餘二名於民卷補
中不敢濫取官生足額疏入報 聞九年六月充日講起居注官
尋授右中允十二月遷侍講十年遷侍讀學士十一年以與修明
史綱目告成議敘紀錄三次十二年正月 命南書房行走七月
擢內閣學士九月 皇清文穎告成議敘紀錄三次十月丁母憂
十三年九月 諭曰內閣學士董邦達丁憂回籍將逾一年著照

從前尙書梁詩正之例來京在內廷行走給與俸祿服闋時遇缺
補用十五年補原官十六年三月充會試副考官十二月遷戶部
右侍郎十八年六月充江西鄉試正考官九月調工部右侍郎十
九年九月充武會試正考官十二月以失察寶源局匠役竊銅奉
旨降三級從寬畱任二十二年九月調吏部右侍郎十月充經
筵講官二十五年充武會試正考官二十六年 遣祭中嶽嵩山
及太昊伏羲氏諸陵二十七年遷都察院左都御史十二月晉工
部尙書二十九年調禮部尙書三十一年正月復調工部尙書十
月 命紫禁城騎馬三十二年仍調禮部尙書三十三年因工部
任內誤准浙江製造步兵鳥槍降一級畱任三十四年五月以老

病奏請解任得 旨董邦達年逾七旬衰病乞休自合引年之例
但伊挈家久居京師既不能遽回本籍且禮部事務本不甚繁著
加恩准其給假數月俾得安心調攝不必解任七月卒 諭曰禮
部尙書董邦達久直內廷奉職勤慎前以衰病乞休特加恩給假
調理以冀漸痊今聞溘逝深爲軫惜應得卹典該部察例具奏又
諭董邦達病故所有伊前在禮工二部尙書任內應賠銀兩著
加恩寬免尋 賜祭葬如例諡文恪邦達工繪事 御製詩題詠
甚多嘉慶十二年三月 諭曰 高宗純皇帝實錄告成正總裁
大學士董誥前後在館八年始終其事允宜特加優獎董誥之父
尙書董邦達從前未經入祀賢良祠著加恩准其入祠子誥官至

國朝詩林卷之十一

文華殿大學士

右 國史館本傳

三

傅爲箬

傅爲箬雲南建水人雍正十一年進士改庶吉士乾隆元年散館授檢討三年轉貴州道監察御史四年六月奏稱明四川道御史趙讓殉崇禎甲申之難請祀於原籍昆明縣忠義祠並請 予諡從之十月擢奉天府府丞五年六月奏請頒給奉天各義學

欽定四書解義 御纂四經性理精義 御選古文 御註孝經各一部 從之閏六月奏請酌廣奉天錦州兩府入學額數 上以其沽名釣譽交部議尋議降二級調用十三年以母老回籍終養二十二年丁母憂二十四年服闋二十六年補光祿寺少卿二十七年擢鴻臚寺卿二十九年奏稱外省文武官員謝 恩向係

鴻臚寺定期傳示三傳不到者指名查參嗣經塔永阿奏准傳示由吏兵二部查參歸鴻臚寺事不盡一請仍歸鴻臚寺一律辦理又學習序班向由直隸學政於生員中擇其人品端方聲音洪亮者挨次送鴻臚寺充補恐日久弊生不無鑽營請託之私應請挑取後學政會同禮部堂官再加驗看如所請行三十二年二月遷大理寺少卿五月擢宗人府府丞十二月轉都察院左副都御史三十三年五月奏請停止御史兼辦部務 諭曰傅爲箸奏請停止御史兼辦部務一摺向來各部司員補授御史該堂官等有奏請仍兼本部行走者雖爲熟諳部務起見但御史有稽察各部之責若仍令兼部事不無意存瞻徇究於政體未協傅爲箸所請事

屬可行嗣後司員改御史奏請留部之處著永行停止其見在御史中兼部行走並著撤任是月誣告謀叛反坐罪犯陳國富於三法司過堂時翻供爲箸奏 聞交刑部研訊尋奏陳國富情虛狡飾圖脫罪名與原審情節並無歧異該副都御史於畫題後復行具奏次日會奏時未經說明暫撤令另審仍復隨同會奏均屬不合請交部察議尋議降一級畱任 上加恩寬免三十五年 上以爲箸年力衰老令原品休致尋卒嘉慶十六年入祀鄉賢祠子嶷乾隆甲午副榜

右 國史館本傳

公姓傅氏溷之建水人諱爲箸字嘉言號謹齋先世隸江西高安

曾祖時鶚遊學於滇遂家焉祖大美爲善於鄉考琳康熙癸巳舉人慷慨任氣節有以殺人事誣其鄰者馳剖於官冤立解公其長子也生而醇篤貌昂藏能委己於學雍正丙午舉於鄉癸丑成進士選庶吉士丙辰 今皇上御極之元年授檢討戊午轉貴州道御史數言事殫竭愚忱一摺謂奸民宜去冗蠹宜除法禁宜申清獄訟而端風化勤勤懇懇不下萬餘言遷奉天府府丞管學政事請設書院頒十三經廿一史便諸生誦讀旋以請廣額降調蓋庚申冬也自是省大父於里門居一載需次於京八載終母養十載公之終養也購書數萬卷採先世譜系於高安以歸凡計程萬二千餘里渡黃河越金焦汎錢塘歷三楚入五溪還六詔壯懷憑弔

輒掀髯高吟自肆於山水閒迨歸里以母老不受九華書院講席之聘偕諸弟姪承歡菽水旣按譜以遡先德之淵源更有藏書足供誦讀融融怡怡朝夕於螺髻浣江有若將終身者公之文能見道公之詩自成一家言公之學蓋再進於庚申以後辛巳以前由奉天而歸省而需次而終養而丁母憂二十餘年讀書之力爲尤多辛巳服闋入都補光祿寺少卿食四品俸壬午遷鴻臚寺卿上召見曰爾儉樸人也夫儉以養廉樸由積誠蓋知公深也丁亥二月轉大理寺少卿五月遷宗人府府丞十二月遷左副都御史奏慎選序班復謝 恩官故事及停科道兼辦各部司員事以存體制俱後先報 可庚寅春病齒劇不能朝四月朔以原品 子

告越七日辛酉卒公祖父均以公貴 贈中憲大夫祖母吳氏母
李氏均 贈恭人配劉氏 封如之嗣子峻增貢生嶷監生所著
藏密文鈔詩鈔斯文易簡錄明儒四家纂藏於家

論曰公於少廷尉署種槐柳於御史臺種柏善詩酒善交及余讀
公疏言明巡城御史趙譔死事狀甚烈爲請諡又言拔貢生王讚
孝行爲請 旌公之風節可想見矣凡都御史於御史向例有統
無屬蓋不以課職爲重而以端表爲先若公者洵足楷模焉嗚呼
臺中諸君子尙愛其樹而弗忘也哉

右傳吳玉綸撰

趙忠愍譔雲南人明崇禎間仕至監察御史巡視南城城陷時爲

流賊所害於白帽胡同其時黨人氣盛公以邊遠之士未及攀躋
清流故南中祭享及本朝賜諡時皆未之及乾隆初公同鄉侍
御傅爲箸爲之表白始補諡忠愍立專祠以祀之在憫忠寺旁今
爲雲南會館

右錄宗室昭樾撰

國朝

卷八十一

三

雙慶

雙慶瓜爾佳氏滿洲正白旗人雍正十一年進士改庶吉士乾隆元年散館授編修三年升侍講四年正月 上御乾清宮集在廷諸臣 賜宴賦詩雙慶與焉三月充會試同考官六月充順天鄉試同考官八年轉侍讀九年七月充山西鄉試副考官十月 上幸翰林院分韻賦詩雙慶復與焉十二年充湖南鄉試副考官十三年 命提督安徽學政十五年任滿仍畱任十六年升國子監祭酒十八年三月擢內閣學士兼禮部侍郎銜四月回京供職十一月授倉場侍郎十九年四月奏參漕運通判陳克大短發淺夫工食銀兩得 旨交部審訊陳克大潛逃詭稱自盡尋於天津訪

獲 諭曰陳克大係應交部審擬之犯該倉場侍郎於奏參時卽當照例摘印看守乃防範不嚴致該犯詭計逃竄深屬不合雙慶著交部嚴議尋議降一級調用上寬之十一月疏言白糧經紀並土壩車戶等剝船已滿十運例應另造但開河剝船與漕船經涉江湖者不同請嗣後行運十五年方准更換得 旨允行二十一年奏稱京倉收貯黑豆積五十餘萬石請照乾隆十八年例以豆代粟抵放俸米並令在京各官按照品級承買關支於廉俸項內扣價其成色稍低者分給五城照時價酌減平糶下部議行二十三年奏請將北倉起運米石氣頭廢底交經紀變價歸公 命戶部尙書劉統勳赴通州查察尋統勳奏氣頭廢底交與經紀變價

以與定例不符致該役等將未經估定成色之米輒自篩颺實屬不合下部察議二十五年二月奏參北城廠書丁斌多領興平倉平糶麥石 諭曰廠書以空白印領冒支倉麥法難寬縱業據陳作梅於初六日奏參該倉場侍郎專司倉儲乃於陳作梅奏參數日後始行查參其失察之咎已屬難辭下部察議六月具題經紀車戶豫領腳價請以辛巳年爲始分作十六年扣還經部具奏得旨此項豫支腳價積至十萬餘兩之多雙慶欲展限通融辦理應專摺奏請乃祇照尋常事件率行具題著交部嚴議尋議降三級調用二十六年復補內閣學士兼禮部侍郎銜二十八年四月充殿試讀卷官五月擢禮部右侍郎十一月轉左侍郎三十年扈

蹕南巡時京察屆期 諭曰侍郎雙慶此次隨從南來辦理行
在禮部事務總屬錯謬如致祭 泰山 周公 孔子祭文均經
遲誤既不據實陳奏於前經朕查詢又復希圖狡辨不可復任侍
郎之職著降四級調用三十一年補太僕寺少卿三十六年卒子
亮保內閣學士

右 國史館本傳

羅源漢

羅源漢湖南長沙人雍正十一年進士改庶吉士乾隆元年散館授編修九年充廣西鄉試副考官十年遷右贊善十二年擢左諭德十四年遷翰林院侍讀提督廣西學政十五年擢侍讀學士十六年擢順天府府尹畱學政任十七年遷大理寺卿二十年源漢前任廣西學政以泗城府及甯明東蘭二州地處煙瘴官難久任請將三學教官改爲邊缺三年俸滿撤回內地補用至是議行二十二年擢倉場侍郎二十五年六月因經紀車戶豫領腳價率行具題降二級調用十月復補順天府府尹二十七年奏順天府屬自治中通判至大興宛平兩縣印佐各官向例三年京察府尹出

具考語咨送部科大計之年復由督臣附疏會題考覈雖勤轉成故事查治中通判經歷照磨司獄教職滿漢等官皆府屬應歸京察其保列一等者准同部院司員一體引見大興宛平兩縣印佐各官所辦事件與京外各官無異應歸大計聽直隸總督會同府尹舉劾又崇文門副使一員專司稅務嗣後京察應令崇文門監督出具考語徑送該管大臣覈辦下部議行二十八年遷都察院左副都御史二十九年奏州縣辦理詞訟如戶婚田土細事所有文卷審斷後並不黏連鈐印輒行發房日久或遺失不全或抽換舞弊遇舊事復發往往查驗無據請嗣後將呈詞供勘槩令黏連成帙鈐印存案從之三十二年遷

倉場侍郎三十四年調吏部右侍郎三十五年三月以前在順天府尹任將出身不正之幕友程芬送考中式部議降二級調用諭曰士子送考事關大典順天府尹給文理應慎重況程芬在署作幕其生平履歷斷難諉爲不知乃因其懇求直用府尹公文移送一切地方加結俱可不用是直府尹身爲作弊豈尋常公過可比且羅源漢屢經升用洊至侍郎於各任應辦之事多係俯仰隨人從未見其稍有自見之處亦難更事姑容致瘵職守羅源漢著照部議降調八月補左副都御史三十六年充武會試副考官三十八年奏漕船所雇短絳奸匪甚多並有不法舵工水手知情窩頓請責令本幫千總實力稽察定以議敘議處下部議行三十九

年提督順天學政四十四年遷兵部右侍郎復任順天學政四十五年三月遷左都御史五月充殿試讀卷官六月充浙江鄉試正考官四十六年四月復充殿試讀卷官十一月擢工部尚書四十七年四月 上祀 雩壇 諭曰常雩 壇內一切禮器均宜敬謹安設誠以敬 天大典小心昭事之忱大小臣工所當共懷乃本日朕行禮時見 壇內懸挂天鏡僅止二盞更衣幄次所設坐褥亦不整齊如此草率不敬非尋常錯誤可比不可不嚴示懲儆羅源漢著革去頂帶仍革職畱任十年無過方准開復尋以年力就衰復頂帶原品休致六月卒子裕遠貴州獨山州知州翺遠江蘇淮南監掣同知

右 國史館本傳

羅源漢字方城號南川湖南長沙人雍正癸丑進士選庶吉士授
編修累官工部尙書教歷五十餘年寅清端恪文章事業朝野推
重書法蒼古道勁尤卓然成家卒年七十五

右述聞謚瑤錄

國朝書目考卷之十一

甲

田懋

田懋山西陽城人大學士從典子雍正十一年由廩生選刑部員外郎奉 旨改用吏部十二年遷郎中十三年遷貴州道御史乾隆元年遷禮科給事中 命巡視南漕二年七月疏言向例巡漕御史二員駐通州二員駐淮安漕艘經由江南山東直隸二千餘里鞭長莫及請將駐淮安者分一員駐濟甯駐通州者分一員駐天津往來接續稽查儼行部議 從之九月奏言河南省秋審招冊內應情實擬以緩決應緩決擬以可矜之案甚多過於寬縱恐各省效尤姑息養奸請 敕部處分 詔巡撫尹會一按察使隋人鵬明白回奏下部議各降一級畱任三年正月疏劾工部尙書趙宏

恩受餽餼安各款軍機大臣等察議得實革宏恩職發軍臺效力
十一月遷鴻臚寺少卿四年三月 諭曰田懋前爲科道時尙屬
敢言不愧臺諫之職著從優升授副都御史四月偕侍郎班第赴
山東察審按察使白映棠出入人罪及虐累商民一案鞠實抵罪
五月擢刑部右侍郎六月轉左十一月遷吏部右侍郎五年四月
轉左五月丁母憂七年補原官九年二月奏言今春京城直隸等
處雨缺 皇上宵旰勤勞命刑部清理庶獄凡一綫可原無不仰
邀 聖恩其外省未結之案請 飭各督撫催結以免遲延拖累
亦上感 天和之一道 上是其言七月吏部尙書訥親奏截取
舉人年力良庸者請停其銓選在籍令督撫在部令九卿甄別分

部學習一年將堪勝縣令者入班選用 敕大學士九卿詳議懋
疏言定例舉人截取督撫驗看送部月選得缺九卿復行驗看衰
庸者扣除立法已善查舉人非二十餘年不能選疏之使通猶虞
壅滯若無故停選甄別分部始行選用事近紛更請仍舊例 從
之時湖南巡撫蔣溥條奏秋審緩決五次情罪稍輕者請以乾隆
乙丑年爲始減等發落部議在京各犯卽以甲子年始定爲朝審
章程則下年督撫秋審易於遵辦十月懋疏言緩決情輕者秋審
原有可矜之例及緩至五次率多情罪重大其於減等必有 特
旨開一行之若於可矜外又增五次緩決之條每歲一舉繫囚皆
有倖心益逞刁風非辟以止辟之義見奉有歲逢甲子停決 恩

旨請將五次緩決人犯情輕者減等於甲子年舉行一次其每歲查辦之處應停止下部議行十一年 上以懋性情浮躁 諭曰朕因田懋爲大學士田從典之子加恩擢用至吏部侍郎乃伊秉性輕浮語言不謹在朕前所奏之事常洩露於外且嗜酒務博不自檢點少年而不老成統袴之習至今未除豈可以居卿貳之首著解任回籍令其閉戶讀書交與該省巡撫管束不許出外生事儻日後改過自新朕再加錄用十四年 命仍以吏部侍郎用十五年以從役毆傷人命爲巡城御史九成所劾部議罰俸 諭曰前因田懋性情浮躁統袴之習未除令其解任回籍讀書聞其在籍頗屬安靜仍復加恩召用乃伊於來京時卽誣奏巡撫阿里衮

修理大行山道一事詢之阿里衮及嚮導等全屬子虛轉詰田懋亦無詞以對其在吏部亦並無感恩出力之處近因禮部侍郎缺出將伊調補又以不由科甲出身與例不合令其候缺補用伊此時既未得缺則係候補之員不應仍居九卿之列伊乃覲然見與九卿同班且有快怏之意御史又參其僕從鬪毆不法是田懋舊習全未悛改仍舊回籍讀書二十六年 上西巡懋迎 駕五臺 賜其母錦帔增禧額及緞四匹三十五年卒

右 國史館本傳

皇朝詩林卷八十一

陸

吳紹詩

吳紹詩山東海豐人雍正二年由生員保舉分刑部學習十二年授七品小京官乾隆二年丁父憂六年服闋補原官奏留本部以額外主事用九年累遷至郎中十一月授甘肅鞏昌府知府十五年遷陝西督糧道十八年二月總督永常參紹詩採買兵精浮銷價值 敕革職審究巡撫鍾音鞠係折中造報並未侵蝕入己但不據實開銷照將增出錢糧私下銷補別項例擬罪十九年發軍臺效力以母病納贖回籍二十二年春 上南巡紹詩迎 鑾諭仍以道府用五月授貴州督糧道七月遷雲南按察使三十四年閏六月疏言兇犯脫逃承緝官以六箇月扣限查參定有任俸

勒緝按年罰俸及降級畱任處分接緝官以到任日起限一年不獲罰俸一年卽免續參查逃犯年遠不獲實由初參限內承緝不力接緝在初限滿參後自與承緝不同若前官甫經承緝或以初參限期未滿卽行去任則接緝卽與承緝無異往往以處分稍輕緝捕不力請接緝在二三參限後者仍照例處分其初參未滿及甫報驗者應分定處分以嚴責成部議承緝官在未滿初參限內離任接緝官罰俸一年之外再限一年限滿不獲仍罰俸一年議上從之十二月奏言學政按試各郡有考場作弊及生監詞訟例發提調官承審學政非刑名衙門不諳律例地方官非學政專轄辦理多不認真請嗣後學政批發提調後卽咨督撫提調奉批

審明議擬一報明學政一詳解藩臬覈轉督撫以免歧玩下部議
行二十五年八月調甘肅按察使十二月遷布政使二十六年十
二月疏言甘肅駐防將軍副都統及所屬滿員應給粳米者涼州
莊浪均給折色惟甯夏滿營額支粳米千五百七十八石向由甯
朔縣採買供支豐歉不一照部價未免派累價外請增又糜帑項
請將二縣採買粳米改爲額徵分散各戶將應徵粟米一石准以
粳米七斗抵交 敕甯夏駐防應支粳米與莊涼一體給價無庸
改徵二十七年閏五月疏言鎮番縣柳林湖前督臣劉於義奏招
墾千九百八十餘頃歲給老農口食銀五百四十兩並借給牛具
工本籽種自雍正十三年至乾隆四年除扣還借項分收糧二三

萬石至六萬石不等外近自乾隆二十二年至二十六年統五年
所收均勻覈算每年分京斗糧一萬七千五百餘石若不立定科
則必逐年減少臣查安西瓜州民種屯田乾隆二十四年督臣楊
應琚奏准照民田升科納賦柳林湖同一屯田應一體按則分別
改徵糧石照鎮番縣額賦歲收倉斗糧萬八千一百三十八石二
斗零折京斗二萬五千九百七十一石七斗零較前此每年分收之
數有益無絀且給照升科俾成民產歲省老農口食銀而民戶世
業盡心礎確悉成沃壤 敕下總督楊應琚等議行二十八年八
月甘肅涼州所屬早紹詩請將張掖永昌鎮番碾伯高臺五縣城
垣並撫彝廳隆德澤州州垣損城工查修代賑 敕下甘肅巡撫常

鈞議行又疏言臨洮道管通省驛傳駐蘭州查臨洮府已於乾隆三年移省城改名蘭州府原府治改名狄道州道銜尙沿臨洮舊名又洮岷道轄鞏昌府秦階二州而洮州廳岷州皆鞏昌府所屬以應州名冠道銜名實不符請將臨洮道改爲甘肅驛傳道兼轄蘭州府洮岷隴右道改爲鞏秦階道下部議行九月丁母憂三十一年正月服闋擢刑部右侍郎二月授江西巡撫三十三年二月疏請本年豁免江西漕糧南昌饒州南康廣信於本年豁免瑞州臨江吉安撫州建昌贛州改至明年 詔可先是江西糧艘有屯田以濟運乾隆二十四年因屯租不敷撫臣阿思哈奏請清查加收餘租資津貼用後署撫臣明德查勘分別升除九江等衛所屯

田餘租率徵解不前至是紹詩奏南昌九江二衛收租過重贛州
袁州鉛山三衛所租重田缺額題請減租部議令總督高晉詳勘
高晉奏原額屯田六千一百二十九頃七十餘畝徵餘租銀十三
萬一千五百五十二兩續報瑞昌縣升科田五十八畝徵銀九兩
零又勘實成熟田六千五十九頃餘照附近民田科則減銀二萬
八百九十六兩零 從之十月奏上猶縣營前山場溝流鐵砂堆
積壅溪礙民田挹注恐小民爭取滋事臣勘山場廣十餘里每人
日得砂百斤約煎鐵五十斤募民給腰牌在溪淘取每砂百斤給
飯銀三分五釐募商設廠收買置竈二座照銅錫十分抽二例納
稅由縣解藩庫畱充地方公用令分駐營前縣丞就近彈壓奏入

報 聞是月查審九江關監督舒善侵虧疎縱 諭責之三十四
年 上聞建昌府知府黃肇隆倚勢妄作 敕紹詩查勘七月紹
詩列款以 聞並及肇隆逢迎布政使揆義事時揆義已擢湖北
巡撫解任來京褫肇隆職 命總督高晉審擬抵罪 諭責紹詩
交部嚴加議處部議革任 詔寬免尋擢刑部尚書十月調禮部
尚書先是南昌等縣被水紹詩將離任始奏請緩征 諭曰災地
應緩漕糧事關闕閭生計吳紹詩何不早爲籌畫即時入告今屆
十月之杪州縣徵糧已將一月吳紹詩平日全不以民事爲重茲
因離任在即自知更無可諉始以一奏塞責殊屬非是著交部議
處尋部議革職 諭曰吳紹詩自簡任巡撫以來於地方政務未

能振作有爲恐久益因循貽誤第念其尙無大過又係刑部司員
出身於刑名素所諳習是以加恩用爲刑部尙書嗣因任內不能
察劾屬員之案屢經發覺是其昏毫無能已可槩見豈堪復膺劇
任因調禮部尙書或尙可勉供職守昨因南昌等縣緩徵漕糧一
事不及早入告遲至十月杪始行奏聞全不知以民事爲重是以
降旨交部議處災地收成歉薄小民豈能復事輸將封疆大臣如
果先時陳奏朕無不力沛渥恩以紓民力乃吳紹詩以明知應緩
之糧遷延不辦直待開徵將及一月始以一奏塞責是誠何心見
在雖已傳諭速予停緩而該省輾轉施行更需時日是急公者納
糧旣不免拮据而疲窘者徒受催科之累此皆吳紹詩於閭閻生

計漠不關心有以誤之也吳紹詩近日果經部議降革並從寬予
以畱任此則玩視民瘼並非過屬因公實難復爲曲貸且其年亦
衰老不能復望其改悔奮勉矣昔宋仁宗於吏部選人坐失入人
罪者卽終身不遷朕今亦倣其意以事係民生休戚者爲督撫黜
陟並爲明白宣示俾皆曉然於其咎實自取且使凡爲司牧者咸
知警惕三十五年三月 諭曰吳紹詩向任刑部司員於刑名案
件尙爲諳習著以刑部郎中用三十六年擢刑部侍郎十一月恭
逢 孝聖憲皇后八旬萬壽列香山九老 賜宴及饗貂文綺三
十七年調吏部侍郎三十九年以老病乞休 詔原品致仕四十
一年三月 上東巡紹詩於德州迎 鑾加尙書銜十月卒 諭

日原任吏部侍郎加尙書銜吳紹詩老成謹慎宣力有年前歲以老病乞休准其回籍頤養今春東巡時尚能遠出迎鑾特晉階以示優眷方冀其延享遐齡不意遽爾溘逝所有應得卹典該部察例具奏 賜祭葬如例謚恭定子二長垣由舉人捐郎中三十五年選兵部 特調刑部三十六年父紹詩擢刑部侍郎 上日吳垣係特調之員不必迴避三十七年弟壇內遷刑部侍郎乃調吏部四十年遷監察御史四十一年丁母憂四十三年服闋補原官轉刑科給事中四十五年四月弟壇遷江蘇巡撫署吏部郎中壇卒補工科給事中四十六年轉吏科掌印給事中巡視北城十月擢鴻臚寺少卿四十七年遷通政司副使四十八年四月遷光祿寺卿轉太常寺卿五月擢吏部右侍郎八

月署工部左侍郎四十九年授廣西巡撫五十年正月 詔入覲
與千叟宴調湖北巡撫五十年秋江夏等州縣旱疏請緩徵平糶
募商赴川買米接濟 命將如何招徠勸諭情形確查奏聞九月
覆奏湖北商民赴川買米接濟本地民食均許給照票註明買米
若干回日給驗如川商運赴江浙糶賣路經湖北者四川於稅票
內註明所往省分湖北卽查驗放行惟是舟行由宜昌至黃州經
由湖北境千餘里沿途停泊驗放轉多遲滯臣飭沿江市鎮川商
頗停泊出糶者聽其投驗稅票如順流東下不及投驗或票內未
註運何省不得攔阻江浙災區造資接濟奏入報 聞五十一年
卒 諭曰湖北巡撫吳垣自簡任封疆以來操守謹飭辦事奮勉

上年查辦災賑事宜實心經理茲聞溘逝深爲軫惻所有應得卹典該部查例具奏 賜祭葬如例次壇乾隆二十六年進士授刑部主事洵遷郎中三十一年紹詩擢刑部侍郎 上以壇辦事明敏勉力毋庸迴避三十二年三月授江蘇按察使三十五年遷布政使舊例蘇州官俸工銀於揚州解餉及上元江甯公地雜租項下解蘇州藩庫支給江甯駐防兵米以丹徒縣衛屯米支給三十二年壇請將蘇屬俸工歸蘇撥給其原編俸工銀交江甯藩庫丹徒衛屯米抵支京口蒙古兵糧其江甯駐防兵米於上元江甯二縣就近截撥以免江甯蘇州兩市政使輾轉下部議行又言江蘇省賦甲他省奏銷率內部查款亦較多每因一款未清致懸全案

請嗣後除向無專案咨題者仍歸總案其專案請銷者屆奏銷時於動撥各款下註歸某案察覈有報銷案內動用而奏報銷完銀米者於動款下註明某案內報完以便察覈所有乾隆六年以後部查未結各款卽照此辦理以清陳案部議有專案報銷各款如所議行向無專案者亦另立專案報部限五月完結江甯安徽均畫一辦理三十七年二月擢刑部侍郎十月 命往河南會同巡撫何焜審淮甯縣民控知縣採買私派運費鞠虛抵罪三十九年以向內監高雲從探聽記載革職交刑部查審擬罪詳見觀保傳諭曰吳壇於探聽記載一事實不意其竟至於此但念其辦理刑名尙爲練習若竟子廢棄未免可惜著加恩以刑部主事用四

十年十月遷郎中十一月 命會同安徽巡撫李質穎查審壽州
高克敬控鄭文穎挾仇陷害案各論罪如律十二月丁本生母憂
四十三年正月服闋補原官四月 命隨侍郎喀爾阿往審山東
東阿知縣浮收案治監生曲九苞誣控及典史受賄罪四十四年
正月授江南河庫道二月遷江蘇布政使四十五年四月擢巡撫
六月疏言吳縣有民捐公田萬二千五百畝承種民戶除完地漕
銀米外歲收租息爲添補運漕之需乾隆三十一年撫臣明德奏
將每年應徵租米二千二百二十七石遞年抵補吳縣無著錢糧
餘米一千數百石畱備地方公用此項既非正供歉年悉照原額
徵收自三十二年至四十三年逋賦一萬九百餘兩查正項錢糧

災緩積欠均沐 殊恩而餘租舊逋轉未邀 恩蠲除恐積久日
多益增民累請歸本年 恩蠲案內一體豁免嗣後遇歉年勘明
隨徵賦蠲緩 上從之又奏言江河險處舊設救生官船五十六
隻康熙四十七年撫臣于準奏撥漁船六分泊京口瓜洲及謝家
莊並置丹陽民田五百畝名普生莊歲收租息供漁船工食救生
賞項乾隆十四年撫臣雅爾哈善奏裁船三十四僅存二十八分
撥上元江甯江都丹徒儀徵江陰靖江山陽清河寶山等處京口
沿江僅留救生船一漁船六查普生莊租息支有盈餘京口漁船
熟習風色練於駕馭請添募船四十給銀三兩分泊京口瓜洲金
山等處 上嘉之八月卒 賜祭葬如例

右 國史館本傳

今皇帝興官耆事董正六典慎詰邦禁圖惟其人時則有若海豐
吳公以持法明允受 上知遇由諸生奮庸汔位常伯折民輸學
壹切倚辦而公亦祗力不懈以迪播彝教 天子嘉其宜毗任負
漚前後居是職者莫與比公既上章乞身歸會 天子東巡謁見
行在所 詔特以尙書寵公比告薨於家訃 聞 上益愴悼
祭葬如制下有司議諡諡曰恭定越明年其孤垣壇等將奉公柩
葬於邑東之 賜塋而先期來謁銘初公之在 朝予數相見聞
就與語樂其人溫溫然而垣壇又先後出予門因稔公事履甚悉
迫其歿也會以職事視外制草得推 明天子所以寵嘉公之意

以褒顯其世今身垣壇之請不可以辭乃按公所自撰次年譜刪
撮而銘之曰公諱紹詩字二南其先自遷安徙海鹽有以進士起
家官山西布政司河東道參議諱自肅者公祖考也 贈刑部侍
郎諱象默者公考也代有令聞紹開厥緒公始補博士弟子號高
才生會 世宗憲皇帝詔中外舉所知各一人公世父黃梅知縣
象寬上公名班見於 廷公奏對稱 旨得試吏刑部授七品小
京官改督捕主事再遷江蘇司郎中除知甘肅鞏昌府四歲餘擢
西安督糧道爲總督劾免家居久之 上南巡公迎道旁有 詔
問公罷官狀公對以實 天子察其誣起貴州糧驛道再 命按
察雲南移甘肅卽其省督布政使以內憂歸旣免喪入 覲留爲

刑部右侍郎匝月復拜兵部侍郎巡撫江西 召入爲尙書自刑部遷禮部未上以歲祲奏緩漕事失期挂吏議奪職居京師數月上終欲嚮用公乃還公刑部一歲中以郎中復爲侍郎而公子壇官江蘇布政使方用才略顯進 上乃特擢壇刑部右侍郎而遷公吏部父子相代佐司寇搢紳以爲榮 慈甯萬壽以齒偕廷臣爲九老 賜杖遊香山圖形禁中公年七十餘精決如少壯觀者咸歎羨不可及而公尋以老疾引年 優詔報許且以公諸子官京師去來聽自便蓋異數也公行內修其於親事生嚴喪死哀篤愛兄弟無間爲人寬厚長者平常安言徐視而居官嶄絕有守疑疑然必得其當出事 天子四十有六年縮職以十數所至輒

有聲績在鞏昌爲興書院數親臨之以進諸生樸俗以化歲早發
俸鋤買牛種子民耕秋則大熟在西安修富平渠絀豪右專利者
沃漑數百頃其在雲南甘肅求利害廢置所宜除建甚眾不赫然
爲名而滲人肌膚至深比去乃益思頌之以至持節江西宣 上
德意數振被水百姓劑其贏乏屯租浮額白弛其徵視所安便不
苟同異其他設施功利大率類此蓋公於小者無所不盡意而決
疑平法以慎於獄則尤其生平卓卓大者惟天下亦以此稱之先
是公祖少參卽由刑部郎顯公早從黃梅君習吏事析律傾服老
輩黃梅君知其才以是內舉公及歷刑部久益精練絕人考定新
舊法式具爲規條梳櫛細密可長用起曹屬迄卿貳謹敏終始如

一而諸子更迭爲刑官亦皆受公教能其職昔周公告蘇公以式
敬由獄其後世爲周司寇聲施至今嗚呼如公者其庶幾近之矣
公享年七十八薨於乾隆四十一年十月十七日配夫人王氏婦
道純備先公一年卒子二長坦壬申舉人掌浙江道監察御史兼
吏部文選司事次壇辛巳進士前刑部右侍郎今官江蘇司郎中
出爲公從父中書瑛後孫二之承庚寅舉人中書職銜坦出之勳
國子監生壇出孫女六坦出者一壇出者五曾孫五承出者四勳
出者一婚嫁聘字皆名族銘曰

粹然吳公慶詒前武德孚行聞以御 帝所舉不失親自其躬興
練達章式莫之與明朝翔西郎遂建旌節內外隨施挹而不竭蹶

也孰起 天子毗之往也孰詣邦刑司之折獄哀鯨其澤世究拜
命於廷父前子後 帝眷耆碩恩禮始終謂將百齡何命不融
有煒 衰綸納書告第豐碑螭首以風具位佳城墨食原高水清
我作銘詩用昭厥聲

右墓誌銘于敏中撰

禮部有修明典禮釐正文風之責故秩宗清要非儒臣有夙望者
不得濫竽其間 本朝禮部漢堂官不由科目者僅三人一吳棊
定紹詩以諸生保舉歷巡撫晉大宗伯一葉侍郎存仁以監生游
升布政使內用晉少宗伯一李大司馬世傑以吏員出身嘗爲禮
部侍郎近六七十年一尙書二侍郎無不科甲中人矣

右紀聞陳康祺撰

宗室德沛

本朝宗室任外吏者以簡儀親王爲首稱王諱德沛鄭莊親王之裔也少應襲公爵王讓其弟己入西山讀書怡賢親王薦於朝世宗聞而異之召見問王所欲曰惟願百年後於孔廟中食塊冷肉耳上奇其言卽任兵部侍郎後屢任封疆不名一錢每到一處務立書院聚徒講學嘗謂人曰人心爲風俗之本未有人心澆漓而風俗漓樸者今世不患乏才而患人心之不復古非講學無以明之如使風化日移勝紛劇於呬晤之學多矣嘗與河督高斌議論不合高欲歲減革埽沙船王力持之不得時語先人曰古人制度安可輕易改革吾年就衰恐不及見汝今年少應見河

患之日增異日當思吾語也後癸酉秋水漫張家路頭果如王所料時王薨已二年矣其後河患日增至竭海內脂膏以供之猶不足補於患則王之先見若何也講學家尊之爲濟齋夫子云

德濟齋夫子嗣簡親王爵時邸庫中存貯銀數萬兩王見詫謂長史曰此禍根也不可不急消耗之無貽禍於後人也因散給其邸中人若干兩餘者建造別墅亭榭軒然故近日諸王邸中以鄭王園亭爲最優蓋王時建造也

右錄宗室昭棟撰

本朝宗藩懿戚中學術之正政治之醇莫如簡儀親王德沛王爲太祖皇帝弟濟爾哈朗四世孫早歲應襲父爵爲鎮國將軍讓

與從子入西山讀書 世宗以果親王薦召見問所欲曰願側身
孔廟分特豚之饗 世宗大器之授兵部侍郎王益折節嚮學
立志希聖一言一動必由仁義乾隆初嘗以吏部侍郎兼祭酒每
入學摩挲俎豆不忍決舍嘗集太學諸生講大學首章圓橋門聽
者千餘人靡不悅服獨助教王之銳以爲未盡復陳說己意王欣
然下階三揖而謝初甘肅地瘠歲常歉有司視爲固然無報災成
例王始外任卽撫甘肅兩月不雨立馳奏賑之 高宗卽位遷湖
廣總督調閩浙再調江南所至黜陟至公尤重民事乾隆七年淮
揚大水王慮漕粟往民不及炊乃實麥餅千艘蔽運河兩岸饑民
噉聲若流菜色立變命府縣官放手開倉以賑甯濫毋隘是役奏

動地丁關稅鹽課銀一千萬兩奏銷時屬吏皆以爲危 高宗弗問蓋信之有素矣

簡儀親王督閩浙時巡歷諸郡所至必先謁 先師廟卽升明倫堂講易屬吏列侍於後諸生環立於前函丈之間雍雍肅肅其駐節杭州時於敷文書院繪河洛方圖義文諸圖揭於屏間王手執松枝佇立指點講解移晷纓笏塞巷巾卷充庭莫不傾聽忘倦僉謂天潢節鉞中古今一人王在閩有鼇峯書院講學錄行於世所著復有易圖解實踐錄二書康熙敬按 本朝滿洲儒臣理學經濟代產巨人尙未有膺孔庭從祀之榮者如王及文定公徐元夢文端公倭仁文忠公文祥亦無愧兩廡人物惜無人焉爲之抗章

乞請也 康祺以京官謁選時自意依流平進烏臺豕芥尙非妄希
著成編茲則 國家闕典如此類者甚多謬冀有所論列私居削牘撰
不宜復出矣

右紀聞陳康祺撰

五十四年九月廿九日

三

國朝耆獻類徵初編卷八十補錄

卿武四十

張映辰

少司馬張公改官副憲以疾卒於京師孤子雲官等奉其喪歸錢唐實癸未歲也先是相國梁文莊公薨於邸第越四日公繼逝中外嗟異文莊公以庚戌進士第三人荷世廟殊遇公娶文莊女弟後一科亦入詞垣予與文莊同登第又交於公後乃以子女歸公次子雲璣蓋予三人者同官於朝氣誼最摯無端哭文莊又哭公三人者獨予在矣配梁夫人以前年壽終孤子雲官等卜地於九曜山之支將以乾隆五十五年正月二十六日丁未合葬先

期以行狀來乞銘予又何敢辭公諱映辰字星指號藻川年十六
補弟子員二十二中雍正癸丑進士入翰林丁巳今上親試翰
詹諸臣欽定一等第三人擢侍講戊子典試湖北旋命督學
任滿升侍講學士充日講起居注官歷右通政轉左又二年除太
僕寺卿以母喪歸旋奉父諱服闋補大理寺少卿癸酉典試陝西
督學江西再任太僕寺卿晉內閣學士調陝甘學政公六年於外
還朝供職備荷温綸拜兵部右侍郎充庚辰武會試知貢舉
以公事鐫二級署理閣學改補副都御史充癸未武會試副總裁
公少負文名受知先帝自超遷侍講以至躋階卿貳今上優
注尤深雖以公過少挫而嚮用之意不衰不僅以文學侍從責公

也故改官副憲公亦恪勤自矢思報國恩而年不臻下壽未究其用惜哉公五掌文衡釐正文體敦勸名行公明廉慎考察深得士心其佐中樞也蒐軍實慎考察克舉其職逮領臺端條上五城事宜疏糾司坊官不職者皆荷俞旨公之見於經濟者如此體素彊屏棄藥餌癸未長至前一日入朝驟中寒疾輿歸遂不起先世自海甯遷省垣曾祖諱起龍祖諱兆元考諱汪浙以名諸生貢成均需次博士生四子並有時名而公居長疊遇覃恩封三世階至光祿大夫兵部右侍郎公性孝友於根本之地講求最厚配梁夫人恭儉有禮宗黨稱之子二雲官兩淮河埭場大使雲璈舉人孫二斐襲曾孫二餽飭公詩筆速捷有集褒然卷繁未及刻

藏於家公生於康熙壬辰年正月初二日卒於乾隆癸未年十一月十七日年五十有二梁夫人後公一年生後公二十五年卒年七十有五子往時聞公任副憲有所彈劾中夜削橐會遽卒不得上公生平不爲鷹擊毛摯之行而遠於權勢風裁峻整獨不幸早沒無以大著其丰采此又誌公墓而恫乎有餘痛也乃爲銘曰
月蝕畢昴害於股肱鼎鉉乍折槐棘旋傾公年五十位躋貳卿起家科第 明良載賡屢持文柄克詰戎兵柏臺踐歷嶽嶽旣旣疏陳災振朝請夕行思除姦宄中夜屏營目光睽睽爛若辰星天不假年喪我國楨睽懷正直涕淚縱橫錢江滯滌湖水浚澄山紆屣履拱揖佳城墨食告吉雙棺以升左壺右甌玄宮永甯

右墓誌銘楮瑣撰

國朝墓誌銘楮瑣撰
卷之八 下 墓誌四十一種錄

三

國朝耆獻類徵初編卷八十一目錄

卿貳四十一

雷保住

金德瑛

秦蕙田

彭樹葵

曹秀先子師曾

鍾音

仲永檀

鄧時敏

卷之二十一

國朝耆獻類徵初編卷八十一

通奉大夫前署江西巡撫江西布政使司布政使湘陰李桓輯
卿貳四十一

畱保住

畱保住烏齊忒氏蒙古正白旗人乾隆元年由官學生考取筆帖式五年補理藩院筆帖式十九年升主事二十三年五月偕御前侍衛敦察帶領索倫官兵赴巴里坤沿途搜捕瑪哈沁尋升員外郎二十四年九月參贊大臣富德等以畱保住屢經戰陣盡心辦事入奏 賞戴花翎並 敕部議敘仍令約束降回二十七年四月授正黃旗漢軍副都統 命往西甯辦事六月因平定準噶爾

回部有功 賞給雲騎尉世職二十八年七月奏言青海西甯地方西南界連川藏沿邊與內地合州沙州接壤凡民人唐古忒交涉命盜及玉舒番子扎薩克等支領俸餉承襲官職並徵收巴彥囊產等部落馬匹賦稅辦理藏使行糧等項非給印信恐致滋弊貽誤請頒給西甯辦事章京關防 諭曰前因西甯無事不必專駐大臣是以將副都統撤回止畱部院章京一員帶領筆帖式一員在彼辦理事務今因大臣撤回地方官員卽有濫行給票舞弊情事必須仍設大臣諸事方有裨益七十五賞給副都統銜帶領撤回原兵卽馳驛前往一切事件俱著照舊辦理九月扎薩克圖汗巴勒達爾呈控畱保住迎請哲布尊丹巴呼圖克圖之呼畢勒

罕途次妄自尊大欺陵伊等並向番子需索金兩皮張經軍機大臣詢無需索情事途次因巴勒達爾滋事曾向約束諭曰畱保住係特派前往照料之人巴勒達爾等卽有不曉事體之處祇當開示訓誡乃謂其汗公及扎薩克等不堪及伊等請見復不肯見此皆由畱保住糊塗所致著革去副都統在理藩院郎中上行走旋補郎中三十三年八月命往恰克圖辦事三十八年十一月回京四十年七月擢內閣蒙古侍讀學士十月賞給副都統銜駐藏辦事四十四年八月旋擢正黃旗蒙古副都統十一月署理藩院侍郎四十五年九月命在紫禁城騎馬十一月調鑲紅旗滿洲副都統四十六年五月命赴西甯駐紮辦事尋授理藩院

右侍郎四十七年二月 命大學士阿桂之子侍衛阿彌達馳往
西甯偕畱保住並章嘉呼圖克圖之弟吹卜呼圖克圖恭詣河源
致祭四十九年十一月 上以畱保住熟習藏務仍授駐藏大臣
五十年六月擢理藩院尙書五十一年閏四月兼鑲紅旗漢軍都
統五十三年三月因誤給班禪額爾德尼之父巴爾丹敦珠克頂
帶交部嚴議尋議降二級調用 上寬之五十四年調鑲白旗蒙
古都統嘉慶元年四月卒子薩爾那襲雲騎尉阿勒京阿五品廕
生

右 國史館本傳

金德瑛

金德瑛浙江仁和县人乾隆元年一甲一名進士授修撰五月命在南書房行走三年五月充福建鄉試正考官六年六月充日講起居注官旋充江南鄉試副考官十一月提督江西學政八年六月遷侍講七月疏請童生府試宜做生員科舉例文童每入學一名府取五十名武童每入學一名府取十名或逾數濫送聽學臣裁斥又凡各府學無租者聽府學之廩生貧士報名附縣學冊後酌量多寡分給部議從之十一月遷右庶子九年十一月諭曰金德瑛在江西學政任甚有操守取士公明著畱任十年二月疏言翰林爲儲才之地庶吉士務期學有根柢器量明達庶無

負教養可備將來任使是以每科命滿漢大臣二員教習庶吉士五六十員而內閣部院大臣政務殷繁但能總其大綱舊有分教之例以俸深翰林爲之俱由掌院分派時設時止今館選屆期乞令大學士掌院於翰詹中品學優贍資俸較深者揀選引見簡畀分教得旨俞允四月轉左庶子十三年二月擢侍讀學士三月遷少詹事十五年六月充福建鄉試正考官十月遷太常寺卿十六年十二月命致祭女媧氏等陵十七年二月疏言女媧氏陵前寢殿中塑女像侍嬪御詢之士人據爲求嗣之神實爲黷褻應毀舊像立木主下部議行四月提督山東學政十九年三月擢內閣學士二十一年二月遷禮部右侍郎六月充江西鄉試正考

官二十二年三月充會試副總裁二十三年二月提督順天學政
五月疏言生員三年歲考黜陟優劣攸關八旗中效力當差駐防
及丁憂者皆由學預詳或臨場患病亦必由學申明病痊日補考
立法綦嚴茲臣按試八旗查閱清冊見滿洲文生與考者二百四
十六名而無故不到者二百五十六名漢軍文生與考者一百七
十六名而無故不到者二百八名詢之教授茫無以應槩以患病
爲辭臣思患病之人豈轉多於與考之人皆由本生不自聲明教
官姑爲容隱臣見將無故不到人數分別滿洲蒙古漢軍八旗縷
晰名單咨各旗都統按名查覈請 敕限兩月內查明咨覆到臣
以便應去應留清晰造冊 詔如所請二十四年七月疏言向來
直隸鄉試對讀生不敷順天府添雇貧生因此四五等生員內或

老病跋涉資斧艱難先期押赴致有逃避不到者並私雇查出概革者似屬可矜擬酌爲變通除甘親身供役外如果老病四等發銀四兩五等八兩解交順天府官雇充用議行二十六年五月擢都察院左都御史九月奏言向例提審各官於朝房東西分行坐陳招冊於前刑部書吏二名南北侍立在北之吏先按一省名冊依次唱某囚係舊事某囚係新事稍徐曰某囚情實緩決可矜在南之吏續唱亦如之招冊繁多旬餘竣事日不下四十冊案幾盈千其閒情實可矜者無多餘皆入緩決而陳案十居八九其中改輕改重者多在新事而積年緩決之案罕有軒輊且一案之定由臬司而巡撫而三法司初獄已慎至九卿益加詳焉若經三審緩決猶

待後此勘定是何時乃成信讞耶請嗣後巡撫每年仍造全冊送刑部存案備考而刑部分九卿招冊惟以三次秋審爲斷則近事愈見精詳庶獄益昭矜慎 上是之十一月奏請恭讀 恩詔有致祭古帝王闕里及五嶽四瀆二條例用侍郎及三四品京堂至十七人之多然臣就其中思之尙有可酌兼者如嶽瀆一條祭長白山混同江者由廣甯陟醫巫閭之陞而不兼舉其禮蓋襲明制北及醫巫閭而止而 本朝發祥之地江山尊於嶽瀆禮官但議增祀弗加詳考耳祭浙江南鎮者由山東則泰山沂山東海之祀可兼祭衡山者路出河南則嵩山淮濟二瀆亦可兼但使典禮明備不在多員且可省車馬供億之繁部議 從之二十七年正月

卒於官

右 國史館本傳

休甯甌山金氏自元處士湄以來代有偉人以文章顯其先本程氏唐上柱國歙州都知兵馬使湮裔十六世至湄幼孤無依母蔣之女兒適金氏應元寶撫育之長妻以女湄之子曰佑曰仁以仁後應元長子卒無嗣佑復以季子干後金而干之同產曰兆曰任二支子姓繁衍迄今又十餘世仍金姓不忘本也公諱德瑛字汝白一字慕齋又號檜門曾王父曰章奇公字爾常任之九世孫於兆之九世曰聲正希先生爲兄弟行正希以文名世爾常見世衰亂獨棄書治生僑寓常州遂豪於財百餘年來近屬幾千人皆賴

以養生送死公故有富名以此其實分張歲息衣食粗足而已性好古下筆必力追作者工書法出入晉唐善鑒別金石摹本及古人手跡真贋日以此自娛願其留意世務所見聞輒入告不以非其職自諉 上因是賢之寢至大用乾隆元年由丙午順天鄉舉貢禮部 廷試讀卷大臣置公卷第六 上特拔第一授翰林院修撰自是連充福建江南考官公故寄籍吾浙江仁和其宗人皆在休甯故邑例應引避辭不許七年視學江西連擢侍讀右庶子滿三年 特旨獎畱十有二年遠 朝擢侍讀學士少詹事當是時海內文風甚盛盛極弊生競爲詭澀公自束髮操觚熟精理法於制義源流正變靡不洞徹所至人不能欺十五年遷太常卿十

七年代祀古陵於山西既蒞事有釐正祀典一疏其詞爲都下傳誦略曰伏見女媧氏寢宮中設婦人塑像鄉愚奉爲求嗣之神夫斷釐立石固聖人所不言和樂誅凶豈當陽爲女主推其命氏蓋如姬姜姚姒之倫遠在洪荒難求日角龍顏之肖宜毀舊設別造神牌瀆褻私祈槩從禁絕上善其議從之是年四月視學山東十九年遷內閣學士明年遷禮部侍郎其秋典江西鄉試先是丁卯歲自學政還朝值齊魯告饑上大發帑金賑救而鄒滕以南被災尤劇有司格於例限未敢以聞公入對言狀即日奉旨展期博濟至是自典試還道出徐州黃河故道向繞徐城東注是秋霖雨暴漲河決上游孫家集奪溜微山與運河通兗州金鄉

魚臺諸縣漫爲巨浸而徐州故道以涸公挾土人策杖登雲龍山
周諮水性地勢得其所以去所以就所以壅所以潰所以消長悉
陳 上前卽日 特遣大臣往勘如其言用大興工築水患以平
自雍正初中嚴學臣貪穢之禁繩以重典 上謹持成憲用法益
果京員出使者類皆廉能自守然或以清素故節齎過當至幕下
賓友寥落所經佳山水多不挂眼其於地方利病益無所關人亦
不責而公恤恤然體國愛人之心形於不自己如此二十有六年
由直隸學政擢今官所條具臺省便宜悉稱 旨其冬寒甚以奉
命巡視通倉得疾越歲而病竟不起年六十有二公家累世孝
友父默齋先生碩論卒後伯兄德鉉繼歿持家惟叔父詢蘭舉一

人丙辰 覃恩特疏陳情何以本身應得貤封得 旨報可辛酉
冬銜 命渡江復請假歸拜封君里門畱十餘日於是遂奠淚先
塋張筵老屋並召同社父老會飲極歡時公意以春秋方富似此
天倫之樂當不止一再見於卽事畱別諸篇而二十年來往來南
北竟未暇續舉蘭皋已先公六年下世矣蓋人生會合時少其在
宦途又加少閒一有之多自謂草草未滿意庸詎知未滿意之境
卽其至少而不可再得者耶嗚呼是可慨矣爾常公之子曰敦頤
自爾常而下皆以公貴 誥贈光祿大夫如公官配皆一品夫人
公元配汪氏生七子曰忠湜早卒忠澤見任國子監主簿候補員
外郎忠潔丁卯舉人忠濟甲戌進士見任知河南遂平縣事忠清

國學生忠沂忠泉皆幼孫二人忠濟子後忠湜者曰孝本承重二
十七年八月孝本等扶柩南歸將奉汪夫人殯合窆而求誌其墓
崙於公之交可以終年不見而不能一日不思不自知其所以然
也今已矣銘曰

柱國之裔育金而昌富貴有時盡而不朽者文章官稱其人以道
途老雖以是老亦以是得仰取俯拾遐搜幽討方其陟匡廬過玉
峽適康王谷坐臥於雪瀑雲松屏輿臺而侶樵牧見者忘其貴人
又先後度霞嶺俯劍津循道山之麓步炎海之濱縱觀鷗波買船
之衝薄而欲遺其形神既乃維舟歷下梯閣登州恍彈子之旋渦
駭大蜃之危樓弔坡公之遺蹟爲長吟以消憂若其閒歲入朝

頻邀扈 蹕吉林一至木蘭三出每倚馬而賡詩動 皇情之歎
息復採風輦下闕山前後擊壤吹葦或童或叟又何有於文普香
臺荆高渡口倚茲山川之助增長骨氣疏瀹性靈日作千字平原
永興鬱發揮於篇什則韓子與杜陵嗟乎檜門吾不知後人之議
論奚似而其不可磨滅者藁草具存吾又不自意先生生天而後
死得爲公書石荒原念平生之約誓聊以妥其幽魂

右墓誌銘陳兆崙撰

公諱德瑛字汝白號慕齋年五十後愛咏陸魯望老檜成雙便作
門句因更號檜門系出唐上柱國歙州都知兵馬使程滂之裔世
居休甯汉口數傳至宋璟公未仕兄泌紹興進士官至端明殿學

士贈少師號洛水遺民再世爲若顏公己丑進士仁和丞再傳至
湄公爲元處士幼孤寡無所依初甌山金公諱應元者配蔣氏湄
之母女兄也至是攜公育於金氏比長以女妻之分其財因改姓
金氏遂爲甌山始祖生二子佑仁以仁繼應元公長子隸河南軍
籍佑生三子兆任千千公復隸河南籍兆公爲東房支祖凡九世
生聲字正希居嘉魚任公爲西房支祖嗣裔繁衍凡九傳生章奇
字爾常與正希屬在兄弟是爲總憲公會祖考配吳繼配王生敦
順字子成吳出也媳汪卒繼娶亦汪氏生二子長聖緒公諱碩論
候補主事公考也妣汪夫人次詢官鑲紅旗官學教習先是爾常
子成兩世皆以聖緒公貴追 贈中憲大夫妣皆淑人旣而聖緒

國朝名臣傳卷之八十一

九

公以公貴 贈承德郎翰林院修撰妣 贈安人自曾祖而下凡
三代一 贈通奉大夫太常寺卿再 贈光祿大夫都察院左都
御史妣 贈夫人再 贈一品夫人悉如公官公兄弟二人長德
鎔字韻文以仁和嵯籍補博士弟子員貢成均公其次也公八齡
失怙叔詢攜寓常州受業於金壇王樹明年又失恃歸甌山終喪
再至毘陵從學於秦宮璧公生有宿慧警悟過人康熙甲午年十
四應仁和童子試受知於學使汪滢補弟子員越三載復從王步
青學九載中自離經辨志至知類通達始終於常州淵源蓋有所
自來己亥遊嘉興配汪夫人來歸辛丑之夏公攜家寄居外家錢
舟園閉關下帷刻苦過寒暑是年生長子忠湜壬寅生忠澤雍正

甲辰應浙江鄉試主司爲江右閣學李公鳳翥搜遺卷得公文激賞甚爲同考某力格被抑李公恚甚榜旣發乃按名冊令學博招公往見厚期之公至是六脫解矣感述知遇垂老猶憮然是年生忠潔明年九月入京丙午生忠濟秋以國子生應順天鄉試舉第七座主爲常熟蔣文肅副都御史寶應劉公藻房師爲編修習公寯暨御史陶公正中丁未停浙人會試公南歸仍居鐵舟園范湖草堂爲姪授經汪夫人體弱善病戊申爲公置側室馬氏明年二月公祖妣汪諤母胡相繼卒公四五齡時祖母屢言孫他日必大貴第刑剋太重聞者叩之不應若有前知者庚戌會試蔣文肅主禮閣同考以公及周霽文並薦文肅俱賞之遂藏闈以定去取公

竟被放癸丑再下第四月生忠淳六月汪夫人卒於嘉興時年三十有一時陳公兆崙張公映斗皆以名翰林迴翔禁省文望蔚然與公爲膠漆友文字之飲無虛日各以馳逐聲華爲戒乙卯夏兄韻文公卒是年祖坐產芝數十本宰木鵲巢中育雙雛皆白羽鄉人以爲瑞十月乃授中書明年爲乾隆元年會試座主爲長白鄂文端高安朱文端少宰邵公基少司空張公廷瑑房師爲員外郎劉公芳藹暨館卿汪公由敦 廷對糊名後 敕大臣十四人充讀卷官貴州王公士晉新以河東總督入佐中樞得公卷極稱賞僉以文非駢麗有違定體欲乙之王性剛直恚甚變色起爭乃置第六進御 上拔置第一傳臚時王於班聯中遙見公狀貌喜告

同列曰吾前夕夢文昌攜一短髯道士來屬予曰付汝付汝覺甚
疑之此君酷肖何也授職後奉 特旨入直南書房先是奉 詔開
鴻詞科太僕蔣公漣列公薦剡及第後遂免試釋褐日李公鳳翥
官祭酒執手稱快及丁丑公主禮闈李公孫瑞麟成進士公心乃
慰元年 恩科順天鄉試公卽充同考官丁巳扈從 泰陵戊午
京察列一等典福建鄉試庚申充大清一統志及授時通考館纂
修辛酉京察再列一等充日講起居注官貳閣學李公紱典江南
試公以本籍徽州疏辭之不許此科得人最盛二十年元魁鼎甲
相繼而起十二月視學江右請假由新安省基於抵任後整飭學
政振興文體培養士氣扶持風教革剔規弊以次施行凡有陳奏

皆蒙 俞旨西江文章節義爲古來名都山高水深士之歛奇磊
砢者負氣矜奇發爲文字未能一於純粹公律以清真雅正凡學
有本源言有根柢者皆拔而獎勵之童子中十齡上下能背誦九
經三傳者每節取入學於是士林發奮經史講求古學不復更從
世俗庸師僅守空疏帖括作僥倖弋獲之想公又取俗書破體譌
字刊布頒行一洗陋習擇文之可以羽翼經傳闡發理道者鐫刻
試牘立爲程式士風丕變蓋數十年之所僅見者也尤加意孤寒
之士其穎異者或引爲學子從遊讀書嘗舉謝朓之言曰士子聲
名未立當共成獎借莫惜齒牙餘論此語誠厚爲國樹人者當三
復焉癸亥擢侍講升右庶子條奏歲科事例一甄別恩歲貢生分

析年分請照舉人截取之例以疏廣文選法一童生入泮請早提
府縣試卷於覆試前預先對勘以杜槍冒一生員科考嚴別錄遺
酌定取額以養廉恥以肅科舉一捐納貢監錄科宜行聯卷之法
以杜代倩請於州縣起文赴省之時試文一篇以便學臣磨對一
請將頒刻 御纂經書令藩司多爲刷印轉發各府於學臣按臨
之日勸諭新進之生各占本經性理照官價交提調購買還項實
屬至便等件奉 旨議行著爲令甲子冬直省學臣報滿公奉
旨畱江西學政任三年乙丑轉左庶子條奏請照舊例派教習庶
吉士官得 俞旨行之西江水驛故紆廓吉臨章貢閒使槎轉徙
無虛日公與士子薰陶教育涵養日益深山川名勝流連觴詠日

益久雙旌所至人士輒依依愛敬之公亦忘其爲使客也其天懷曠逸固如此丁卯司寇錢公陳羣典江西鄉試榜發日中丞以下咸慶得人一時知名之士入彀者十九錢公戲謂公曰微公六載培養焉得如許佳士苟老眼生花何以爲公解嘲公亦歎服前輩巨眼詩歌酬答相與讓美者再三爲一時傳頌官滿還京師上將東巡山左連歲歉收屢加賑恤發公帑至數十百萬鄒滕二邑以南地方偏僻歉收尤甚雖亦經察辦而給發稍遲情形較迫公道經其地於 召對時據實指陳 上許其不欺戊辰遷侍讀學士再遷少詹充殿試讀卷官己巳生忠沂旋扈 駕木蘭庚午扈 駕五臺秋典閩試十月奉 旨稽察右翼宗學一日入對便殿

上曰汝元年狀元尙作四品官耶公感 眷問再頓首謝數日擢
 太常卿辛未秋扈 駕木蘭再扈 東陵明年正月奉 命祭告
 山西歷代帝王陵寢使還疏奏爲釐正祀典事約略謂臣見女媧
 氏陵前寢宮中塑女像旁侍嬪御鄉愚奉爲求嗣之神等諸淫祀
 竊思斷釐鍊石雖聖人所不言和樂誅凶豈當陽爲女主推其命
 氏蓋如姚姒姬姜之倫遠在洪荒難求日角龍顏之肖理宜毀去
 舊像設立牌位黷褻私祈槩行禁絕仰符 聖主尊崇古聖之心
 永飭守臣蠲潔烝嘗之典事下禮部議 從之四月視學山左整
 頓設施之方鼓勵獎勸之道與在江右時小有變通蓋因地制宜
 歸諸實政而已明年癸酉爲直省選拔之歲公甄選得士若干人

貢成均年來取科第者過半滕邑張昌九歲能爲孳窠書時兗州
太守桐城姚公奇愛之字以女旣而解組去阻絕十餘載公旣選
拔昌廉知姚公子宦黔中乃曲成其婚海陽鞠湖齡鞠慎有才名
公舉其優行復俸其行李使入監讀書齊魯之區富於山水公按
部所經必窮探勝跡載賓客飲酒賦詩徜徉林麓蓬萊勞山之閒
猶繾綣不能去濟南名泉俯拾皆是學使署臨大明湖虛白千頃
倒衍鵲華諸峯葭蒲菡蓹漁歌菱唱宛如江鄉公月夜泛小舟攜
詩人酒客演漾歷亭芳嶼閒自謂不減羽衣黃樓吹笛時也時楊
公應琚撫東省與公友善楊豁達淹雅爲政有體能知人每造公
清談茗椀相對無一冠蓋語十月忠泉生是年武鄉試外場事竣

中丞以河決往勘特奏屬學臣入內簾總裁榜發還京師甲戌三月升內閣學士兼禮部侍郎七月扈蹕吉林公幼孤爲叔詢撫育丁巳 覃恩疏請將本身妻室封典貤封 制曰可至是復遵例請晉封詢如其官乙亥九月扈蹕木蘭丙子二月擢禮部右侍郎秋典江西鄉試榜後來謁者半屬舊時門下士至此復受知公加慰焉歸途過徐州時微山湖水暴漲與運河相通山東兗州等屬多有水患公念切民生徒步登雲龍山召土人諮問水勢情形講求漫溢之故自辰歷申洞悉之還 朝入奏 上前口陳指畫大約謂黃河故道本繞徐城下東注見今徐城河流微細聞係上流孫家集大溜往北決去以至微山等湖清水爲黃流攔截所

以湖水壅上與運道交流等語 上嘉予於是特命重臣勘理覆奏如前 上見軍機大臣曰金德瑛誠實不欺然河臣以是得罪去公每引爲歎丁丑主禮闈殿試充提調官九月奉 詔往熱河陪宴十月以議湖南藩司楊灝罪失當降二級蒙 恩畱任明年二月督學順天等處轉左侍郎公以畿輔之地培植士林厥任尤艱鉅寬嚴揚激之間益加詳慎己卯畱學政任辛巳五月擢左都御史於是還京師陛謝 上爲之霽顏九月公疏請酌定秋審章程以歸實效大約謂凡已經秋審者謂之舊事見入秋審者謂之新事當九卿詹事科道會議時或有改易輕重多在新事而積年緩決之案由臬司而巡撫而三法司初獄已致慎矣況經三審緩

決久成信讞九卿雖有易人獄詞終不可變其偷生囹圄者所幸
十年慶典庶沐 恩綸重瞻 天日然亦裁自 聖心眾卿弗與
焉然則舊事招冊繁多實可於秋審時裁省吏胥宜唱一過之例
陳案既省近事更得盡心詳審雖從容往復商酌不虞淹滯不啻
一日之中展二三時之限而九卿兼有餘晷治其本署公事其爲
利便亦匪一端疏上奉 硃批所奏是大學士會同該部議奏卒
從之十二月遇 覃恩得一品告身封四世十二月初奉 命
從王大臣稽查通州倉儲是冬嚴寒逾常歲倉廩聽事故無扉扇
諸王大臣於風雪中危坐聽委吏唱籌者連日衣裘積素瑩然若
鋪練冷氣透肌體公素羸弱不能支柱乃病還邸第翌日尙力疾

趨直南齋至日漸委頓不得已請假調治歲底上每見廷臣數
問公病狀至云渠辛巳生長朕十歲真殊眷也辛巳元旦三日
病勢轉劇日益沈頓公少年稟賦本壯及第後入直內廷飲食失
調遂嬰噎證二十餘年成痼疾官江右時瀕於危者數次泊奉使
山三得醫藥漸安公神明清澈於世俗聲色之娛一無嗜好且飲
啜淡泊杯羹豆肉過午不食至是益爲減損故雖癰瘡日形氣力
微薄而目光奕奕心神清明友朋存問者每爲關問他事至家庭
瑣屑不及一語唯三復坡詩云我是香山老居士世緣終淺道根
深十一日公披裘危坐顧左右曰今日立春爲聖駕啟鑿之期
自雖病憊不能恭送乃令具筆札口授遺奏訖遂垂目而瞑上

啟蹕時猶顧問廷臣曰金德瑛久不入直病必沈重而公已逝矣
公子七人忠湜忠澤忠潔忠濟忠澗忠沂忠泉公秉至性痛念二
親遇諱日及己誕辰必素服齋居愀然終日至六旬初度猶不令
舉壽觴配汪夫人卽世公年纔三十三神傷燕處旣貴後不更置
姬侍尤樂閒靜取適絲竹戲玩之具皆屏謝星輶冰署了無長物
几席閒丹黃圖史而外一茗鑪棋局而已讀書作字至老不倦平
生手批經史朱墨圍乙旁行夾注者幾千卷歲時令節無笙歌宴
飲小窗一燈雜誦琅琅然閒有以考訂相質者爲指摘諸書不失
行幅同官奉 敕修西清古鑑其閒鼎彝尊卣各銅器公援據經
史百家文集訂正爲多在山左購求漢唐以下碑版石刻充露庫

考究精覈題跋高簡識者謂博奧古質不減金石集古兩錄至臨摹法帖日程月課歲麻積累幾於等身嘗笑謂賓友曰束縛敗紙聊示子孫俾知老翁用功有恆學書不必果佳較賢博奕遺日耳公未第時於帖括文最爲攻苦有明以來各家派別舉之如觀指紋故掌文衡者垂三十年所得皆根柢之士不爲剽襲者所溷唯於古文不多作閒出一二篇皆有法度深於此道者轉加推許年四十餘始肆力於詩博觀約取冥搜妙悟久之心有所得離脫窠臼寓目卽書理解天機直抒胸臆嘗戲謂二三素心曰使韓杜蘇黃復生吾當在弟子之列外人不足語此也著檜門詩疑若干卷然虛懷求益爲刪定者再三間爲門人說詩則曰文詞之要古人

所以不朽者只一切字切則日新而不窮否將牽附粉飾外彊中
乾貌腴神悴苟知切之爲用則變化卷舒象外箇中開闢無盡第
各就學識才分成其小大若浮夸以侈規模狹隘以詡矜貴是皆
虛車也其好學深思類如此兄子涓宰吉水忠濟宰遂平兩地官
方公尤塵念每作家諭輒舉愛人爲政之道丁甯誠勉又取古今
循吏設施長民之可法倣者彙書卷冊寄資經濟嘗曰公餘當多
讀書古人治譜具見載籍誠能規倣而變通之自異俗吏所爲矣
丙寅公捐俸置祠田至是病中曰吾歐山宗祠爲正希公所建後
燬於火列祖木主皆栖妥別室明年當新之王申與汪公由敦倡
建休甯會館於京師鄉人咸有栖處有客死者卽謀歸殯之計清

俸所餘隨事分惠以彰 君賜家人生產未曾介意公侍禁近二十六年遇令節拜 賜珍物不可勝紀而圍場雉鹿每登 君射尙方珍膳則日飫之公立身端平無有偏黨於時賢流品胥中涇涓分明未嘗一加臧否嘗謂士君子讀書養氣當於聖賢得力處體認真切則修身立朝方有把握不爲寵辱利害所移至勳名事業殆有天數小用大用皆貴有以自見若容容富貴中心無所主儻境遇紛乘必將潰裂不學無術之害非同淺鮮人貴自勉不必以是責天下士也公性簡直與人交坦率無匿情意有所樂則掀緝旁薄談諧疊疊或當不快時雖極投契者亦周旋簡略無所阿忍然爲友朋忠告傾吐盡情冀相資益人有過輒面折不少容功

名之會又恬然聽之無所絳競以是爲人所諒罔相覈責蓋不欺物而率天真也又如此公寡交遊不喜與俗人居退食之餘門庭清肅二三門人嫻戚外欣然倒屣者寥寥焉公生康熙辛巳九月初二日歿於乾隆二十七年正月十一日歷壽六十有二配汪氏誥贈一品夫人公子忠湜早卒忠澤員外郎忠潔禮部主事忠濟知縣忠溇忠沂忠泉皆太學生女三人葬休甯某邱謹狀

右行狀蔣士銓撰

總憲酷嗜涪翁故論詩以清新刻削酸寒瘦澀爲能於同鄉最愛錢君坤一督學江西識拔蔣君心餘於諸生中而汪子康古其戚也甲戌余入京師總憲時時招同遊宴於一經齋清談終日率以

國朝書目卷八十一
為常及余南歸又以書薦於前山東吳運使凌雲其愛才推轂皆
此類也總憲歿四十餘年而杭城士大夫請祀鄉賢時余主講敷
文因送其栗主奉於學宮歸而重復其詩為之淒黯

右蒲褐山房詩話王昶撰

汝白為太僕卿常熟蔣公所薦未及試丙辰以第一人及第授修
撰入直南書房是舉有兩狀元金壇于振鶴泉及汝白也汝白讀
書精細通鑑點勘皆徧五言清微朗潤希風錢劉

右詞科掌錄杭世駿撰

秦蕙田

秦蕙田江蘇金匱人乾隆元年一甲三名進士授編修 命南書
房行走六年充順天武鄉試副考官七年 命上書房行走八年
閏四月遷侍講六月遷右庶子八月遷右通政十一月擢內閣學
士十年遷禮部右侍郎十二年五月丁本生父憂十三年四月奉
旨秦蕙田服制將滿著仍以禮部侍郎起用十五年調刑部侍
郎十九年充經筵講官二十二年正月擢工部尚書四月署刑部
尚書七月疏言工部爲工程總彙辦法難易不同委辦司員每意
存趨避請照刑部見審案件掣籤均派之例將應派各員設名簿
以工程大小分別等次一百兩以上滿郎中員外籤掣三十兩以

下筆帖式籤掣仍註簿堂官畱心體察功過示懲勸得 旨允行
二十三年正月調刑部尙書仍兼管工部事尋加太子太保四月
疏請將各省流勾遞籍編甲收管以清逃盜之源 諭曰秦蕙田
所奏甚是實爲清獄訟息事端之良法但此輩輾轉流移城市村
落所在多有必一一拘查押送責成原籍保甲人等收管事理頗
屬繁瑣不若就所在地方設法查禁嗣後地方官遇流勾在境務
須督率保甲人等畱心訪察遇強橫不法者嚴拏懲治庶於聽其
營食之中卽寓禁其滋事之意十月疏言向例各部院赴閣傳鈔
事件係當月司員專責而月止滿員一人遇漢字事件假手鈔寫
每致草率遺漏請增派漢司員一人下部議行二十四年御史觀

成挾嫌誣奏民人張九違禁躡麪一案蕙田擬罪失當部議革職
奉旨寬免二十五年充會試正考官二十八年充會試正考官
二十九年四月以病請解任 諭曰秦蕙田不必解任題奏事件
照常辦尋常咨行事暫且不必畫彙俾得從容調攝八月復請解
任回籍 諭曰秦蕙田以見在病尙未痊奏請開缺給假回籍就
醫著照所請准其給假南旋既可乘便就醫而江鄉水土於伊調
攝自必相宜可以日漸就痊刑部尙書不必開缺其事務著劉綸
兼署九月卒於途遺疏入 諭曰秦蕙田奉職西曹恪勤素著前
以患病告假准其回籍就醫尙冀痊可茲聞在途溘逝深爲軫惻
應得卹典已飭部查例具奏著再加恩賞給銀一千兩經理喪事

國朝老成傳卷六十一
以示優卹尋 賜祭葬如例諡文恭三十年 聖駕南巡幸寄暢
園 上憶及蕙田 御製詩有養疴旋里人何在撫景愀然是此
閒之句

右 國史館本傳

太子太保尙書秦公以經術篤行知名海內起家詞苑官登極品
歲甲申四月以疾請解任 溫旨不許八月復具疏乞回籍調治
詔允所請仍懸缺以待公既受 命買舟南下疾遂革以九月
九日巳時薨於滄州訃聞 天子軫惻 賜白金千兩庀喪具令
有司議卹典祭葬如制諡曰文恭明年春 車駕南巡至無錫
幸寄暢園 御製詩有養疴旋里人何在撫景愀然是此閒之句

寄暢園者公家別業也 上追念舊臣形於翰墨如此公可以不
朽矣其九月孤子編修泰鈞等將葬公於某原先期遣一介走京
師述公遺言請大昕爲文誌其墓大昕於公爲年家子又嘗主公
邸第日月不居知己云逝文雖不工其何敢辭謹按公諱蕙田字
樹峰號味經宋贈龍圖閣直學士觀之二十六世孫世居無錫爲
右族雍正初析無錫置金匱縣故公爲金匱人曾祖考德澄祖考
松齡順治乙未進士日講官起居注左春坊左諭德考易然常州
府學生妣顧氏本生考道然康熙己丑進士日講官起居注翰林
院編修改禮科給事中妣徐氏胡氏生母浦氏三世皆以公貴
贈光祿大夫刑部尙書妣皆一品夫人公以乾隆元年 賜進士

第三人及第授翰林院編修入直南書房丁浦太夫人憂服闋
補原官教讀上書房遷侍講進右春坊右庶子改通政使司右
通政擢內閣學士遷禮部右侍郎丁給諫公憂服闋補禮部左侍
郎調刑部右侍郎轉左侍郎兼理國子監算學充經筵講官擢工
部尙書兼理樂部調刑部尙書加太子太保案階至光祿大夫公
至性過人方未遇時給諫公以藩邸事牽連頌繫十餘年閒檻車
南北炎雨悲風吏卒雜前公隨侍膝下百方營護夜分就寢流涕
交頤然不令給諫公知之及通籍之始朝廷赦書屢下給諫公
猶不得援例寬釋公以新進詞臣輒伏闕陳情乞以身贖其略
云臣本生父某身罹重罪已荷天恩曲宥祇因催追銀兩力不

能完仍行圜禁迄今九載年已八十衰朽不堪本年五六月內侵染暑溼瘡瘍時作寒熱交攻奄奄一息幾至痠楚羈所情關骨肉痛楚難忍臣雖備員禁近而還顧臣父老病拘幽既無完解之期更無久存之望方寸昏迷不能自主誠不忍昧心竊祿內慚名教伏惟 皇上矜愍庶獄有一綫可原者槩予寬釋當此 聖明孝治之朝更逢薄海祝網之日惟有籲懇 鴻慈格外鑒宥勾臣父八旬垂死之年得以終老牖下臣願革去職銜效力奔走以贖父罪奏入 天語嘉歎遂有寬釋之 詔而未完之銀亦並豁免由是給諫公優游林下者又十年公受 詔感泣誓以身許國而上亦鑒公忠孝有大用公之志矣公在學士時陳科舉學校六事

在禮部練習掌故夙夜匪懈在刑部執法平允尤爲上所倚重
同僚或持異議公援引律例必如所擬乃已遇司屬譏笑不苟其
以才能見者則薦引之不遺餘力眾莫不憚其嚴而服其公也公
歿之後部中讞獄偶不當上輒舉公名歎惜不置以是知公之
盡心於職矣公立朝三十年治事以勤奉上以敬剛介自守不
曲意徇物公退則杜門謝賓客著書不異爲諸生時後進有通經
嗜古者獎借不去口蓋天性然也公幼而穎悟及長從給諫公於
京邸何屺瞻王若林徐壇長諸先生咸折輩行與之交中歲居里
門與蔡宸錫吳大年尊彝繩中爲讀經之會嘗慨禮經名物制
度諸儒詮解互異鮮能會通其說故於郊社宗廟宮室衣服之類

尤究心焉。上御極之初，江陰楊文定公領國子監事，薦公篤志經術，可佐教成。均既而直內廷課。皇子講讀，益以經術爲後學宗。嘗言：儒者舍經以談道，非道也；離經以求學，非學也。故以窮經爲主，而不居講學之名。生平所爲文，號味經窩類彙者，凡若干卷，而說經之文居其大半。公夙精三禮之學，及佐秩宗，考古今禮制，因革以爲禮。自秦火而後，漢儒保殘守缺，什塵存一。朱子生於南宋，嘗有志編次朝廷公卿大夫士民禮爲當代之典，而所撰儀禮經傳通解體例未備，喪祭禮又續自黃氏、楊氏，未克竟。朱子之志，迺按周官吉凶軍賓嘉之目，撰爲五禮通考二百六十二卷。先經後史，各以類別。凡先儒所聚訟者，一一疏其脈絡，破其癥結。上

探古人制作之原下不違當代之法殫思二十餘年彙易三四而後定自言生平精力盡於是焉少喜談易謂易者象也先儒詳於言理略於言象故撰周易象義日箋若干卷又謂詩三百篇古人皆被之管絃漢魏以降始失其傳然天籟之發今猶古也因與同志講求欲以今曲歌古詩庶協詩樂合一之旨又以近代聲韻之書未有善本奏請刊正 上命公與武進劉公任其事公建議言古韻二百六部今併爲一百七韻如元與魂痕當析爲二殷韻宜併入真韻不當入文韻上聲拯韻去聲證韻宜分出各自爲韻又考定四聲表兼采崑山顧氏婺源江氏之說欲通古音於等韻時公已邁疾而往復辨論猶斷斷不置也公之著述其大者如此若

夫律呂算數以及醫方堪輿星命家言皆泝流窮源得其要領雖
專門名家者亦歎以爲莫及嗚呼可謂有體有用者已公生於康
熙壬午十月十九日歿時年六十有三夫人侯氏太學生某之女
封一品夫人子四人長泰鈞乾隆甲戌進士翰林院編修次復
鈞殤次鼎鈞太學生次上鈞女二人長適雲南劍川州知州嵇承
豫孫男二人沐日沐恩孫女六人銘曰

西神我我二泉鄰造物鍾英生偉人雙孝之澤流十世啟佑祖考
清華繼惟公至行爲士宗歷艱而亨純孝通明刑十載邦憲司三
刺三宥公無私斯人一去難再得同朝盡傷 至尊惜政事文學
一身兼歿而言立公何慚城西新阡卜云吉千秋識之字不滅

右墓誌銘錢大昕撰

秦蕙田字樹峰乾隆元年進士第三人累官太子太保刑部尙書
蕙田少承家學以經術篤行爲江陰楊名時所知父道然以藩邸
事久繫縣獄蕙田旣通籍伏闕陳情乞以身贖父罪道然竟得
釋領西曹最久遇事沈毅果斷退則閉戶著書所撰五禮通考凡
二百六十二卷故崑山徐尙書乾學未成之書歲久散佚譌脫蕙
田蒐輯補綴歷數十年始成而刻之旣卒謚文恭蕙田官翰林時
月進劄子原本經術迨侍郎嘗舉仁和孫灝自代世服其知人
學者稱味經先生味經蕙田號也

右傳秦瀛撰

金匱秦先生諱蕙田字樹峯進士官至刑部尙書撰五禮通考二百六十二卷因徐氏讀禮通考體例網羅眾說以成一書凡爲類七十有五以樂律附於吉禮宗廟制度之後以天文推步句股割國立觀象授時一題統之以古今州國都邑山川地名立體國經野一題統之並載入嘉禮雖事屬旁涉非五禮所應該不免有炫博之意然周代六官總名曰禮禮之用精麤條貫所該本博故朱子儀禮經傳通解於學禮載鐘律詩樂又欲取許氏說文解字序說及九章算經爲書數篇而未成則先生之依類纂附尙不爲無據其他考證經史原原本本具有經緯非剽竊餽飭挂一漏萬者可比較陳用之所作禮書有過之無不及矣

右學案唐鑑輯

文恭尊甫雒生先生頌繫日久文恭既入翰林卽請以官贖父罪蒙恩得釋故時與桐城方公宜田稱二孝蓋以宜田每於秋日省其父於塞外戍所故也生平覃心經術尤熟禮經爲五禮通考二百餘卷彙自來諸儒聚訟之說爲之疏通解駁又附以歷朝史志使後來者折衷損益可以坐言而起行其有功於經義良不尠也文恭博學多聞窮經之外凡河渠律厯下至醫方術數靡不通斷故梁文莊公云樹峯如鷹隼橫空飛而食肉又口若懸河辨才無礙其爲同曹畏服如此

右湖海詩傳張維屏錄

殿試卷例以前十本進呈惟乾隆庚辰年秦尙書蕙田等以十本
外尙有佳卷 特旨許以十二本進呈是科十四名以前並入翰
林按同治以來二甲二十名
前均入翰林幾同成例 至乙卯年 恩科大學士伯和珅讀
卷以無佳卷止取八本呈 御覽見北江詩話卽此一端文恭與
和相其心術之廣狹瞭然矣

右紀聞陳康祺撰

彭樹葵

彭樹葵河南夏邑人乾隆元年進士改庶吉士二年散館授編修五年擢侍讀充日講起居注官六年遷侍讀學士尋調通政使司右通政遷太僕寺卿七年升宗人府府丞八年遷都察院左副都御史九年正月擢倉場侍郎十月 上幸翰林院 賜羣臣宴賦柏梁體詩樹葵與焉十二月署湖北巡撫十三年四月署倉場總督戶部侍郎雅爾圖疏劾樹葵前在倉場衙門任聽廳員收受陋規又承辦 御舟不能實力稽察軍機大臣議革職 上加恩改爲畱任七月奏州縣額徵錢糧如甲年徵解者例應乙年奏銷而乙年錢糧又應於是年二月開徵向來奏銷時祇將甲年完欠數

目載入盤查結內至乙年已徵錢糧並不具結州縣官遇有拖欠
往往那新掩舊以致虧空日多請嗣後令該管上司將見年已徵
錢糧一併盤查儻有侵蝕卽行揭參至知府有應徵之項責成盤查
之道員一體遵辦下部議行閏七月實授以 孝賢純皇后國制
隨同總督塞楞額於百日內薙髮 賜塞楞額自盡樹葵革職畱
任罰修直隸城工十一月疏言荆襄一帶江湖多沙易淤小民趨
利者因於岸腳湖心多方截流以成淤隨借水糧魚課四圍築隄
以成垸人與水爭地爲利以致水與人爭地爲殃見飭各州縣親
行履勘將所有見垸若干造冊存案嗣後不許私自加增仍令該
管道員於出巡之便詳查加結具報報 聞又請將常平倉穀分

別府廳州縣衛酌派勻貯其舊存穀石不敷派貯之額令逾額之
州縣將本年平糶價銀酌撥秋成買補足數下部議行十四年復
授倉場侍郎二十二年調禮部左侍郎二十三年湖廣總督碩色
疏參知府李泌知縣馬汝明等加徵私派樹葵前任湖北巡撫失
於覺察部議降三級調用上以樹葵原有革職畱任之案部議
疏漏樹葵亦未陳明 命革任二十五年 上五旬萬壽樹葵來
京祝嘏 賞三品頂帶三十年 上南巡樹葵迎 鑿以親老
奏陳 賜椿庭萊舞扁額四十年卒子冠翰林院侍讀學士

右 國史館本傳

曹秀先 子師曾

曹秀先江西新建人乾隆元年進士改庶吉士散館授編修時恭修世宗憲皇帝實錄秀先充纂修官兼經史館校勘六年丁父憂九年服闋補原官充山東鄉試副考官十年遷浙江道監察御史尋請假回籍十七年仍補原官八月秀先胞姪舉人曹詠祖與監試御史蔡田交通關節事發時田詠祖俱正法部議曹秀先應革職諭曰曹秀先與曹詠祖交通關節之事經王大臣等審明並不知情且搜獲時卽認係伊姪筆跡據實舉出尙無大咎但伊姪在京夤緣作弊不能約束教訓失察之罪實所應得曹秀先加恩免其革職著降二級畱任十八年近畿蝗生秀先疏請御製

祭文頒發有蝗郡縣敬謹謄黃祭告乃稽古典舉蜡祭文州縣雇募捕蝗錢糧令同城教職佐雜會同給發並嚴飭不得假手吏胥致滋混冒 諭曰曹秀先請頒發祭文所見甚爲迂謬蝗蝻害稼惟當實力撲捕此人事所可盡至於祈神保賽禮亦宜之若欲假文詞以期感格如唐韓愈祭鱷魚其鱷魚之遠徙與否究亦無稽未必非好事者流附會其說朕非有泰山北斗之文筆似此好名無實之舉深所弗取所請不必行餘著議奏尋議蜡祭不必行餘如所請十九年轉刑科給事中二十一年丁母憂二十五年服闋補吏科給事中巡視南城二十七年擢鴻臚寺少卿二十八年遷光祿寺少卿二十九年遷通政使參議三十年擢國子監祭酒充

浙江鄉試正考官尋視江蘇學政三十二年擢內閣學士三十三年遷工部右侍郎留學政任三十四年六月 命赴浙江會同巡撫永德審長興縣監生李公麟控庫書陳維商等私加火工飯食一案分別治罪如律十月充經筵講官三十五年調戶部右侍郎兼理工部右侍郎事尋調吏部右侍郎充江南鄉試正考官三十六年扈 駕東巡 遣祭尹吉甫墓請 御製詩表其墓 許之尋 命祭告東嶽及少昊金天氏諸陵暨闕里三十八年充四庫全書館副總裁三十九年進所輯山莊正雅集 御製詩賜之卽以爲序詩曰憶年十二始來斯 聖祖恩深最受 知豈意有堂肩仔已恆勤養 志色難思惟滋夕惕朝乾勵卻匪風吟月弄爲

哀輯事成慚正雅那更表語頌浮規八月充順天鄉試正考官十
二月晉禮部尚書四十二年上書房行走 賜紫禁城內騎馬四
十二年 命在上書房總師傅上行走四十三年以隨同尚書永
貴指名保題主事李激芳議革職 詔從寬畱任四十四年五月
扈 蹕熱河 召見奏請建承德府學並頒發書籍 允之四十
五年三月充會試正考官四月偕考官尚書德保等奏言會試向
例房官閱卷止迴避本省自戊戌科改分南北兩項尋以多寡不
均奏明通融辦理臣等伏思此例一行以一人迴避八九省闈中
臨時調劑既費周章且既顯示以迴避之門卽隱導以揣摩之漸
於防閑中亦有關係請仍舊例爲便臣秀先上年奉 命會議兩項

分卷當時實爲防弊起見今日擊卷數多寡不齊諸多周折不敢
迴護誤公下大學士九卿議行四十六年禮部恭擬壬寅年祀
祈穀壇日用次辛 諭曰所議甚多不當天子父 天母 地祇
承之義不可稍弛從前雍正七年恭奉 皇考世宗憲皇帝諭旨
以定例正月上辛若在初五日以前則改於次辛但元旦朝賀乃
朕躬之禮儀若因此而展祈穀之期於心實有未安著於上辛行
禮煌煌 聖訓實萬世不刊之論朕御極以來遇正月初三日以
前上辛因必須隔年齋戒是以改用次辛其有初四日上辛亦改
用次辛行禮者則因 聖母皇太后祝釐初祉朕於元辰恭率王
公大臣拜賀 東朝儀節不容稍闕至明歲正月上辛並非向年

可比矣該部何亦改次辛況冬至南郊禮成有於次日受賀者所謂禮緣義起而義以方外尤必敬以直內如為臣下意在尊君不敢輕易朝正令典亦當備查往例具奏請旨乃禮部遽行題達何昧昧一至於此所有禮部堂官著交部嚴加議處尋部議秀先應革職 命從寬畱任四十七年四月 常雩 天鐙及 更衣幄次陳設不備奉 旨嚴責下部議革任 加恩寬免仍註冊十月因纂輯明臣奏議體例乖舛下部嚴議尋 詔免十一月曹秀先諭師不勝總師傳之任著回原衙門辦事四十九年六月秀先卒 諭曰禮部尙書曹秀先由翰林洊擢正卿曾在 上書房行走教皇子書學問優長奉職勤慎茲聞溘逝殊為軫惜著加恩晉贈太子太傅其任內

降革罰俸處分俱予開復所有應得卹典仍著該部察例具奏尋
賜祭葬如例諡文恪

右 國史館本傳

乾隆四十九年七月朔禮部尙書新建曹公以疾卒於位遺疏入
上軫惜 晉贈太子太傅 諭祭葬 賜諡文恪明年夏其孤
師曾將奉喪歸葬於 賜塋以狀來請宅幽之銘瑞於公家三世
媼串六十年公聘瑞女爲叔子婦叔子早卒女守貞迨公病篤特
以禮迎女歸成其志故於其請不忍辭謹按狀公諱秀先字芝田
一字冰持又字恆所號地山宋兵部尙書曹文簡公彥約之裔也
由歙遷鄒之都昌十傳遷新建之蘆坑又三傳遷魯江曾祖諱建

治本生曾祖諱建節祖考諱家甲康熙丁丑進士知福建龍溪縣
事多惠政祀名宦祠考諱繩彬歲貢生候選訓導有至行學者稱
爲孝永先生三世皆以公貴 贈光祿大夫禮部尙書妣皆一品
夫人孝永先生子七人公其六也年十四補郡庠生由選拔副榜
貢生中式雍正壬子順天鄉試舉人官內閣中書 詔舉博學鴻
詞臨川李公紱以公名薦 今上乾隆元年丙辰成進士選庶吉
士散館授編修尋改浙江道監察御史轉吏科給事中歷鴻臚光
祿少卿通政參議國子祭酒擢內閣學士授工部右侍郎充經筵
講官調戶部右侍郎吏部左右侍郎晉禮部尙書入直 上書房
封光祿大夫公歷官最久爲政 大體不爲苛論天下望爲鉅

人長德長興縣民控吏私增糧耗奉 命鞠治如律無枉縱天目
諸山水道臨安瀘茗溪以達太湖漲溢敗田廬災餘杭沿嘉湖兩
郡公尋奏便宜卽 敕疆吏於茗南挑上下兩湖疏濬蓄洩浙西
類之熱河始置承德府公時扈 蹕請立廟學得 旨荆建 命
視成復請得 武英殿書九十二種存貯尊經閣公以儒臣起家屢
柄文衡典山東浙江江南順天鄉試各一文武會試各一其他考
校以十數得士甚盛有敷歷封疆爲國大臣者視學江蘇多拔孤
寒衰耄振興郡縣書院士林頌之瑞嘗繼公視學其間如此少受
母教妣胡太夫人嘗患疽公吮瘡痛止天曠和藥需露跪達旦露
盈器病立痊幼多疾病賴庶母龔攜持事如母學於伯兄茂先敬

之如嚴師其後並上疏乞封惠族黨惟恐弗及積俸數十年以
建家祠置義田立義學上嘉之賜秩宗衍澤祠額魯江田千
頃舊多旱澇患自公之祖以下築洪建牖資宣節公又置雷溪鄧
溪田開溝以引吳源續建牖於茶塘而患除生平篤師友著師席
淵源考一卷爲文章原本忠孝追蹤曾王方望溪先生屢稱之詩
品在蘇黃之間所著有賜書堂彙依光使星秋光等集敬思堂題
跋移晴堂四六若干卷書法尤高古人得片楮以爲寶求者不少
書碑版照耀海宇自刻石書課若干種公自爲翰林以文學邀
異數每國家大慶大典禮專譔述詩文賦頌以進輒蒙天
語褒獎年近六十始躋卿貳益勤慎上封事輒焚彙奏對退不以

述之子弟然同官或其以事里吏議得 旨獨寬免蓋 上之知
公深矣嘗語瑞曰自惟晚受 特達知報 恩恐臣力未能知
恩則夙夜弗敢忘遂顏其所居曰知恩堂公生於康熙四十七年
四月二十三日得年七十有七配劉夫人先公三年卒側室管氏
馬氏子師曾官兵部郎中得 封其母管氏爲恭人娶吳氏次祖
德次師程俱馬恭人出皆早卒師程卽聘瑞女者女六人宋荆寶
李秉禮張曾諧劉佳琦温之誠彭良軫其壻也銘曰
秀峰接天生靈芝毓靈匡廬昌龍溪幼耽典籍搜經竒一目七行
日生鸞帝令仙人手按治鴻文繡虎高名基 龍飛初元鳳來儀
聖心簡爲文宗師得人報國矢勿欺 文思文治隆古稀公掌

國朝書林卷之十一
三
邦禮承疇咨經天緯地文禱而在位有恪 恩心允允不少畱究
厥施家國一生無一私恕德廉儉可蔽之覆露厥裔孫謀詒既安
且吉藏於斯千秋汗簡徵銘詩

右墓誌銘彭元瑞撰

曹文恪公秀先第在米市胡同乾隆癸巳邀程文恭公景伊嵇文
恭公瓊吳恭定公紹詩總憲張公若淮大司寇崔公應階少司馬
蔣公元益倣耆英真率之會倡和極歡越四年戊戌易以蔡文恭
公新周文恭公煌總憲羅公源漢時有七人元旦五百歲之句朱
石君先生對以二老同年十九科蓋指蔡公也先是康熙戊子沈
心齋閣學涵約勞介巖僉憲之辨汪涵齋少司農晉徵孫樹峰少

督臣咨送臣衙門揭帖稱竊犯趙廣在大興縣采育地方竊銀十
四封由不識地方坍塌邊牆出口至建昌縣經差役盤獲員弁無
從覺察應免置議臣伏查古北口設立關隘所以嚴稽查慎出入
也卽有坍塌之處亦應派兵役巡查乃任匪徒攜賊偷越遽以無
從覺察率請免議殊非慎重邊防之道請 飭交該督詳查得
旨該管官不時嚴密巡查毋任疏懈其趙廣一犯是否由關口混
出亦著溫承惠查明具奏十五年升都察院左副都御史奏言每
科鄉會試正副考官及同考官御史竟有不到午門祇候在家得
信徑往貢院者殊非慎重敬事之道請添派御史稽查 命如所
請十六年奏言各衙門覈辦事件以例案爲憑近日往往將例文

疑似之條緣飾辦案與例意迥不相符一經辦理之後遂致互相踵述轉以爲見行之例反置定例於不言以致混淆舛錯百弊叢生又有舊例已改而陳案未經查銷牽連援照更增歧誤 諭曰部院衙門爲政事總匯之區慎守紀綱必以定例爲憑吏胥高下其手堂司意見參差總由於舍例言案蓋例有一定案多歧出也該副都御史所奏係爲釐除弊混起見著照所請交部院各堂官各率所屬將見行定例詳加查覈如有例所未備而案應遵照者卽檢明彙齊纂入則例其案與例不符者造冊註明事由將原彙卽行銷毀若有例案不符而彙件仍有關查覈者著另冊登記鈐印貯庫辦彙時不得再行援引該堂官等務督飭司員加意清釐

同矢公慎以杜弊源而歸畫一十七年奏請慎選賢能以重京察
諭曰京察爲考績鉅典舉劾悉稟公正方足澄清仕路各堂官
於保舉一等人員務當加意甄別擇才守兼優之員登諸薦牘不
得以尋常供職者濫保充數用副朕慎簡賢良之至意十九年升
內閣學士兼禮部侍郎銜二十一年遷兵部右侍郎兼署倉場侍
郎二十二年署刑部左侍郎二十三年奏家置祠學義田懇官爲
查覈 上允所請二十四年轉左侍郎二十五年三月以兵部遺
失行在印信 命摘去頂帶交部嚴加議處部議革職得 旨曹
師曾著加恩以四品京堂補用十二月補太常寺少卿道光二年
授通政司副使四月升太常寺卿十二月以呈進告祭 奉先殿

儀注並未詳稽舊例又不聲明請旨妄將元年告祭作爲比照
輕率錯謬降四品頂帶罰俸二年仍畱原衙門之任三年正月
祈穀禮成上嘉其禮儀祗恪賞還頂帶七月奏請回籍修墓
十二年卒子開業鹽運司運同

右 國史館本傳

皇朝通志卷之二十一

三

鍾音

鍾音滿洲鑲藍旗人姓覺羅禪乾隆元年進士改庶吉士授檢討
二年在批本處行走六年充日講起居注官九年遷國子監司業
十二年遷祭酒兼世襲佐領十三年三月擢內閣學士充殿試讀
卷官閏七月遷盛京刑部侍郎十五年以失察郎中錫林等玩法
婪贓議降二級 詔從寬畱任十六年遷戶部右侍郎十七年授
陝西巡撫十九年閏四月疏言漢中府廣積倉大使別無職掌應
裁穀改貯南鄭縣下部議行是月襲其高祖阿爾岱所 贈輕車
都尉五月疏言陝省常平額貯糧二百七十三萬餘石因西同等
府賑濟缺額節次買補尙缺穀二萬餘石今歲豐價減請照時價

國朝通志卷之二十一
買貯如議行尋調福建巡撫二十年疏言臺灣流寓雜處請編保
甲儻生事爲匪卽押遞原籍有借稱墾地越番界搭糞借名採捕
實則接引偷渡均拆糞驅還原籍嗣後內地領照過臺之人先赴
官驗照如係偷渡解內地懲治 從之又言閩省地方官開徵將
錢糧一兩以上聽花戶交錢致州縣囤積日多發錢易銀墨吏多
收少發剋扣漁利價何由平臣飭屬凡錢糧至一錢者令花戶封
錢投櫃責成該管官照例委員監收按期申報其一錢以下應收
制錢三日內照數發商易銀毋使壅滯剋短並禁發典商營運至
南臺閩安等處商船雖定有額帶數目而違例多帶者未定專條
今議逾額夾帶錢十千以上笞五十勒令易銀二十千以上杖一

百將錢一半入官五十千以上荷校一月錢全入官既可慎重海
防民用亦裕得 旨妥協爲之勿因去弊而反滋弊也二十三年
正月調廣東巡撫尋仍調陝西二十四年二月疏言陝省連年災
歉倉貯空虚請將榆林等七州縣出口種地貧民給牛具籽種銀
秋收照時價交還府施等縣倉亦缺額照見有糧石出三借給爲
數無幾多借又於積貯有礙請按種地多寡借銀俾春耕有賴秋
後照時價交糧在民可免糶穀易銀在官不須發銀買穀得 旨
此因時制宜之法可行也二十五年疏言榆葭道僅轄榆林府五
州縣應裁歸延榆綏道轄鄜州屬之洛川等三縣改歸糧道稽察
下部議行二十七年正月西安將軍嵩椿調任來京奏陝西地方

官接見將軍不照督撫例 敕鍾音將陝西因何沿習違式之處
查明據實具奏尋奏請酌改儀注 諭曰鍾音覆奏摺糊塗不堪
已於摺內批示茲因嵩椿面奏伊在西安曾有道旁呈遞手本並
不跪接之員殊非體制是以降旨飭查而鍾音並不實言其事之
有無一味顛預但稱酌改儀注妄意調停了事所見已屬大謬復
經明切傳諭雖甚愚懵亦當了然洞悉矣今乃輾轉執迷不悟所
奏竟至出人意表如稱前此司道接待將軍俱相沿舊習非敢於
將軍嵩椿之前傲慢失禮一似朕庇護嵩椿爲之爭論體統又有
蒙恩不加嚴譴仍令確查云云此則成何言語夫嵩椿何人鍾音
乃於朕前奏事竟有敢不敢之辭耶試問方今卽有舉朝重臣及

欽差大使稍示威福令地方官委曲承奉者朕甯肯稍假借之又
何有於嵩椿此皆萬無可置論之事而鍾音憤憤若此何以能勝
巡撫之寄可見封疆中處非其據苟冀無事善藏者不少朕轉不
能不爲深慮矣鍾音著傳旨嚴行申飭諄命來京補授兵部侍
郎七月諭往巴里坤軍營辦事二十九年四月疏言巴里坤東
至呼濟爾臺西至鄂什布原設卡倫十八處今準噶爾平巴理坤
已成內地除通烏里雅蘇臺歸化城闢展烏魯木齊等處大路者
尙須巡查餘兵皆撤回從之十月詔回京三十一年六月敕
習庶吉士八月授廣東巡撫三十五年二月丁母憂諭來京署
吏部侍郎四月充武英殿總裁閏五月署福建巡撫十二月兼署

閩浙總督三十六年五月，授閩浙總督加太子少保六月疏言臺灣流寓既難槩爲查逐似宜隱寓招徠向例由臺灣渡回內地廳縣給照汛口盤驗放行兵役刁難每致裹足請嗣後回籍者槩免給照准自赴鹿耳門開姓名總單由船戶持交口岸員弁掛號放行報臣衙門備案自內地渡臺者遵例給照盤驗稍爲變通則欲回者無所阻游民自必漸少如所議行三十七年疏言浙江大荆營賜谷畧有南合北合溪心等村生齒日繁商販往來應設汛查橫山汛原駐把總一外委一兵五十以防海口淤塞商船漁艇久不通請改汛爲塘畱兵五撥把總一帶兵二十五移駐賜谷畧北合設塘駐外委一帶兵十南合設塘駐兵十大芙蓉汛

轄之西店嶺墩地非要隘原設兵八應撥五人移駐溪心下部議
行三十九年入 覲 御製詩賜之曰海江保障寄儀型弗動色
聲措輯甯述職咨詢近前席歸轅在苒別明廷兩疆所部連康歲
一路應知是福星勛爾莫渝終始志昭昭原不若惺惺四十一年
兼署福建巡撫四十二年二月授禮部尙書充經筵講官三通館
四庫全書館副總裁兼正藍旗蒙古都統九月扈 駕盛京卒於
途 諭曰禮部尙書鍾音敷歷內外奉職恪勤且在滿洲科目中
尙爲通達事體因擢授秩宗方加任使茲以扈從途次忽遘沈疴
特遣太醫診治並令先期回京調攝以冀速痊遠聞溘逝深爲憫
惻著加恩晉贈太子太保應得卹典著該部察例具奏尋 賜祭

韓如例謚文恪子恩慶襲一等輕車都尉恩明見官安徽按察使
恩長見官湖南按察使

右 國史館本傳

仲永檀

仲永檀山東濟甯人乾隆元年進士改庶吉士散館授編修三年六月充湖北鄉試副考官五年十一月授陝西道監察御史十二月疏言酌減上元燈火聲樂 諭曰昨御史仲永檀奏稱人君辦理政務一有暇逸之心卽開怠荒之漸每歲上元前後燈火聲樂日有進御伏願酌量裁減豫養清明之體書云不役耳目詩云好樂無荒古聖賢之垂訓乃朕所夙夜兢兢而不敢忽者仲永檀所奏亦卽此意惟是歲時譙賞慶典攸關自古有之況我朝統一中外元正獻歲外藩蒙古朝覲闕廷錫宴同歡有不可缺之典禮朕亦惟踵舊制而行之未嘗有所增益至於國家政務朕仍時刻畱

心照常辦理並未蹈怠荒之戒而略有稽遲也因仲永檀不能深知爰頒此旨至伊胸有所見卽直陳無隱是其可嘉處朕亦知之先是工部鑿匠俞君弼富而無子病故後其義女婿許秉義欺其嗣孫長庚幼謀爭產出名主喪因囑同宗內閣學士許王猷徧邀九卿往弔且首君弼掘埋藏銀步軍統領鄂善以聞詔嚴鞫秉義論罪如律並革王猷職傳旨申飭九卿六年三月永檀奏言臣聞鄂善於掘銀案內受俞姓賄一萬兩禮部侍郎吳家駒因弔喪受謝儀五百兩又吞分送九卿炭金二千兩旋卽假歸且聞弔喪不止九卿大學士亦然張廷玉差人送帖徐本趙國麟俱親往詹事陳浩在彼陪弔奔走數日臣因未得鄂善等受賄確據大

學士等又於 皇上申飭九卿時追燬原帖不敢遽參恭讀 上諭原許風聞言事謹據實密奏以備訪查又聞向來密奏畱中事件外聞旋知此必有串通左右暗爲宣洩者權要有耳目朝廷將不復有耳目矣疏入 諭曰據御史仲永檀奏參鄂善等稱係風聞言事據實密奏以備訪查鄂善係朕倚用之大臣非新用小臣可比伊意欲朕訪查不知應委何等之人若委之禁近小臣豈大
臣不可信而小臣轉可信乎若委之大臣又豈能保其必無恩怨乎況命人暗中訪查而朕不明言藏於胸臆是先以不誠待大臣矣此事甚有關係若不明晰辦理判其黑白則朕將何以任用大臣大臣又何以勝任國家之事耶著怡親王和親王大學士鄂爾

泰張廷玉徐本尙書訥親來保秉公查審使其果實則鄂善罪不容辭如係虛捏則仲永檀自有應得之罪王大臣必無所偏徇於其間也仲永檀又稱向來密奏畱中事件外間旋知朕於左右近侍訓約甚嚴防閑甚密數年以來凡密奏畱中之件皆朕親自緘封並有覽閱之後默記於中卽焚其藁者實無宣洩之隙其有宣洩於外者則皆係本人自向人言以邀名譽而反謂自內宣洩以爲掩飾之計朕猶記方苞進見後將朕欲用魏廷珍之意傳述於外並於魏廷珍未經奉召之前遷移住屋以待其來京此人所共知者又李紱曾經召對朕以君不密則失臣臣不密則失身之義諭訓之伊稱臣斷不敢不密但恐左右或有洩漏耳朕諭云朕從

來召見臣工左右近習曾無內侍一人並無聽聞亦何從洩漏如此二人者皆此類也至於權要串通左右一語朕觀此時並無可串通之左右亦無能串通之權要伊既如此陳奏必有所見著併訊問具奏朕之所以廣開言路者原以明目達聰以除壅蔽若言官自謂風聞言事不問虛實紛紜瀆陳徒亂人意於國事何益是以此案必須徹底清查不便含糊歸結亦正人心風俗之大端也仲永擅摺并發尋 命革鄂善職拏交刑部嚴審 諭曰仲永擅奏參鄂善得受俞長庚賄賂一案朕初以爲必無之事仲永擅身恃言官而誣陷大臣此風斷不可長但事不查明何以治仲永擅之罪因而派王大臣七人秉公查審屢經研訊逐日奏聞乃鄂

善家人及過付人等俱各應承是鄂善受賄之處已屬顯然朕特召和親三大學士鄂爾泰尙書訥親來保同鄂善進見面加訊問鄂善始猶抵飾朕諭之曰此事汝家人及過付人等俱各應承汝能保家人捨命爲汝而自認此賊爲己吞乎若能如是事亦可已若不能如此此數人者出將秉公嚴訊彼時水落石出汝一人之事所關甚小而朕用人顏面所關則大汝若實無此事則可若有不妨於朕前實奏朕另有處置面諭此數大臣從輕審問將此事歸汝之家人以全國家之體設非朕另有指示此數人者但知秉公而已敢如是辦理乎鄂善熟思乃直認從家人手中得銀一千兩是實朕以鄂善在朕前已經自認毫無疑竇以皇考及朕平

日深知信用之大臣而負恩至此國法斷不可恕若於此等稍有寬縱朕將何以臨御臣工但朕心欲以禮待大臣以存國體賈誼曰其有大罪者聞命則北面再拜跪而自裁上不使人捽抑而刑之朕之處鄂善亦猶是耳因垂淚諭之曰爾罪按律應絞念爾曾爲大臣不忍明正典刑然汝亦何顏復立人世乎汝宜有以自處乃彼既出之後朕猶恐如此辦理或有過刻之處又令和親王等四人會同大學士張廷玉福敏徐本尙書海望侍郎舒赫德再加詳議據王大臣奏稱鄂善婪贓負國法所不容人心其憤理當明正典刑乃蒙天恩容其自盡實無過刻之處朕因令訥親來保前往將王大臣奏帖與鄂善閱看并傳諭曰朕於大臣視同手足今

爾負朕至此朕萬不得已如此辦理自降旨之後心中戚戚不能自釋如人身之失手足也汝心中若有欲言之事不妨向二人再行陳奏鄂善忽奏稱我錯聽皇上諭旨以爲我家人已供我得銀一千兩又聽得諭旨云爾係 皇考及朕信用之大臣如果有受賄實情可在朕前據實奏出朕另有辦處以全大臣之體我因皇上屢次降旨滿尚書皆可信其無他今我被入參劾審有得銀之供恐皇上辦理爲難是以一時應承我實無贓私入己如家人供出我來情願與之質對等語朕當爾等面訊鄂善時總以至誠開導欲得其實情爾等皆爲之感泣鄂善亦良心發見俯首無詞因而直認不諱並未以威懼之以言誘之以刑訊之也旋命訥親來

保傳旨與伊朕意彼若自知罪重誠心悔過或以罪當監候懇切
哀求尙欲緩其須臾之死乃鄂善無恥喪心至於此極其欺罔之
罪卽立時正法亦不爲枉夫朕之所以令彼自處者以欲全國家
之體而賜彼以顏面也乃彼自不惜顏面朕將何惜豈皇考在
天之靈不容此負恩之輩冒恩苟免欲使明正典刑以儆戒大小
臣工耶可將鄂善革職拏交刑部著福敏海望舒赫德會同爾等
嚴審則虛實自見或因鄂善愧懼一時錯認亦未可知王大臣必
不阿朕旨而故入以重辟也夫姦盜等案朕尙熟思審處期於至
當況鄂善曾爲大臣者乎朕爲此事數日以來寢不安席食不甘
味深自痛責以爲不如我皇考之仁育義正能使百爾臣工兢

兢奉法自不致身陷重辟水弱之病朕實蹈之若再不明彰國法則人心風俗將何所底止朕之苦衷亦惟 皇考在天之靈鑒照之耳垂淚書此王大臣其體朕意焉布告天下咸使聞知四月王大臣等鞫實鄂善擬絞決吳家駒陳浩均革職 諭曰仲永檀身爲言官能發奸摘伏直陳無隱甚屬可嘉應加超擢以風臺諫著將僉都御史鄭其儲調補順天府府尹其僉都御史員缺卽將仲永檀補授至仲永檀摺內所奏大學士到僉姓送帖弔奠一事今查詢明白全屬子虛伊係得之于枋之口則非伊捏造可知又奏畱中密摺宣洩於外伊旣舉出吳士功奏參史貽直一案查上年吳士功果有此奏見在交王大臣查詢是伊亦並無妄言之咎俱

不必向伊置問朕始疑仲永檀妄言誣陷大臣故欲加罪今查詢
有據旋卽加恩擢用朕大公至正之心可以對天地可以對臣
民自今以後居言官之職者皆當以仲永檀爲法而不必畏首畏
尾矣八月擢左副都御史時貴州蕤安縣民羅尙珍赴都察院控
家居之原任四川巡撫王士俊占據墳山 命永檀赴貴州與總
督張廣泗會鞠得實士俊擬杖徒如律七年二月充會試副考官
時河南巡撫雅爾圖劾永檀自貴州回京令家人鞭打平民下部
議罰俸九月充武會試考官十二月 命往江南同巡撫周學健辦
理查賑事務是月以密奏聞中事洩於鄂容安奉 旨革職鞫問
交王大臣等會鞠時 諭曰朕細閱鄂容安仲永檀供詞伊等往

來親密於未奏以前先行商量既奏以後復行照會二人俱已供出明係結黨營私糾參不睦之人爾等祇擬以洩漏機密事務之律不合著三法司另行嚴定王大臣等因請刑訊並將大學士鄂爾泰革職鞫問奉 旨鄂爾泰著交刑部議處以示薄罰至爾等奏請將仲永檀鄂容安加以刑訊伊等俱曾爲三品大臣又豈可似盜賊罪犯重加三木若不過套夾一訊爲爾等斷案張本又何必多此一番奏請乎況此事形迹已明無庸刑訊仲永檀受朕深恩由御史特授副都御史乃依附師門將密奏密參之事無不豫先商酌暗結黨援排擠不睦之人情罪甚屬重大鄂容安在內廷行走且係大學士之子理應小心供職閉戶讀書乃向言官商量

密奏之事情罪亦無可追但較之仲永檀尙應未減耳爾等可定擬具奏永檀尋病卒

右 國史館本傳

國朝書局類律存稿

卷之二

馬

鄧時敏

鄧時敏字遜齋廣安人乾隆丙辰進士授翰林院編修官至大理寺卿先生少負雋才早掇巍科登九列年纔三十餘以母老陳情乞養里居二十餘年篤倫常而淡榮利尤爲當代公卿中所罕觀戊午分校順天得士最盛其最著者爲一文一武文爲袁子才太史武爲阿廣庭相公尤足爲門牆生色

右 國朝全蜀詩鈔小傳孫桐生撰

皇朝通志卷之二十一

四

國朝耆獻類徵初編卷八十二目錄

卿貳四十二

陳兆崙

齊召南

林枝春

觀保 從弟德保

王會汾

國朝耆獻類徵初編卷八十二目錄

皇朝通志卷之八十一

--	--	--	--	--	--	--	--	--	--

國朝耆獻類徵初編卷八十二

通奉大夫前署江西巡撫江西布政使司布政使湘陰李桓輯
卿貳四十二

陳兆崙

陳兆崙浙江錢塘人幼聰慧七歲就傳日讀書百餘行輒通曉大
義年十五舉十三經旁涉子史博聞強識當時無比雍正八年進
士以知縣需次福建閩浙總督郝玉麟器重之延主鼇峯講席兼
領通志局事十三年薦舉博學鴻詞科比入都適內閣中書懸缺
例得人試以一名授中書兼撰文充軍機章京乾隆元年舉
博學鴻詞科試列二等授翰林院檢討二年充世宗憲皇帝實

錄館纂修官兼 三朝實錄校對六年充湖北鄉試正考官七年
充日講起居注官累充大清會典明紀綱目續文獻通考纂修官
十七年二月 上御經筵以撰擬講義稱 旨擢左春坊左中允
六月大考二等一名擢翰林院侍講學士十八年遷太僕寺卿充
續文獻通考總裁十九年擢順天府府尹歲值大水所在告災兆
崙心計指畫撫綏安集無不得所畿輔役繁舊設官車力疲倣議
僉富戶以代兆崙奏罷之咸以爲便時西路出師徵發禁旅與索
倫兵兆崙經畫宿頓儲蓄井井有緒軍民晏然二十一年遷太常
寺卿二十三年 上謁 陵迴鑿以同官迎 駕失儀降太僕寺
少卿尋 命入直上書房遷通政使司副使三十二年復授太僕

寺卿前後恭和 聖製恭進詩文屢拜 御製 御書書籍硯墨
文綺豐貂之 賜三十三年乞假歸三十五年假滿仍直上書房
三十六年卒年七十有二兆崙精六書之學尤長經義於易書禮
均有論述不專主一家其爲詩文不以氣炫才不以詞害志潛古
潛泊清遠閒放適如心所欲出著有紫竹山房文集二十卷詩集
十二卷

右 國史館本傳

太僕寺卿陳公既葬之二十有三年其孫某等自楚歸展敬墓次
相與謀曰公事狀在史館銘幽有願廣州之文惟外碑未有刻揭
而詩之於以詔稚昧而咏永久也益焯矣乃介其族業弟鴻壽爲

請譽自惟不文且名位先後去公遠且久既禮辭矣竊念自少爲文卽私淑公又公嘗自誌先德不欲求貴人達官今公之孫猶公之志遂不獲讓謹按狀而述其一二大者公諱兆崙字星齋曾祖諱某祖諱某考諱某皆 贈通奉大夫通政副使妣皆夫人公以雍正庚戌進士試用福建知縣會舉博學鴻詞入都考授內閣中書乾隆丙辰 召試保和殿名在二等第二授翰林院檢討時同徵者百八十四人通籍者十五人皆通儒鴻生斂手交讓莫敢雁行充日講起居注官丁父憂服除轉左春坊左中允擢侍讀學士遷太僕寺卿授順天府府尹京兆古號難治以嚴明爲稱職公一書生疑不習吏事又西夷反覆發滿洲索倫兵往征之爲隊於德

勝門外供張儲侍日不暇給公莅政斬斬靜若無事其筆畫處置皆一一先定飭大興宛平兩邑令各於城外設鋪戶以貯弓矢器械他軍行所須令毋得一入城公衣短後衣策馬度居庸關大雪中周歷諸營壘下馬相勞苦羽林髦頭之卒無不超距踊躍歡呼京兆來公徐起上馬微吟而歸先是順天所治縣置官車以供役其戶求退因別僉他戶又時以軍役旁午議以民私畜車注官符以備急公奏罷官車而力寢籍者之議民以不擾官用亦給調太常寺卿左轉太僕寺少卿遷通政司副使仍晉太僕寺卿公先後立朝四十餘年侃侃正色無纖介之過文章學術徹於當展孚於廷竅崇信於鄉黨宗師於後學充世宗實錄明史綱目詩

經補注各纂修官續文獻通考副總裁及經進日講餘他撰述當事者體例未定文臣學士相顧未下筆公徐爲敷陳肌分縷晰申紙和墨水縣矩程 至尊動容羣儒俛首一典湖北鄉試再充會試同考官所得士皆天下豪俊後或居臺閣爲侍從或先公躋顯秩或出四方爲太吏皆卓卓可紀里人後進操不律學爲文詞上者以文名當時下亦得科第發名成業如是纍纍不絕皆以公爲師言文必曰句山先生嗚呼其文哉公雖位不至宰輔然一二稍見設施文章遇合亦已極儒者之榮於公皆可無憾今公孫桂生以從軍有勳爲太守湖北有當官名竟公之志將於是詩曰千年河清岐鳳一鳴歐陽有言須時太平國有大科以納豪俊已

未丙辰先後稱盛公起浙西旣伏乃飛伏誰蹟之飛豈翼之天門
誅開 帝實揖之典章煌煌星輝日光濡染大筆在 帝之旁
皇畿千里京兆所治悍卒惕息窮黎遨嬉謂公循良張趙三王謂
公儒者嚴徐東馬維 帝庸只位旣崇只不究其庸人具恫只龜
跌螭首有碑穹只刻此銘詩長無窮只

右神道碑銘郭譽撰

公諱兆崙字星齋號句山先世自隋開皇閒由淮遷上虞再徙餘
姚十六世鈞始定居錢塘遂爲錢塘陳氏曾祖相謨祖文燦皆
贈通奉大夫父培駿復累 贈至資政大夫母沈夫人公以雍正
八年進士福建卽用知縣舉鴻博科未試先考取內閣中書旣試

高第授檢討轉春坊中允侍讀學士歷太僕卿順天府尹調太常
左遷太僕少卿旋副通政仍掌太僕居官凡四十餘年嘗充日講
起居注及經筵講官纂修世宗實錄會典明史綱目詩經補注
又副續文獻通考總裁一主湖北鄉試再爲會試同考官公貌秀
羸言不出口遇事不動聲色而條理井然如於書無所不讀自少卽
以文章推服一世今承學之士相率誦習其制舉文蓋皆未通籍
以前作也其尹順天也值水災承旨賑恤公經畫精密四廳二
十餘州縣之民皆忘饑饉當是時西域軍興滿洲索倫之兵相繼
徵發公命所屬置供頓軍儲甚備不令一兵得闌入城復冒雪送
之居庸關外時時下馬相勞苦軍中見公莫不權呼踊躍公徐上

馬周歷營壘而還彈琴峽流漸漫道攬轡泥淖中不輟吟詠日成
數章以抒懷述事又議者以役繁欲藉民車備用公力言於總督
乃已民賴以無擾官事具辦維時與公共事者爲吾宗文定公綸
方以戶部侍郎爲兼尹公應制科文定實爲舉首雅相引重計
事多合故動以有成焉公卒以乾隆三十六年年七十有二同郡
顧君光誌其墓謂前知霸州時以屬吏謁公軍門因災請免州屬
餼甲車並所送車馬騾亦乞勿檢換公悉如所言而先命賦古詩
一篇以識之嗚呼卽此可見公之惠愛矣公之文學遭際聖明
天下莫不宗仰茲特著其吏治之大者以示後之人有以知學之
選者將措諸事而無弗宜也公娶於周誥封恭人累贈夫人

子四長玉萬次玉敦同舉乾隆十五年鄉試玉萬山東濟陽縣知縣玉敦江南江甯府同知公以後其弟其二蚤卒孫五人其仲桂生以侍郎巡撫江南得 贈公如其官上距公之卒四十九年矣又後十九年巡撫公復命武進後學劉曉華爲之表揭於墓左蓋道光十八年也

右墓表劉曉華撰

星齋先生論書有云唐拘於法宋取意晉韻千秋竟誰辨於唐言法於宋言意於晉言韻是眞得書家三昧者先生又嘗論 本朝書家首推何義門次則姜西溟趙大鯨似屬偏嗜以愚見言之當以王文安劉文清爲最次則張文敏照陳香泉奕禧汪退谷

士鉉然張陳汪皆不及王劉二公之厚王猶依傍古人劉則厚而能脫入乎古人而出乎古人其晚年妙境蓋先生已歸道山不及見矣又先生生平畢竟以時文爲第一推闡名理包羅史事宜達物情自成一子不當作時文觀也

右松軒隨筆張維屏撰

丙辰登大科者十五人杭郡居其四當時稱爲極盛而角藝壇玷主持騷雅尤推董浦甸山兩先生辛酉先生以侍講典試湖北所得多知名士生平和易近人有以詩文請質者備極獎借人故樂親之今先生之後克繼家聲仕躋通顯咸以爲盛德所致

右鶴徵後錄李富孫撰

陳句山太僕兆崙書法蘭亭取意簡遠侍講梁山舟曰本朝不以書名而書必傳者陳文簡元龍及太僕也

右紀聞陳康祺撰

齊召南

天台齊氏有圯族之逆子曰周華少溺於呂雷良之邪說伸論黨
護應真重典邀 恩寬宥跳身遠走閱三十餘年然後歸歸而出
妻屏子通族擯而不齒益復斥賣田宅盡刊其非聖無法之言巡
撫熊中丞學鵬方閱視台州城工遮道獻其書並列其宗人前禮
部侍郎召南十罪中丞上其書於 朝以其人磔死其近族弟姪
並子孫論大辟者凡十人 聖慈止戮其子孫餘皆釋弗論而逮
禮部至京法司當公徇隱之罪而盡籍其產 皇上鑒公無他僅
千草織還其產之十三四爲其饋粥之地旋 命歸里恩膏汪濊
旁觀皆爲感泣況其身受者乎公易直子諒樸誠自矢爲 主上

所深知橫遭宵小之玷繁紆趨悶無由自白於 聖人之前舟車
刺促內鬱外勞抵家甫匝月疾作遂不可爲時乾隆三十三年五
月二十三日也貧無以殮孤子鬻其餘田以給喪事某年月日葬
於先人之阡苴杖屨經遠走千里踵余門而乞銘余與公同試詞
科同官翰苑性情嗜好無一不合不獨文章學問之益也其忍不
銘齊之出有二太公之後子孫以國爲氏衛大夫齊子之後子孫
以字爲氏此夾漈鄭氏之言也世遠不可考信公自撰年譜矜慎
不敢妄定據其近代之可徵者曰先世汴之祥符人隨宋南渡僑
寓杭州有諱盛者由進士官宣義郎始占籍天台是爲天台之始
祖四世祖莊卿洪武初以人材薦授湖廣房縣知縣七世祖汪正

統丙辰進士官兵部車駕司郎中扈蹕殉土木難曾祖父諱之仲
早卒曾祖母許氏守節撫孤事載郡邑志從祀節孝祠祖諱化龍
以潛德孝義聞於鄉祖母徐氏父諱蕪字省齋邑文學母張氏自
曾祖以下皆以公貴累 贈至資政大夫禮部右侍郎妣皆 贈
二品夫人公名召南字次風號瓊臺晚號息園省齋公生五子公
其次也幼而穎敏六歲解屬對九歲五經成誦鄉里稱神童十二
歲應郡試省齋公攜至郡登巾子山吟五言云江水清天白人煙
滿地浮巾山山上眺一覽小東甌識者卽以公輔器相品目與兄
周南出就外傳青燈布被攻苦連日夕弟圖南世南道南皆從公
學友愛彌篤年十六充博士弟子員二十三督學新城何端簡公

世璠選拔入成均十一郡貢生成集端簡指公稱於眾曰此我朝奇士當以王姚江一輩相待也雍正七年己酉科鄉試中副車十一年癸丑 詔復詞科之制明年督臣上蔡程公元章學臣奉新帥公念祖以博學鴻詞薦乾隆丙辰 皇帝紀號之元載 召試之士羣萃闕下凡百八十四人試於保和殿 欽取一十五人君名在二等第八改翰林院庶吉士卽充大清一統志纂修官明年散館授檢討三年四月京察一等加一級四年六月充武英殿校勘經史官十月充明鑑綱目館纂修官六年三月以一統志館議敘列一等加一級八年四月 御試翰詹官於圓明園列優等六月晉右春坊右中允十一月轉左以原銜署日講起居注官

召對於養心殿西煖閣旋晉翰林院侍讀以原銜充日講起居注
官九年丁省齋公艱戴星而奔哀毀骨立前曾承辦禮記漢書考
證十年 諭旨仍令在籍編輯陸續交武英殿經進十一年三月
綱目告成議敘仍列一等奉 旨於起官日加一級服闋入都奉
上諭仍著在武英殿校勘經史十二年二月補原官三月經史
館告成議敘加一級旋充大清會典纂修官四月京察一等署日
講起居注官五月 召對於勤政殿校勘通志通考晉侍讀學士
充續文獻通考館纂修官主順天武鄉試以原銜充日講起居注
官十三年戊辰會試充同考官五月 御試翰詹官於乾清宮榜
未發奉 上諭在阿哥書房行走以一等第一名擢授內閣學士

兼禮部侍郎甫一月補授禮部右侍郎 上於甯古塔得古鏡以
來歷未詳問朝臣莫有對者公具悉原委並其款識以對 上大
悅諭左右曰是不愧博學鴻詞矣八月 召對於勤政殿越日復
於養心殿西煖閣 召對九月初五日禮部於西苑樓前侍班伏
觀 御射發十九矢皆中的 上騎還園明園顧尙書蔣溥與公
曰不可無詩公於翌日進詩四首序一篇 上卽俯和 命內監
持槩示公知遇之隆罕有倫比旋充續文獻通考館副總裁官侍
班暢春苑大西門樓奉 特旨勘定通禮十四年正月 召對於
西煖閣四月充冊封婉嬪副使二十九日自聞明園直上書房歸
澄懷園甫及門馬驚墮觸大石負重傷幾不藥程學士景伊亦自

上書房歸驚馳入告 上爲動容賜藥三瓶 特遣中官就寓
探問傳蒙古醫療治病少定 上見阿哥果親王頻問汝師傅病
勢如何須時差人探問又見奏事大臣 天語垂問病狀後於木
蘭圍場中又 問阿哥九月回 鑾又 問大學士尙書 賜乾
鹿肉十五束 聖眷隆厚雖慈父母之於子無以加也十月病稍
閒詣 宮門請 聖安 召對於宏德殿行步猶艱 天顏惻閔
曰汝病尙未愈須加意安養公因口陳懇解職任回籍省侍老母
上慰留再三堅請益力 上言冬閒風寒如何行路慰諭款曲
十一月具摺哀懇俟春和由長船回南 上始可其奏猶傳太醫
劉裕鐸邵正文診脈處方公單門寒素起自田閒不藉引援不由

推轂荷 聖主特達之知論有根柢辭無枝葉肫誠樸茂溢於眉
宇望而知爲端人碩士晝日三接一歲九遷受寵若驚奉身若不
及 天鑒密微一誠相感蓋不獨以其學優而文贍也自通籍以
來 聖恩優渥錫賚便蕃不可勝紀其同詞科諸臣拜 賜者則
日知薈說 御製喜雪石刻紗葛筆墨端硯其同翰苑諸臣拜
賜者則日講春秋樂善堂文集 世宗憲皇帝御製文集 欽定
四書文 世宗憲皇帝上諭其同綱目館諸臣拜 賜者則明史
其同翰詹諸臣優等拜 賜者則 御製元宵聯句石刻紗葛筆
墨其因考試而拜 賜者 御製石刻硯墨筆等物其 賜詞林
典故則 召對於勤政殿也其同上書房行走諸臣拜 賜者則

御書敬勝堂法帖紹德龍箋對聯筆墨以及鹿肉大魚山雞鹿
尾挂麪餠粉葛粉荔枝蓮子青果嘉慶子豐貂文綺挂包手帕福
字凡三 賜馬起程又 賜紗葛各二抵家太夫人適患痰喘臥
牀第聞公至起謝 天恩執公手曰汝果來乎勿藥而愈十六年
卒塋南幸公恭迎於吳江入測河岸 上遙顧曰汝已好耶隨
向 行在請 聖安卽 召見詢問病體及老母健否 諭以
汝能奉母讀書自然復健汝第安養不必步步相隨 賜克食並
內緞二紫貂四十一月太夫人棄養明年十月合葬考妣於三十
一都苑坑之原十九年二月服闋制府略公請爲紹興蕺山書院
山長冬略公復請主福建道山書院以道遠辭巡撫周公聘主杭

州敷文書院二十二年 上復幸浙公於無錫北之迎龍橋迎駕尙未奏名 上望見卽問汝今已好耶隨詣 大營盤請 聖安卽 召見垂問病勢加減及書院人文奏對良久遵 諭先至杭 上駐蹕蘇州 命軍機處賜墨刻一卷內緞四匹二十八日於西湖 行宮恭進頌冊蒙 賜大緞六匹二十六年十月叩祝 皇太后萬壽入京恭請 聖安卽蒙 召對慰問良久內監扶起與尙書長洲沈德潛奉 旨仍赴上書房與諸阿哥相見以詩文質正辰入未出有扶掖者不拘常儀十一月二十五日朝賀 皇太后萬壽 賞內緞三匹挂包鼻煙又奉 旨加一級加賞綵緞三匹紫貂六箇 皇清文穎一部二十七年 皇上三幸浙江

恭迎於吳江汪家溪亭上三十年 皇上四幸浙江恭迎於蘇州
城內 行宮俱蒙 溫旨慰問傳 諭先回靜候 皇上駐蹕西
湖行宮疊受 頒賞內緞越日 幸敷文書院 御製詩疊韻
命公與學臣並諸生和詩進呈 賞筆墨硯公主敷文凡十一年
獎勵後進因材而篤生徒雲集中卷盈坐至是以風痰時發懇辭
歸里杜門不出方幸棲遲化日保卒餘年不意逆人近出族屬橫
遭波累壽命不長彌留墜言自云我生不辰濱於死者有二皆賴
聖主得以生全方馬驚墜地時首觸巨石腦髓迸流目睛眩轉
神魂飛越自分必死非夫萬金良藥孰能使元神固而不離非夫
生牛冒首孰能使真氣聚而不洩非夫蒙古神醫偏體椎扑孰能

使十二經脈漸復其本初三百六十五骨節各還其部位三日而知痛五日而知飢不三月而卽能起立收旣散之魄體與陰陽爭瞬息之去畱而奪之鬼伯之手生我者父母之死而致生之者皇上也逆書上聞部議以徇隱擬流 聖意不測遠則新疆近則烏喇至近則甯古塔也朔風砭骨黃沙蔽天朝狎駝馬夜鄰鬼魅羸軀殘喘填溝壑而飽烏鳶其常也則今日考終牖下雖死猶幸齊氏子孫生生世世宜如何其銜結以報也言不及家事泊然而逝公口無擇言身無擇行弱不好弄而於詩書若翹彙著作等身石渠金鑑藏在廣內者一統志河南山東江蘇安徽福建雲南六省皆其編輯外藩屬國徐韓向無底本則公剞劂新撰也明史綱

目前紀二卷神光熹三朝則公所輯也又與楊學士椿兼總校之
任武英殿分撰經史考證而公獨多經則尙書禮記春秋三傳史
則史記功臣侯表五卷漢書百卷後漢書郡國志五卷隋書律厯
天文五卷舊唐書律厯天文二卷嘗言酈氏之注水經明於西北
而闇於東南且域外之水道未詳因撰水道提綱三十卷大而河
海小而溪澗湖源窮委如指上螺紋一鑿可悉又有史漢功臣傳
第考一卷歷代帝王表十三卷後漢公卿表一卷宋史目錄皆其
藏於家者也詩文操筆立就鋪陳終始爛若雲錦晚喜集句李杜
韓蘇若出一手在蕺山聽雲樓臨摹蘭亭法帖卽於原序中去其
複字二百四字做千文體成三言詩十七章客有以瀟化閣帖三

百字求跋者卽因其字數縱橫集之頃刻成五言律十二首讀余
嶺南集卽集七十餘首讀錢司寇香樹續集卽集十首贈之敏捷
如此公生於康熙四十二年正月十一日年不踰中壽止六十有
六云配張氏 誥封二品夫人子一式遷國子監生女二長適張
緝禮次適文學潘崙甲孫女二人銘曰

赤城霞起翠屏雲蒸鍾毓神秀哲人以興繁公方聞詞科發迹笙
典珠墳紛綸旁魄蹈道執禮儒林職志三篋補亡百題並試劉仲
遠父心所遐慕七經釋疑兩漢刊誤珠林玉府恣公遊處鴻筆馳
驟爲 國風雨慎節 宮僚爲諸王友諫寓邪蒿敬徵醴酒吁嗟
逢屯日昃退直馬驚而墮命在漏刻巫咸叫閭 聖心閔惻賜藥

遣醫奪之鬼伯移席歸臥優游林泉詠歌德化若將終焉族子與
繡不可化訓蒼蠅點壁幾隕厥問 帝念微勤弗寘於理白衣還
山祝宗祈死 鴻慈未酬歿而不瞑魂瞻 帝鄉長在華頂松貞
柏悅幽扁孔臧毋忘在莒一嘗何傷碑材輪囷徐俟愍綸瘞銘前
和視此刻文

右墓誌銘杭世駿撰

乾隆元年秋余與齊公次風同試博學鴻詞於保和殿一時士論
余以實學推公及榜發 欽取十五人公果與選余雖報罷而公
念同徵之誼最殷後三年余亦入翰林作後進常與公唱和外出
爲令始與公別別四十七年余老矣遊天台山公死已久且葬其

兄周南弟世南年八十餘龐眉扶杖延予飲其家抱公詩文集百卷出曰先生視此以志其墓嗚呼當時薦此科者海內凡二百餘人而今則在野在朝屈指無有也公之遭逢寵遇升沈禍福非余後死其誰知之而誰表之謹按公名召南字次風又號息園幼而穎敏讀書十行俱下年十六受知於督學何公世璠充博士弟子貢入京師中己酉副車雍正十一年督臣程公元章以鴻博薦授翰林院庶吉士改檢討 御試高等超遷至侍講學士加日講起居注官充戊辰會試同考官上書房行走再遷內閣學士禮部右侍郎公清癯短身而憑鄉樸之氣溢於眉宇獨能宏搜博覽記性過人 上於甯古塔得古鏡未詳款式問朝臣莫有對者公引證

書史羅縷具奏 上大悅顧左右曰是不愧博學鴻詞矣 國家疆域恢宏烏喇巴哈俱置候尉又新開伊犁諸臣奉使者輒先詣齊侍郎家問路公與一冊某墩某驛應宿何所需若干糧數萬里外若掌上螺紋毫忽無譌或問曾出塞乎曰未也然則何由知之曰不過漢書地里志熟耳問之讀漢書者卒亦不解沈尙書德潛嘗在 上前譽天台石梁之奇 上問公公曰荒山磽确不足以勞 聖駕人笑其奏對率易而 上以此益重之十四年四月從上書房歸澄懷園日昃馬驚觸大石上腦涔涔流昏懵不起 上大驚命蒙古醫速治醫刳生牛腹臥公其中又取牛腦乘熱納公頰左右搖公始蘇當是時 上方嚮用公遣 皇子及中使問病

者不絕於道又數月公病少痊步猶蹒跚頗忘所記書不能握筆
又心念老母乞回籍終養 上慰畱再四然後許之還浙後掌教
蕺山萬松兩書院 上三次南巡公力疾迎 駕皆 召見賞賜
優渥先是公有族匪周華者素不良公訓誨不悛遁海外三十餘
年忽因浙撫熊學鵬巡城遮道獻所著逆書揭公十大罪熊奏聞
上誅周華赦公削職歸里公身受 特達之知方恨無涓涯報
而怪民妖言乃出自近族悔平時教敕無素又隱忍不先舉發以
致惡彰於天自分雖九死罪固當而 上復屈法活之恩愈重愧
憤愈深結轡不已路上疾暴作還家而月竟以不起年六十六嘗
言鄜道元水經注明於西北闔於東南特撰水道提綱三十卷又

歷代帝王表十三卷後漢公卿表一卷所修官書則一統志明史
綱目續文獻通考禮記漢書考證皆所纂也曾祖三仲祖化龍父
肅俱以公貴 贈如公官妻張氏 封二品夫人子式遷國學生
女二人葬台州花坑之原銘曰

天台之山其高萬有八千以是鍾靈生公其閒學識其大才擅其
全以人視山幾與齊肩雖鼻獍齧其後惡馬蹶於前而終以受知
於天無損其賢嗚呼非我來遊誰表此阡嗣後川湜湜峰縣縣磅
礪鬱積繼公而生者其又在何年

右墓誌銘袁枚撰

齊召南浙江天台人幼而穎敏鄉里稱神童年十六補縣學生二

十二學使何世璠舉選拔貢成均嘗稱於眾曰此我朝奇士當以王姚江一輩相待也雍正七年己酉科鄉試中副車十一年癸丑詔復詞科之制總督程元章學使帥念祖以博學鴻詞薦乾隆元年召試於保和殿欽定二等第八名改翰林院庶吉士充大清一統志纂修官散館授檢討四年充武英殿校勘經史官又充明鑑綱目館纂修官八年四月御試翰詹於圓明園列優等擢右春坊右中允旋轉左以原銜署日講起居注官晉翰林院侍讀丁父憂歸以前曾承辦禮記漢書考證諭令在籍編輯陸續交武英殿經進先是京察及一統志館議敘屢列一等及十一年綱目告成議敘仍列一等奉旨於起官日加一級服闋入都

命仍在武英殿校勘經史十二年補原官充大清會典纂修官
旋晉侍讀學士充續文獻通考館纂修官主順天鄉試以原銜充
日講起居注官十三年充會試同考官五月 御試翰詹於 乾
清宮榜未發奉 上諭在阿哥上書房行走以一等第一名擢授
內閣學士兼禮部侍郎甫一月補授禮部右侍郎 上於甯古塔
得古鏡以來歷未詳問朝臣莫有對者召南具悉原委並其款識
以對 上大悅曰是不媿博學鴻詞矣九月禮部於西苑樓前侍
班伏觀 御射發十九矢皆中的 上騎還園明園顧尙書蔣溥
與召南曰不可無詩召南翌日進詩四首序一篇 上卽俯和
命內監持彙示公其知遇之隆如此旋充續文獻通考館副總裁

侍班暢春苑大西門奉 特旨勘定通禮十四年四月充冊封婉
嬪副使二十九日自圓明園直上書房歸澄懷園甫及門馬驚墮
觸大石負重傷幾殆程學士景伊亦自上書房歸驚馳入告 上
爲動容賜藥三瓶 特遣中官就寓探問傳蒙古醫療治病少定

上見阿哥果親王頻問爾師傅病如何須時差人探問後於木
蘭圍場中又 問阿哥九月回 鑾又 問大學士尙書 賜乾

鹿肉十五束 聖眷隆厚如此十月病稍閒詣宮門請 聖安

召對於宏德殿行步猶艱 天顏惻閔曰爾病尙未愈須加意安
養召南因口陳懇解職任回籍省視老母 上慰留再三請益力
上言冬寒如何可行十一月具摺哀懇俟春和時由長船回南

上始可其奏猶傳太醫劉裕鐸邵正文診脈處方召南單門寒素起自田間不藉引援不由推轂荷高宗純皇帝特達之知而召南受寵若驚奉身若不及天鑑密微一誠相感蓋不獨以其學優而文贍也召南自通籍以來同詞科及翰苑諸臣拜文集石刻紗葛筆墨之賜者錫資便蕃不可勝紀十六年二十二年

高宗純皇帝南巡召南再迎 鑿數蒙 恩召對二十六年恭祝

皇太后萬壽入京恭請 聖安卽蒙 召對慰問良久內監扶

起 命與尙書沈德潛仍赴上書房與諸阿哥相見以詩文質正

辰入未出有扶掖者不拘常儀旋乞歸二十七年三十年 高宗

純皇帝南巡再迎 鑿俱蒙 恩慰問三十一年 幸敷文書院

御製詩疊頌 命召南與學臣及諸生和詩進呈 賜筆墨硯
時召南主敷文書院爲山長也三十二年召南之族子周華少時
黨呂畱良獲罪邀 恩寬免僅予遠戍及戍歸刻其書呈於巡撫
熊學鵬並列召南十罪學鵬上其書於 朝讞定磔周華其近族
弟姪子孫論大辟者几十人召南逮至京法司當召南徇隱之罪
而盡籍其產 高宗純皇帝鑒召南無他僅予革職還其產之十
三召南歸旋卒年六十有六卒時言不及家事惟云濱於死者二
皆賴 聖主得以生全馬驚觸石而得萬金良藥以生族子之獄
而荷從寬典今日考終牖下雖死猶幸齊氏子孫生生世世且如
何銜結以報也召南所著述其在史局則一統志中河南山東江

蘇安徽福建雲南其所編輯其外藩屬國向無底本召南勅彙新撰也明史綱目前紀二卷神光熹三朝召南所輯也其分撰經史考證經則尙書禮記春秋三傳史則史記功臣侯表五卷漢書百卷後漢書郡國志五卷隋書律厯天文五卷舊唐書律厯天文二卷嘗言鄒氏之注水經明於西北而闇於東南且域外之水道未詳因撰水道提綱三十卷大而河海小而溪澗湖源窮委一覽可悉又有史漢功臣侯第考一卷歷代帝王表十三卷後漢公卿表一卷宋史目錄皆藏於家

右傳陳用光撰

先生未遇時夢于忠肅曰景泰帝易儲事吾嘗具疏力諫不從後

人不知遂妄加疑議今皇史宬中吾疏具在公他日當檢出示人以雪吾冤先生修明史綱目親至皇史宬徧覓忠肅奏疏卒不得後餘姚邵進士晉涵與分纂之任親到皇史宬求忠肅疏亦不得但檢得明時通政使進本檔冊載景泰某年某月日于某一本爲太子事此卽忠肅具疏力諫之明證

右碧谿詩話張維屏錄

先生瞳人極小能遠視與紫坪登山見江舫先生辨舟中幾人服某某色杯斝壺觴之屬歷歷可數下山至泊所則所視皆不爽先生清晨望雲能尋其根云彷彿如絲繫於山隨所尋窆之得雲根石多花草鳥篆形尤異一石具先生名字

右茶餘客話阮葵生撰

齊次風少宗伯目力過人嘗銷夏萬松山中見雲起處必牽一縷如絲繫於峯巔蹤跡之獲石數枚有文印之成書畫形後積聚漸多因以作譜用東坡石鼓韻題長歌以紀之一時名流咸欣然屬和焉

右記余金撰

天台齊侍郎敏悟強識觀書目十行下一覽則終身不忘其應徵北上時謁某邑宰畱宿署中見架上有異書八冊請借觀主人曰諾次日將登程主人奉書以出侍郎曰已閱訖矣主人未之信抽一二冊詢之探喉而出不譌一字

天台雁宕之勝甲於東南傳之圖志 高宗南巡侍臣多稱述及之者一日 召見齊侍郎召南 詢以兩山古蹟侍郎以未經游覽對 上問籍隸台州因何不到侍郎云山勢崖崿谿流深險臣有老母孝子不登高不臨深是以不往游 上適奉 孝聖皇后南來聞侍郎言遂不復巡幸浙東

本朝儒臣以文章名世者天台齊侍郎與諸城賢侍郎齊名曰南齊北竇河間紀文達公與嘉定錢詹事齊名曰北紀南錢又曹倦圃溶評詩以南潘北李並舉蓋指天生次耕兩先生大興朱竹君學士與青浦王述庵少司寇皆喜提唱風雅人稱北朱南王嘉慶中歛鮑宮詹桂星與吾師童通副槐亦有南童北鮑之目則以應

制詞賦見稱也

按鮑南人而云北鮑侯考

右紀聞陳康祺撰

按齊公尙有賜硯堂詩寶繪堂文集

陸奥守藤原氏家系表
卷之十一

三

林枝春

林枝春字繼仁高士湛孫少孤苦事孀母負薪汲甕以養學益力長而有文名以內閣中書及第第二人桐城方侍郎負海內望於士少許可獨器重之以侍講督學河南豫人至今稱之豫有三教堂其位佛居中而孔子老子左右之凡五百餘所相沿不廢枝春奏請盡改其祠爲義學數轉通政司副使復督學江西公愼如在河南歸主龍峯書院教諸生坐作進止皆有規矩所成就多名人與弟鳳彩友愛遺命與同葬曰吾魂魄不忍相離也其爲中書時母在家寢疾燕去闕五千里感夢請急航海歸六日抵家母驚喜疾爲少瘳人謂孝感所致云著有某某集能詩尤工書法

右小傳龔景瀚撰 按林公福建閩縣人乾隆丁巳進士殿試一甲第二名

觀保 從弟德保

觀保姓索綽絡內務府正白旗滿洲人乾隆二年進士改庶吉士四年散館授編修六年五月充雲南鄉試正考官十二月在南書房行走八年二月充日講起居注官四月遷侍講九年十二月提督安徽學政十二年 詔畱任十三年五月轉侍讀六月遷國子監祭酒閏七月擢內閣學士八月署刑部侍郎十四年正月兼國子監祭酒充經筵講官十二月授兵部侍郎仍兼刑部侍郎十七年充武會試正考官二十年在南書房行走二十二年六月教習庶吉士十二月兼管正白旗滿洲副都統二十五年充浙江鄉試正考官七月教習庶吉士二十六年二月充會試副考官六月國

子監將報滿教習沈若木引見摺內既引吏部原議或以教職或以知縣用恭候 欽定又聲敘該員係進士曾經歸班以知縣選用 上以祭酒陸宗楷有心取巧觀保等扶同具奏下部嚴議尋部議陸宗楷觀保俱請革職得旨從寬畱任二十七年五月調吏部侍郎兼翰林院掌院學士閏五月教習庶吉士八月充順天鄉試副考官二十八年以吏部侍郎管理兵部侍郎二十九年二月調兵部侍郎奏言講官恭纂記注例於內閣查 上諭絲綸外紀各檔敬謹編輯其添敘事由以所貯六部通政司副本爲據兼查六科存注紅本各部院升補官員及自行陳奏事件由各衙門造冊送館必冊檔詳明紀載方爲詳覈乃奉行日久所送冊檔

漸圖省便多有脫遺咨查需時請 敕各部院衙門於每年正月將上年事件詳細造冊派員查閱送館得 旨允行三十年七月授左都御史三十一年正月北城御史素爾納奏北城文移檔案皆另貯城外控呈俱在漢御史家投遞非慎重公事之道 上命觀保等查奏尋覆奏北城案卷自乾隆二十六年後俱貯書吏家餘四城查問巡視各員均藏公署應令北城將案卷查存公署巡城御史交部察議書吏責革至尋常事件各城原在署接收設遇緊急事件彼此觀望必致遲誤請無論滿漢准其接收即日會同商辦 上責其所查糊塗 命軍機大臣詢問辦理另奏大學士公傅恆等查奏五城文移檔案俱不存貯公署該堂官查問時蒙

混回覆請將巡視中東西南四城御史交部議處五城滿漢御史應每日進署控呈公同辦理遇昏夜緊急事件始准私宅接收次日會辦得 旨俞允三十二年教習庶吉士三十三年四月兼署禮部尙書十月吏部司員姚左垣馬道周議處山西學政呂光亨失察逆犯張廷瑞但呈照馮鈐從寬革職畱任例於吳華孫李宗文實降之案並未查送 上以其避重就輕下都察院議處觀保將姚左垣等議照推諉遺漏例降抵罰俸 上責其徇庇下部議處部議革任得 旨寬免十二月調補禮部尙書兼鑲白旗蒙古都統三十四年二月侍郎邁拉遜查奏咸安宮官學教習曠功上諭責觀保管理官學日久並不實力整頓下部嚴察議奏部議

革任 詔免之十月國子監遺失書籍交部嚴議部議革任 諭
日公過處分適年率從寬予以畱任使眾人見因公議處仍得安
享高官益增其不肖實心任事之念觀保自用爲部院大臣兼管
旗務二十餘年於各任內應辦之事從未見其認真經理虛有其
表毫無實際非國家得用之人何必令其徒曠職守著革任仍在
上書房行走十二月署左都御史充經筵講官三十五年五月
諭曰入阿哥並未具奏入城觀保以阿哥師傅不行勸阻甚屬非
是著革職八月授左都御史仍帶革職畱任充順天鄉試副考官
三十六年三月充會試副考官五月充國史館副總裁三十七年
二月 上御經筵觀保進退失次不能終講 命革去頂帶從寬

畱任三十九年七月兵部侍郎高樸奏內監高雲從洩道府記載
觀保與侍郎蔣賜榮吳壇在九卿班私論道府記載優劣 諭曰
觀保屢次獲罪本一庸材更何心覲顏論事而蔣賜榮吳壇皆新
進平等材具祇宜恪勤供職何可於九卿班上議論道府朕於用
人黜陟權不下移豈在下所能窺測伊等議論優劣其意何居但
其所議論者何事何人觀保蔣賜榮吳壇身爲九卿直如此多事
俱著革職交刑部查審並著伊等各將議論情節明白錄供由刑
部堂官具奏越日又 諭曰硃批紀載乃 皇考世宗憲皇帝畱
意人才以備隨時錄用實屬法良意美所當永遠遵守至於所用
道府亦不過照例補放或後經督撫參劾朕亦從無庇護若其中

果有才本平常或資緣倖得九卿確有實據不妨據實奏參朕必
爲嘉獎又何所容其私相議論乃觀保等既不能實指直陳徒於
班聯上妄行竊議意欲何爲況觀保本屬庸材屢經獲譴蔣賜棨
吳壇甫經擢用尤宜恪勤奉職又何暇評論人才乎嗣經大學士
舒赫德等覆鞫請加刑訊諭曰觀保等明知交結內監探聽記
載情罪重大冀圖躲避重譴不肖供認伊等果無其事高模何能
憑空捏造至所稱九卿同在一處不敢妄行私議九卿盡在豈肖
盡爲隱瞞之語更屬荒唐此等口舌案件原無憑據九卿等誰不
欲置身局外此時卽問之九卿又孰肯爲之質證況九卿除觀保
等外豈無探聽記載未經高模指奏之人朕亦不屑因此一一窮

治遽興大獄也至刑部請旨刑訊殊屬無謂伊等皆一二品大員
卽加刑訊亦不過用刑套問虛應故事伊等若復堅供如前刑部
又如何辦理豈因觀保等不肯承認轉將高樸訊究坐以誣奏之
罪尙復成何事體且此後誰復肯以眾人情僞據實直陳耶觀保
等探聽記載竊議道府優劣一節伊等雖狡詞隱飾揆之於理其
肺肝自不能掩朕今亦不復窮究試令觀保等捫心自問又豈能
盡昧天良乎高雲從見已照御前大臣及行在刑部所擬卽行正
法所有觀保等一案著刑部按律定擬具奏尋問擬斬候九月
諭曰觀保蔣賜榮吳壇身爲大臣不知安分奉職輒敢私議道府
優劣蔣賜榮吳壇甚有向太監高雲從探聽記載之事其罪均無

可道幸當朕勵精圖治朝政肅清之時伊等尙不敢任意妄爲否則不知何所底止是以不得不爲審訊以飭綱紀但信其尙無交通結納行賄營私大弊觀保蔣賜榮吳壇俱著加恩釋放觀保著以無頂帶人仍在阿哥書房行走效力贖罪四十一年卒 諭曰觀保在上書房行走有年尙屬小心勤謹今聞其患病溢逝著加恩給還左都御史原銜

右 國史館本傳

德保

德保索綽絡氏內務府滿洲正白旗人曾祖都圖任六庫郎中署總管內務府大臣 聖祖仁皇帝賜姓石德保乾隆二年進士改

庶吉士散館授檢討九年十月充順天鄉試副考官十一月充日講起居注官十年五月入直南書房三月充會試同考官十一年擢侍講十二年充山東鄉試正考官提督山西學政十三年轉侍讀十四年條奏學政事宜一永濟鳳臺俱大學邢縣交城清源浮山黎城陵川萬泉餘社武鄉樂平俱中學均訓導一員潞城甯鄉懷仁山陰靈邱廣靈馬邑俱小學皆訓導教諭二員請永濟鳳臺懷仁山陰靈邱廣靈馬邑俱添設教諭一員邢縣交城清源浮山黎城陵川萬泉餘社武鄉樂平訓導俱改爲教諭一員潞城甯鄉懷仁山陰靈邱廣靈馬邑祇留訓導一員其教諭七員裁一士子最重經學請於歲科正考日除誦習御纂諸經者另期摘條發問外仍摘本經一段開明起止

令各生童默寫卷末錯落多者生員不准前列童生不准入泮一
四等生員錄遺與五等青生一例對讀下部議行十五年六月遷
右庶子八月調山東學政十一月擢翰林院侍講學士尋升內閣學
士十七年遷工部侍郎兼總管內務府大臣仍直南書房十八年
九月 上以德保射箭生疏 命革去侍郎專在內務府總管行
走十月 諭不必在南書房行走二十六年授正黃旗漢軍副都
統十月充經筵講官十一月授吏部侍郎二十七年奏從前旗人
崇尚樸實不事奢靡遇奉差隨圍爭先恐後衣服食用皆知撙節
今凡有派差隨圍出兵人員俱蒙賞給官馬幫貼銀兩仍不免窘
迫者皆因不顧生計鮮衣美食妄行糜費訪得八旗當差人等前

往正陽門外戲園酒館以數月之用度供一時之糜費於風俗人心大有關係昔世宗憲皇帝因八旗漸改舊習不守本分曾經嚴加懲創皇上軫念旗員不令在前二門外居住實恐習染奢靡先事防閑至意但因循日久不免仍蹈故轍請嗣後仍照舊例交八旗大臣步軍統領衙門不時稽察違者官員參處兵丁責革再查八旗官兵服式前經世宗憲皇帝定有章程今罔知舊制服飾越分請交禮部將前定章程刷印傳示俾各按品級服用得旨如所請行二十八年三月充會試副考官五月教習庶吉士三十年管理國子監事充江西鄉試正考官提督順天學政十月奏江西大省向分十四房易四書三詩五春秋禮記各一除書春

秋禮記卷數不甚相遠毋庸更改外惟易一千七百餘卷而詩經五房每房分校九百餘卷多寡懸殊請易經裁去一房添入詩經則多寡適均校閱較易 從之三十二年丁母憂百日期滿補吏部侍郎仍兼管內務府大臣正黃旗漢軍副都統三十四年調鑲黃旗滿洲副都統三月充會試副考官十一月兼翰林院掌院學士管理盛京官學生事十二月授廣東巡撫三十六年二月兼署兩廣總督九月奏軍械必須堅利適用未便任滋朽壞查粵東西兩省鎮協刀皆純鐵無鋼槍杆用沙木圍圓不過一寸卽通飭另製各營軍裝冊內另有盈餘一項零星破壞存留日久竟同棄置甚至移抵作新希圖假冒見令將冗設朽壞者分別銷燬變價償

清理後混請另製卽參處著賠 上嘉之三十七年二月奏各州縣徵收田房契稅統限奏銷前解司遲延將各州縣罰俸一年府州罰俸六個月勒限解足侵虧照例治罪追賠直隸州應解契稅逾限不解照州縣例參處道員照知府例查參下部議行五月奏同知直隸州推升知府因不勝府缺仍畱原任同知有督捕水利之責分防要地者與州縣無異至直隸州知州身膺民社兼轄屬員設怠惰自甘公務必曠請嗣後三年限滿遞加考察曠職者勒令休致 上是其言三十八年二月奏原設槳船十粵東內河營汛次已極周密兼有左翼鎮屬槳船不時巡緝撫標槳船例止每季輪派守備一員千總三員分巡各帶兵三十名坐駕槳船與鎮

營各船互相聲應四隻儘足敷用餘皆有名無實應裁下部議行
九月奏本年湖廣督臣陳輝祖咨會撥解川餉於七月十六日限
行六百里發遞八月二十四日始到遞至三十餘日緣向來接遞
公文逾限不分緊緩均照遞延公文議處例止罰俸各員遂不經
心請嗣後照管驛州縣接遞各省限行六百里公文若不依限馳
遞查明逾限最多者照扣閱公文遞延例一律參處議行四十一
年正月丁父艱百日期滿署吏部侍郎十月署福建巡撫尋奉
命暫署漕運總督是月 諭曰姚立德奏各省重運漕船向係冬
兌冬開次年得及早過淮五月全入臺莊回空於九月初亦得全
入臨清開行總無遲逾之事近年以來兌開既遲長途不能償趕

年復一年回空亦未能依限歸次不無阻淺守凍之虞前與阿思哈面商意見相同茲阿思哈病故恐冬兌冬開之例仍不能實力奉行請敕諭有漕各撫臣責成各糧道妥協辦理等語所奏甚是各省漕糧冬兌冬開自屬正辦迨後開兌遲緩實係歷年因循所致雖催趨尚無貽誤不若照例於冬月開幫之爲暇豫目下正屆收兌漕糧之期若能於今歲冬開辦定章程嗣後卽無難遞年遵辦著卽傳諭有漕之各督撫一體實力妥辦其江蘇安徽浙江各省糧艘務令歲內全數開行其江西湖廣各幫亦須將回空之船迎催歸次必於正月內掃幫前進毋至遲延至德保業已起程著傳諭令前赴濟甯與姚立德面商熟悉實力妥辦十一月奏本年

各省回空糧艘於十月二十八日全出臺莊開河爲時稍遲見在分途催趲江蘇安徽浙江各省糧艘務令歲內開行其江西湖廣各幫檄行各糧道迎催歸次受兌亦於正月埽幫前進報 聞十二月奏漕船開兌日期向由州縣自定每致稽緩見檄行各糧道州縣收漕一有成數卽定期開兌各遵定限埽幫前進並嚴禁運丁攬裝客貨逾違參處再幫船行走向藉等候同幫爲詞見通檄隨帶隨行不得等候稽延至漕糧首重米色漕運全書內開到淮查驗米色潮雜不純及虧折之米有結者旗丁賠補未出結者縣幫各半均賠例意未免兩歧請嗣後到淮米色查係原兌平常將徵兌州縣無論已未出結嚴參議處著賠補運道府及監領各員

弁一併參處中途挽和及不能勤加風瞭過淮後米色微暗仍照定例辦理報 聞四十二年三月奏德州衛左幫濟甯衛任城幫軍船承兌豫糧本無軍田又無津貼每船止贍軍銀十兩且水次在河南造船在山東完工赴豫受兌抵通回空守候諸多拮据若將左任城二幫照例改爲自備旗丁毋庸押空守候可省長途費用亦可免大遭賠累下部議行又奏漕標試用衛千總多至百餘員例押空滿運畱標千總遇缺開補查通漕千總繁缺共六十一每年依次輪補不過數員餘皆需次候補應照吏部覆准廣東省分發佐雜人員無論年限准回原籍之例准其告假回籍如情願往來亦照部議由原籍督撫給咨赴淮下部議行七月 諭曰據

巡漕御史敦岱奏臨清守備萬世通同東昌衛守備王祖夔統率
丁舵衙役人等至臨清開喝令眾人將閘板拉起放進回空船八
隻致重運糧艘頂阻八時等語實屬不法運河設閘蓄水以濟重
運其回空船隻例應俟重運糧船全行出口方准進閘乃該守備
萬世通欲將赴次改造之空船強行進閘因閘官阻止輒同守備
王祖夔率領丁舵人役將閘板拉起放進空船八隻任意妄行不
可不嚴加懲儆著傳諭德保會同姚立德卽速查明據實參革究
審定擬具奏敦岱摺並鈔寄閱看尋奏見督全漕過德州不日卽
抵天津俟趨叩闕廷後回至臨清會同河臣姚立德嚴審定擬
具奏 諭曰昨據德保奏稱督催全漕不日卽抵天津俟趨叩闕

廷後回至臨清審擬守備萬世通擅起閘板一案已於摺內批示令其不必來京卽回臨清速審此案矣計德保回至臨清審擬搶閘一案事畢卽應催償回空抵次籌辦明年漕務見在鄂寶所辦川省軍需奏銷諸事未能卽竣其赴總漕新任尙早一切漕務仍係德保專責德保於上年冬閒甫經出京又何必襲押運舊例卽請陞見耶著傳諭德保卽遵照此旨妥辦仍將萬世通擅起閘板一案速行會審明確定擬具奏又諭曰前因守備萬世通搶閘滋事一案已諭令德保速赴臨清會同姚立德國泰嚴審定擬矣此案萬世通押帶回空漕船過閘膽敢不候重運北上輒行擅起閘板放下空船致稽重運情罪固重其閘官崔體淵庸懦無能擅

離閘所以致閘夫散去咎亦難辭德保等審明時自當卽行按律定擬以示懲警至各閘雖設有閘官專管必有道廳等官兼司統轄當漕務緊要之時各該員不應駐宿河干往來稽察彈壓乎此次萬世通搶閘之事德保原參有據上河通判洪世儀詳報等語是該通判卽係該閘兼管之員定案時自當予以處分卽統轄之道員亦當有應得之咎著傳諭德保等查明定例一併參處並此後何以嚴定章程令其稽察不致生事亦當一併議奏旋奏請將萬世通等論罪如律又奏東省北自臨清南至臺莊共四十九座閘臨清閘板爲自北往南進閘之始各省漕船應行打造者俱係隨閘搭放但未明定章程以致爭搶越幫令糧道先查每幫確數

飭於臨清板閘塘內乘空分塘每起進閘不得過五隻船尾粉書
赴廠打造字樣各閘驗放時遇船連橋行走令於河面稍寬處停
讓不得礙絆爭行致阻重運嗣後如仍有搶閘等事將兼管廳員
照約束不嚴例降一級調用統轄道員照失察例議處閘官故意
畱難捐勒照例參辦下部議行九月奏近年糧船每報失風江河
水勢浩瀚閘河水性急湍猝遇風浪人力難施內河遇有風暴原
可隨時防範定例糧船失風運弁罰俸一年押運廳員罰俸六箇
月船隻多寡並無區別請嗣後江浙幫船在鎮江口以內江西幫
船在鄱陽湖以內河南山東湖南湖北至臨清閘以北失風一二
隻及船米無虧者仍照例議處三隻以上運弁降一級調用押運

廳員罰俸一年五隻以上運弁革職押運廳員降一級畱任旗丁
各予滿杖枷號一月其進瓜洲儀徵口以至淮安均係內河俱照
北河例辦理十月奏漕標下左營都司右營遊擊向來止用鈐記
該二營經管軍馬錢糧隔省駐劄文稟均關緊要請一體頒給關
防均如所請十一月奏入秋以來天氣久晴直隸山東河道淺滯
臨清至韓莊閘回空漕船行走未能迅速江西九江後吉安二幫
於十一月初一二日渡黃初三日東北風過大河水陡落楊家莊
頭水僅深一尺五寸連日風雪雙金閘迤上俱已冰凍邳宿一帶
亦開斷凍阻臣馳赴河口撥派兵夫設法疏通天氣正寒隨敲隨
合至初九日風色略轉水勢稍增冰凍盡力敲通十一二三四等

日加緊渡黃其邳宿一帶飛咨各州縣照料見在未渡黃者尙有九幫共船三百六十八隻得旨嘉獎又奏邳宿桃源境內凍阻各船一律開通安福撫州二幫於二十四日渡黃至二十七日尾幫全渡二十九日均過淮南下本年江西回空漕船較往年遲至十餘日該省糧船居通漕之尾約歲前抵次仍可跟接湖廣幫船前進無誤新漕諭曰德保奏十一月初開雙金閘一帶天寒冰凍回空漕船稽阻南下當飭文武員弁上緊敲打一律開通等語所辦尙好但據稱未渡黃河之回空漕船尙有江西船九幫雖云今歲河凍較早而回空漕船至十一月初開未渡黃者三百餘隻已較往年稍遲其適值凍阻究係行遲非盡關寒早也且見在正

屆冬月開兌之期而江西回空漕船阻次黃河以北者尙有如許不致有誤開兌否著傳諭德保卽速查明江西幫船是否在路稽延遂致回空較晚及此等船隻回抵江西水次是否不誤今冬開兌之處據寶覆奏仍飭押運員弁將回空各船迅速催僭前進毋再稽遲仍將各船於何日全行渡黃趨進之處一並覆奏十二月奏本年漕船自通回空南下實因直隸山東河道水勢淺弱每日僅過一二幫出山東境適天寒冰凍渡黃較遲尙無稽延情事報聞四十二年二月奏請江南揚州衛三浙江杭嚴頭杭嚴二三幫千總改爲繁缺在外揀調長淮衛宿州頭蘇松鎮海衛前浙江台州衛後三幫千總改爲簡缺歸部銓選下部議行四月赴福建

巡撫任六月署浙閩總督八月奏漳州府知府姚棻調補福州府
汀州府知府景昌調補漳州府遺缺以臺灣海防同知鄔維肅補
用諭曰前因福州府知府缺出曾降旨令該督撫於通省知府
內揀員調補遺缺將鄔維肅補授今據德保奏請將漳州府知府
姚棻調補福州府而以汀州府知府景昌調補漳州府所辦非是
福州府雖閩省首郡事務較繁但督撫皆駐省會又有兩司各道
同城卽或有要務首府就近稟承易於辦理至漳郡濱臨海疆民
俗刁悍最爲難治其繁要數倍於福州朕因素知姚棻能事前次
漳州缺出特從湖北調任該郡實係因地擇人豈可輕於更調雖
據稱漳州近年以來風氣漸純究亦未足深恃萬一地方有事又

豈德保之所能料乎今德保請以姚棻調補首郡而以景昌調任
漳州何不即將伊調補福州乎著傳諭德保如姚棻等尙未調定
卽將景昌調補福州府其汀州府員缺卽著鄔維肅補授如彼此
業經更調自難復行改易著德保畱心試看如景昌到漳州不能
如姚棻經理得宜卽一面將姚棻調回漳州景昌調回福州不得
稍有迴護九月擢禮部尙書十二月 賞戴花翎四十四年正月
兼署吏部尙書三月署翰林院掌院學士教習庶吉士十二月
命纂音韻述微四十五年三月充會試正考官四月奏會闈分卷
請照舊例祇令房官迴避本省試卷至公堂分十八束送內簾籤
掣不必將至字公字區分兩項下部議行十一月兼署都察院左

都御史四十六年正月兼管太常寺事三月充會試正考官五月
充纂辦日下舊聞考總裁旋充上書房總師傅揀選贊禮郎與例
不符議革四十七年正月 諭曰嗣後 壇內補種樹株著御前
侍衛德保幫同禮部尙書德保於靜明園清漪園培養之樹內移
往一律補栽四月 諭曰常雩大典朕親詣行禮凡在 壇執事
諸臣胥應其矢恪恭 壇內一切禮器於朕未經齋宿之先禮部
工部太常寺等官豫行派員周視均宜敬謹安設誠以敬 天大
典小心昭事之忱大小臣工所當共懍乃本日朕行禮時見 壇
內懸挂天鐙僅止二盞又更衣幄次所設坐褥亦不整齊 郊壇
大典朕親詣行禮尙如此草率不敬若遣官恭代更不可問矣其

罪甚大非尋常錯誤交部議處者可比德保著革去頂帶花翎仍帶革職從寬畱任十年無過方准開復五月 上御殿受朝西班官一員由甬道走入東班監禮御史等並未查參德保係都察院堂官亦未奏參部議罰俸一年又以 社稷壇內樹株未經芟修交部議處鑄一級九月暫署兵部尙書十月 諭曰前經降旨派皇子同總師傅等編輯明臣奏議一書原因明季朝多秕政廷臣讜言直諫者亦不乏人特令廣爲蒐採裒集成編自應考訂朝代前後按次編錄方於時事得失原委瞭然今閱書內體制乖舛總師傅等不能詳加釐正著交部嚴加議處十一月 諭德保不勝總師傅之任著回原衙門辦事十二月得 旨賞還頂帶花翎仍

革職畱任四十八年二月總司營建辟雍四十九年充會試正考官五月兼署都察院左都御史五十年與千叟宴三月諭經理修葺直隸昌平州明代陵寢八月總辦樂律全書諭曰古樂以宮商角徵羽爲五音合諸變宮變徵則爲七音今之樂猶古之樂何以樂部所奏樂章僅以五六工尺上等字爲音而問之宮商角徵羽則茫然不知爲何事近偶閱張照所奏論樂劄子辨晰頗詳其所謂五六工尺上卽宮商角徵羽甚合古意因復取律呂正義再加參覈本屬相合因思今之五六工尺上古之宮商角徵羽名雖異而實則同聲音之道原欲避俗趨雅今反援雅而歸於俗甚非道也況 郊 廟樂章格 天歆 祖正朝御殿敷政臨民鐘

虞元音自應用古制爲節奏。今樂部所定樂章俱取便注工尺揆之名義殊乖莊雅。但相沿已久。若猝令樂工等改習宮商角徵羽。則心手俱所未嫻。其勢亦有所難。朕意俗用工尺與宮商角徵羽。變宮變徵字樣。皆令兼之。則不但郊廟朝廷倍彰莊雅。而以此潛移默化。漸復古音。未始非返樸還淳之一道。再古樂中琴瑟與金石並重。近來樂部奏樂。琴或閒能操縵。而瑟則竟屬虛陳。卽業儒之人。雖偶有學琴者。已非古調。至於瑟。則未有能鼓者。是瑟之爲道久已失傳。夫八音迭奏。琴瑟相宣。豈容偏廢。向來樂部奏樂。俱因笙笛聲壯。琴瑟聲細。爲其所掩。絲不如竹。古已有其語。是以樂工等罕有嫻習者。殊非八音咸備之意。從前勵宗萬爲太常

寺少卿時寺丞張樂盛編輯 壇 廟樂章勵宗萬爲之作序維
時已有律呂正義一書而張樂盛所編書內樂章並不依照兼注
宮商輒專注工尺勵宗萬又不爲定正所謂不學無術不可與言
樂亦安能窺律呂正義之博洽賅備耶然律呂正義一書卷帙既
繁剖析又極精微樂工未易領會德保係禮部尙書太常寺樂部
皆所總理莊存與則禮部侍郎而兼管樂部著德保莊存與向武
英殿咨取律呂正義刻本一部將律呂正義書內每字下駢注宮
商角徵羽及五六工尺上字據著摘出令樂工按書演習精熟並
著將琴瑟二樂飭令樂舞生一體用心嫻習蓋黃鐘爲萬事根本
五音十二律還相爲宮而所謂三分損一隔八相生之說其義原

可貫乎今之工尺蓋黃鐘生大呂至半大呂而又生黃鐘夫黃鐘宮也以宮商角徵羽變宮變徵之位言之則爲七以其相生之數言之則爲九此隔八之說所由來也如歲時有八節遞嬗而歲時成矣今之五六工尺上四合合字音之終也而卽以生五生生不窮自爲循環所謂貞下起元聲音之道與政通也著德保莊存與悉心講求檢閱於律呂正義一書取要節繁輯爲簡要一編會同軍機大臣酌定繕寫進呈刊發再律呂正義中原有御製補笙詩六首駢注工尺宮商字樣著一併入編頒發學宮肄習以示作樂崇德協律同和之至意五十一年十一月 命紫禁城騎馬十二月 諭曰朕披閱朱載堉樂律全書所論音律算法稱引繁賾但

其中較律呂正義一書疏漏歧誤之處正復不少蓋樂律算法義本相通必須講求貫串以期畫一卽如樂律以黃鐘爲本而尺度之長短視黍黍爲準但黍有縱橫亦有大小顆粒若用縱黍則較長若用橫黍則較短其大小顆粒亦如之原難定以爲準也是書橫黍百粒當縱黍八十一粒之說尙爲牽強又書中所載樂譜內填注五六工尺上等字並未兼注宮商角徵羽字樣未免援古入俗自應做照律呂正義逐細添注方爲賅備蓋古樂皆主一字一音如關關雎鳩文王在上等詩詠歌時自應以一字一音庶合聲依永律和聲之義若如朱載堉所注歌詩章譜每一字下輒用五六工等字試以五音分注未免一字下而有數音是將援雅正而

入於繁靡也卽以琴瑟而論上古操縵亦係一字一音後世古樂失傳而製譜者多用鉤擘埤拂等法以悅聽者之耳遂使一字而有數音幾與時曲俗劇相似更失古人審音知樂能使人聲入心通之意且如殿陛所奏中和韶樂從前未免沿明季陋習多有一字而曼引數音者聽之殊與俗樂相近經朕特加釐正俾一字各還一音目今朝會大典鐘虞鏗鎡備極莊雅業經載入律呂正義彰彰可考不可融洽貫通乎著交管理樂部算法館之皇六子及德保鄒奕孝喜常會同精覈朱載堉所載此書分門別類務將樂律全書較律呂正義疏漏歧誤之處分別各條公同詳晰訂證如書中凡例體裁逐加詳評載於從要之後以垂永久以昭釐定

五十三年八月充順天鄉試正考官五十四年正月諭曰朕於元旦臨御太和殿受賀見東邊第三四班內有越至甬道上行禮者本日據鴻臚寺堂官奏請將排班之引贊官阿勒精阿交部議處並自請交部而糾儀之御史百慶范衷參摺內則稱係蒙古台吉等行禮錯誤請敕交理藩院查明議處等語朝賀大典鴻臚寺設有引贊官員御史復有糾儀之責理應敬謹排定以肅朝班乃行禮各官內竟至有越上甬道者該管官員所司何事而御史百慶等尙復覩顏委之蒙古台吉等以卸其不能稽察之咎尤屬非是百慶范衷阿勒精阿俱著革職尙書德保係管理鴻臚寺大臣咎實難辭著革去翎頂其餘鴻臚寺堂官俱著交部嚴加議處是

月卒 諭曰德保因元旦朝賀官員行禮越至甬道未能先事督飭是以革去翎頂但念其宣力年久茲聞溘逝著加恩賞還翎頂嘉慶四年五月 諭曰禮部尙書德保在上書房行走有年學問優長著加恩追諡並 予祭一壇 諭祭文有如松柏之後凋藹如春日無蔦蘿之冑施介比秋霜碑文有茫乎莫知其岸度本懷清狷者有所不爲操惟履正之句蓋褒其實也 賜諡文莊子英和見官協辦大學士戶部尙書孫奎照見官刑部右侍郎奎耀見官通政使司通政使

右 國史館本傳

德保與其從兄觀保並以乾隆丁巳進士入翰林又均以文章受

知遇屢典貢舉爲詞林耆舊迄今館閣舊臣尙多二人門下士云
右八旗通志張維屏錄

德保氏索綽絡字仲容一字潤亭號定圃又號龐村滿洲正白旗
人乾隆丁巳進士官至禮部尙書嘉慶初年 賜諡文莊有樂賢
堂詩文鈔

右傳略吳修撰

索綽絡氏文莊公德保任翰林學士僅九日晉內閣學士後其子
相國英和任詹事亦僅十日晉閣學相國嘗語人以爲 國恩家
慶亙古希邁也

右紀聞陳康祺撰

王會汾

王會汾字蓀服江蘇無錫人乾隆二年進士改庶吉士歷官吏部侍郎終大理寺卿會汾少刻苦下帷雅負文譽雍正十三年舉博學鴻詞報罷泊入翰林 御試翰林等官拔第一擢侍讀學士不數年洊歷卿貳立朝審察於時事多所陳奏退而自焚其橐兩主浙江鄉試所取多名宿官侍郎時遇京察嘗舉天台齊召南自代其歿也家甚貧人皆重其清望而惜其設施未竟焉

右傳秦瀛撰

按王公一字晉川

